

डुग्गर दे सांस्कृतिक ते धार्मिक थाहर

सुनीता भड़वाल

प्रकाशक

***Duggar De Sanskritik
Te Dharmak Thahr***

by

Sunita Bhadwal

प्रतियां

200 कापियां

*

प्रकाशन ब'रा

2018

*

© लेखका

सुनीता भड़वाल

*

मुद्रक

क्लासिक प्रिंटर्ज
बड़ी ब्राह्मणां, जम्मू

*

मुल्ल

200

भूमिका

इस प्रोजेक्ट च डुग्गर प्रदेश दे प्रसिद्ध मंदरें बारै गल्ल
कीती गेदी ऐ जेहड़े एतिहासिक ते सांस्कृतिक दृश्ट
कनै खास थाहर रक्खदे न तां जे अनदिकखी दे
चलदे लुप्त हुंदी इंदी म्हत्ता बारै सभ्भनें गी जानकारी
दित्ती जा जे डुग्गर संस्कृति च इंदा केह् थाहर ऐ।

विशे सूची

| | | |
|-----|---|---------|
| 1.0 | पैहला ध्याऽ : संस्कृति ते डुग्गर संस्कृति | 7-17 |
| 1.1 | संस्कृति | |
| 1.2 | डुग्गर | |
| 1.3 | डुग्गर संस्कृति | |
| 2.0 | दूआ ध्याऽ : जिला जम्मू दे धार्मिक ते सांस्कृतिक थाहर | 18-117 |
| 2.1 | जिला जम्मू दे मंदर | |
| 2.2 | जिला जम्मू दे थढ़े ते थान | |
| 2.3 | जिला जम्मू दियां देहरियां | |
| 3.0 | त्रीआ ध्याऽ : जिला कटुआ दे धार्मिक ते सांस्कृतिक थाहर | 182-245 |
| 3.1 | जिला कटुआ दे मंदर | |
| 3.2 | जिला कटुआ दे थढ़े ते थान | |
| 3.3 | जिला कटुआ दियां देहरियां | |
| 4.0 | चौथा ध्याऽ : जिला सांबा दे धार्मिक ते सांस्कृतिक थाहर | 246-279 |
| 4.1 | जिला सांबा दे मंदर | |
| 4.2 | जिला सांबा दे थढ़े ते थान | |
| 4.3 | जिला सांबा दियां देहरियां | |
| 5.0 | पंजमां ध्याऽ : जिला उधमपुर दे धार्मिक ते सांस्कृतिक थाहर | 280-309 |
| 5.1 | जिला उधमपुर दे मंदर | |
| 5.2 | जिला उधमपुर दे थान ते थढ़े | |
| 5.3 | जिला उधमपुर दियां देहरियां | |

| | | |
|------|---|---------|
| 6.0 | छेमां ध्याऽ : जिला रियासी दे धार्मक ते सांस्कृतिक थाहर | 310-315 |
| 6.1 | जिला रियासी दे मंदर | |
| 6.2 | जिला रियासी दे थान ते थढ़े | |
| 6.3 | जिला रियासी दियां देहरियां | |
| 7.0 | सतमां ध्याऽ : जिला रामबन दे धार्मक ते सांस्कृतिक थाहर | 316-331 |
| 7.1 | जिला रामबन दे मंदर | |
| 7.2 | जिला रामबन दे थान ते थढ़े | |
| 7.3 | रामबन दियां देहरियां | |
| 8.0 | अठमां ध्याऽ : जिला डोडा दे धार्मक सांस्कृतिक थाहर | 332-355 |
| 8.1 | जिला डोडा दे मंदर | |
| 8.2 | जिला डोडा दे थान ते थढ़े | |
| 8.3 | जिला डोडा दियां देहरियां | |
| 9.0 | नौमां ध्याऽ : जिला किशतवाड़ दे धार्मक ते सांस्कृतिक थाहर | 356-373 |
| 9.1 | जिला दे मंदर | |
| 9.2 | जिला दे थान ते थढ़े | |
| 9.3 | जिला दियां देहरियां | |
| 10.0 | दसमां ध्याऽ : जिला राजौरी दे धार्मक ते सांस्कृतिक थाहर | 356-373 |
| 10.1 | जिला राजौरी दे मंदर | |
| 10.2 | जिला राजौरी दे थान ते थढ़े | |
| 10.3 | जिला राजौरी दियां देहरियां | |
| 11.0 | जिला पुंछ दे धार्मक ते सांस्कृतिक थाहर | 375-384 |
| 11.1 | जिला पुंछ दे मंदर | |
| 11.2 | जिला पुंछ दे थान ते थढ़े | |
| 11.3 | जिला पुंछ दियां देहरियां | |

संस्कृति ते डुगगर संस्कृति

1.1 संस्कृति

संस्कृति बारे गल्ल करदे होई विद्वानें दे बक्ख-बक्ख मत न। किश विद्वानें दा मनना ऐ जे सारा सीखे दा व्यवहार जेहड़ा माहनू बरतदा ऐ उयै संस्कृति ऐ। भारती ऋषि-मुनियें माहनू जीवन गी चऊं हिस्से च बंडे दा ऐ। धर्म अर्थ काम ते मोक्ष। अज्ज अस संस्कृति शब्द गी इनें चौंने च बंडोए दा प्रतक्ख दिक्खने आं। भारती संस्कृति च म्हेशां थमां मन्नेया जंदा रेहा ऐ जे जेहड़ा माहनू समाज धर्म गी छोड़ी दिंदा ऐ उसदा संस्कृति कन्नै कोई मेल नेई रौंहदा।

संस्कृति शब्द सम् उपसर्ग कन्नै जुड़ी दी कृ धातु थमां बने दा ऐ। सुत दा आगम सजावट दे अर्थ च होए दा ऐ ते वित्तन प्रत्यय जोड़ियै एह संज्ञा शब्द बनाई लैता गेदा ऐ। संस्कृत दा अर्थ ऐ बनाना सुआरना।

संस्कृति नां ऐ संस्कारे दे अनुवर्तन ऐ। संस्कृति तजरबे ते सिखलाई कन्नै सिद्धे तौरा पर सरबन्धत ऐ। सभ्यता ते संस्कृति मझाटै फर्क गी साफ करदे होई मानक हिन्दी कोश च लिखेया गेदा ऐ सभ्यता मानव समाज की बाह्य ते भौतिक सिद्धियों दी मापक ऐ ते संस्कृति लोकें दे आतरिक ते मानसिक उन्नति दी परिचायक होंदी ऐ इसकरी सभ्यता समाजगत ते संस्कृति मनोगत होंदी ऐ।

०००

1.2 डुग्गर

सांस्कृतिक दृष्टी च डुग्गर प्रदेश भारत दे उत्तर च प्हाडी लाका ऐ जिस च रियासत जम्मू कश्मीर पंजाब दा होशियारपुर ते गुरदासपुर, हिमाचल दे कांगड़ा चम्बा मंडी, बिलासपुर ते हमीरपुर ते पाकिस्तान दा सियालकोट ते जफरवाल तसील दे इक सौ सौलां ग्रां ओंदे हे। भारत दी बंड होने परैन्त हून सिर्फ जम्मू गै डुग्गर दा पर्यायवाची ऐ। विश्व मानचित्र च जम्मू भूमध्य रेखा थमां बत्ती थमां चौंती अंश उतर थमां ते मध्याहन रेखा थमां तैहतर अंश पूर्व थमां छैहतर अंश पूर्व दे बश्कार विराजमान ऐ। एह लाका त्रुं हिस्से च बंडोए दा ऐ जिस च प्हाड़ मदान ते कंदी लाका ऐ।

इत्थं दे मौसम बारै गल्ल कीती जा तां इत्थें गर्मीयें च गर्मी ते सर्दियें च सर्दी 10° थमां 15° सैलसियस तगर हुंदी ऐ। इत्थें बरखा करीब 12 सेंटीमीटर दे लगभग बरे भरा च हुंदी ऐ। भूगर्भ शास्त्रियें दी मनचे तां डुग्गर प्रदेश अति प्राचीन ऐ। डुग्गर दे चन्द्रभागा नदी दे कंठे आदि हड़प्पा ते हड़प्पा संस्कृति दे अवशेष बी लब्धे दे न। नागें दी भांति गै इत्थें यक्ष ते पिशाच आदि जातियां बी इत्थें बास करदियां हियां। इतिहास दे हवाले ने दिखचै तां खस जाति दी चर्चा सब्भने थमां बद्ध होई दी ऐ। खस लोकें गी गै डुग्गर दे मूल निवासी मन्नेया जंदा ऐ। किराट जाति बी इत्थें रौहदी ही।

०००

1.3 डुग्गर संस्कृति

डुग्गर संस्कृति च भांत-सभांते रंगें दे केई फुल्ल न जेह्दे अपनी खशबो कन्नै इसगी सगोसार करदे न। इत्थूं दी संस्कृति दी आत्मा भामें इक्क गै ऐ पर भूगोलक धार्मिक, इतिहासक, राजनैतिक ते समाजक परिस्थितियें कारण इस च रौहने आहलें लोकें दे खानपीन, रैहन-सैहन ते रीति रवाजें च मता फर्क आई जंदा ऐ। डुग्गर प्रदेश त्रऊं हिस्से च बंडोए दा ऐ फ्हाड़ी, मदानी ते कढी। इत्थूं दे मौसमे च बी आपूं च मता फर्क ऐ जिसकरी लोकें दा खानपीन, रैहन-सैहन, लाबा लबास किश बक्खरा होई जंदा ऐ।

इत्थूं दी संस्कृति दा गै चमत्कार ऐ जे इत्थें नेकां हमले होए, वदेशी संस्कृति लेई लोक इत्थें आई बस्से उनें अपना किश प्रभाव बी इत्थें छोड़ेया पर साढ़ी संस्कृति दी मूल भावना दा अनन्त प्रभाव अपने उस्सै रूप च रेहा। ते इत्थूं दी संस्कृति च असेंगी वैदक संस्कृति दी आत्मा दा रूप गै झांकदा लभदा ऐ। इत्थूं दे लोक केई धर्म ते विश्वासें गी मन्नने आहले न। हिन्दू, मुसलमान, सिक्ख सब्भै धर्म दे बंधने थमां मुक्त होई रली मिली इत्थें बसदे न ते इक दुयै दे सुख दुख दे भ्याल न। इत्थूं दे मते लोक करसानी करदे न ते फौजा च नौकर होई देसा दी सेवा करदे न।

धार्मिक प्रवृति दे होने करी इत्थूं दे लोक पुराणक देवते दे कन्नै-कन्नै डुग्गर दे केई वीर बलदानी, सैंत महात्मा, पीर, सतियां आदि गी बी खेतरें दा थाहर देई उंदी पुजा करदे न। तां गै इत्थूं दे हर ग्रां च कोई ना कोई देहरा, देहरी समाध जा थान परतक्ख रूप च लब्धी जंदा ऐ। इत्थूं दे मेले, त्यहार नत वर्त, ब्याह राह रीतां आदि सब्भने दे सांझे न ते सब्भै लोक इक दुयै दे धर्म दा आदर करी रली-मिली रौहदे न इयै डुग्गर संस्कृति दी टकोह्दी पंछान ऐ।

०००

देवस्थान

देव शब्द दा अर्थ ऐ :- रोशनी देने आहला। ओह देवता जिनें अपने कुले दी खातर अपना आप तगर बलिदान करी दित्ते दा होए। उंदे बलिदान दे परैत सारा कुल किट्ठा होईयै उनेंगी देवता आंहगर पूजदा ऐ ते घरै च होने आहले हर शुभ कम्म जां दिनें तेआरें गी उनेंगी चेचे तौर पर चैता कीता जंदा ऐ। बरे च इक जां दो बारी इनेंगी पूरी बरादरी किट्ठी होई इंदे नां दा यज्ञ ते भंडारा आदि करी इनेंगी चैता कीता जंदा ऐ। देवस्थान शब्द थमां थान शब्द बनेआ। इनें बलिदानी देवतायें गी शहीद देवता करी बी कुआलेआ जंदा ऐ। लोके दा इंदे पर अनत्रुट्ट विश्वास होंदा ऐ जे एह देवता अपनी शरण च अपने कुल गी सुरक्षा दिंदे न। भामें गल्ल पैहे दी होए, सेहत दी जां खेतीबाड़ी डंगर बच्छू इनें देवतायें गी सब्भनें दा रक्षक मनेया जंदा ऐ। इससै करी लोक घरै च जां फी कुसा खुले थाहर इंदा स्थान बनाई इनेंगी म्हेशां पूजदे न। लोक देवता दा थान भामें सारा ग्रां अपना मनदा ऐ पर इयै कुसा खास कुला दा कुल देवता बी होंदा ऐ। इयां गै नाग देवता बी मती सारी जातियें दे डुग्गर प्रदेश च कुल देवता बी एह न। राजा मंडलीक, कालीवीर ते नरसिंह आदि बी डुग्गर दी केई जातियें दे कुल देवता न। लोके दा मनना ऐ जेकर एह देवता अपना मान-सम्मान जां अनादर होंदा दिक्खन तां एह रूष्ट होई जंदे न ते दंड बी दिंदे न।

श्री ओम गोस्वामी हुंदे मताबक कुल देवता दा प्रतिष्ठान करने दे किश कारण इयां न। परोआर दा बाद्धा, धन ते फसल दी रक्षा, डंगरें दी सेहत ते रक्षा लेई, धन दी तंगी नेई होने करी, घरै पर आए दे संकट गी टालने गितै। डुग्गर समाज च एह धारणा बड़ी पक्की ऐ जे कुल देवता समस्त आदि दे रक्षक हुंदे न।

०००

डुग्गर ते शिलाबैतियां

डुग्गर च शिलाबैतिये दे पछोकड़ ते परम्परा दा सुआल ऐ। उसदे बारे एह आक्खना गैर बाजब नेई जे डुग्गर दी संस्कृति दी सीर भारती संस्कृति चा गै बगी दी ऐ ते इत्थूं दा नारी जीवन अपने आपे च इक मसाल रेहा ऐ। एह नारियां सत चरित्र, शीलवती, पतिव्रता गै नेई सगुआं दया, करूणा ते तप त्याग दी मूर्त न। जिनें नां सिर्फ अपने चरित्र जा पतिव्रता दी खातर गै बलिदान दित्ते न सुगुआं दया ते करूणा दा रूप धारियै दुएं दे हित, समाजी भलाई, न्यापूर्ण व्यवहार ते बुनियादी अधिकारें दी रक्खेया लेई बी प्राणे दी आहुति दित्ती। एह चेता कराने आली गल्ल ऐ जे डुग्गर दी नारी सिर्फ पति कनै गै सती नेई होई बल्के भ्रा, पिता ते पुत्तर आदि कनै बी इसदे सती होने दियां आम मसाला मिलदियां न।

डुग्गर प्रदेश च सती प्रथा कदूं शुरू होई, इत्थें जेकर एह गल्ल मन्नी लैती जा जे डुग्गर प्रदेश दा सरबन्ध राजस्थान कनै रेहा ऐ तां एह प्रथा राजस्थान च गै इत्थें आई होग। की जे मते इतिहासकार इस गल्ला दी हामी भरदे न जे डोगरे दा सरबन्ध राजस्थान कनै ऐ।

राजा अग्निगर्भ दे परिवार समेत इत्थें आनी बस्सने दी जुगती गी जेकर अधार मन्नी लैता जा तां डुग्गर प्रदेश च एह प्रथा राजा अग्निगर्भ कनै गै इत्थे आई होग। पर इस थमां पैहले बस्सने आहली जाति बी एह प्रथा रे'ई जां नेई इस बारै कोई स्पष्ट प्रमाण नेई मिलदा।

डुग्गर प्रदेश सती-सजैवतियें ते दाती शिलाबैतियें दियें देहरियें-समाधियें दा पवित्र थाहर ऐ। पर शिलाबैतियें दी एह परम्परा इतिहासक तौर पर किन्नी प्राचीन ऐ इस बारै कोई ठोस प्रमाण उपलब्ध नेई होंदे। उ'आ बक्ख-बक्ख कुल परिवारें ते जातियें दे लोक अपनी-अपनी शिलाबैती गी अत प्राचीन गलांदे

न। किश लोक 1800 बरै पराना दसदे न ते किश 1100 बरै। उ'आं मगोत्रा ब्रह्मण जाति दा दावा ऐ जे उंदी शिलाबैती दा सती काल 600 बरै पराना ऐ। आर्क्यालोजी दे माहिरे थमां अपनी देहरी पर लग्गे दे मिट्टी-मसाले दी जांच इस बरादरी ने करोआई ता एह 600 बरै पराना पाया गया।

डुग्गर च सती होने दा पैहला सबूत असेंगी इत्थूं दे लोक साहित्य चा मिलदा ऐ। बाबा जित्तो दी कारक च बाबा जित्तो दी धीऽ बुआ कौडी दे बापू दी लाशै कन्ने सती होने दा वर्णन बडा स्पष्ट ऐ। इसदी इतिहासक प्राचीनता बारै प्रो० राम नाथ शास्त्री हुन्दा गलाना ऐ जे एह घटना बिक्रमी सं-1515 दी ऐ।

जित्थू तगर जौहर दी प्रथा दा सरबन्ध ऐ डुग्गर दे इतिहास च इस चाल्ली दी प्रथा दा जिक्र नेई मिलदा। पर राजा सुचेत सिंह दे शहीद होने पर साम्बा ते रामनगर च सुचेत सिंह दिये रानिये ते किश गोल्लिये दे सती होने दा जिक्र नरसिंह दास “नर्गिस” हुन्दी पोथी गुलाब सिंह जम्मू कश्मीर राज्य दा इतिहास 1776-1856 ई० च इयां मिलदा ऐ।

राजा सुचेत की मौत की खबर जब साम्बा पहुंची तो महलों में तीन रानियां और बतीस बांदियां बाहिर निकल आईं। खजाना दान के रूप में लुटा दिया गया। उन्होंने हार शृंगार किया और परदे में रहने वाली देवियां जिन्हें कभी सूर्य और चांद की किरणें भी देख न सकी थीं, जिनकी सुन्दरता और कोमल स्वभाव पर देवलोक की अप्सराएं भी स्पर्धा करती थीं, सती होने के लिए खुले मुंह डोलियों में बैठकर साम्बा के नीचे बसन्तर नदी के किनारे हजारों लोगों के साथ चल पड़ी जहां कि उन सब के लिए चिताएं तैयार थीं। रानियां और बांदियां जब चिताओं पर बैठ गईं तो लोगों ने उनके सामने सिर झुकाया”।

ते इसदे दुए रोज रामनगर च बी राजा सुचेत सिंह दियां दो रानियां ते 30 गोल्लियां सती होईयां। इत्थे गै नरसिंह होर लिखदे न।

“शायद भारत भर में सती की यह आखिरी रसम थी जो कि रामनगर में राजा सुचेत सिंह की इन बीर रानियों के महान बलिदान पर खत्म हुई”।

पर भारत गी ते छोडो, जेकर अस दुग्गर दी गै गल्ल करचै तां सुचेत सिंह दी रानियें ते गोल्लियें दे सती होने परैन्त बी दुग्गर च सन 1852 च ग्रां गुढा सलाथियां दे सिपाही इन्द्र सिंह दे गिलीगित शहीद होने पर उंदी धर्म पत्नी सती होई दियां न। जेह्दे जिक्र गुढा सलाथियां ग्रां च लग्गी दी शहीद पट्टी पर होऐ दा ऐ। इसदे परैन्त महाराजा रणवीर सिंह उंदे शासन च सती होने दी बी संकेत मिलदे न। मास्टर श्री मोहन लाल उन्दे मुजब इंदी शिलैबैंती महाराजा रणवीर सिंह होन्दे शासन काल च सती होई ही। सती दे पति दा नां मौहर सिंह हा ते उन्दे लोहके भ्रा दा नां प्रभू हा ते ओह महाराजा रणवीर सिंह राज दरबार च बाह्वें थाहरे दा तवीलदार हा। इस गल्ल दा प्रमाण मास्टर श्री मोहन लाल हुन्दे कोल इन्दे खानदान महाजन बरादरी दी बैशावली च दर्ज ऐ ते होई सकदा ऐ जे इसदे परैन्त होर बी स्त्रियां दुग्गर च सती होइयां होडन।

इत्थें एह तत्थ देना बी जरूरी ऐ जे भारत च 1947 दे परैन्त राजस्थान च 28 होर सातियें दे India Today सकेत दे अंक अक्टूबर-1987 च मिलदे न।

पर दुग्गर च 1947 दे बाद ऐसा कोई प्रमाण नेई मिलदा। अर्थात दुग्गर प्रदेश च सती दे पछोकड़ बारे च इयै गलाया जाई सकदा ऐ जे भारती संस्कृति दा प्रभाव ते दुग्गर दियें सतबैंतियें नारें पर जमादरू गै हा ते इसदे इलावा किश प्रादेशिक कारण बी आनी रले होडन, जिस करी एह प्रथा इत्थें अपनियां जड़ां फलाई गई होग। जित्थु तगर इसदी परम्परा दा सरबन्ध ऐ तां इयै आक्खेआ जाई सकदा ऐ राजपूत काल थमां गै एह प्रथा इत्थें प्रचलत होई होग। ते इनें शिलाबैंतिये दी पूजा दा वधान बी उन्ना गै पराना ऐ जिन्ना इंदे सती होने दी परम्परा दा बधान। दुग्गर समाज दी शिलाबैंतिये परती डूहगी आस्था होने कारण इत्थूं दे जन-जीवन च शिलाबैंतियें दी बड़ी महत्ता ते मानता ऐ। पर्वे-ध्यारे दे इलावा रोजाना जीवन च बी एह जनमानस अपनी-अपनी शिलाबैंतियें अग्गे हाजर होइयै सिर नुआंदे ते सीस लैंदे न। मन्दरें भाएं रोजाना जाई सकन जा नेई पर अपनी दातियें दा सिमरन घर बैठे बी करी लैंदे न। शिलाबैंतियें परती लोकें दी डर-भावना समझो जा शरधा भाव जे कोई बी सुख कारज होऐ तां लोक उसगी इंदे दित्ते दा मनदे न, ते जे कोई करोपी जां माडी गल्ल होई जा तां बी सोचदे न जे उंदे थमां कोई भुल्ल-खुन्झ होई गई होनी ऐ, जिस

कारण उनेंगी दुख दिक्खना पवा करदा ऐ। ते पही इंदी महत्ता गी मनदे होई नक्क रगड़ी-रगड़ी क्रोपी दूर करोआने दे उपाऽ तुपदे न। डुग्गर जन जीवन च इदी महत्ता इन्नी रची-पची गेदी ऐ जे लोक अपनी धन-दोलत, कुल-परिवार जीआ-जैन्त सब किश इंदी गै दौलत मनदे न। डुग्गर दे कुलदेवतें ते शिलाबैतियें दी महत्ता ते मानता बारै गल्ल कत्थ करदे होई डॉ० वीणा गुप्ता होर “डुग्गर दा संस्कृतक इतिहास” च अपने लेख “डुग्गर दे धर्म दर्शन ते विश्वास” च लिखदियां न? “छड़ा कलोकाल च बुआ भागां, मढ ब्लाक च साहरणा नां दे ग्रां च बुआ सजावती, गजनसूह कश अमरो, दाती लाडो ते बुआ मक्खां आदि डुग्गर दी सतबैती नारियें दी सम्हाले च पवित्तर स्थान (देहरियां) बने दे न, जिनें कुसै पवित्तर उद्देश्य लेई, कटारे खाइयै अपनी कीमती प्राणें दे बलिदान दित्ते जां जीन्दे-जी सत्ती होने दे प्राण गी गलै लाया। इनै स'ब्बनें कुलदेवते ते सजैवतियें कनै सरबन्ध रक्खने आले डुग्गरवासी अपनी-अपनी रीत-परम्परा मताबक, निश्चत होए दे पवित्तर ध्याडें पर इनें देवस्थानों पर किट्ठे होंदे न ते अपने-अपने देवते गी श्रद्धा दे फुल्ल अर्पत करियै सीस नुआंदे न। होर ते होर ब्याहें ढंगें जा होर दुए शुभकारजे गी रम्भने पर बी सारें-शा पैहले अपने कुलदेवता जां सजैवती गी सम्हालदे न।

रोजमर्रा दी दिनचर्या दे इलावा जिनें खास-खास मौके उप्पर डुग्गर जन-जीवन च शिलाबैतियें दी मानता दे टकोहदे प्रमाण लब्भदे न, उंदा ब्यौरा इस चाल्ली ऐ :-

- क) कुसै बी शुभ कम्मैं गी रम्भनें बेल्लै अपने-अपने बावे (कुल देवते) जा दाती (शिलाबैती) दा सिमरन ते मनौती सारें शा पैहली रीत समझी जन्दी ऐ।
- ख) फसल पकने दे मौके बी पैहला चढावा शिलाबैती अगें चढाया जंदा ऐ।
- ग) फसलै लेई लोडचदी बरखा नेई होने पर बी शिलाबैती दी शरण लैती जंदी ऐ, ते यज्ञ बगौरा करियै बरखा ब'रने दी प्रार्थना कीती जंदी ऐ।
- घ) घरा च नमां तंधोआला होने पर पैहलें शिलाबैती दे स्थान पर चढाव दे तौर पर चढाया जंदा ऐ ते मानता कीती जंदी ऐ।

- ड) घरा च नमां जीव (खास करियै जागत) होने पर बी सुच्चै होइयै चढावे दे तौर पर चढाया जंदा ऐ ते मानता कीती जंदी ऐ।
- च) ब्याह परैन्त लाडी ते म्हाराजा ब्याहनू जीवन गी सफल बनाने आस्तै इनें शिलाबैतिये दी देहरी पर ते जेकर देहरी दूर होए ता घर बैरी दी डाहली गड्डिये ते इनेंगी प्रतीक मन्निये सुच्चे मुंह (लाडी दे बीती बौहने शा पैहलें) रकैधे फिरने दी रस्म पूरी करदे न ते इंदे थमां आशीर्वाद प्राप्त करदे न।
- छ) ब्याह शुरू होने शा पैहले सांती दे जज्ञ च सभनें शा पैहले इन्दे नां दा मण्डला रखेआ जंदा ऐ।
- ज) शरीरक रोग जियां फौडे-फिम्मनियां, खारश, चम्बल आदि होने पर बी इन्दे सुक्खन कीतियां जंदियां न ते रोग दूर होने पर मानता कीती जंदी ऐ।
- झ) कुल परोआर दी बेल बधने-फुल्लने आस्तै बी इंदे सुक्खना सरीनियां कीतियां जंदियां न।
- ञ) इंदी म्हता दा खास दिन इंदियें देहरियें पर लग्गने आली “मेल” आला दिन गै होंदा ऐ। शिलाबैतिये दी मानता दा एह इक स्थायी तत्व ऐ। इस दिन लोक ज्हार क्रोहे परा बी इंदे स्थान पर पुज्जने दी कोशिश गै नेई करदे बल्के पुज्जियै अपनी शरधा, अपना प्रेम ते तन-मन-धन कन्नै सहयोग देइयै यज्ञ गी सफल बनांदे न ते अपनी जीवन च इंदी म्हत्ता दा सबूत दिंदे न।
- ट) मेल आले रोज जगै च बने दा परशाद, भाएं किन्ना थ्होड़ा बी की नेई होए पर एह विश्वास बने दा ऐ जे च बड़ी बरगत होंदी ऐ ते सभने आसेआ चक्खने परैन्त बी कदें मुकदा नई।
- ठ) इनें शिलाबैतिये दी मानता दे बारे च आधुनिक समाज च जागरूकता बधदी जा करदी ऐ। इस च लोकें दी शरधा-आस्था समझो जा इन्दे आर्थिक हालत दा बेहतर होना-इनें शिलाबैतिये दियें देहरियें गी मतियें हारियें थाहरें खासे बडडे-बडडे मन्दरे दे रूपा च विकसत

कीता गेदा ऐ ते कीता जा बी करदा ऐ। मन्दरे दे इलावा मतियें थहारें भवन ते पक्के दलान बी बनाए गेदे न। जेहड़े दूरा दा औने आले यात्रुएं गी सुख-सुविधा प्रदान करदे न। पक्के दलान बनाने दियां योजना इंदे लग्गने आली मेल आले रोज बनाइयां जंदियां न ते औने आले साल एह योजना पूरियां कित्तियां जंदियां न ते इस नेक कम्मै आस्तै बरादरी विशेष धन ते श्रमदान कन्नै अपना पूरा-पूरा सहयोग दिंदी ऐ।

- ड) इंदी महत्ता इन्नी गै नेई बल्के लोक अज्जकल ब्याहें दे कार्ड पर बी इंदा जयकारा “जय दाती दी” “जय शिलाबैती दी” लिखदे न ते सब्भनें शा पैहला नींदरे दा कार्ड इनें शिलाबैतियें दे नां दा लिखेआ जंदा ऐ? जां हत्थ लिखे या नींदरा बी रक्खेआ जंदा ऐ? ब्याह दे कार्ड कन्नै धुब्बा रक्खियै इनेंगी ब्याह औने दा साद्दा दित्ता जंदा ऐ।

4. मेल नां दे आयोजन च शिलाबैतियें दी मानता दा विधान

मेल : हर बरादरी अपनियें-अपनियें शिलाबैतियें दे स्थाने उप्पर निश्चत ध्याडे पर किट्टे होइयै यज्ञ हवन करियै शिलाबैती दी मानता करदी ऐ जां उस खास कुल दे लोकें दे किट्टे होने गी मेल आक्खेआ जंदा ऐ। इस ध्याडै हर घरा दे अब्बल ते सारे जी इस च शामिल होंदे न, पर जेकर कुसा कारण वंश सारे नेई जाई सकदे होन तां घरा दे इक बसनीके दा जाना लाजमी समझेआ जंदा ऐ। मेल दी तेआरी इक दो रोज पैहलें गै शुरू होई जंदी ऐ। हर घर अपनी थबीक मताबक मेल च होने आले यज्ञ-हवन आस्तै शरधापूर्वक योगदान दिन्दा ऐ ते केइये थाहरे एह निश्चत कीता गेदा होंदा ऐ जे घरा परती इन्ने पैसे जां चोल बगैरा भेट कीती जाग। इस मेल आले ध्याडै बनने आला भोजन ज्यादातर सादा भोजन गै होंदा ऐ, जेहदे च मिट्टे चौर, दाल-भत्ता, पूडी-कडाह, खिचड़ी बगैरा बनाया जंदा ऐ, पर केइये थाहरे अजें बी बकरे दी बलि दित्ती जंदी ऐ। जिया घमेआर जाति दी रक्खड पुन्नेआ आले रोज तहसील साम्बा दे ग्रां डुगोहड़ च होने आली मेल च सिर्फ जेठे पुत्तरे दे गै नेई, बल्के जिन्ने बी पुत्तर होन सारे दे बक्खो-बक्ख बक्करे दित्ते जंदे न ते मास दी तरकारी शिलाबैती दे स्थाने उप्पर गै बनाई जंदी ऐ। हर रक्खड पुन्नेआ गी इत्थे काफी

बक्करे दित्ते जंदे न। हर थाहर बनने आला भोजन पैहलें इनेंगी अर्पण कीता जंदा ऐ ते की कंजके गी भोग लगाया जंदा ऐ। आमतौरा पर एह मेल नमीं फसल दे औने उप्पर अर्थात चिढी दी पुन्नेआ ते हाड म्हीने दी पुन्नेआ गी लगदी ऐ। चिढी दी पुन्नेआ गी सभने दातियें दे थाहरे उप्पर खिचडी दा भोजन ते हाड म्हीने दी पुन्नेआ गी आमतौर पर पूडी ते कडाह बनदा ऐ। पर मतियां सारियां ऐसियां जातियां बी हैन जिंदी मेल इने ध्याडै नेई बल्के उत्तरायण, नागपैचमी, दसेहरे जा रक्खड पुन्नेआ गी लगदी ऐ।

इस रोज भुल्ली-खुन्झी दियां सब राह रीतां बी पूरिया कीतिया जदियां न। रकाधे फिरने थमां खुन्झे दे लोक इस रोज एहकी रम्म पूरी करदे न ते अपनी भुल्ल-कुत्थ दी माफी मंगदे न। इनें शिलाबैतियें दे हर थाहर योगी पच्याले ते नेई होन्दे पर जिंदे होन इस रोज उनेंगी जरूर सददेआ जंदा ऐ। इस रोज गै कम छटाये जंदे न। ते भुल्ल-कुत्थ दे उपाऽ बी योगियें शा पुच्छे जंदे न। इस रोज दी होने आली चढतल शिलाबैतियें द्वारा निर्धारत आदमी गी गै दित्ती जन्दी ऐ। इंदे च ज्यादातर योगी, कुल परोहत कंजका जां होर कोई बी होई सकदा ऐ। जियां ब्रैहमण जाति दी शकोत्रे बरादरी दी शिलाबैती नरोबाल बाला (ब्लाक पुरमण्डल) थाहरै पर ऐ ते मेल आले रोज इत्थे चढने आली सारी चढतल चनास टिक्करी भेजी जन्दी ऐ जेहड़ी शिलाबैती दे प्यौकिये दी ध्यानं च बण्डी जन्दी ऐ। दूरा दा औने आले इस ध्याडै गै अपनियां-अपनियां सुक्खन दिन्दे न। इस ध्याडै बी शनान कराइयै नमें शुआट ते झण्डे चाढे जंदे न। केइये थाहरें पर शिलाबैतियें दे मौहरे होने दे बावजूद बी सौंगला चढाइयां जदियां न। केइये थाहरें नमीं फसल दा किश हिस्सा जां खारके इस्सै रोज दित्ते जंदे न।

सतकाले दी हालती च मेल लग्गी सकदी ऐ पर मौहरे गी शनान कुल परोहत कशा जां कुसा होर कशा करोआया जंदा ऐ। पर मतकाले दी सूरत च मेल नेई लगदी।

मेल आले ध्याडै लोक दूरा-दूरा थमां बी अपने शिलाबैती दे स्थाने उप्पर औंदे न जियां दिल्ली, पंजाब, हरयाणा, राजस्थान, हिमाचल प्रदेश ते होर केई राज्ये नगरें चा बी लोक इत्थें आइयै शरधा कन्नै अपनिये शिलाबैतिये गी सम्हालदे न।

०००

दूआ ध्याऽ

जिला जम्मू दे धार्मिक ते सांस्कृतिक थाहर

जम्मू

जम्मू शैहर गी भांत सभांते फुल्लें दा गुलदस्ता गलाया जा तां कोई गलत नेई हौग। इत्थें केई धर्म दे लोक रलीमिली रौहदे न। इस शैहरा गी मंदरें आहला शैहर करी बी कुआलेया जंदा ऐ। जम्मू शैहर इक धर्म निरपेक्ष शैहर ऐ। इत्थें सब्भनें धर्म दे लोक रौहदे न। हिन्दू धर्म दे लोक मती गिनतरी च होने कारण इत्थें थाहर-थाहर मंदर नजरी औंदे न। इनें मंदरे च मते प्राचीन मंदर न ते नमें मंदरे दा निर्माण बी लगातार होआ करदा ऐ। इंदे च शिवमंदर, विष्णु मंदर ते मती गिनतरी च शक्ति मंदर न। जिनें मंदरे दी शैली नागर शैली ऐ इंदा निर्माण काल डोगरा राज सन 1822 ई० थमां 1925 ई० तगर दा रेहा ऐ। इस समें दरान जम्मू दा मती गिनतरी च नमें मंदर बने ते फी जम्मू दी पंछान मंदरें आहले शैहरा दे नां कन्नै होई गई। अज्ज बी इत्थें मते मंदर लगातार बना करदे न ते ज्हारें बद्धे भक्त जेहड़े माता वैष्णो दे दर्शनें गितै औंदे न इनें मंदरे गी दिक्खी बिजन प्रभावत होयै दे नेई रौहदे। जम्मू दा शलैपा ते लोकें दा औने आहले दे प्रति आदर मान इस मंदरें आहले शैहरा दी खासियत ऐ। जेहड़ा इक बारी इत्थें आवे और बार-बार इत्थें औना चांहदा ऐ जां फी इत्थूं दा गै होईयै रेही जंदा ऐ।

०००

2.1 श्री रघुनाथ मंदर-सुई

जम्मू थमां 22 किलोमीटर दूर दक्खन पश्चिम च इक शांत थाहरा पर एह मंदर ऐ। सुई ग्रां च इस मंदर पुज्जने गित्तै जम्मू थमां बस थ्होई जंदी ऐ। सुई दा एह मंदर जिस च भगवान राम, माता सीता लक्ष्मण ते हनुमान जी दियां अष्टधातु दियां मूर्तियां न। एह मंदर लगभग 200 बरै पैहलें महाराजा गुलाब सिंह ने रहानी गुरु बावा प्रेमदास जी दे आक्खने पर बनवाया हा जिं'दे आशीर्वाद कन्नै ओह पैहलें जम्मू दे ते पही जम्मू कश्मीर दे महाराजा बने।

आखदे न जे इक बारी महाराजा गुलाब सिंह बचपन च अपने कुसा रिश्तेदार दे घर सर्हूईसर ब्याह गेदे हे तां उंदी मलाटी बाबा प्रेमदास कन्नै होई जेह्दे अमरनाथ जातरा परैन्त झील दे कनारे धूनी लाई बैठे दे हे। गुलाब सिंह अपने हत्थें च गलेल लेई जंगल च पक्खरुएं गी नशाना बना करदे हे तां उ'नें उत्थें महात्मा होरें गी कुटिया च दिक्खेआ ते मलाटी गित्तै अंदर गे उठी। गलेल हत्थें च दिक्खी महात्मा होर बोल्ले इ'नें पक्खरुएं दा शकार कितकारी कोई बड्डा कम्म करने दी सोच, खानदान दा नांऽ रोशन कर। किश समें परैन्त महात्मा होर सूही आई गे। उत्थें गुलाब सिंह उ'नेंगी मिलन जंदे उंदी सेवा करदे। महात्मा हुंदी रुट्टी ते धूनी लेई जंगल थमां लक्कडियां बी चुनी आहनदे।

इक दिन गुलाब सिंह ऊंट पर समान लेई जम्मू थमां अखनूर जा'रदे हे तां उंदे मना च गुरु जी दे दर्शन करने दा मन कीता ते ओह रात गजारने लेई महात्मा जी कोल सुई आई गे। बड्डलै महात्मा होरें उ'नेंगी पैरे दी ठोकर कन्नै जगाया ते आक्खेआ इत्थें कीड समां नास करा करना जा अपने नगरै थमां बाहर ते किश कर, जंदू तगर तूं किश बनी नेई जागा तां मेरे कोल नेई आवेआं। उ'नें महात्मा हुंदे पैरे वंदे ते अखनूर जाने गित्तै चली पे।

गुलाब सिंह दे बर्जुग महाराजा रंजीत सिंह दे दरबार च उच्चे थाहरें पर हे इसकरी उ'नेंगी बी रंजीत सिंह दी फौजा च नौकरी थ्होई गई। रंजीत सिंह गुलाब सिंह दी ब्हादरी थमां इन्नें प्रभावित होए जे उ'नें 17 जून 1822 गी उ'नेंगी अपने हत्थें राजतिलक करी जम्मू दा राजा बनाई दित्ता। उ'नें अपना पैह्ला दरबार हरमन्दा दे थढ़े पर लाया। दरबार परैन्त बाकी करिन्दें गी जम्मू भेजी आपूं गुलाब सिंह सूही महात्मा हुंदे कोल आई गे ते उंदे पैर बंदने परैन्त बोल्ले गुरु जी बाहरे ब'रें तुंदे आशीर्वाद लेई आया। इक सधारण माहनू थमां में राजा बनी गेआ। हून मिगी हुक्म देओ में तुंदे लेई केह् सेवा करां। महात्मा बोल्ले मिगी साधु गी पैहे दा केह् लाह् जेकर किश करना ऐ तां मिगी इत्थें कुटिया दे थाहर मंदर बनवाई दे। तां जे भगवान भक्ति च मेरी अगली आयु बीतै। गुलाब सिंह ने गुरु आज्ञा दा पालन करदे होई इत्थें रघुनाथ जी दा मंदर किश पक्के घर बनवाए ते खेती लेई कन्नै लगदी जगह छोड़ी तां जे खेती बाड़ी होई सके ते साधुएं दे रौहने खाने-पीने दा बी प्रबंध कीता।

मंदर च जाने गितै दऊं मंजली ड्योढी ऐ ते दौनें पाससैं कमरे बने दे न। इक बगीचा ऐ ते साधुयें ते भक्तें लेई गोलघर बने दा ऐ। उ'आं ते मंदर होर मंदरें आंहगर गै ऐ पर इत्थूं दी चित्रकारी च चित्रकारें कमाल कीते दा ऐ। इ'नें अपना तगर कुतै नेई लिखे दा। एह् दिक्खी अंजान चेहरे साढ़े सामनै आई खड़ोंदे न। मंदर दे गर्वगृह दी कंधा पर महाराजा गुलाब सिंह दा चितर ते सज्जे पाससै बावा प्रेम दास जी दा चितर बने दा ऐ। परिक्रमा दे खब्बे पाससै कंधै पर फुलकारी, रामायण, महाभारत, गुरु गोविन्द, कृष्ण, जरासंद, राजा भरतरी हरि, गुरु गोरखनाथ ते गुरु नानक दे चितर बने दे न, बाला ते मरदाना कोल खलोते दे न। इक चितर नाग शैय्या पर विष्णु जी ते पैर दबांदी मां लक्ष्मी दा ऐ। कोल गै वीर हकीकत राय ते संत कबीर जी दे चितर न। इ'यां बंझोदा ऐ चितरकारें पूरा पराना इत्तेहास कंधें पर चित्तरी दित्ता दा होऐ। गर्वगृह च माता सीता, भगवान राम लक्ष्मण ते हनुमान जी दियां मूर्ता न, कोल गै पित्तलू दे पतरें पर महालक्ष्मी यंत्र ऐ जिसदी लोहड़ी देआली गी पूजा होंदी ऐ। दरवाजे कोल गै तपस्या लेई गुफा जनेही बनी दी ऐ जिसगी ढक्कन कन्नै बंद कीता जंदा हा।

मंदर दी पिच्छली भेठा बावा प्रेम दास जी दे मौके दी पवित्र धूनी ऐ जिसगी लोहे दे जंगले कन्नै घेरे दा ऐ। मंदर सामनै बाबा प्रेम दास दा समाधि मंदर ऐ जिसगी उंदे जींदे जी बनाया गेआ हा। ते सुर्गवास परैन्त उंदी समाधि इत्थें गै बनाई दित्ती गई।

समाधि कोल हनुमान मंदर ऐ। इसलै एह मंदर ट्रस्ट दी निगरानी च ऐ। उ'नें इत्थें पुजारी बी रक्खे दा ऐ। कोल गै अम्बें दा बाग ऐ जिसदी ट्रस्ट गी खास आमदनी होई जंदी ऐ। मंदर दी शैल दिक्ख रिक्ख नेई होने कारण मंदर दी कंधें पर बने दे चित्तर नश्ट होआ करदे न। भक्तें लेई बी खास प्रबंध नेई ऐ। जेकर सैलसफा विभाग ते धर्मार्थ ट्रस्ट रलियै ध्यान देन तां इत्थें वकास होई सकदा ऐ। चित्तरकार बी इत्थूं दे चित्तरें थमां प्रेरणा लेई सकदे न।

०००

देहरी दाती टोडी



जम्मू थमां 27 किलोमीटर दूर बिश्नाह तसील दे ग्रां रतनाल च दाती टोडी दी देहरी ऐ जित्थें ओह् अपने पति कन्नै सती होईं गेईयां हियां। इस देहरी च दाती टोडी ते उंदे पति मियां केसरु दे मोहरें न।

दाती टोडी दा जरम करीब चार सौ 60 बरें पैहले 1556 च किला बाहु कोल नरवाल ग्रां च इक गरीब चमार परोआर च हौआ। उंदे पिता दा नांऽ संतराम ते मां दा नांऽ देवकी हा। दाती टोडी दिक्खने गी इन्नी शैल ही जे जो कोई उसगी दिक्खदा ते दिक्खदा रेही जंदा। कुड़ियें कन्नै खेढ़ना ते प्रभु भक्ति करना गै टोडी दा कम्म हा। इक बारी ओह् कुड़ियें कन्नै ग्रां च खेढ़ा करदी ही तां इक फौजी अफसर जेहड़ा जम्मू थमां शकार खेढ़न उत्थें आए दा हा ते बुहटे हेठ बसाऽ करा करदा हा उनें टोडी दा शलैपा दिक्खेया तां उस पर मोहित होईं गेआ। पता लाई ओह् टोडी दे पिता कोला गेआ ते सनाया मेरा नां मियां केसरु ऐ, में फौजी आं ते तुंदी धीयु कन्नै ब्याह करना चांहना। टोडी दे माता-पिता जिसलै उसदे राजपूत होने दा पता लगगा तां उनें जातपात

दे फर्क कारण रिश्ते थमां नां करी दित्ती। मियां केसरु ने उनेंगी भरोसा दित्ता जे ओह टोड़ी गी म्हेशा खुश रखने दी कोशिश करग। अखिर ब्याह होई गेआ। सस्स बी नूहां गी बड़ा प्यार करदी।

मियां केसरु राजपूत घराने दा पाकिस्तान दे ग्रां गढ़ मल्लतान दे रौहने आहले हे। उंदे पिता दा नांऽ विजयराम ते माता दा नांऽ कशल्ल्या हा। उंदे पिता ने दो ब्याह कीते दे हे। केसरु कशल्ल्या दा इकलौता पुत्तर हा ते दूर्ई दे चार पुत्तर हे। ओह सारे म्हेशां केसरु कन्नै जलदे जे एह अद्धे दा मालक ऐ। पिता दी मौती परैन्त केसरु ते उसदी मां परानी मंडी आईयै रौहन लग्गी पे ते केसरु मेहनत मजदूरी करी गजारा करदा। ओह बडा ब्हादर ते चतर हा। इक बारी जम्मू दे राजा ने उनेंगी दिक्खेया ते उस थमां बडे प्रभावत होए ते उसगी फौजा च भर्ती करी लेआ। राजा ने उसगी रौहने लेई मैहल ते निक्की जनैही जगीर बी दित्ती।

ब्याह दे चऊं बरे मगरा उंदे घर जागत जम्मेआ तां पंते उसगी प्यो पर भारु दस्सेया ते 12 बरे पिता पुत्तर दे नेई मिलने दी सबील दित्ती। मियां केसरु ने टब्बर मैहले च छोडेया ने आपूं रतनाल जाई रौहन लग्गी पे जित्थें इसलै देहरी ऐ। गढ़ मलतान जिसलै केसरु दे भ्राए गी पता लग्गा जे उसनै गैर जाति च ब्याह करी खानदान गी बट्टा लाया ऐ तां ओह उसगी मारने लेई जम्मू आए उत्थें पता लग्गा जे केसरु रतनाल रौहदा ऐ तां ओह उत्थें गै ते कपट कन्नै भ्रा गी मारी द्रोड़ी गै। केसरु अजें जख्मी हा पर साह बाकी हे। उसनै उत्थूं जा करदे सुखा ब्रैह्मण गी परानी मंडी स्नेहा देने गी गलाया। दाती टोड़ी पैहले अपने प्यौके गेई जे मेरे बच्चे गी तुसें पालना ऐ जेकर मेरे पति नेई रेह दे होगन में उंदे कन्नै सती होई जाना ऐ। टोड़ी ने अपने बच्चे अंगू गी मां दी गोदी पाया ते आपूं रतनाल जाई पुज्जी। उत्थें केसरु दे साह मुक्की गेदे हे। दाती ने चिता बनाई ते आपूं बी पति कन्नै चिता पर जाई बैठी। उसलै गै उत्थूं दा अबदुजोगी ते मरासी जा करदे हे। दाती ने जोगी गी अपनी कारक बनाने ते मरासी गी गाने दा हुक्म दित्ता। उनें हामी भरी दित्ती। सुखा ब्रैह्मण दी मदद लेई शुक्रगजार होई दाती ने गलाया जे साढ़ी सारी बरादरी तुंदा आदर करग।

सती होने परैन्त दाती ने मारने आहली गी बड़ा दुख दित्ता तां उनें दाती थमां क्षमा मंगी ने उंदी देहरी बनाई ते दाती टोडी ते मियां केसरु दे मोहरे स्थापित कीते।

दाती दे पुत्तर अंगू दी पालमा नानी दे घर होई ते उंदा ब्याह बी टोडी दी जाति च होआ। उंदे चार पुतर होए, प्रकाश, रुलदू, रांजा ते जगतु। प्रकाश नरवाल थमां पंजाब, रुलदू अखनूर, रांजा उधमपुर ते जगतु कटुआ चली गोआ। अंगू दे परोआर दे लोक अंगूराना जां अंगराल खुआए। दाती दी देहरी पर बरे च दो बारी मेल लगदी ऐ-हाड ते कत्ते म्हीने दी पुन्नेया गी। लोक श्रद्धा भाव कन्नै इत्थें औंदे न।

०००

मां सजौती शील्ला देवी



अज्जे थमां कोई 350 बरे पैहले मनावर सुर्खपुर च रामसिंह जगीरदार रौहदे हे उंदे होर बी छै: भ्रा हे। मती जमीनदारी होने कारण उंदा अपने इलाके च मता दबदबा हा। जमीन लेई केई नौकर चाकर हे। इलाके दे मते लोके गी उंदे थमां कम्म रोजगार लग्गे दा हा। ओह् गरीबें दी इयां बी मौके पर खूब मदद करदे। उंदे ग्रां च इक गरीब ब्रैह्मण परोआर बी रौहदा हा। ब्रैह्मण पिताम्बर दास आर्थिक तंगी कारण बड़ा परेशान हा तां उसगी बी जगीरदार ने अपने खेतरें दी देखभाल लेई रक्खी लैआ। ओह् पूरी ईमानदारी कन्नै अपना कम्म करदा।

इक बारी जगीरदार दे निक्के भ्रा दा ब्याह हा तां बराती जाने लेई मते लोक बाहर थमां बी आए। जिसलै बरात जा करदी ही तां किश जागत खरबुजें दा खेतर दिक्खी खेतरा च चली गै। ब्रैह्मण पिताम्बर दास जेहड़ा उत्थें राक्खी करा करदा हा उनेंगी बड़ा मना कीता पर जागत नेई मन्ने। उंदे बिच्चा कुसा ने कच्चा खरबुजा ब्रैह्मणें गी मारेया तां ओह् ऐसी थाहर लग्गा जे ओह् बेहोश

होई गै ते फी कदें होश च नेई आये। उंदा कुत्ता एह सब किश दिक्खा करदा हा। बरात चली गई ते कुड़ी आहले घर उंदा बड़ा सुआगत हौआ। जिसलै रूटी खान बैठे तां छड़े कीडे ते लहु गै लब्भा।

सारे बड़े परेशान होए। कुसा सेयाने ने दस्सेया जे एह ब्रह्म हत्या दा दोश लग्गदा ऐ। पिताम्बरदास दा कुत्ता खेतरा थमां घर गेआ ते उंदी लाड़ी शीला देवी (मां सजोती) गी खिच्चदा होई खेतर लेई गेआ। जिसलै उनें उत्थें अपने घरैआहले दी लोथ दिक्खी तां ओह बड़ी दुक्खी होई ते घरैआहले दी चिता बनाई ते आपूं बी अपने निक्के जनेह जागते कनै सती होने गी त्यार होई गई। जिसलै जगीरदार गी पता लग्गा तां उनें सती नेई होने लेई शीला देवी दे बड़े तरले कीते ओह नेई मन्नी ते सती होई गई।

जगीरदार पर ब्रह्म हत्या दा ऐसा दोश लग्गा जे सब किश नश्ट होई गेआ। केई सेयाने गी पुच्छेया गेआ तां कुसा ने पैहले ते उनेंगी जात बदलने गी गलाया। तां उनें मन्हास जाति छोड़ी ते घंघाल जाति दे होई गै। सब्भने किट्टे होई दाती दी देहरी बनाई ते उनेंगी कुलदेवी मन्नेया। सब्भै जित्थें-जित्थें कम्म करन गै दाती दा थाहर बी बनाई लेआ। हमीरपुर सिद्धड़ दी देहरी बेगौरी रेही तां माता ने सुखने च हुक्म दित्ता मेरी सुध लैती जा तां 28 अक्टूबर 1960 गी मां दी आज्ञा कनै पंचवक्तर मंदर च मां दे मोहरे ते मंदर बनाया गेआ। बरादरी दी मेल कत्ते म्हीने दी पुन्नेया गी इत्थें गै होंदी ऐ। मते लोक मां दे दर्शनें गितै इयां बी मत्था टेकन औंदे न।

०००

बुआ भजां-बाबा बीबडू रायपुर



जम्मू थमां 10 किलोमीटर दूर इक ग्रां रायपुर जिसगी लोक रैपर करी कुआलदे न स्थित ऐ। आमतौर पर इस ग्रां दे बसनीक जम्वाल राजपूत न जेहड़े पीढ़ी दर पीढ़ी फौजा च नौकरी करी देश दी सेवा करदे रेह न।

इत्थें गै जगीरदारें दी फौजा च इक हरिजन सपाही बीबडू बी हा। ओह डमवाल जाति दे हे। इक बारी बीबडू गी बी लड़ाई च जाने दा मौका लग्गा तां ओह खुशी-खुशी गै। उंदी लाड़ी बुआ भजां ने उनेंगी खुशी कन्नै विदा कीता। लड़ाई च लड़दे-लड़दे बीबडू शहीद होई गेआ ने उसदी लोथ ग्रां आई गेई। बुआ भजां गी जिसलै पता लग्गा तां ओह बडी दुखी होई। त्यार होई शमशान पुज्जी ते सती होने दी इच्छा सब्भनें गी सनाई। उत्थूं दे लोके दे घरै दे लोके बुआ गी बडा रोकेया पर ओह नेई मन्नी ते हवन करी अपनियां बालियां धीऽ चिड़ी गी दितियां। बुआ ने उस थाहर इक मंदर बनाने गी गलाया जिसदी पुजारन उंदी धीऽ चिड़ी होग। उसलै गै बुआ ने मोहरे बनवायें उनेंगी हत्थ लाया ते हवन अग्नि कन्नै चिता सलगाई ते आपूं बी घरैआहले कन्नै सती होई गेई। बाद च लोके मंदर बनवाया ते उनें मोहरें दी स्थापना करवाई। उंदी धीऽ चिड़ी दे वंशज अज्ज बी मंदर दे पुजारी न। बुआ दे सौहरे प्यौके दे कुलें दे लोके बुआ गी कुलदेवी मन्नी पुजैया।

इत्थें झिड़ी आहली पुन्नेया दे परैन्त औने आहली पुन्नेया गी मेला लग्गदा ऐ। बरादरी दे लोकें दी इस दिन मेल लगदी ऐ। हवन यज्ञ ते भंडारें दा अयोजन कीता जंदा ऐ।

मंदर दी कंधा पर बाबा बीबडू दे शहीद होने दा समां दिसम्बर 1841 ई० लखोए दा ऐ। बुआ दी देहरी पर 1997 च मंदर बी बनवाया गेआ। इत्थें आई कुलें दे लोक रीति रवाज अनुसार मंगल कर्म्में दा शुभारम्भ करदे न। इस लाके दे होर लोक बी इस थाहरे दे प्रति खास श्रद्धा रखदे न।

०००

बाबा बड़गाल-कोट भलवाल



जम्मू थमां 12 किलोमीटर दूर बाबा बड़गाल जी दा स्थान ऐ जेहड़ा जम्मू घरोटा अखनूर शिड़का दे सज्जे पाससै स्थित ऐ। इत्थें बाबा बड़गाल जी दे मोहरे रखे गेदे न ते कन्नै गै इक मंदर ऐ जेहड़ा बाबा बड़गाल जी दा ऐ। बाबा बड़गाल भलवाल राजपूत ते बड़गोत्रा ब्रैह्मणें दे कुलदेवता न। लोके दा विश्वास ऐ जे बाबा गड़गाल जी कांगड़ा, हिमाचल प्रदेश दे रौहने आहले हे। ओह इत्थें आए तां समें-समें पर उनें लोकें गी मते चमत्कार दस्से जिस कारण लोक उनेंगी मनदे हे।

इक परोआर दे चार भ्रा बाबा जी दे चमत्कारें कारण उनेंगी भगवान सरूप मनदे ते घरा च उंदा स्थान बनाया। किश चिरै मगरा उनेंगी जम्मू राजे दे नौकरी थहोई तां उनें जम्मू रौहने दी सोची। घरा बाबा जी दे मोहरे पालकी च पाये ते चली पे रस्ते च बसाऽ करने गी रुके तां पालकी बी कोल रक्खी लेई। जिसलै जागे तां पलकी चुकी पर ओह नेई चकोई। उनें गी लगगा जे बाबा जी इत्थें रौहना चाहंदे न। उनें उत्थें गै जित्थें अज्ज बावे दा थाहर ऐ मंदर बनवाया ते आपूं बी इत्थें रौहन लगी पे। उनें इत्थे मेहनत कन्नै ग्रां कोट ते

भलवाल बसाये। भलवाल राजपूतें बड़गोत्रा ब्रैह्मणें गी अपना परोहत बनाया।
अज्ज बी शुभ मौके भलवाल अपने परोहत बड़गोत्रे कन्नै इत्थें औंदे न।

बाकी जात दे लोक बी इत्थें औंदे न। इत्थें बच्चे दे मुंडन ते नमें ब्याह
आह्ले बी आई मत्था टेकदे न। मौके-मौके पर इत्थे भंडारे आदि दा अयोजन
बी कीता जंदा ऐ। दशहरे गी इत्थें मेला लगदा ऐ। इस थाहर दी लोके च बड़ी
मानता ऐ।

०००

नाग देवता नागबनी थान

जम्मू थमां 12 किलोमीटर दूर नाग देवता दा प्राचीन स्थान नागबनी च प्रसिद्ध ऐ। वासुकि नाग दे पुतर राजाभेड़ नगरोटा कोल तवी नदी दे कंठै वास करदे न जिंदे दर्शन बड्डी मच्छी दे रूप च होंदे न। सुरगल कुसा बी घरा च वास करी सकदे न। काई गी अखनूर दी गद्दी थोई दी ही ते टलन गी वासुकि नाग ने नागबनी दी गद्दी सौंपी ही। इत्थें नाग देवता दा वास इक निक्के जनैह् मंदर च ऐ। इत्थें इक बड्डी बरमी ऐ जिस पर मती गिनतरी च लोहे चांदी ते ताम्बे दे नाग लोके चाढ़े दे न। इसदे खल्लें नौ पिंडियां ते बड्डी बरमीं दे उप्पर मोहरे रखे दे न। अपनी सुक्खन पूरी होने परैन्त भक्त चांदी ते होरने धातुयें दे बने दे नाग चाढ़दे न। इत्थें इक तलाऽ बी एह् जित्थें लोक नाग देवता दे जाने थमां पैहले स्नान करदे न। इत्थें पैहलें घना जंगल हा ते सवें दी गिनतरी च बरमियां हियां। मती गिनतरी च बेस्हाबे नाग इत्थें आम लब्भदे हे तां करी गै इस वन दा नां नागबनी पेआ।

इस थाहर नागें दी शक्ति बारे बखान करदे होई पंत लब्भूराम होरें सनाया जे मेरे पिता जी दे समें दी गल्ल सनाई जे उसलै महाराजा हरिसिंह दा राज हा। इक बारी राजा ने हुक्म जारी कीता जे इत्थूं दे जंगल गी साफ करी खेतीबाड़ी काबल बनाया जा। कटाई दा कम्म शुरु होआ तां केई नाग बरमियें थमां बाहर निकली आए। इक सप्प मारदे तां केई होर आई जंदे जिसलै राजा गी सारा मामला पता लग्गा तां उनें 25 धमां जमीन नागें लेई छोड़ी दिती।

राजा दा इक बजीर जेहड़ा कम्मा दी दिक्ख करा करदा हा उनें पंडत रोहलू राम जी गी आक्खेया में नागें दी शक्ति नेई मनदा जेकर तुस मनदे ओ तां मिगी प्रगट करी दस्सो। पंडत होरें इक हफ्ता नागें दी पूजा कीती जे प्रभु मेरा विश्वास सच्च करो तां इक बुहटे दा तना फटेआ ते उत्थें नाग देवता प्रगटे। ओह बुहटा अज्ज बी उत्थें मजूद ऐ। तां फी उसनै नाग देवता गी मत्था टेकेआ

ते हुक्म दिता जे सरकारी जमीन पर होई दी फसल थमां हर ढेर चा इक पाई
अनाज इस पवितर थाहर चाढ़ेया जाग।

अज्ज बी जिंदे घर नाग निकलदे न ओह् बरमी पर दलस्सी चाढ़ेदे न
ते माफी मंगदे न।

उयां ते लोक इत्थें रोज औंदे न पर नाग पंचमी पर, शिवरात्रि ते होर तेआरें
पर इत्थें मती गिनतरी च भक्त मत्था टेकन औंदे न।

०००

थाव बावा महीमल्ल

एह थाहर तसील अखनूर दे ग्रां डोरी डगेर च ऐ। एह अखनूर थमां 35 किलोमीटर दूर उतर-पश्चिम दिशा ऐ।

बावा महीमल्ल हुंदा जरम 570 बरे पैहले प्रंद्रहवी सदी च उप्पल ब्राह्मण वंश च हौआ। इंदे पिता दा नां श्री पिल्लो राम हा ते मां दा नां राधा देवी हा। इंदा जरम कत्ते महीनें दी पुन्नेआ गी होआ हा। बारहें बरें दी बरेसा तगर पढे ते फी करसानी दे कम्मं च लग्गी पे।

उसलै सामंतवाद दा जुग हा ते सांमतवादियें अगें कोई बी नेई हा बोलदा। करसानें पर जगीरदार केई जुल्म करदे पर कोई उंदे अगें जबाव नेई दिंदा। जेकर कोई बोलने दी हिम्मत बी करदा तां जगीरदार उसदा मूंह म्हेशां लेई बन्द करी दिंदे।

बावा महीमल्ल करसानी ते करदे पर उंदी जमीन बड़ी घट्ट ही। ओह नाथल ग्रां दे जगीरदार योआला सिंहनियां दे कोल हाजर हौये ते राहनें बाहने लेई किश जमीन दी मंग कीती। जगीरदार ने बंजर धरती दिती ते चौथा हिस्सा लेने दा करार कीता।

बावा खुशी-खुशी नाथल ग्रां गै उठी ते उस बंजर जमीन पर दिन रात सख्त मेनहत कीती। मेहनत दा रंग दिक्खी सब्भै र्हान हुंदे पर बावा गर्मी च बी जमीन च खूब कम्म करदे। नतीजे च कनका दी फसल होरने लोके थमां बी बदध होई। मती फसल होने दी खबर योआला सिंहनियां कोल बी पुज्जी। दरबार च मजुद लोके उनेंगी अदध लेने गितै बहकाना शुरू कीता। योआले गी बी मती फसल लेने दा मना च लालच उठी आया। उसने खेतरा च महीमल्ल कोल अदध लेने गितै आदमी पेजेया पर बावा इस लेई भलेया त्यार

नेई हौये ओह करार मताबक चौथा हिस्सा देने पर अडे दे रेह। इस अन्याय गी बावा सैहन नेई करी सके ते जगीरदार कन्नै लडाई होई गई। पैंचे सरपैंचे दी बी नेई मनोई जगीरदार अद्ध लेने पर अडे दा रेहा। इक दिन महीमल्ल दी मां ने उनेंगी देंही दा कुज्जा जगीरदार दे घर देने गी पेजेया ते कन्नै गलाया जे लडाई चा किश नेई निकलना अज्ज कोई फैसला करियै गै घर वापस आया। महीमल्ल ने सोचेया अज्ज ते फैसला होई गै जाग। बावा अपने ग्रां डोरी डगेर अपने मितर पोरू लोहारे कोल गै ते हक्क मारी। ओह घर नेई हा। बावा महीमल्ल ने उसदी लाडी जीवनी थमां खोखरी मंगी। उनें खोखरी हसदे होई दिती ते बोली खोखरी रक्खना ते सौक्खा ऐ पर बरतना मुश्कल। बावा होरेंगी एह गल्ल बुरी लग्गी। बावा जगीरदार दे घर पुज्जे तां उनें यज्ञ रचाए दा हा जिस च विदवान ते ब्राहमण सद्दे दे हे पर बावा महीमल्ल गी कोई साद्दा नेई हा। जगीरदार गी त्राह हा जे सभ्भने साम्मने उसदी गल्ल खुल्ली जाग। बावा जिसलै योआला सिंहनियां दे दरबार पुज्जा तां रानी सोहली गी मां दी पेजी दी सगात दिती। रानी बी महीमल्ल दे हक दी गल्ल चांहदी ही पर जगीरदार इक नेई मनदा। जिसलै बावा महीमल्ल विदवाने कोल पुज्जा तां उनें अपने लेई न्याऽ दी फरयाद कीती। उनें सभ्भने करार मताबक फसल गै देने दा फैसला कीता पर जगीरदार भड़की पेआ। सारे बिजन खाद्धे दे जान लगे तां जगीरदार ने उनेंगी जर्बदस्ती रुट्टी खाने गितै बठाई लेआ। उनें आक्खेआ जे तुस चांहदे ओ तां इस बिन बलाये ब्राहमणा गी बी रुट्टी खलाई ओडो तां ते यज्ञ चा कोई भुक्खा नेई जा। महीमल्ल गी जिसलै न्याऽ नेई थ्होआ तां ओह दुखी होइयै दरबार थमां किश दूर इक बोहड़ी दे बूहटे पर चढ़ी गेआ। बावे ने बोहड़ी दे बूहटे गी पंज फट्ट मारे उत्थूं दुद्ध निकली आया। बावे ने दुद्ध गी मां दा दुद्ध मन्नी तिलक लाया ते खोखरी अपने टिड्डै च मारी लैती। उसलै गै यज्ञ च बनी दी रुट्टी कीडें ते लहुये च बदली गई। लोक भुक्खे गै उठी।

जगीरदार दी नौकरानी ने बावे गी बूहटे थमां डिग्गदे दिक्खेआ ते जगीरदार थमां डरदे-डरदे उसगी पैरें कन्नै सिद्धा कीता। खूना च लथपथ बावे ने नौकरानी गी आक्खेआ जेकर तूं मिगी हत्थै कन्नै सिद्धा करदी तां सुरगै

च जंदी। फही बी तूं मिंगी सिद्धा कीता जा दूर कुतै चली जा तेरा वंश चलदा रौहग। बावे ने श्राप दित्ता जे योआला सिंहनियां दा कोई बी जीऽ जींदा नेई बचग लगा। योआले दा वंश अज्ज खत्म होई गेदा ऐ पर नौकरानी दा वंश चला करदा ऐ। डोरी डगैर च बावे दा मंदर ऐ। छें-छें म्हीनें उत्थें मेल लगदी ऐ ते लोक बडी श्रद्धा कनै उत्थें मत्था टेकन औंदे न। ते बावे दी वीरता दा गुणगान करदे न।

०००

भैड़ देवता

जम्मू थमां लगभग 20 किलोमीटर उत्तर पाससै तवी दे सज्जे कंडे भैड़ देवता दा स्थान ऐ। इनेंगी केई बरादरियें दे लोक अपना कुल देवता मनदे न। इस पवितर थाहरा पर इक बड्डी शिला ऐ जित्थें मोहरे ते सौंगलां रक्खीं दियां न। इत्थें गै भैड़ देवता दियां पिंडियां, त्रिशूल ते चिमटा बी ऐ। कोल गै तवी दे खास थाहर जित्थें डबर ऐ उत्थें भैड़ देवता इक मच्छी दे रूपा च विराजमान न जिसदे दर्शन कदें कदालें कुसा भगता गी हुंदे न। भैड़ देवता गी जेहड़े लोक अपना कुल देवता मनदे न ओह इत्थें अपने जागतें दे मुनन करदे न ते बकरा चाढ़दे न।

भैड़ देवता दे बारे च दंत कथा ऐ जे वासुकि नाग दे चार पुतर हे अल्लन, राल्लन, काई ते भैड़। भैड़ काई थमां निक्का हा। काई दी माता दा नां कर्पूरी ते भैड़ दी माता दा नां बैरी नागिनी हा।

इक बारी वासुकि नाग गी चमड़ी दा रोग होई गेआ केई इलाज करने परैन्त बी अराम नेई लग्गा तां राज वैद्य ने राजा गी सनाया जेकर कोई “कलाश कुंड” थमां नदी बगाई आहन्ने तां उस च स्नान करने परैन्त तुस ठीक होई जागे। राजा ने सोचेया चौनें पुतरें दी परिख्या लेने दा शैल मौका ऐ। उनें चौनें पुतरें गी हुक्म दित्ता जे जाओ ते कलाश कुंड थमां नदी इत्थें लेई आओ जेहड़ा पैहले पुज्जग उसगी जम्मू दा राज दित्ता जाग। भैड़ सब्भने थमां ब्हादर हा। ओह कलाश कुंड पुज्जा इक काली शिला परे हटाई तां तवी दे रूप च पानी बगन लगी पेआ। भैड़ बी तवी कन्नै चली पेआ तां काली माता ने दिखेया जे काई चनाब लेई आवा दा ऐ। माता ने शक्ति कन्नै काई गी निंदरा च करी दित्ता ते भैड़ जम्मू आई पुज्जा। पिता वासुकि ने तवी च स्नान कीता ते रोग मुक्त होई गै सारा जम्मू दा राज भैड़ गी दित्ता। जिसलै होरनें गी पता लग्गा तां ओह जित्थें हे उत्थें गै रुकी गै। काई ने अखनूर राज लेआ। भैड़ दे स्थान कोल गै माता काली दी गुफा ऐ।

०००

कालीवीर जी मंदिर-सूजवा

जम्मू थमां करीब 10-11 किलोमीटर दूर सूजवा नां दे गां च कालीवीर जी दा पवित्तर थाहर ऐ। इत्थें इक मंदर च कालीवीर जी दे मोहरें स्थापित न। एह् स्थान लगभग दो सौ बरे पराना ऐ। इत्थें कोई चार सौ बरे पैहले रैणा बरादरी दे लोक आई बस्से हे जंदू कश्मीर च लोकें गी जर्बदस्ती धर्म बदलने पर मजबूर कीता जा करदा हा। किश लोके डरे मारे अपना धर्म बदली लेआ पर किश उत्थूं आई गै। जेहड़े रैणा बरादरी दे लोक उत्थूं दा आये ओह् अपने कन्नै मोहरे, हथियार झुंडे ते होर समान लेई आये ते कालीवीर दे मोहरे आदि सूजवा च स्थापित करी दित्ते। समें कन्नै बल्लें-बल्लें इत्थें रैणा बरादरी ने रलीमिली कालीवीर जी दा बड्डा मंदर बनवाई लेआ ते जेहड़े रैणे सूजवां दे बाहर बी रौहदे हे ओह् बी इत्थें मत्था टेकन जरूर औंदे हे। किश बरे पैहले तगर इत्थें घना जंगल हा पर हून इत्थें मती रौहल ऐ ते एह् लाका शैहरा कन्नै रलीमिली गेदा ऐ। इत्थें अप्रैल ते नवम्बर महीने बरे च दऊं बारी मेल लगदी ऐ। गोगा नौमी गी इत्थें मेला बी लगदा ऐ।

कालीवीर जी का जन्म अयोध्या दे राजा ईशर दे घर होआ। उंदी माता दा नां कालिका हा इसकरी उनेंगी काली नां कन्नै कुआलेया गेआ कुल पर ग्रैह खराब होने कारण उनेंगी काली माता दे मंदर चाढ़ी दित्ता गेआ। जवान हुंदे गै राजा मंडलीक ने उनेंगी अपना मंत्री बनाई लैता। राजा मंडलीक ते कालीवीर ने सारे भारत च जातरा कीती इस्सै कारण जम्मू कश्मीर दे कन्नै-कन्नै भारत दे होरने शैहरें च बी उंदे भगत ने स्थान मजुद न। कालीवीर जी गी भगवान शेषनाग दा अवतार मनेया जंदा ऐ।

०००

सुमाह-देवस्थान

जम्मू थमां 40 किलोमीटर दूर तसील अखनूर दे सुगंल ग्रां कोल सुमाह देवता दा प्राचीन स्थान ऐ। आखदे न जे एह स्थान महाभारत काल दा ऐ। ऋषि मार्कण्डेय भीम गी इत्थें लेई आये। इत्थें उसलै नागें दा राज हा। इत्थूं दी नाग कन्या गी वरदान हासिल हा जेकर ओह कुसै बी मृत गी गंगाजल पलाई देग ओह जींदा होई जाग। मार्कण्डें नाग कन्या कोल भीम दा इलाज करान आये। नाग कन्या भीम गी दिक्खदे गै अपने मन बसाई लेआ। कन्या ने देवते दी तपस्या कीती ते भगवान शिव ने उसगी वर मंगने गी गलाया। उनें गंगा इत्थें आहनने दी विनती कीती। भगवान शिव बोले इत्थें गंगा क्रियां आई सकदी ऐ। नारद दी बोले गंगा ते तुंदे रोम-रोम च बसदी ऐ। नारद जी दे आक्खने पर नाग कन्या ने शिव जी गी कमल दा फुल्ल, नरैल ते फुल्ल माला अर्पण कीती। शिव जी दे फुल्लें दे हार थमां गंगा आहगर पवितर नदी निकली जेहड़ी इसलै बी सुमाह च बगदी ऐ। इस नदी दा पराना नां पुष्पे भद्रा ऐ।

नाग कन्या ने उस नदी दा जल भीम दे मूहां च पाया तां ओह होश च आई गै। ऋषि थमां सारी गल्ल सुनी तां भीम नाग कन्या कोल जाई उसदा धन्नवाद कीता ते आक्खेया किश बी मेरे थमां तूं मंगी सकनी ऐ। नाग कन्या बोली में तुसेंगी अपना पति मन्नी चुकी दियां। में नाग कन्या दा शरीर त्याग करी जनानी दे रूप च औगी तां तुसेंगी अज्ञातवास होग अदूं साढा मिलन हौग तां तुसेंगी मिगी स्वीकार करना पौग। भीम उसदी भविक्ख दी जानकारी होने दी गल्ला पर बड़ा हैरान हा।

अज्ञातवास मौके जिसलै पांडव माता कुंती कन्यै इत्थें आये तां कुंती गी त्रेह लग्गी, भीम पानी लेन गेआ उत्थें उनें मायावी कुड़ी गी दिखेया उसगी मारन लग्गा तां ओह बोली तुगी में जीवनदान दित्ता ते तूं मिगी मारा करना। इत्थूं दे महंत हुंदे कथन मताबक उस नाग कन्या दा नां सोमावती हा जिसदे नां पर इस थाहरा दा नां सुमाह पेआ।

०००

बाबा धर्मचंद देवस्थान

बाबा धर्मचन्द चिब दा स्थान अखनूर थमां नौ किलोमीटर दूर ऐ। इत्थें बरे च दऊं बारी चिब बरादरी दी मेल लगदी ऐ। इक कथा मताबक 15वीं शताब्दी दे कोल पंजाब दे कन्नै लगदे सूबा गुजरात दे कोल रियासत भिंबर ही। उसलै उत्थें राजा धर्मचंद राज करदे हे। जेहड़े चिब बरादरी थमां गै हे। अदू पंजाब कन्नै कश्मीर दे बपार आस्तै सारे रस्ते भिंबर रियासत थमां गै जंदे हे। राजा धर्मचंद बडे नेक ते दयालु राजा हे। ओह् बमारें दी लाजकारी करने च बी बडे सिद्ध हस्त हे। लोक उंदे कोल इलाज करोआन औंदे ते राजी होई जंदी। इक बारी दिल्ली दा बादशाह कुसै बमारी दी फगड़ च ऐसा आया जे ठीक गै नेई हौआ। इक बपारी जेहड़ा भिंबर थमां होइयै कश्मीर होंदे होई दिल्ली पुज्जा उनें दिल्ली दे बादशाह गी दस्सेया जे भिंबर दा राजा धर्मचंद हर बमारी दा लाज करी जानदा ऐ। तुस उस थमां इलाज करवाओ।

बादशाह ने राजा गी बलाया तां राजा दिल्ली आई गै ते बादशाह दे रोग दा इलाज करी दिता। जिसलै बादशाह ठीक होई गेआ तां उनें राजा गी मुस्लिम धर्म अपनाने गी जोर पाया कि जे बादशाह ने एलान कीते दा हा जे जो कोई उसदी बमारी ठीक करग ओह् अपनी कुड़ी दा ब्याह् उसदे कन्नै करी देग। धर्मचंद जिसलै नेई मन्ने तां बादशाह ने जर्बदस्ती धीयु दा ब्याह् राजा कन्नै करी दिता। राजा पर मैहलें च पैहरा लाई दिता तां जे राजा नस्सी नेई सके। राजा नेई परतोआ तां उसदी रानी गी बडी चिंता होई उनें दरबार दे इक गायक गी दिल्ली पेजेया। जिसलै ओह् उत्थें पुज्जा तां पैहरे कारण राजा गी नेई मिली सकेया पर ओह् उच्चे सुरें च गीत गांदा रेहा। राजा ने अवाज पंछानी तां बादशाह थमां आज्ञा लेई गायक गी अपने मैहलें च बलाया ते सारा हाल पुच्छेया। रानी दी हालत सुनी राजा परेशान होई उत्थूं नस्सी गेआ। गायक मैहले च गांदा रेहा पर आखिर भेद खुली गेआ ते उसगी बादशाह ने फांसी दी सजा

दिती। बादशाह ने राजा दी तपाश च सेनापति बैत खान ते फौज पेजी दिती। राजे गी तुप्पी लैता गोआ ते उसगी ललकारेआ। राजा धर्मचंद नै आक्खेआ जे में अपने राज च आई गोदा आं इसकरी पैहला वार तूं कर। इन्ना आक्खेदे गै बैत ने तलवार दा वार कीता ते राजा दा सिर घड़ै थमां बक्ख करी ओडेआ। राजा ने इस्लाम कबूल कीते दा हा इस करी उसगी दफनाया गोआ। उससै कब्र च भिंबर दी रानी थकैयल ने बी समाधि लैती। खानकाह नां कन्नै मशहूर एह बाबा धर्मचंद दी समाधि हून पाकिस्तान च ऐ। 1947 थमां पैहले हिंदू ते मुसलमान बडी श्रद्धा कन्नै इत्थें मत्था टेकदे ते मेल दा आयोजन बी कीता जंदा।

अपने कुल देवता बाबा धर्मचंद दे चैते च भिंबर ते ओहदे आस्सै पाससै थमां आए दे चिबें अखनूर तसील दे नड्ड ग्रं च इक स्मारक बनवाये दा ऐ। इत्थें चिब बरादरी दे लोक हर खुशी मौके औंदे न।

27 मार्च गी इत्थें बड्डी मेल लगदी ऐ। अदूं इत्थें जम्मू, पंजाब, हिमाचल, हरियाणा आदि रियासतें थमां हिंदू मुसलमान ते सिख मत्था टेकन औंदे न।

०००

बाबा जसदेव दा स्थान रायपुर क्षतवारी

अज्जा थमां कोई चार सौ बरे पैहले जिला हमीरपुर तसील भिम्बर दे इक ग्रां देवा च चिव परोआर च होआ। उंदे पिता जी दा नां रतन देव ते माता दा नां शीलांवती हा। चिब राजपूतें दे पंत ज्ञान चंद होंदे मूजब जसदेव दे पिता दे पंज पुत्र हे-बावा सदे, सरवार, मानसिंह, बसो ते जस्सो। बारहें बरें दी उमरी तगर पुज्जदे गै बावा जसदेव सब्भने धार्मक ग्रथें दा पाठ करना सीखी गै। उंदे च बचपुने थमां गै भक्ति भाव भरोचे दा हा। इक बारी बावा नहाईयै आए ते सिरै दे बाल झाडदे होई पानी उंदी बड्डी भरजाई पर पेई गेआ तां उनें अपने घरैआहले गी शकैत कीती। जस्सो गी बड्डै भ्रा ने इन्नी जोरा दी चपेड़ मारी जे उसदे मूहां थमां खून निकली आया। दऊं चऊं रोजे दी दिक्ख भाल कन्नै ओह ठीक होई गै ते बाहर न्याने कन्नै खेदुन गैऽ तां न्याने उंदा खूब मौजू लेआ ते भ्रा थमां दंद तुडवाई आया ऐं। जसदेव गी बडा रौह चढ़ेया ते ओह वापस घर आई गेआ। घरा इक गड़वी लेई ते जाई तलाऽ च शनान कीता ते गड़वी च पानी भरी आहन्दा। घर आई ठौगरें दी पूजा कीती ते उनेंगी अर्ज कीती जे में जीना नेई चांहदा में लोके दे ताने मीहने नेई सुनी सकदा इसकरी तुंदे चरणें दा एह जल पींदे गै मेरी मौत होई जा। ईश्वर दी करणी जल पींदे गै उंदी मौत होई गई। घरा आहलें उंदा संस्कार कीता ते अस्थियां देवजाति दे ब्रैह्मणें गी देई हरिद्वार पेजेआ। ब्रैह्मणें ने उंदे पैहे रक्खी ले ते अस्थियां मनावर कोल दलदल च सुट्टी दितियां। बावा जी दे परोहत गी उंदे काल होई जाने दा पता लग्गा तां ओह मंगलूरा थमां देवा उंदे घर कल्पने गी आये। उस्सै रातीं बावा अपनी मां दे सुखने च आए ते बोले तुस सारे सुखा च ओ ते में दलदल च खुब्बे ना। परोहत होरें गी आक्खो मिगी इत्थूं लेई जाओ ते हरिद्वार अस्थियां प्रवाह करो। पंत होर गैऽ उनें अस्थियें गी कडढी हरिद्वार लेई गैऽ। उंदे कोल पैहा नेई हा तां उनेंगी बावा मनुक्ख रूप च मिले गडवे च दुद्ध पलाया ते गड़वा कन्नै लेने गी आक्खेया ते आपूं लुप्त होई गै। पंत

होरें गडवा दिक्खेया तां उस च सुन्ने दियां मोहरा हियां। पंत होर सारा मामला समझी गै ते हरिद्वार जाई पिंड दान कीता। जसदेव हुंदे सारे परोआर दे कश्ट उंदी अकाल मौत ही। इसकरी सब्भने सलाह मश्वरा कीता ते जसदेव दे मोहरे बनाई देवा ग्रां च स्थापत कीते।

मोहरे दी पूजा पंत करदे न पर देव जाति दे ब्रह्मण उत्थें नेई आई सकदे। 1971 च जिसलै देवा पाकिस्तान च आई गेआ तां बरादरी दे लोके उंदा थाहर रायपुर सतवारी बनाने दा फैसला कीता जिस आस्तै जगीरी सिंह होरें जगह दित्ती ते मंदर बनी गेआ। मंदर च बाबा जी दे मोहरे स्थापत कीते गै ते 11 फरवरी 1997 गी जसदेव जी दी मूर्ति दी स्थापना कीती गई। कोल गै बावा जी दी भरजाई वदी दी देहरी जिसने बावा गी थमां माफी मंगी ही। इस स्थान दे बेहड़े च 15 सतियें दियां देहरियां बी एह न।

०००

बुआ दाती शीलावंती अखनूर

बुआ दाती शीलावंती दा पवित्तर थाहर अखनूर दे कामेश्वर मंदर च विराजमान ऐ। दाती दे मोहरे पंचमुखी हनुमान जी दे मंदरें दे कन्नै इक निक्कै जनैह् मंदरे च स्थापित न। इत्थें दाती दा प्राचीन मोहरा ऐ ते इक दाती दे घरै-आहले दा मोहरा बी एह्। पैहले ते इत्थें एह् देहरी गै ही पर हून कोई त्रीहे बरें थमां इक जनैह् मंदर बनवाया गेदा ऐ। दाती दा त्रै सौ बरे पराना स्थान बकोर च ऐ उत्थूं गै मोहरे गी इत्थें आनेया गेआ हा। एह् टगोत्रा बिरादरी दी कुलदेवी ऐ। इत्थें बरे च दऊं बारी मेल लगदी ऐ जिस च टगोत्रा बरादरी दे लोक औंदे न। पैहली मेल अप्रैल म्हीने ते दूई छै: म्हीने परैन्त होंदी ऐ।

उत्थूं दी बसनीक कमला देवी ते मेजर दीनानाथ जी मताबक दाती अपने घरैआहले ते पुत्तरे कन्नै खुशी-खुशी अपने घर रौंहदी ही। उंदे घरैआहले करसानी करदे हे। इक बारी ओह् कुतैं बाहर गै तां मते दिन नेई परतोए। बुआ गी बडी चिंता होई। इस दरान कुसा ने अफवाह फलाई दित्ती जे ओह् नेई रेह् दे। बुआ ने सुनेया तां सोचेआ जे घरैआहले बिजन में जींदे रेही केह् करना? उनें चिखा बनाई जागते गी चुकेआ ते चिखा गी अगग लाई जागतें समेत अग्गी दे लोरें च बल्दी चिखा च बेही गेई ते किश चिरै गी सब किश सुआह होई गेआ। इनें च बुआ दा घरैआहला जिसलै परतोआ तां उनें सब किश खत्म हौए दा दिक्खेया तां ओह् बी उत्थें गै जली मरे।

बुआ दाती शीलावंती बकोर दियां बसनीक हियां ते उंदे सती होने पर लोके इत्थें गै उंदी देहरी बनाई पर बार-बार पाकिस्तान पासेआ देहरी गी हर्जा होने कारण बरादरी दे लोके आपसी सलाह कन्नै ते दाती दी आज्ञा कन्नै मोहरे अखनूर स्थापित कीते तां जे सब्भै कुलदेवी दे दर्शनें गितै आई सकन।

०००

दाती दी देहरी मकवाल

दाती दा जन्म लगभग त्रै सौ बरे पैहले अखनूर दे ग्रां कलीठ च जडेल्यान महाजन परोआर च होआ। उंदे पिता जी दा नां रामदास हा ते माता दा नां द्रोपदी हा। दाती गी मां प्यो ने बडे लाड प्यार कन्नै पालेआ ते जिसलै सेयानी होई तां मकवाल दे लाला परमराम दे पुत्तर उतमचंद हुंदे कन्नै उंदा ब्याह करी दित्ता। ब्याह मगरा दाती कोई बरा भर प्योकै रेहियां ते फी दाती दे पिता ने उंदे सौहरे स्नेहा पेजेआ जे कुड़ी गी लेई जाओ। उतमचंद लाड़ी लेन कलीठ आये ते रातीं उत्थें गै रेह। बड्डलै दाती दा भ्रा उनेंगी बाहर लेई गेआ ते उंदे कीमती सुन्ने दे गैहने (चैन, कडा, बटन, अंगूठी) आदि दिक्खी उसदा मन बेईमान होई गेआ। उसनै उनेंगी उत्थें गै मारी दित्ता ते बुहटे कन्नै लोथ लमकाई छोड़ी।

दाती दा भ्रा घर परतोआ तां घरैआहले उंदे बारै च पुच्छेया तां ओह बाहने मारन लगी पेआ।

रातीं उतमचंद ने सुखने च दाती गी दर्शन दित्ते ते आखेया तूं रमानै कन्नै सुत्ती दी ऐ ते तेरे भ्राऽ ने मिगी मारी बूहटे टंगे दा ऐ। दाती ने घर सब्भने गी सुखना सनाया ते सब्भै उंदी तपाश करन लगी पे आखिर बूहटे थमां लोथ लब्धी गई। उतमचंद दी लोथ मकवाल आहन्नी गई ते दाती बी कन्नै गै आई गई। ते घरैआहले कन्नै गै सती होई गईयां। अज्ज जिस थाहर दाती ते उंदे पति दे मोहरे स्थापित ने उत्थें गै उंदा संस्कार होआ हा। मरने थमां पैहले दाती ने अपने सौहरियें गी सनाया जे मेरे भ्रा ने गै तुंदे पुतरें गी मारेया इसकरी मेरे सती होने परैन्त मेरे प्यौकियें कन्नै तुस कोई वास्ता नेई रखेयो।

किश चिरै मगरा जिसलै दाती दे सौहरियें नूह पुतरें गी भुल्ली अपनी दुनियां च रुज्जी गै तां दाती ने अपना प्रकोप दस्सेया सारे घरैआहलें गी केई

कश्ट होन लगे तां अबदू जोगी ने अटूठ रोज दाती दे सती होने दे थाहर ब्रत रक्खी उनेंगी विनती कीती जे अपने परोआर पर दया करो। तां दाती ने योगी गी दर्शन दित्ते ते आक्खेया जित्थें में सती होई ही उत्थें मेरे ते मेरे पति दे मोहरे स्थापित करवाओ ते बावा भोतो जिनेंगी में मन्ननी उंदी मेल दे परैन्त औने आह्ले बुधवारें गी मलगोत्रा बरादरी मेरी देहरी पर मेल करे ते मेरी मानता करे। देहरी बनाने थमां लेई अज्जे तगर उत्थें दाती दी पूजा अर्चना पंत करदे न, ते सारी बरादरी इत्थें आई दाती दा आशीर्वाद लेई सुख समृद्धि हासिल करदी ऐ।

०००

दाती गर्बो की देहरी कीर पिंड

दाती गर्बो कोई चार सौ बरे पैहले अपने पति दे कनै सती होईयां हियां। उंदे पति फौजा च नौकरी करदे हे पर उनेगी अपनी धरती कनै बडा प्यार ऐ। इक बारी लड़ाई लग्गी तां उनें बी उस लड़ाई च हिस्सा लैता। लड़ाई च दुश्मनें उंदा सिर धड़ बक्ख करी उनेंगी मारी दिता तां ओह अपना सिर हथेली पर रक्खी घोड़े पर चढ़े ते अपने ग्रां दा रूख कीता जेहड़ा दिव्य शक्ति कारण मुमकन होआ। घोड़ा जिसलै फतुचक थमां लंघा करदा हा तां किश जनानियां उत्थें गोहटे पथा करदियां हियां ओह एह नजारा दिक्खी डरी गईयां ते उसलै गै धड़ घोड़े थमां खल्ल डिग्गी पेआ। ग्रां खबर पुज्जी तां सब्भै उत्थें आई गै। दाती गर्बो बी उत्थें आईयां ते पति दी चिखा च बेही सती होई गईयां।

दाती की जे कक्कड़ बरादरी च ब्होई दियां हियां इस करी कक्कड़ बरादरी दे लोके दाती गर्बो गी कुल देवी दे रूप च मन्नेया। ते जित्थें उंदे पति दा संस्कार होआ ते दाती सती होईयां उत्थें उंदे परोआर आहले लोके इक देहरी बनाई ते दाती ते उंदे पति दे मोहरे दी स्थापना कीती। बिरादरी दे सदस्य पी.एल. ककड़ हुंदे मताबक कोई दो सौ बरे परोआर दे लोक फतुचक्क (पाकिस्तान च) जंदे रेह ते फी की जे बरादरी कीर पिंड रौहदी ही ते देहरी दी सेवा ठीक चाल्ली नेई होंदी ही। इसकरी बरादरी मोहरे कीर पिंड लेई आई ते इत्थें स्थापना करी दिती गई। जिसलै एह देहरी त्रुट्टी गई तां कोई पजांह बरे पैहले बरादरी दे लोके आपूं चा पैहे किट्ठे करी खेतरें बश्कार खुल्ली थाहरा देहरी बनवाई लेई। इत्थें सारी ककड़ बरादरी बरे च दऊं बारी मेल पर मत्था टेकन औंदी ऐ ते दाती दे अगें सीस झुकांदी ऐ।

०००

बून्दा देवी दी देहरी छन्नी हिम्मत

छन्नी हिम्मत तलाऽ उप्पर भंगपथिये महाजने दी शिलाबैंती बून्दा देवी जी दी देहरी ऐ। उंदे प्यौके नंगा ग्रां च हे। बून्दा देवी जिसलै अपने प्यौके गेदियां हियां तां कुडियें कन्नै खेददे होई इदियां चूड़ियां पज्जी गईयां। एह बसगन हुंदे गै उनेंगी आगम होई गोआ जे मेरे घरैआहले दा काल होई गेदा ऐ। पता कराया ता गल्ल सच्ची ही। इनें सती होने दा फैसला कीता तां प्यौकिये नेई मन्ने। बून्दा देवी होरें मरन वर्त रक्खी लैआ तां प्यौकियें सती होने दी गल्ल मन्नी लैती ते उत्थू दा पालकी च पाईयै छन्नी हिम्मत आहदा कुसा ब्रैह्मणे दे घर पालकी तुआरी इने पानी पीने गी मंगेया ते सब्भने गी बल्लगने गी गलाया जे इसलै मेरे घरै दे लोक आमले दे चार कन्नै भठोरे खा करदे न जाओ दिक्खी आओ। गल्ल सच्च ही इसकरी इनेंगी थोहड़ा चिर बलगना पेआ।

शिलाबैंती बून्दा देवी हुंदे दऊं देर हे। बड्डा देर प्रभु महाराजा रणवीर सिंह हुंदे राजदरबार च बाहवे थाहरा दा तसीलदार हा ते बडा पैहे आहला हा। शिलाबैंती दी सती होने आहले दिन ओह घर नेई आया ते अपनी मर्जी कन्नै गै तवी दे कण्ठें इन्दी चिक्ख बनाई दिती पर ओह परमंडल सती होना चाहदियां हियां इसकरी इनें मनमर्जी करने पर देरा गी श्राप दिता तूं अपने गुमान च मेरे दर्शनें गितै बी नेई आया इसकरी तेरी वंशबेल नेई बधग। मास्टर अशोक हुंदे मताबक प्रभु ने दऊं ब्याह कीते पर लोआद नेई होई।

इंदा दूआ देर अवतार शाह इंदे सती होने पर बडा दुक्खी हौआ ते पालकी कन्नै रोंदे-रोंदे परमंडल तगर गोआ। सती ने उसगी बधने दा आशीर्वाद दिता। अज्ज इससै अवतार शाह दा कुल चला करदा ऐ। परमंडल पुज्जी सती होने थमां पैहले इनें शनान करी शिवजी दे मंदर जल चाढ़ेआ, हवन करदे गै अग्नि प्रकट होई ते एह सती होई गईयां। दशैहरे गी इस सती दी देहरी पर यज्ञ कीता जंदा ऐ। उस रोज जम्मू, करथोली, आर.एस. पुरा, भूरे चक्क, रंगपुर, कोट

भलवाल आदि थमां महाजन भंगपथिये ते होर महाजन बरादरी दे लोक बी इत्थें औंदे न ते दाती शा आशीर्वाद ग्रैहण करदे न। भंगपथिये महाजनें दा ब्योत्रे बरादरी कन्नै छिन्ना ऐ की जे सती माता दे प्यौके ब्योगे हे ते उन्नै ब्योत्रे कन्नै साक सरबन्ध नेई करने दी अपने कुला गी हिदायत दित्ती ही।

०००

शकोत्रे ब्रैह्मणे दी शिलाबैंती दी देहरी

नरवाल गां च गै शकोत्रे ब्रैह्मणें दी शिलाबैंती दी देहरी ऐ। बसन्त राम हुंदे मताबक शिलाबैंती दे सती होने दा कारण उंदे घरैआहले दा काल होई जाना हा। जिसलै काल होआ तां उनें सती होने दी मन्शा घरे दे सारे लोके अगें रक्खी पर कोई बी नेई मन्नेया। उंदा निश्चा पक्का हा ओह जर्बदस्ती क्किडे पर लेटी गईयां पर इनेंगी पिच्छें करी दित्ता गेआ। इंदी पक्की जिद्द ही जे में सती होइयै इस कुला थमां अपनी मानता करानी ऐ। घरा च जिसलै इंदी गल्ल पूरी नेई होई तां इनें महाराजा गुलाब सिंह हुंदे कोला सती होने दी सैहमती मंगी। महाराजा होरें उनेंगी पैहले परीक्षा देने गी गलाया तां ओह राजी होई गईयां। महाराज होरें इक उटनी मंगवाई ता पुच्छेया जे इसदे पेट च केह ऐ? तां शिलावैती ने सनाया जे इसदे पेट च बच्चा नेई बल्कि पैहले मरे दे दऊं बच्चे दा सल्ल ऐ। ऊंटनी गी महाराजा दी आज्ञा कन्नै गोली मारी दित्ती गई ते दिक्खने पर पता लग्गा जे उसदे पेट च दऊं गोले बने दे हे। गुलाब सिंह होरें सती होने दी आज्ञा देई दित्ती। सती होने परैन्त इनें अपना कोप दस्सेया ते अपनी मानता शकोत्रे ब्रैह्मणे दे खानदान थमां करोआई।

इंदी देहरी पर गुग्गा नौमी गी यज्ञ कीता जंदा ऐ ते चढ़तल शिलाबैंती दे प्यौके टिक्करी गां कंजकै गी पेजी जंदी ऐ। न्याने दे सुतरे ते खुशी दे मौके इंदे नां दा गुड़ मनसेआ जंदा ऐ। सारी बिरदारी इत्थें मौके-मौके पर अपनी हाजरी लाई मत्था टेकदी ऐ।

०००

विश्वकर्मा वैस दी शिलाबैती दी देहरी

नरवाल वाला ग्रां च “मुण्ड जाति” विश्वकर्मा वैस दी शिलाबैती दी देहरी ऐ। गरीबदास हुंदे मताबक लगभग त्रै सौ बरे पैहले सती दे घरैआह्ला “राजा मंडलीक” दे झुण्डै लेइयै हरिद्वार शनान करन गै तां उंदा कतल रस्ते च कुसा ने करी दित्ता। रस्ते पैदल तय करने पौंदे हे ते कुत्तै-घने जंगल बी औंदे हे। झुण्डै आहले थैले गी चोरे धन जयदाद समझी उनेंगी कत्ल करी दित्ता। जिसलै उंदे कत्ल दी खबर घर पुज्जी तां उंदी लाडी दऊं धीयें समेत सती होई गई।

राडिये ब्रैह्मणे गी इस सती दी देहरी पर जाने दी सख्त मनाही ऐ की जे जिसलै मता चिर सती दे पति नेई परतोए तां उनें कुसा राडिये ब्रैह्मणें गी पता लाने गितै गलाया पर ओह् नेई गेआ।

योगी गी पता करने लेई पेजेआ तां ओह् पता लेई परतोआ। इस्सै करी योगी गी बडी इज्जत दित्ती गई ते सती दे स्थान पर चढ़ने आहली चढ़तर योगी ते जारड़े ब्रैह्मणे गी दित्ती जंदी ऐ।

नर्मी फसल दे अलावा घरा च नमां दुद्ध होने पर बी पैहले इंदे नां दा गै अर्पण कीता जंदा ऐ। इस खानदान गी दुद्ध घ्यो बेचने दी बी मनाही ऐ। अपने थमां निक्की जाति आहले गी दुद्ध पीने गी नेई देई सकदे।

इत्थें देहरी पर न्याणे दे सूतरे, सती दे नां दे दो सूट कंजके गी दित्ते जंदे न ते शुआड चाढ़ेआ जंदा ऐ। कत्ते म्हीने दी पुन्नेआ गी इस बरादरी दी मेल होंदी ऐ ते सारे किट्ठे होई हवन यज्ञ करदे न।

०००

देहरी बुआ तृप्ता



जम्मू थमां त्रीह किलोमीटर दूर चनाऽ पुल थमां त्रै किलोमीटर उतर दिशा आहली भेठा अम्बारां ग्रां ऐ जेहड़ा तहसील अखनूर च औंदा ऐ। इत्थें मंदर च पंज मोहरे स्थापित न। इंदे च इक बुआ तृप्ता दा, दुआ उंदे भ्रा कान्हा दा, त्रीया चौथा मां प्यो दा ते पंजवा उंदी भैन बुआ पोतो दा। पोतो राजे दे मंत्री ते परोहत हंसराज दी पैहली लाड़ी ही। एह् थाहर लगभग दो ढाई सौ बरे पराना ऐ। बुआ तृप्ता नाद जाति दे ब्राह्मणें दी नूह ही ते हून उंदी कुल देवी दे रूप च नाद ब्राह्मण उनेंगी पुज्जदे न।

प्रचलत कहानी मताबक बुआ तृप्ता दे पिता दा नां पलोदा, मां दा भड़ोली ते भ्रा दा नां कान्हा हा। ओह् गौर ग्रां च रौंहदे हे जेहड़ा ब्लाक भलवाल च औंदा ऐ। बुआ दा ब्याह अम्बारां दे छज्जुराम दे पुतर पंत हंस राज कन्नै होआ एह् हंसराज हुंदा औलाद नेई होने करी दुआ ब्याह हा। हंसराज अम्बारां दे राजा दा मंत्री ते कुल परोहत हा। राजा उस पर बडा भरोसा करदा हा। दरबार दे होर मंत्री इस कारण उस पर बडा जलदे हे।

आखदे न जिसलै बुआ पोतो दी निक्की भैन बुआ तृप्ता गी ब्याहईयै हंसराज होर अपने घर पुज्जे तां राजा दा साद्धा आया जे हंसराज गी दरबार

च सद्दे दा ऐ। राजा दा हुक्म पूरा करने गितै हंसराज होरें ब्याहनु कपड़े बदले ते दरबार बक्खी चली पे। राजा कोल पुज्जे तां राजा ने पुच्छेया जे इस मौके जेकर कुसा बी चीजा दी लोड ऐ तां नझक्के होई दस्सो। पंत होर किश बोलदे इस थमां पैहले गै अस्तबल च इक घोडा विटरी गेआ ते फी दिखदे दिखदे गै मती गिनतरी च घोडे विदकी गै खूब रोला पेआ। लोक किट्ठे होई गै। बुआ तृप्ता जेह्ड़ी नमीं लाड़ी ही परेशान हाल अपने भ्रा ते नेयान पता करने गी पेजी, पर ओह उर्थें तमाशा दिखने च रुज्जी गै। बुआ दा फिकरा कन्नै बुरा हाल हा उनेंगी अनहोनी दा शक्क मना च घर करी गेआ। उसलै उर्थें कोई आया ते बोलेया इर्थें तूं लाडी बनी बैठी दी ऐं ते उर्थे तेरे घरैआहले गी कुसा ने मारी दिता ऐ। बुआ ने घडी पल गवाये बिजन सती होने दा फैसला मनोमन कीता ते कोल बलदे दीये कन्नै उनें अपने पंरादे गी अग्ग लाई। कोल गै लकडी दा थम्म हा जेह्ड़ा लट-लट बली पेआ। थम्मा पर नाग देवता हे ओह बी अग्गा च भस्म होई गै। भैनु गी बलदे दिखी भ्रा कान्हा बी अग्गा दे हवाले होई गेआ। इयै कारण ऐ जे अज्ज बुआ दे कन्नै उंदा भ्रा ते नाग देवता गी बी पुजेया जंदा ऐ।

इस पवित्तर थाहरा पर हर बरे चैत्र महीने दे नराते च पैहले सोमवार नाद बिरादरी दे ब्राहमणें दी मेल लगदी ऐ। होर जाति दे लोक बी इर्थें मत्था टेकन औंदे न।

इर्थें इक चार सौ बरे पराना-पीपले दा बुहटा ऐ ते कन्नै गै इक बड्डा तलाऽ हा जेह्ड़ा हून सुक्की गेदा ऐ। इर्थें कोल गै शिवजी दा मंदर बी ऐ।

जोगिन्द्र शर्मा नाद जिनें इस थाहरा दी पूरी जानकारी दिती उनें दस्सेया जे सारी नाद बिरादरी इस थाहरा दे बाद्धे वकास लेई इक जुट होई कम्म करा करदी ऐ।

०००

देहरी बुआ दाती चोआदी

जम्मू थमां कोई 12-14 किलोमीटर दूर चोआदी ग्रामं ऐ जित्थें बुआ दाती दी ते बाबा जी दी देहरी ऐ। इस थाहर मंगोत्रा बरादरी दी कत्ते महीने पुन्नेया गी मेल लगदी ऐ। मंगोत्रा ब्राहमणें दे इलावा होर बी मते लोक इत्थें मत्था टेकन औंदे न।



बुआ दा जन्म पटोली मंगोत्रेयां होआ हा ते ब्याह चोआदी जम्बालें दे ब्राहमणें घर होआ। बुआ दे घरैआहले मां प्यो दी इक्कै संतान ही उंदा परोआर बडा समृद्ध हा ते आले दुआले दे लोक उंदा बडा आदरमान करदे हे। ग्रामं दे साहुकार होने दे नाते ओह लोड़ पौने पर लोके गी मौके पर पुकरदे। कम्म-काज दे सिलसिले च बाबा जी गी अकसर सूजवां दे आले दुआले ग्रामं च बी जाना पौंदा। अजें ब्याह गी किश चिर होआ हा तां उनेंगी ग्राही लेई जाना पेआ तां उने बुआ गी किश रोज प्योके पेजी दित्ता।

अगले रोज ओह चोआदी ग्रामं च जलाहें दे घर पैहे लेन आये तां उनें पैहे देने थमां ना करी दित्ती। बाबाजी गुस्से कनै उंदे घर बेही गै जे जिसलै तगर पैहा नेई देगे में इत्थूं नेई जाना। जुलाहें परेशान हौये दे कोल गै राजपुतें दे घर गैऽ ते सारी गल्ल सनाई ते अपने कनै चलने गी आखेया तां मियां कनै ते नेई गेआ पर आक्खेया जे उस कमजोर ब्राहमणें दा केह तुआलना दऊं धक्के दी मार ऐ। जलाहें ने घर आई बाबा जी गी मारना शुरु कीता ते उंदे प्राण गै लेई ले। उंदी लोथ तलाऽ कोल गै इक गत्ता च दबाई दित्ती। बाबा जी दा कुत्ता सब किश दिक्खा करदा हा। ओह बुआ कोल पटोली जाई पुज्जा। बुआ चरखा कत्ता दी ही पर कुत्ता उनेंगी बार-बार तंद त्रोडी साहरतां करांदा रेआ। बुआ दी मां ने एह दिक्खेया तां गलाया जे खबरै तेरा कैत कुसा मुश्कला च

होए तां गै एह तेरे कोल आया ऐ। बुआ दी मां ने परोहता गी कुड़ी कन्नै जाने गी गलाया तां उनें ना करी दित्ती तां बुआ ने परोहता गी गलाया जे मेरे कुसा बी दिनवार मौके तुगी कोई मूंह नेई लाग। भरजाई गी बी कन्नै चलने गी गलाया तां उनें बी नां करी दित्ती तां बुआ ने गलाया जे में कदे तंुदे मूंह नेई लगगड परतियै इयै कारण ऐ जे मंगोत्रे दियां नूहां नंगे मूह बुआ दे देहरी दे दर्शन नेई करी सकदियां। कोई कन्नै नेई आया तां बुआ कुत्ते कन्नै इक्कली चोआदी आई पुज्जी जित्थें कुत्ते ने अपने पंजें कन्नै मिट्टी पुट्टी ते बाबा जी दी लोथ बाहर कडढी। उसलै बडगोत्रें दे बच्चे उत्थें बकरियां चारा करदे हे। बुआ ने उनेंगी लकड़ियां किठियां करने गी गलाया ते आपूं चिक्ख बनाई। बाबा जी दी लोथ रखी आपूं बी बुआ बेही गेई ते उनें बच्चे गी चिक्खा गी अग्नि देने गितै गलाया। बच्चे पाप अपने सिर लेने थमां ना करी दित्ती पर बुआ दे गलाने पर जे में खुशी-खुशी अपने घरैआहले कन्नै सती होआ करनियां। तुस अग्नि देओ, जेकर मेरी गल्ल मनगे तां तुसेंगी बी मेरे कन्नै-कन्नै आदरमान मिलग। उनें चिता गी अग्नि देई दित्ती। अदूं थमां गै बडगोत्रा परोआर इत्थें पूजा पाठ करदा आवा दा ऐ।

इत्थें इक बडा बड्डा बोहडा दा बुहटा ऐ जेहडा त्रै सौ बरें थमां बी मता पराना ऐ ते छै कनाल जमीन च फैले दा ऐ। इस्सै बुहटे दे हेठ इक मंदर च बुआ ते बाबे दे देहरे स्थापित न। इंदे उप्पर इक फोटो च बुआ गी बाबे कन्नै सती हुंदे दस्सेया गेदा ऐ। मंदरे दे बाहर इक तलाऽ ऐ जित्थें बुआ सती होईयां हियां। इत्थूं दा जल ते शक्कर (मिट्टी) प्रसाद रूप च भक्त ग्रैहण करदे न। इत्थूं दे पुजारी रामदास बडगोत्रा होरें सनाया जे हून इत्थें मता विकास कीता जा करदा ऐ उस लेई इक कमेटी बनाई गेदी ऐ। जेहडे इत्थूं दे कम्म-काज गी समें-समें पर दिखदे न।

०००

कामेश्वर मंदर अखनूर

जम्मू थमां 30 किलोमीटर दूर अखनूर च शिडका दे सज्जे पाससै कामेश्वर मंदर स्थित ऐ। इस मंदर दा वर्णन धार्मिक ग्रंथें च बी लब्धदा ऐ। इसगी महाभारत काल दा मंदर मन्नेया जंदा ऐ। डुग्गर प्रदेश च कामेश्वर महादेव नां कन्नै दो मंदर न। पैहला देवका नदी पर उधमपुर च ते दूआ चंद्रभागा दे कंठै अखनूर च। एह पवित्तर थाहर इक पौराणिक म्हत्व ते रक्खदा गै ऐ पर कन्नै गै लोक आस्था दा बी प्रतीक ऐ। इक लोक कथा मताबक कश्मीर दा राजा बर्बरीक बडा ब्हादर, तेजस्वी दानी ते ज्ञानी हा। कुसै तरीके जिसलै उसगी महाभारत दे कौरव पांडवे बश्कार होने आह्ले युद्ध दी खबर लगगी तां ओह कुरुक्षेत्र चली पेआ। उत्थें पुज्जी जिसलै कृष्णजी कन्नै झत्त होई तां उनें उसदा परिचै पुच्छेआ। परिचे सुनने परैन्त कृष्णजी ने पुच्छेया जे कुसदे बक्खी दा युद्ध लड़ना ऐ। बर्बरीक बोलेआ में सिर्फ युद्ध दिक्खना ऐ, लोड़ पेई तां कमजोर सेना बक्खी दा लड़गा। भगवान बोले अपनी ब्हादरी दा कोई प्रमाण दे। राजा बर्बरीक ने तरकश चा तीर कड़ढेआ ते उसगी कोल गै इक बुहटे पर छोड़ेआ। तीर इक-इक करियै बूहटे दे पत्तरें गी बेधदा गेआ। कृष्ण जी ने इक पत्तर पैरे हेठ छपैली लेआ बर्बरीक बोलेया पैर परें करो नेई तां तुंदा पैर बी बेधी ओड़गा। कृष्ण जी ने झटपट पैर पिच्छै कीता तां तीर ने ओह पत्तर बेधेया ते वापस तरकश च गेआ उठी। भगवान बोले मिगी तेरी ब्हादरी पर हून कोई शक नेई। पर जेकर तेरे थमां किश मंगा तां देगा। उसदे हां करदे गै कृष्ण जी ने उस थमां उसदा सिर मंगी लेआ। राजा बोलेया प्रभु में ते युद्ध दिखना हा तां एह कियां संभव होग? भगवान ने उसगी भरोसा दित्ता जे ओह उसगी युद्ध जरूर दस्सडन पर ओह लडी नेई सकग। बर्बरीक ने प्रार्थना कीती प्रभु मेरा धड़ मेरी मां गी पेजी दित्ता जा। भगवान ने धड पजाने दी व्यवस्था लेई हां कीती ते बोले जेकर रस्ते च किश होई जाग तां? बर्बरीक ने अपना सिर भगवान गी भेंट कीता। कृष्ण जी ने उसदी आत्मा गी सिरै च रखेया ते सिर

उच्ची थाहर रखी दित्ता तां जे ओह युद्ध दिक्खी सके। उसदा धड़ घोडे पर कश्मीर लेई पेजी दित्ता गोआ।

घोडा अखनूर पुज्जा। जित्थें अज्ज मंदर ऐ उत्थें कन्नै गै इक तलाऽ बी हा जित्थें लोक नहा करदे हे जिसलै उनें धड़ दिक्खेया तां ओह धरती पर डिग्गी गोआ। लोक दिक्खने गी अगडे हौये तां उत्थें त्रै पिंडियां उभरी आईयां। इक पिंडी राजा बर्बरीक दी, दूई घोडे दी ते शिवजी दा तबीत जेहड़ा राजा दे गले च हा ओह बी पिंडी बनी गोआ। जिसलै राजा दे परोआर ते कश्मीर दे लोके गी पता लग्गा तां ओह अखनूर आये ते पिंडियें दी खुदाई शुरु कराई तां जे कश्मीर लेई जाई सकन। पर उनेंगी सफलता हत्थ नेई लग्गी। राजा इक रोज सुखने च आया ते उनेंगी वापस परतोने गी गलाया जे मेरी इच्छा इत्थें गै रौहने दी ऐ अपने घोडे ते भगवान शिव दे कन्नै सारे वापस कश्मीर परतोई गै।

आखदे न राजा दा नां कामराज बी हा। कीजे भगवान शिव ने उसगी वचन दित्ते दा हा जे उसदा नां भगवान शिव दे नां कन्नै जुडग इसकरी इस पवित्तर थाहरा दा नां कामेश्वर प्रसिद्ध होआ। भगवान शिव दा इक नां कामेश्वर बी ऐ।

इक दंत कथा मताबक पांडवें अज्ञातवास मौके इत्थे गै राजा विराट दे दरबार च भेस बदलिये नौकरी कीती ही। इस नगरी गी मत्स्य नगरी बी आक्खेया जंदा हा।

इत्थूं दे लोके दी इस मंदर च बडी आस्था ऐ। इत्थें आई लोक अपनियां मुरादां मंगदे न। लोके दा विश्वास ऐ जे 16 सोमवार लगातार इत्थें आई पुजा कीती जा तां मनै दियां सब्भै आशा पूर्ण होंदियां न।

०००

राधा-कृष्ण मंदिर बकौर

अखनूर थमां 22 किलोमीटर दूर चनाऽ दे कंढे ग्रां बकौर दा राधा-कृष्ण मंदर लोके दी आस्था दा थाहर ऐ। इक दंद कत्था मताबक बकौर राजा विक्रमादित्य दे राज च औंदा हा। इस मंदर च श्री श्री 1008 बाबा मौनी जी महाराज दी गद्दी ऐ। वर्तमान महंत केशवदास शास्त्री हुंदे मताबक इस गद्दी दे संस्थापक श्री 1008 बाबा मौनी जी महाराज हे। ओह पैह्ले लहौर रौंहेदे हे पर किश कारणें करी इत्थें आई गै। सन 1656 च उनें बकौर ग्रां च मंदर बनोआया। ओह सिद्ध पुरश हे। अपने भक्तें गी ओह केई बारी चमत्कार दस्सदे हे। इक कथा मताबक इक बारी बाबा जी कोल इक महात्मा घोडे पर आए ते उनेंगी बी आक्खेया जे चलो छिन्ज दिक्खन चलचै। बाबा जी ने कंघा गी अड्डी लाई तां कंघ चलन लगी पेई। महात्मा ने दिक्खेया तां ओह उंदे चरणें च डिग्गी ऐ। इक बारी उंदे कोल साधुएं दा टोला आया ते उनें बाबा जी बी फरमैश कीती जे दुद्ध पीना ऐ ते लौंगे दी धूनी सेकनी ऐ। बाबा जी ने उनेंगी दुद्धे दा गड़वा दित्ता सभ्भने बारी-बारी दुद्ध पीता पर आखिर च गड़वा दुद्ध कन्नै भरोचे दा गै रेहा। बैरी दा बूहटा घोलेया तां लौंगे दा सथर लग्गी गेआ। ओह सारे साधु मौनी बावे थमां बडे प्रभावत हौये।

इक बारी बकौर मंदर च चोर चोरी करन आये तां अंदर जंदे गै अ'न्ने होई गै। सवेरे मौनी बावे थमां माफी मंगी तां उनेंगी लौ लग्गी।

बकौर मंदर अज्ज बी लोके दी आस्था दा थाहर ऐ।

०००

मंदर गुफा पीर खोह

त्रेताजुग च जिसलै भगवान श्री रामचन्द्र जी दा अवतार होआ। बाल काल बीतने परैत जोआनी च उनेंगी जिसलै 14ऐं बरें दा बनवास होआ तां लक्ष्मण सीता बी उंदे कनै गैऽ। वनवास दौरान रावण ने माता सीता दा हरण करी लेआ तां जंगलें च राम लक्ष्मण जी दी मदद केई जनें कीती माता सीता गी लंका थमां वापस आहने लेई उंदे च जामवंत जी बी शामिल न। ओह राम रावण युद्ध च भगवान राम जी दी सेना दे सेनापति हे। युद्ध खत्म होआ तां जामवंत जी बोले प्रभु सभने गी अपनी वीरता दस्सने दा मौका थोआ पर मिगी नेई। उसलै भगवान राम बोले तेरी मना दी इच्छा जरूर पूरी होग, जदूं द्वापर युग च में कृष्ण अवतार लेंग। जामावंत जी केई बरे पीर खोह गुफा च भगवान दी तपस्या करदे रेह ते जदूं जुग बदलोआ तां उनेंगी पता बी नेई लगगा। इक कथा मताबक राजा सगजीत सुरज भगवान दा परम भक्त हा। उसदी भक्ति थमां खुश होई सुरज देवता ने उसगी प्रकाशमणि भेंट दिती।

राजा दे भ्रा ने मणि चराई लेई, जंगल च उसगी शेर ने दिखेया ते उसगी मारी मणि खुस्सी लेई। जामावंत उत्थूं जारदे हे उनें शेर गी मारी मणि हासिल करी लैती ते अपनी गुफा च लेई आए। राजा ने मणि चोरी होने दी घोषणा कीती जे कृष्ण जी ने मणि चराई ऐ। कृष्ण जी मणि दी तुप्पा च जामावंत गुफा कोल पुज्जे, उंदी कुड़ी कोल मणि दिक्खी ते जामावंत गी युद्ध लेई ललकारेआ। केई दिन युद्ध चलेया पर कोई नेई हारेआ दौने लड़दे रेह। अखीर च जामावंत होरें पुच्छेया तुस कुन ओ अपने असल रूप च आओ। तां विष्णु अवतार कृष्ण ने उनेंगी दर्शन दिते ते जामावंत जी धन्न होई गै। की जे युद्ध च कोई नेई हा हारेया इस करी जामावंत ने मणि कोल रखी ते प्रभु गी अर्ज कीती जे मेरी धीयु कनै ब्याह करो। ब्याह परैन्त जामावंत ने मणि दाजा च दान दिती। कृष्ण ने मणि राजा सगजीत गी ओह उंदे चरणें आई डिग्गा ते अपनी धीऽ सत्य भामां दा ब्याह कृष्ण जी कनै कीता ते मणि दाज च दिती।

इस चाल्ली इस गुफा दा खास महत्व ऐ जामावंत जी ने केई सौ बरे इस गुफा च प्रभु दी तपस्या कीती। इत्थें गुफा च इक शिवलिंग स्थापित ऐ जिसदी बनावट हुबहु रुद्राक्ष दे मनके आंहर ऐ। आक्खेया जंदा ऐ जे इयै जनेहा शिव-लिंग होर कुसा बी मंदरे च नेई ऐ। लोके दा मत ऐ जे इस शिवलिंग दे साम्मने दा इक गुफा निकलदी ऐ जेहड़ी अमरनाथ तगर जंदी ऐ। गुफा दा दरवाजा लगभग पंज सौ बरे पैहले राजा ने बंद करवाया हा। तां जे कोई अनहोनी नेई घटे। राजा गुलाब सिंह दे समें थमां इत्थे नाथ सम्प्रदाय दे पंत पुजा पाठ ते दिक्ख-रिक्ख करा करदे न।

०००

हनुमान मंदर गोलपुली जम्मू

तलाब तिल्लो दा हनुमान मंदर प्राचीन मंदरें च इक ऐ। इसगी कदूं ते कुस नै बनवाया इसदा कोई लिखत प्रमाण नेई ऐ। लोके दा आक्खना ऐ जे मंदर जम्मू दे कुसै राजे ने बनवाया होना। कोई ऐसा संकट आया होग जिस थमां लोके गी बचाने लेई संकट मोचन मंदर बनवाया गेआ होना। पराने समें च तलाब तिल्लो दा सारा लाका जंगल हा। बडे घट्ट लोक इत्थें रौंहदे हे। इक बारी कोई अपनी धरती पर खुदाई करा करदा हा तां हनुमान जी मंदर दा उप्परला हिस्सा नजरी आया किश होर खुदाई कीती तां निक्की ईटें कन्नै बने दा एह् मंदर निकलेआ। लोके आले दुआले साफ सफाई कीती ते मंदरे च पुजा शुरु कीती गई। मंदर कोल इक खूह बी हा जिसदा पानी इस लाके दे लोक पीने दे कम्म ते पुजा लेई इस्तेमाल करदे हे।

इत्थें गै धर्मराज, चित्रगुप्त ते यमदूतें दियां मूर्तियां बी कंधां पर बनाई गेदियां न। सब्भै मूर्तियां जयपुर थमां आहनियां गेदियां न। इत्थें रघुनाथ मंदर दे कोल इक होर निक्का मंदर ऐ जिस च राधाकृष्ण, मां दुर्गा ते हनुमान जी दियां मूर्तियां स्थापत न।

इयां ते भक्त इत्थें रोज औंदे न पर पर्वे पर जियां जन्म अष्टमी, रामनौमी, नरातें, शिवरात्रि ते हनुमान जयंती पर इत्थे भक्तें दी मती भीड़ हुंदी ऐ। इत्थें भक्त श्रद्धा भाव कन्नै जग हवन दा सरिस्ता बी करदे न। इस पराने मंदर दी मरम्मत पंडित बशम्बर दास होरें करोआई। लोकें गी इस मंदर पर अनत्रुट्ट भरोसा ऐ। लोकें दा विश्वास ऐ जेकर कुसा दा ताप नेई त्रुट्टे तां उसदे गले च इक ठीकरी हनुमान जी दी मूर्ति कन्नै लाईये पाई जा तां ताप त्रुट्टी जंदा ऐ।

इस मंदर च बंसी आहले बाबा बी रेह जेहडे हनुमान जी दे परम भक्त

हे। उनें मंदर दे वकास लेई बड़े कम्म करोआए। उनें इत्थें बाग लाया जिस च फल फुल्ल लाए गै। फल भक्तें गी ओह् प्रसाद रूप च दिंदे ते फुल्ल हनुमान जी गी अर्पण करदे।

इत्थूं दे लोकें दा मनना ऐ जेकर चालीं दिन कोई दीया जला तां उसदी मनोकामना जरूर पूरी हुंदी ऐ। 2002 च इत्थें भक्तें आसेया चढाई गेदी चढतल आहले पैहे कन्नै रघुनाथ जी दा मंदर बनवाया गेआ जिस च श्रीराम, सीता लक्ष्मण ते हनुमान जी दियां मूर्तियां स्थापत कीतियां गेईयां।

०००

मंदर शीतला माता - आर.एस. पुरा

जिला जम्मू दे आर.एस. पुरा थाहरा पर शीतला माता दा इक पराना मंदर ऐ। इत्थें माता दा वास कदूं होआ इसदी पूर्ण जानकारी कुसा गी नेई। पर लोकें मताबक केई चिर पैहले आर.एस. पुरा दे स्व. लाला मिलखी राम होरे गी माता ने सुखने च दखाला दिता जे उस थाहर मेरी पिंडी ऐ। मता घाऽ बगैरा उगने कारण ओह केई चिरे दी धरती च अदृश्य होई गेदी ऐ। माता ने उनेंगी उस थाहर सफाई कराने ते उंदा थाहर बनाने दी आज्ञा दिती। लाला होरें माता दे दस्से मताबक उस थाहरा दी तपाश कीती ते पिंडी लब्धी जाने पर उत्थें रंगपुर दे मिस्त्री खजान चंद थमां देहरी बनवाई। जेहड़ी अकार च मती निक्की ही ते उत्थें दऊं त्रै लोक गै बेही सकदे हे। शुरू च इत्थें बडी घट्ट गिनतरी च लोक औंदे हे पर हून भक्तें दी गिनतरी मती बधी गेदी ऐ। इत्थें ओह बमार जिनेंगी माता निकली दी हौए औंदे न ते ठंडे पानी दे शिटे देई ठीक होई जंदे न।

इत्थें भक्त नमां अनाज औने पर पैहले माता गी भेंट करदे न। नरातें च बी इत्थें भक्तें दी बड़ी रौहल होंदी ऐ।

हून इसलै इत्थें बड्डा मंदर ऐ जिस च लक्ष्मी नारायण, राधा कृष्ण, शिव परिवार ते दुर्गा दियां मूर्तियां न। माता शीतला दी मूर्ति गी लाल कपड़े ते गैहनें कन्नै बड़ा शैल सजाया गेदा ऐ। मूर्ति कोल खल्के पाससै माता दी पिंडी ऐ, जित्थें लोक जल चाढ़दे न। दिनें तेआरें गी इत्थें खूब चैहल-पैहल होंदी ऐ।

०००

पराना शिव मंदिर-रूप नगर

शैहरा दी भीड़ थमां दूर इक पराना शिवर मंदर हा जित्थें बडे घट्ट लोक जंदे हे। की जे घना जंगल होने करी उत्थें कोई नेई रौंहदा हा। किश लोक जेह्दे पशु पालने दा धंधा करदे हे उयै उत्थें कच्चे कोटु पाई रौंहदे हे। एह थाहर अज्ज पूरी चाल्ली भीड़ आह्ला ऐ ते इसदा नां ऐ रूपनगर। रूपनगर च स्थित इस मंदर बारे आक्खेया जंदा ऐ जे इक चरोआल रोज जंगले च अपने डंगर चारदा पर इक मंझ रोज घर आई भलेयां दुद्ध नेई दिंदी। इक दिन चरोआले ने मंझा दा पिच्छा कीता ते दिक्खेया जे उसदा दुद्ध आप मुहारा इक शिवलिंग पर डिग्गा करदा ऐ ते उस च पूरी चाल्ली समाई जा करदा ऐ। चरोआले गी बड़ा गुस्सा आया ते उसने शिवलिंग पर कुहाड़ी कन्नै फट्ट मारेया तां शिवलिंग केई थाहरें दा त्रुट्टी गेआ। ते उस थमां खून निकली पेआ ते कन्नै गै ॐ नमः शिवाय ते हर हर महादेव दी बाज सारे जंगले च गूजन लगी पेई। फट्ट मारने आह्ला अन्ना होई गेआ ते उसदा घर बी फकोई गेआ।

इस चमत्कार दी चर्चा लोके च पुज्जी ते फी इक दिन महाराजा प्रताप सिंह दे दरबार च बी पता लग्गा जे सथरे पलौड़ा च आप शम्भू प्रगट होयै दे न। महाराजा ने अपने सेवके गी पूरा पता लाने गी आक्खेया। ओह जिसलै परतोए तां उनें राजा गी सारी गल्ल सनाई ते कन्नै आक्खेया जे जंगल होने करी उत्थें कोई नेई औंदा जंदा। शिवा जी दी पूजा कियां होग ? महाराजा प्रताप सिंह गी जानकारी थ्हांदे गै उनें गलाया जे शिवलिंग शैहर लेई आओ ते इत्थें मंदर बनवाईयै स्थापित कीता जा। राजा दी आज्ञा मताबक खुदाई दा कम्म शुरु कीता गेआ पर केई रोजें परैन्त बी शिवलिंग बाहर नेई निकलेआ। राजा गी सारी गल्ल सनाई गेई तां राजा आपूं उत्थें शिवजी गी प्रार्थना करन गै जे इत्थें जंगल च तुंदी सेवा कु'न करग तुस शैहर चलो। प्रार्थना परैन्त महाराजा प्रताप सिंह परतोई आए।

रातीं सुखने च शिवजी ने महाराजा प्रताप सिंह गी दर्शन दित्ते ते गलाया जे जंगले च रौहना मिगी प्रिय ऐ तुस अपने लोक वापस सद्दी लाओ। इक दिन इत्थें गै मेरी खूब पुजा होनी ऐ। महाराजा ने कम्म रोकी दिता।

बल्लें-बल्लें लोकें गी इस थाहरा दा पता लगा तां ओह इत्थें औना शुरु होए। इस थाहरा दा पराना नां शिवस्थान सथरे पलौड़ा ऐ। हून इत्थें ज्हारें बद्धे लोक मत्था टेकन औंदे न ते श्रद्धालुयें दी म्हेशा भीड़ रौहन्दी ऐ।

०००

महालक्ष्मी मंदर बाहु फोर्ट

एह मंदर कोई बडा मता पराना मंदर नेई। इसगी 1970 च बाबा सिद्ध जी राव होंदे आक्खने पर बनाया गेआ। बाबा सिद्ध गी राव कर्नाटक दे रौहने आहले हे। गृहस्थ आश्रम दा त्याग करी ओह साध संगत च मग्न रौहदे ते देश दे कोने कोने च तीर्थ करने गितै जंदे। अमरनाथ यात्रा करने गितै ओह किश साधु महात्मा दे साथे रियासत जम्मू कश्मीर च आए। अमरनाथ यात्रा करने परैन्त ओह जम्मू परतोए तां उनेंगी इत्थूं दा शांत वातावरण बडा मनचित लग्गा ते उनें इत्थें गै बसने दा फैसला मनोमन करी लेआ। उनें अपने कन्ने आये दे साधुयें गी बी इत्थें रौहने दा सुझाऽ दिता पर ओह परतोई गै। केई चिरै तगर ओह रघुनाथ मंदर च रेह ते फी बाहुफोर्ट आई बडडे जनैह बुहटे हेठ अपनी कुटिया बनाई ते रामनाम च मग्न होई गै। शाम सवेरे भक्त उंदे कोल औंदे ते बाबा जी लेई फल रुट्टी आदि बी लेई औंदे। हर मौसम च ओह अपनी कुटिया च प्रभु भक्ति च खुश रौहदे। उनें गवा बी र्क्खी दियां हियां ते आपूं गौ सेवा करदे। उंदे भक्त गर्मी सर्दी बरखा च जिसलै उंदे कोल औंदे तां उनेंगी बडा दुक्ख हुंदा। भक्तें दा कष्ट दिक्खी बाबा जी ने मंदर बनवाने दा फैसला कीता। लोके मंदरें लेई पैह् किट्ठा कीता ते जमीन उनेंगी दान च थहोई गई। 1970 च मंदर बनना शुरु हौआ ते 1976 च मंदर पूरा बनी गेआ। ते फी इत्थें महालक्ष्मी दी मूर्ति स्थापित कीती गई। अज्ज भामें इत्थें ब्रह्मा, विष्णु, महेश, सीता, राम, लक्ष्मण, शिव परोआर आदि दियां केई मूर्तियां इत्थें स्थापित न पर पैहले लक्ष्मी माता दा गै मंदर बनाया गेआ हा।

125 बरें दी उमरी च बाबा जी सुर्ग सघारे तां उंदी समाधि मंदर दे प्रवेश द्वार कोल गै बनाई दिती गई।

अज्ज बी मती गिनतरी च भक्त ते साधु महात्मा इत्थें औंदे न। कोई साधु महात्मा जेकर इत्थें रौहना चाह तां उनेंगी इत्थें कमरे बी दिते जंदे न।

०००

बुआ ज्योति दी देहरी

बुआ ज्योति दी देहरी नानक नगर च राजकुमार दे घरै च ऐ। आक्खदे न जे बुआ ज्योति होर त्रै भैना हियां ते घरै च खूब गरीबी ही। इक बारी बुआ ज्योति बमार होई तां तंगी कारण उंदा इलाज शैल चाल्ली नेई होई सकेआ ते पैहे दे अभाव च गै उंदी मौत होई गई। उंदी माता हर बैल्ले उनेंगी चैता करी-करी रोंदी रौह्दी। केई चिरै मगरा बुआ ने घरैआह्ले गी जगाऽ दित्ता ते अपना थाहर बनाने गी गलाया। उंदी माता गी चौकी औन लगी पेई। चौकी च बुआ खेढने गी खढोने दी मंग बी करदी उंदा थाहर बनाई उत्थें उंदा मोहरा स्थापित कीता गेआ ते हर बरे नराते च रामनौमी गी उंदे थाहर पर खास करी कन्या पूजन कीता जंदा ऐ ते भंडारा बी कीता जंदा।

०००

माता सीता देवी दी देहरी

माता सीता देवी दी देहरी सेक्टर त्रै नानक नगर जम्मू च स्थित ऐ। सती माता सीता ने कुसा घरै दे माहनू दे लच्छन लाने पर दुक्खी मनै कन्नै आपूं गी अग्नि दे हवाले करी दित्ता। परोआर च उंदी मरने दी घटना गी लोके सामने गलत तरीके कन्नै ब्यान करने पर माता ने रुष्ट होई घरै दे लोके गी जगाऽ दित्ता ते अपनी सेवा च हाजर होने दा हुक्म दित्ता। माता ने अपने लेई थाहर बनाने गी बी गलाया। उंदी भरजाई गी चौकी औन लगी पेई। उंदी भरजाई जेहड़ी प्यौके रौंहदी ही उनें उत्थें गै सती माता दा थाहर बनाया। हून सौहरे ते प्यौके दमें सती गी पुजदे न। हर बरे उंदी देहरी पर हवन यज्ञ कीता जंदा ऐ। सारा परोआर बरादरी किट्ठे होई भंडारे दा बी सरिस्ता करदे न।

०००

मां ध्यानी मंगला देवी

मां ध्यानी मंगला देवी दी देहरी अखनूर रोड़ उप्पर स्थित ऐ। एह देहरी पैहलै मीरपुर यानि पाकिस्तान अधिकृत खेत्तर च ही। कीजे एह 'चौगा महाजन बरादरी' दी कुल देवी ऐ। जिसनै अपनी बरादरी दी रक्खेआ गितै अपनी ते अपने दौनें जागतें दी बलि देई ओड़ी ही। ते फही सती होने परैन्त देवी ने महाजन बरादरी दे किश लोकें गी जगाऽ दित्ता जे उं'दा स्थान बनाया जा तां इस बरादरी दे लोकें किट्ठे रलियै सलाह कीती ते सती मंगला देवी दी देहरी उस मौके पाकिस्तान च गै बनाई ओड़ी ही पर देसै दी बंड परैन्त इस पाससै आई बस्से दे लोकें दा तुआंह जाना औक्खा हा तां इस बरादरी दे लोकें उत्थुआं मोहरे चुक्के ते बक्शी नगर च टकाई दित्ते पाकिस्तान चा मोहरे आंदे ते इत्थै गै रक्खी दित्ते।

सती ने फही चौकी च अपने कुलै दे लोकें गी आखेआ जे कोई खु'ल्ली जनेही थाहर लेइयै उसदे मंदर दा निर्माण कीता जा। फही महाजन बरादरी ने किट्ठे रलियै सलाह कीती ते होर जमीन खरीदियै मंदर निर्माण दा कम्म रम्भी टकाया जेहड़ा अजें बी चला करदा ऐ।

सती मंगला देवी दी मेल हर बरै दशहरे आहले रोज लगदी ऐ। इस रोज महाजन बरादरी दे सब्भै लोक किट्ठे होइयै देवी दी पूजा अर्चना ते चौकी दे इलावा लंगर बी लांदे न।

०००

बुआदाती-बनी सहारन

जम्मू थमां 20 किलोमीटर ते गजनसू थमां त्रै किलोमीटर दूर बनी सहारन च बुआ दाती दी देहरी ऐ। बनी शब्द इत्थें वन दा प्रयाय ऐ। इत्थें बडे घने बूहटे न। थाहर दिक्खने गी बडा मनभावना ऐ। इत्थें गै बशपरिया बरादरी दी कुलदेवी बुआदाती दी देहरी ऐ। इत्थें बुआ, उंदे घरैआहले ते कुड़ी दे मोहरे स्थापत न।



इत्थें बुआदाती दी देहरी दे कन्नै-कन्नै केई होर जातियें दे कुल देवतायें दे मंदर ते देहरियां बी बनी दियां न।

गरधारी लाल डोगरा हुंदे मताबक दाती दे पति बावा विद्दो बडी ब्रैहमणा कोल ग्रां बाजपुर च रौंहदे हे। ओह बडे मेहनती ते सच्चे स्थाऽ आहले माहनू हे। जित्थें बी कम्म करदे मालक उंदे कम्में कन्नै बडे खुश हुंदे। इक बारी ओह जस्वां परयाल ग्रां च कम्मा लेई गेदे हे। उत्थें मता चिर लग्गा तां उनें मालके कशा छुट्टी लेई ते घरै गी जाने दी तैय्यारी कीती। मालकें उनेंगी चांदी दे सिक्के दित्ते। ओह अपने घोडे पर चली पे। कुसा गी उंदी दौलत बारै पता लग्गा तां ओह उंदा पिच्छां करदे होई जंगल दे रस्ते च पुज्जे ते बावे दा कल्ल करी पैहां लेई लेआ। उंदी मुंडी उत्थें डिग्गी गई ते लोथ घोड़े पर अगमें पुज्जी गई। उंदी लाड़ी घर निक्की धियु कन्नै उंदी निहालप करदी रेही पर ओह नेई आए। रातीं बुआ गी नींदर पेई तां सुखने च उनेंगी घटना दा एहसास हौआ। बुआ उनेंगी तुप्पन चली पेई, निक्की धियु गी बी कुसा नेई रखेया तां बुआ उसगी बी कन्नै लेई गई। तपाश मगरा बुआ उस थाहर पुज्जी बावे दी मुंडी ते लोथ इक थाहर रक्खी चिखा बनाई ते आपूं बी सती होने गी तेआर होई कुड़ी गी किश दूर रखी। चिता गी अगग लाई बुआ बावे कन्नै सती होई गई

ते कुड़ी उत्थें गै धरती च समाई गई उसदी चादरा दी चूक जिस पर उसगी रखे दा हा बिंद जनैही बाहर रेही।

त्रौनें दी मौती मगरा कुला दे लोके दा बुरा हाल हौआ उनेंगी हत्या दा दोश लगगा। इक चले ने उनेंगी सती होने आहले थाहर दी तपाश करने ते उनेंगी मनाने गी आक्खेया। सारे कुल ने किट्ठे होई ओह थाहर तुप्पेया ते देहरी बनाई उत्थें उंदे मोहरे रखे ते उनेंगी मनाया।

इस पवित्र थाहरा पर हून बरें च दो बारी मेल होंदी ऐ। इक बारी कत्तें म्हीने दी पुनेया गी ते दुई बारी हाड़ म्हीने पुनेया गी। दुए प्रदेशे रौहने आहले बाशपरिया बरादरी दे लोक बी इत्थें औंदे न। देहरी च रखे दे मोहरें ते सौंगलें दी पुजा थमां पैहले भक्त इत्थें बौली च स्नान करदे न।

जिनें लोके बावे दी हत्या कीती ही उनें जातियें कन्नै बाशपरियें कोई मेल मलाप नेई रखदे। मन्नी जाति च बाशपरिये ब्याह नेई करदे। दाती दा सरबंध मन्नी परोआर कन्नै गै हा।

एह स्थान भामें बाशपरिया लोके दा ऐ पर होरनें जाति दे लोके दी आस्था दी इसदे प्रति घट्ट नेई। बडी भक्ति भावना कन्नै सब्भै इत्थें अपना सिर झकांदे न।

०००

राजा मंडलीक

राजा मंडलीक (गोगा जी) दा इक पवित्र थाहर जम्मू थमां 14 किलोमीटर दूर जम्मू घरोटा अखनूर शिड़का पर भलवाल जेल थमां अगें पुरखू जाने आहली शिड़का दे सज्जी दिशा च बसे दे इक निक्के जनैह् ग्रां काला काम च ऐ। इत्थें राजा मंडलीक गी बेहडे आहला बावा बी आक्खदे न। इत्थें कोई पंज सौ बरे पराना बैहडे दा बूहटा ऐ। लोक विश्वास ऐ जे राजा मंडलीक ने डुगगर प्रदेश भ्रमण दरान इस बुहटे हेठ किश चिर अराम कीता हा। इस्सै थाहरा पर राजा मंडलीक दे मोहरे, पिंडियां, झुंडे ते उंदा बडा बड्डा फोटू रखे दा ऐ। कोल गै बैहडे दा प्राचीन बुहटा ऐ जिस पर कोई फल नेई लगदा पर म्हेशा हराभरा रौहदा ऐ। इत्थूं दे लोके मताबक इस बुहटे पर इक बारी गै कोई बडा बड्डा फल लगगा हा। इस थान कोल लगदी धरती थमां कोई लकड़ी नेई लेई सकदा। कोई माहनू जेकर लकड़ी ले तां ओह सप्पें च बदली जंदी ऐ।

उयां ते राजा मंडलीक दे जम्मू च मते थान न पर कालेकाम दा एह थान मते लोके दी श्रद्धा दा थाहर ऐ। बैहडे दे बुहटे हेठ राजा मंडलीक ते उंदे बजीर नाहर सिंह ते कालीवीर दा अराम करने कारण गै लोक इसगी बैहडे आहले बावे दा थान करी कुआलदे न। इस थाहरा कन्नै केई कनाल जमीन लाई दिती गेदी ऐ जिस पर वकास दियां केई योजना भक्त बना करदे न जिस कन्नै इस थाहरा दा बोध वकास होई सके। इत्थें जन्माष्टमी दे अगले दिन गोगा नौमी गी बड़ा बड्डा भंडारा होंदा ऐ। लोक बडी श्रद्धा भावना कन्नै पुजा अर्चना करदे न ते बावे दे गुनगान करदे न।

०००

बाबा प्रागण नाथ जी



बाबा प्रागणनाथ जी दा पवित्र थाहर नानक नगर जम्मू च ऐ। इत्थें बाबा जी दी मूर्ति स्थापना कीती गेदी ऐ। मूर्ति दे सामने बाबा जी दियां खडामां ते शालग्राम रखे दे न। बाबा प्रागणनाथ जी बाबा सहजनाथ जी आंहगर गुरु गोरखनाथ दे चेले हे। उनें अपनी गुरु आज्ञा पर चलदे होई प्रभु भक्ति कीती। बाबा जी रोमेत्रा बरादरी दे कुल देवता न पर होर बी मते लोक उंदे मत्था टेकने न ते उंदी शिक्षा पर चलदे न।

बाबा जी दी बड्डी गद्दी दरंगला जिला गुरदासपुर पंजाब च ऐ। किश होर थाहरें बी बाबा जी दे मंदर बनाए गेदे न जिंदे च आर.एस. पुरा भूलोचक ते नौशैहरा राजल च ढाई किलोमीटर दूर बाबा जी दा मंदर ऐ। थापा बरादरी ने बाबा जी दी समाधि बागवस्सी बड़ी ब्राहमणा च बनाई दी ऐ। इत्थें आहड़ महीने पुन्नेया गी थापा बरादरी दी मेल लगदी ऐ जित्थें पंजाब दिल्ली ते होर केई थाहरें थमां थापा बरादरी दे लोक औंदे न।

नानक नगर बाबा जी दे स्थान पर बरे च दो बारी मेल लगदी ऐ। आहड़ म्हीने बड्डी ते कत्ते म्हीने पुनेया गी निक्की मेल लगदी ऐ। कथा मताबक रोमेत्रा बरादरी दियां कुड़ियां बाबा जी दी मूर्ति दे दर्शन ते पुजा नेई करी सकदियां। रोमेत्रा बरादरी दी कुड़ी गै बाबा जी दी मौत दा कारण बनी ही।

श्री दयाराम रोमेत्रा होरें बाबा प्रागणनाथ हुंदे बारै इक कताब लिखी दी ऐ जिस च बाबा जी दे चमत्कारे दा बी जिक्र कीते दा ऐ। उंदे मताबक गुरु गोरखनाथ हुंदी आज्ञा कनै बाबा सैहजनाथ स्यालकोट ते बाबा प्रागणनाथ चपराड़ जिला स्यालकोट चली गै। चपराड़ बडी शैल थाहर ही जिस करी बाबा जी ने उत्थें गै कुटिया बनाई रौहना शुरु करी दित्ता। आक्खदे न उनें नाले कंढे बागें च बडें दे बुहटे हेठ कुटिया बनाई ते उत्थें रौहन लगी पे तां ओह बुहटा हराभरा होई गेआ। लोकें उंदा चमत्कार दिक्खेया तां उंदे औन लगी ऐ। इक बारी बाबा जी ने समाध लाई दी ही तां उत्थूं चोर लंघे उनें बाबा जी गी मत्था टेकेया ते गलाया जेकर चोरी करने च सफल होए तां तुसेंगी बी किश चाढगे। रोमेत्रे शाह दे घर चोरें चोरी करी लेई ते वापसी पर बाबा जी कोल गै तां बी ओह अपने ध्यान च समाधि लाई बैठे दे हे। चोरें उनेंगी इक चोरी कीते दा शाल लपेटेआ ते चली गे। बड्डलै रोमेत्रे दी धीऽ जिसदा ओह शाल हा, उसनै दिक्खेया तां गुस्से च लाल होई दी गेई ते समाधि लाए दे बाबा जी गी धक्का कराया तां ओह परलोक सधारी गै। किश चिरै परैन्त रोमेत्रा परोआर पर केई मुश्कला औन लगी पेईयां। उनें बडे उपाऽ कीते पर कोई फर्क नेई पेआ तां कुसै सेयाने ने उनेंगी सनाया जे तुस बाबा जी गी मनाओ ते उंदा थाहर बनाओ। उनें मंदर बनाई बाबा जी दे मोहरें दी स्थापना कीती। हवन यज्ञ कीता तां बाबा जी दी क्रोपी शांत होई। बाबाजी दा पराना मंदर ते पाकिस्तान चपराड़ च गै रेही गेआ तां दुआ दरांगला गुरदासपुर च बनाया गेआ। अज्ज बी उत्थें कत्ते म्हीने दी पुनेया गी बडी बड्डी मेल लगदी ऐ। ते जम्मू थमां बी लोक उत्थें जंदे न।

०००

बाबा अम्बो जी

जम्मू दा राज जंदू राजा ध्रुवदेव दे हत्थें हा तां बाबा अम्बो उंदे राजपरोहत हे। बाबा अम्बो हूनें थमां कोई त्रै सौ बरे पैहले बाहु किले रौंहदे हे। ओह् राज परोहत हे इस करी उंदा राजमैहल च अकसर औना जाना हुंदा। राजा ध्रुवदेव उंदा बडा आदरमान करदे ते कर्दें-कर्दें उंदे कन्नै राजा चौपड़ बी खेढेदे।



बाबा अम्बो त्रै भ्रा हे। बाबा अम्बो सभनें थमां बड्डे हे, बाबा सम्बो ते बाबा सिद्ध उंदे निक्के भ्रा हे। बाबा सिद्ध दा थान अज्ज बी राजपुरा मंगोत्रेयां च ऐ।

इक ऐसी घटना घटी जेहड़ी बाबा अम्बो गी अमर करी गई। बाबा जी अपने घर पुजा करा करदे हे जे बाहर जोरें-जोरें कुसा ने दरोआजा खड़काया उंदी पंतैनी होरें दरोआजा खोलेया इनें च बाबाजी बी बाहर आई गै। इक आदमी गी राजें दे सपाहियें फगड़े दा हे ते ओह् पीने गी पानी मंगा करदा हा ते कन्नै गै दुहाई देआ करदा हा जे बाबाजी मेरा कोई कसूर नेई में किश नेई कीता मिगी बचाई लाओ। बाबाजी ने पुच्छेया जे तूं कुन ऐ ते तेरे पर केह् दोश लाया गेदा ऐ तां ओह् बोलेया जंदू राजाजी राजकुमार हे तां ओह् मेरी दकान पर अकसर कपड़े लेन औंदे हे। इक बारी पैहे पेजने च किश चिर लगगी गेआ तां में कुसा हत्थ स्नेहा पेजेआ जे पैहे दी लोड़ ऐ। मिगी राजकुमार होरें मैहलें आई पैहे लेई जाने दा हुक्म दित्ता पर अपनी दकानदारी च रुज्जे दा होने करी में नेई गेआ तां राजकुमार होरें दकान पर रकम पजाई दित्ती पर बझौंदा ऐ जे उंदे मना च उस गल्ला दा गुस्सा हा तां गै उंदे सपाही मिगी फगड़ी

लेआ खबरै में जिसदे हत्थ स्नेहा पेजेआ हा उसनै गै उनेंगी बहकाया होना पर में निर्दोष आं बाबा जी। बाबाजी ने सपाहिये गी गलाया जे तुस इसगी लेई चलो में दरबार च हाजर होना। बाबाजी जाने दी तैय्यारी करन लगे तां पंतैनी होरें पुच्छेया जे रुट्टी नेई खानी तां बाबाजी बोले पैहले उस निर्दोष गी छुडवाई आं तां गै रुट्टी खानी ऐ। में तौला गै परतोई आँग। पंतैनी होरे पुच्छेया जेकर राजा तुंदी गल्ल नेई मन्नेया तां? बाबाजी बोले तां में अपने प्राणें दा त्याग करी देंग। पंतैनी ने गलाया तां अस बी जींदे नेई रौहगे पर असेंगी पता क्रियां लगगा तां बाबाजी बोले रोला पेआ तां समझी जायां जे में प्राणें दा त्याग करी दित्ता ऐ।

राजे कोल हाजर होई उनें उस आदमी गी छोडने दी विनती कीती। राजे गी बाबाजी दे औने दा पता लगगा तां उनें उंदा पूरा आदर सत्कार कीता ते औने दा कारण पुच्छेया। बाबाजी ने गलाया जिस माहनू गी तुंदे सपाही फगड़ी लेई आए दे न ओह् निर्दोष ऐ उसगी छोड़ी देने दा हुक्म देओ। राजे ने उंदी गल्ल मन्नी ते उस आदमी गी जेहड़ा के खतरी हा छोड़ी दित्ता। बाबा जी बी परतोन लगे तां राजे ने उनेंगी बिंद रुकने गी गलाया जे चौपड़ दी बाजी लाई लैचे। उनें मैहल च गै रुट्टी खाद्धी ते उस खतरी गी स्नेहा दित्ता जे मेरे घर स्नेहा देआं में रुट्टी खाई बैठा ते बिंद चिरै आँग।

खतरी अजादी दी खुशी च स्नेहा देना भुल्ली गेआ ते पंतैनी बलगदी रेही। किश चिरै चौपड़ खेददे मैहले च रौला पेआ की जे अस्तबल च घोडे खुल्ली गेदे हे। पंतैनी होरें जिसलै मैहले दा रौला सुनेया तां मकाने दा दरोआजा बंद कीता ते अग्ग लाई लेई जिस च पंतैनी, उंदी धीऽ, उंदा नौकर कुत्ता ते मजुद जीव जंतु सारे सुआह होई गै।

बाबाजी जिसलै घरै गी परतोए तां किशती दे मलाह सुरजन ने बाबाजी गी सारी घटना बारै सनाया। बाबाजी समझी गै जे रल्ली खतरी ने उंदे घर स्नेहा नेई दित्ता। ते घोडे खुलने दे रौले गी उनें मेरी मौत समझेया। उनें बी बिजन टब्बरै नेई जीने दा मन बनाया ते घर जाई उस अग्गा च छाल लाई अपने आप गी खत्म करी लैआ।

इस चाल्ली बाबाजी ने इक बेदोशे दी मदद करदे होई अपने प्राणें दा

त्याग तगर करी दित्ता। रल्ली खतरी गी जिसलै सारी घटना दा पता लग्गा तां
उसगी अपनी करनी पर बडा दुख हौआ।

ओह परोआर समेत बाबाजी दी थाहरा पर आया ते उंदे थमां क्षमा मंगी
ते उंदे चेतें च उर्थें इक देहरी बनवाई। अज्ज उर्थें इक मंदर बनाया गेदा ऐ।
माघ म्हीने दी संक्रान्ति गी खजुरिया बरादरी दी मेल लगदी ऐ कीजे बाबाजी
आपूं खजूरिया जाति दे हे। इस थाहर अज्ज बाबाजी, उंदी धर्मपत्नी, नागदेवता,
उंदा परोआर, गणेश जी, कालीवीर जी ते होर केई देवतें दियां मूर्तियां न। रल्ली
बरादरी दे लोक बी बाबाजी गी कुलदेवता मनदे न ते हर खरे कम्में पर इर्थें
आई मत्था टेकदे न ते अपने बर्जुगें दी गलती पर क्षमा याचना करदे न।

०००

बाबा भरोजी स्थान

बाबा भरोजी दा पवित्र थाहर जम्मू थमां 20 किलोमीटर दूर जम्मू अखनूर शिड़का पर बाबे दे जाड़ च ऐ। इस बंजर धरती पर गै बाबा जितो ने खेतीबाड़ी कीती ते फी जगीरदार दे वचन पर कायम नेई रौहने पर उनें इत्थें गै अपने प्राणें दा त्याग करी दिता। इस पवित्र थाहरा पर कुसा ने बी परतियें खेतीबाड़ी नेई कीती ते मते हारे लोके इस पवित्र धरती पर अपने कुलदेवतें दे स्थान बनाई ले।



रत्नचंद हुंदे मताबक बाबा भरोजी रतन बरादरी दे कुलदेवता न। बाबा जी दे बर्जुग हिमाचल दे रौहने आहले हे। उंदे बर्जुग कांगड़े आहली माता ब्रजेश्वरी दे पुजारी हे।

उंदे बर्जुग उत्थूं दे राजा नारायण चंद कटोच दे मित्र ते राजपरोहत हे। इक बारी राजा तीर्थ करन गै ते राजगद्दी पर अपने भ्रा गी बठाई गै। जिसलै परतोए तां भ्रा ने राज देने थमां ना करी दिती। राजा बडा दुखी होआ ते उत्थूं होर थाहर जाने दा मन बनाया। राजे दा मित्र होने करी पंत सुदर्शन बी सनटब्बरें राजें कन्नै चली पे ते जम्मू च आई पुज्जे। उनें जम्मू दे राजे थमां मदद मंगी पर कोई सुनाई नेई होई। पंत होर ते राजा अम्बारां आई गै। किश चिर उत्थें रेह ते फी भिम्बर आई गै ते ग्रां लूरा पुज्जे। किश म्हीने उत्थें रेह सारा धन जेहड़ा कोल हा खत्म होई गेआ।

राजे ने नौकरा गी गैहने बेचन पेजेया। नौकर गी चोर समझी सनेयारे ने उसगी उत्थूं दे राजा अगगें पेश कीता। नौकर दी सारी गल्ल सुनी राजे ने राजा नारायण चंद ते उंदे पुत्तर चिबेचंद गी पूरा आदर दिता ते फी अपनी धियु दा

ब्याह चिबेचंद कन्नै करी दित्ता। पंडित सुर्दशन लेई दाई नैनावती थमां घर पाने गी जमीन मंगी गई उसनै जमीन खुशी-खुशी देई दित्ती। ग्रां लूरा दा फी इस लेई मंगलूरा होआ की जे उनें इत्थें धरती मंगी लेई ही। राजे दे परोहत उत्थें रौहन लगी पे। चिबेचंद ने उत्थें कांगडा नां दे मैहल गी बी बनवाया हा। चिबेचंद दियें दस्सें पुशतें उत्थें राज कीता। फी इक समां आया जे सब्भै उत्थूं थमां गै उठी बस सिर्फ बर्जुग बाबा भरो गै मंगलूरा रेह्। बाबा भरो प्रभु भक्ति च लीन रौहदे ते माता ब्रजेश्वरी दी उंदे पर बडी कृपा ही। ओह् दिव्य चमत्कारे कन्नै लोके दे दुख दूर करदे। मते चिरै बाबा जी ने भक्ति परैन्त टाल्ली दे बूहटे हेठ खडोते दे गै समाधि लाई ते प्राण त्यागी दित्ते। प्राण त्यागने थमां पैहले उनें उत्थें मजूद नाई गी स्नेहा दित्ता जे मेरी बरादरी दे लोक इस्सै बूहटे हेठ अपने जागतै दे मुंडन करन। बाबा जी दे संस्कार आहली थाहर देहरी च मोहरा रखेया गेआ। ते बरादरी ने उनेंगी कुलदेवता दे रूप च स्वीकार कीता। 1947 परैन्त सारी बरादरी बिखरी गई तां बाबे दे जाड़ बाबा भरो दा स्थान बनाया गेआ ते पिंडी स्थापना कीती गई। इत्थें बरे च दो बारी नरातें च नौमी आहले दिन हवन यज्ञ ने भण्डारा कीता जंदा ऐ। बरादरी दे सारे लोक इत्थें किट्टे होई मत्था टेकदे न।

०००

बाबा जियो नाथ जी

अखनूर थमां 6 किलोमीटर दूर भलवाल ब्राहमणां ग्रां दे तलाऽ पर बाबा जियो दा स्थान ऐ। बाबा जियो दे पिताजी दा नां रतो ने माता दा नांऽ कपली हा। ओह हिमाचल प्रदेश दे ग्रां चुरमट दे रौहने आहले हे। उंदे पिता बडे विदवान पंडित हे। लोके दा उंदे पर बडा पक्का विश्वास हा। उंदे घर औलाद नेई होने करी सारे लोक इक बारी किट्ठे होई उंदे घर आए ते पंत होरे गी अपनी चिंता बारै सनाया जे बाबा रतो जी तुंदे परैत साढ़ा परोहत कुन हौग? बाबा जी लोकें दा प्यार दिक्खी खुश हौये ते संतान प्राप्ती लेई गुरु गोरखनाथ जी दी अराधना करन लगी पे। गुरु गोरखनाथ जी दे आशीर्वाद कनै उंदे घर बाबा दा जन्म हौआ। उंदा नां जियो रखेया गोआ।

ओह बड्डे होए तां उनेंगी गुरु गोरखनाथ जी दी भक्ति ने दर्शनें दी इच्छा जागी। ओह गुरु जी कोल गै तां ओह तपस्या च लीन हे। उनें जियो गी कुटिया दे बाहर बठायया जे कोई अंदर नेई आवे। जियो अपनी लगन च भुल्ली गै ते किश साधु अंदर गै उठी एह दिक्खी गुरु गोरखनाथ जी उंदी लगन दिक्खी बडे खुश होए। दर्शनें परैन्त ओह हिमाचल गै ते उंदे गुरु ने शिक्षा दिती जे म्हेशां हर कुसै दी मदद करनी।

बाबा जियो दा घर मन नेई लगगा ने ओह तीर्थे गै उठी। सारे तीर्थ होई आये ते वापस जम्मू आई गै। चिनाव कंठे तपस्या लेई रुकी गै। आक्खदे न उंदे गै नां पर जिया पोटा घाट दा नां पेदा ऐ। इक दिन बाबा जी जी उत्थें अराम करा करदे हे तां इक जनानी उत्थूं पानी लेई जा करदी ही ओह उंदे कोल आई ते बोली बाबा जी मेरे घर कोई नेई ऐ में घर इक्कली रौहनी आं जेकर तुस मेरे घर रवो तां तुंदी कृपा हौग। उस मोरां नां दी जनानी दे आदर सत्कार पर खुश होई उनें उसगी अपनी धर्म माता बनाई लेआ। ओह ग्रां दियां गवां जंगल च लेई जंदे ते संजा वापसी पर रोटी लेई घर आई जंदे। पलवां

कोल इक ग्रां च म्हेशां कलेश रौहदा। कुसा सेयाने ने ब्राह्मण बलि दा सुझाऽ
दित्ता तां किश जनें मोरा कोल आये इक पैहा देई बाबाजी गी लेई गै। जंगल
च कटार कन्नै उनेंगी फट्ट मारी उंदी मुंडी बक्ख करी दित्ती। बाबाजी दे
संस्कार लेई लोके उनेंगी उत्थें आंहदा जित्थें अज्ज उंदा मंदर बने दा ऐ। उनें
लोके गी बाद च बड़ा कष्ट हौआ जिनें मोरां थमां बाबाजी आहनने गी गलाया
हा।

बाबाजी दी मेल हर बरे दिसंबर म्हीने मस्सेयां परैन्त औने आहले ऐतवारें
लगदी ऐ। मेल दे इलावा बी होर धार्मिक पर्वे पर बी भक्त मत्था टेकन जरूर
औंदे न।

०००

श्री रघुनाथ मंदर जम्मू

जम्मू मते मंदरें दे होने करी गै “मंदरें दा शैहर” नांऽ कन्नै मशहूर ऐ। प्हाड़ें पर होनें करी इ'नें मंदरें दे सनैहरे कलश दूरा गै नजरी आई जदें न। सूरज दी लोई च लिशकदे एह कलश औने आहले गी अपने पाससै खिचदे न ते शैहर गी दिक्खने दी लालसा बधाने दा कम्म करदे न। जम्मू च पैहलें थमां गै मते मंदर हे पर डोगरा महाराजें दे मौकै इंदी गिनतरी च बाद्धा होआ।

जम्मू च सब्भनें थमां बड्डा रघुनाथ जी दा मंदर ऐ जिस च राम सीता ते लक्ष्मण जी दियां मूर्तां न, एह संगमरमर दियां न। उंदे सामनै राम भक्त हुनमान जी दी मूर्ति ऐ। आखदे न जे इस मंदर दा कम्म 1851 ई० च महाराजा गुलाब सिंह दे राज च शुरू होआ ते उंदे पुत्र महाराजा रणवीर सिंह होरें सन् 1857 च इसदा उद्घाटन कीता। डोगरा राज च सब्भनें गी धर्म दी अजादी ही ते हर कोई अपनी मर्जी मताबक उस ईश्वर दी पूजा अर्चना करदा। डोगरा राजें हिन्दू धर्म दे कन्नै-कन्नै होरनें धर्म दे लोकें कन्नै बी आदरमान रखदे हे। उंदे राज च मते पीर फकीर जम्मू च आए। जि'नेंगी हर सुविधा डोगरा राजें आसेआ उपलब्ध करवाई गई। जम्मू उसलै आपसी भाईचारें दी मसाल हा। डोगरा राजें शैहर ते ग्रांएं च केई मंदर बनवाए। मते मंदर रघुनाथ जी दे गै मंदर न। डोगरा शासक अपने आप गी सूर्यवंशी राजपूतें दे वंश थमां गै मनदे न जेह्ड़े अयोध्या थमां इत्थें आए। भगवान राम जी गी ओह अपने रक्षक ते कुल देवता मनदे न।

श्री रघुनाथ मंदर कुल्ल 17एं मंदरें दा किट्ट ऐ जेह्ड़ा मती जगह च फैल्ले दा ऐ ते एह पराने जम्मू दे दक्खन च बने दा ऐ। अप्रैल 1884 च महाराजा रणवीर सिंह होरें मंदरें दी दिख-रिख लेई धर्मार्थ ट्रस्ट दी स्थापना बी कराई तां जे मंदरें दी दिक्ख-रिख शैल चाल्ली होई सकै। इत्थें साधु संतें

दे रौहने खाने दा पूरा इंतजाम हा। गुलाब सिंह होरें महाराजा बनदे गै हिन्दू धर्म दे प्रचार प्रसार लेई केई मंदर ते धर्मशालां बनवाइयां। उ'नें इक खजान्ना बी खुल्हाया जिसदा नांऽ रघुनाथ जी दा खजान्ना हा। उ'नें आपूं 5 लक्ख रपेऽ दित्ते जिसदे ब्याज कन्नै इत्थूं दा हर कम्म चलदा। अपने पुत्तर महाराजा रणवीर सिंह गी उ'नें इसदा ट्रस्टी बनाया। पिता दी आज्ञा अनुसार महाराजा रणवीर सिंह ने धर्मथ ट्रस्ट दा संविधान बनाया ते इक कौंसल दी स्थापना कीती तां जे ट्रस्ट दे पैहे दा ठीक इस्तेमाल कीता जा। रणवीर सिंह इक सफल शासक होने दे कन्नै गै इक विद्वान बी हे। उ'नेंगी भारती संस्कृति ते डुग्गर दी कीमती विरासत ते अपनी संस्कृति कन्नै बड़ा मोह हा। उ'नें ट्रस्ट दे पैहे कन्नै सिर्फ मंदर गै नेई चलाया बल्कि इत्थें गै मंदर च केई दूई भाशा दे ग्रन्थें दा अनुवाद बी कराया। अनुवाद लेई उ'नें इक बक्ख विभाग बनाया। इक पाठशाला बी इत्थें गै चलाई जिस च चार वेद, छे शास्त्र ते होर धार्मिक ग्रंथें दे कन्नै-कन्नै संस्कृत बी पढ़ाई जंदी ही। इत्थें 500 पढ़ने आहलें दा मुफ्त रौहने खाने दा इंतजाम हा। उ'नेंगी कताबां बी मुफ्त उपलब्ध कराइयां जंदियां। इक लाईब्रेरी बी ही जित्थें करीब छे ज्हार कताबां हियां।

ते कन्नै हस्त लेख बी हे। अनुवाद विभागें गी चलाने गित्तै संस्कृत अरबी फारसी दे विद्वान रक्खे गेदे हे। मंदर दे पिच्छें बौल्ली बी ही जिसदा पानी पंत पूजा गित्तै बरतदे हे। इत्थें इक बड्डा खेठें दा मदान बी न्याने लेई बनाया गेदा हा। मंदरें दे आले दुआले भक्तें दे रौहने गित्तै कमरे बनाए गेदे हे। हून उ'नें कमरें चा किश गै बाकी रेहदे न। इत्थें हून सराय बनी दी ऐ जिसगी धर्मथ ट्रस्ट दिखदा ऐ ते ट्रस्टी महाराजा हरि सिंह दे पुत्तर डा० कर्ण सिंह जी न।

मंदरें दे बाहर वर्तमान हरि मार्केट सामने इक तलाऽ हा जेहड़ा म्हेशां साफ पानी कन्नै भरोचे दा रौहदा हा। यात्रु ते जम्मू वासी बड्डलै इत्थें न्हौने परैत मंदर च पूजा अर्चना करदे हे। हून इस तलाऽ दा अंश बी नेई रेहदा।

रघुनाथ मंदर दे निर्माण बारै शिव निर्मोही होरें अपनी कताब “डुग्गर दे देवस्थान च” श्री रामकृष्ण शास्त्री दी लिखी दी कताब दा हवाला दिंदे होई

आक्खे दा ऐ जे महाराजा गुलाब सिंह होरें इस मंदर गी रामदास वैरागी हुंदे आखने पर बनवाया।

रामदास वैरागी होरें गुलाब सिंह दे राजा बनने दी भविक्खवाणी सूही सिम्बली च कीती ही। वैरागी जी राम भक्त हे ते राम जी दे आर्दशें दा प्रचार करने गितै ओह् अयोध्या थमां जम्मू आए हे। ओह् सूही सिम्बली रौह्दे हे ते पैह्ला राम मंदर बी उ'नें महाराजा गुलाब सिंह हुंदे शा इत्थें गै बनवाया हा ते पही बाद च रघुनाथ मंदर दा बनना शुरू होआ। रामदास वैरागी महाराजा दे गुरु ते प्रेरणा स्रोत हे। तारीख डोगरा देश च श्री नृसिंहदास होरें गुलाब सिंह दे गुरु दा नांऽ बाबा प्रेम दास जी लिखे दा ऐ ते उ'नें गुलाब सिंह दे राजा बनने दी भविक्ख वाणी कीती ही। बाबा प्रेमदास जी दा फोटो रघुनाथ मंदर दे मुख द्वार दी कंधा पर बने दा ऐ।

डोगरा राजे अपने परोआर समेत दूए थाहरें तीर्थ पर जंदे हे। खास करी ओह् बनारस दे मंदरें थमां बड़े प्रभावत हे ते उंदा मन हा जे बनारस आंगर जम्मू बी मंदरें दा शैहर बनै ते लोक ज्ञानी होन।

इस्सै करी रघुनाथ मंदर दा निर्माण कीता गेआ ते राम, सीता ते लक्ष्मण जी दियां मूर्तियां भक्तें गी मानसिक शांति प्रदान करदियां। कोल गै महाराजा रणवीर सिंह जी दा शाही लिबास च बड़ा शैल फोटू ऐ। मंदरे दे बेहड़े च उ'नें सभनें देवी देवतें दियां मूर्तियां स्थापत न जेहड़े साढ़े धार्मिक ग्रँथें च औंदे न। मंदर दे आले दुआले थढ़े पर लक्खें बद्धे शालग्राम जड़े दे न। एह सारे मध्यप्रदेश दी नदी नर्मदा थमां आहन्ने गेदे न जि'नेंगी मंत्र उच्चारण परैत स्थापत कीता गेदा ऐ।

मंदर दे कन्नै बने दे हालें दे तौकड़ें च बी देवी देवतें दियां मूर्तियां स्थापत कीतियां गेदियां न। बड़डे मंदर च बने दे तौकड़े च ग्रँहें ते दशाएं जि'यां राहू, केतु, शनि, बुध बृहस्पति, शुक्र, उत्तर, पूर्व दक्खन ते पच्छिम दिशा दियां मूर्तियां न।

रघुनाथ जी दे बड़डे मंदर कोल 14 होर मंदर न जिं'दे न शेषनाग शैया

पर विष्णु जी ते माता लक्ष्मी, गणेश भरत, लक्ष्मण, शत्रुघ्न, नृसिंह अवतार, राधाकृष्ण मंदर, वामन अवतार, वराह अवतार, महालक्ष्मी जी, मत्स्य, कश्यप, विराट रूप, भगवान शिव, सूरज भगवान ते सत्य नरायण जी दे मंदर बी दिखने आहले न। इ'नें सभ्भनें मंदरें दे कन्नै लगदी थाहर पर फुल्लें दे केई किसमें दे बूहटे लाए गेदे न तां जे पुजारी पूजा मौकै फुल्ल भगवान गी चाढ़ने गित्ते इत्थूं लेई सकन। इत्थें तुलसी दे बी केई बूहटे न जि'नेंगी लोक पूजदे न। बोहड़ी दे सायेदार बूहटे ते फुल्ल आए दे लोकें दा मन मोही लैंदे न।

त्यहारें दे दिनें इत्थें श्रद्धालुयें दी मती भीड़ होंदी ऐ। रामनौमी ते ठाकरें दे वर्ते गी इत्थें भगवान दी जीवन लीला पर झांकियां निकलदियां न। सभ्भै लोक शिड़कें दे दौंने बक्खी खड़ोई झांकी दा सुआगत करदे न। धार्मिक मंडलियां झांकी दे कन्नै भजन कीर्तन करदियां चलदियां न। अदूं शैहरा गी रंग- बरंगी रोशनी कन्नै सजाया जंदा ऐ। रामनौमीं गी खास रौनक होंदी ऐ। महाराजें दे समें च रामनौमी सरकारी तौर पर मनाया जंदा हा ते भगवान राम दी झांकी कन्नै आम लोकें दे इलावा फौज ते पुलिस दे जत्थें बी कन्नै चलदे हे। हून सारा प्रबन्ध धार्मिक ट्रस्ट ते लोक गै करदियां न। 21 अक्तुबर 1932 गी महाराजा हरि सिंह दे राज च सभ्भनें मंदरें च हरिजनें दे जाने दी मनाही गी हटाई दिता गेआ हा। एह उंदी दमदार गैऽ ही। उ'नें दिनें एह थाहर समाजी गतिविधियें दा केन्द्र हा ते बाहर थमां धर्म प्रचारक ते कथा वाचक इत्थें औंदे हे। इत्थें मौके-मौके पर धार्मिक सम्मेलन बी कीते जंदे हे ते वेद पुराणे धार्मिक ग्रैन्थें पर चर्चा होंदी ही। 1979 च इत्थें 'नटराज' मंदर बनवाया गेआ।

रघुनाथ मंदर कारण गै एह थाहर बपार दा केन्द्र बनी गेदा ऐ। इत्थें सारा दिन लोकें दी भीड़ रौहदी ऐ। माता वैष्णों दे यात्रु इत्थूं गै अखरोट, बदाम, मेवे, शाल साढ़ियां ते सजावटी समान खरीद दे न। जम्मू वासियें दी भगवान राम प्रति श्रद्धा ऐ जि'दे आर्शीवाद कन्नै जम्मू नित तरक्की करा करदा ऐ।

०००

श्री रणवीरेश्वर - मंदर जम्मू

जम्मू दा रणवीरेश्वर मंदर इक खूबसुरत ते विशाल मंदर ऐ जिसगी महाराजा रणवीर सिंह होरें बनवाया हा। महाराजा रणवीर सिंह दा जनम 1830 ई० च जि'ला साम्बा दे रामगढ़ किले च होआ। महाराजा गुलाब सिंह दे त्रै पुत्र हे राजा उद्यम सिंह, मियां सोहन सिंह ते रणवीर सिंह। उद्यम सिंह अक्टूबर 1843 ई० ते मियां सोहन सिंह 1844 ई० च ल्हौर दरबार दी बेहाली दा शकार होई गे। महाराजा गुलाब सिंह होरें अपने जींदे गै अपने त्रीये पुत्र रणवीर सिंह होरें गी जम्मू कश्मीर दा राज सौंपी दित्ता।

महाराजा रणवीर सिंह होर बी अपने पिता आंहगर धार्मिक बचारें दे माहनू हे। ओह जम्मू गी काशी आंहगर धर्म नगरी बनाना चांहदे हे। उंदे राज दौरान जम्मू ते आले दुआले दे ग्राएं कस्बें ते नगरें च केई मंदर बनवाए गे। ओह अपने परिवार गी मंदरें गितै दान देने गी खास प्रेरित करदे। उ'नें मंदरें दे कन्नै खु'ल्ले खेतरें गितै जगह बी छुड़वाई तां जे इत्थूं दी आमदन ते अनाज कन्नै साधु महात्मा लोकें गी लंगर उपलब्ध होई सकै। महाराजा रणवीर सिंह होरें 1856 थमां 1885 तगर बड़ी कामयाबी कन्नै राज कीता। उंदे आसेआ बनाया गेदा रणवीरेश्वर मंदर वास्तुकला दा इक बेहतर नमूना ऐ। एह मंदर परेड दे दक्खन च शालीमार शिड़का पर ऐ इसगी उत्तर भारत दा सब्भनें शा बड्डा शिव मंदर मन्नेआ जंदा ऐ। उच्चि थाहरा पर होने करी इस मंदर थमां जम्मू शैहरा दा नजारा बड़ा शैल लगदा ऐ। इस मंदर गी 1873 ई० च बनवाया गेआ हा। त्र'ऊं मंजलें आहले इस मंदरै दियां पैहलियें द'ऊं मंजलें च साधु महात्माएं दे रौहने लेई कमरे न ते त्री मंजल पर इक चबूतरे पर मंदर बनाया गेदा ऐ। मंदरै दे बेहडे च महन्त नन्द गिरी जी दी समाधि ऐ। जिं'दे आशीर्वाद कन्नै महाराजा रणवीर सिंह जी ने लद्दाख युद्ध च जित्त हासल कीती ही। 1856 ई० च महाराजा ने दऊं बारी लद्दाख पर चढ़ाई कीती पर जित्त हत्थ नेई ही

लगी ते उत्थूं दे लामाएं गी ओह् अपने अधीन नेई करी सके हे। इस गल्ला महाराजा परेशान रौह्दे। उंदे कुसै काम्मे ने उ'नेंगी सिद्ध बाबा नन्दगिरी बारे सनाया जेह्दे इत्थें कुटिया बनाई रौह्दे हे, जे बाबा अध्यात्मिक शक्ति दे मालक न उंदे तुस दर्शन करो ते मानसिक चिंता थमां मुक्त होई जागे। अगले रोज महाराजा रणवीर सिंह ने अपने इक मंत्री गी बाबे कश भेजेआ तां बाबा जी नराज होए ते बोल्ले जि'नें तुगी भेजेआ ओह् आपूं की नेई आया आशीवाद कुसा दे हत्थ भेजने दी चीज नेई ऐ। अगले रोज राजा आपूं आए ते अपनी गल्ली दी क्षमा मंगदे होई बोल्ले बाबा जी मिगी आशीवाद देओ में तुंदी शरण च आं। मेरे राज दे बादधे लेई भगवान अगें प्रार्थना करो। बाबा महाराज पर प्रसन्न होई बोल्ले जदूं बी लड़ाई पर जाओ तां मिगी खबर जरूर करेओ। बाबा नन्द गिरी होरें अपने त्रिशूल 'र मंत्र पढ़ेआ ते त्रिशूल धरती पर मारेआ। ते फही सपाही लड़ाई पर भेजे। बाबा जी दे आशीवाद कन्ने महाराजा दी जित्त होई ते महाराजा बाबा जी दे शिष्य बनी गे। उंदे आखने पर गै महाराज ने मंदर दा नांऽ रणवीरेश्वर मंदर रक्खेआ। महाराज ने इत्थें गै नन्द गिरी जी दी गद्दी दी स्थापना करवाई। लद्दाख जित्त मगरा महाराजा नै इस मंदर गी वनवाइयै बाबा जी गी सर्पपत कीता। एह् मंदर 1863 च महाराज होरें अपनी दिक्ख-रिक्ख च बनवाया हा।

मंदरै च सामने खु'ल्ला थाहर ऐ जित्थें मेले ते भंडारें होंदे न।

सब्भनें थमां पैह्लें बरांडे च पित्तलू दे बने नंदी दे दर्शन होंदे न जिसगी डॉ० कर्ण सिंह होरें मैसूर थमां बनवाई इत्थें स्थापित करवाया हा। बरांडे च सज्जे पाससै महाराजा रणवीर जी दा चित्र ऐ। ते कन्ने दिन-रात जगदी अखंड जोत ऐ उसदे कन्ने महाकाली दी मूर्ति ते पंचमुखी हनुमान जी दा निक्का मंदर ऐ। मुक्ख दरोआजे दे सज्जे पाससै बरांडे च गै गणेशजी ते कार्तिकेय दियां मूर्तियां स्थापत न। मंदर जंदे गै श्याम रंग दे संगमरमर दे सत्त फुट्ट उच्चे शिव लिंग दे दर्शन होंदे न जेह्दा इक कंवितल थमां बी बद्ध ऐ। उसदे दौनें पाससै पंज पंज शिवलिंग न जेह्दे बड्डे आंहगर न पर दऊं ढाई फुट्ट गै उच्चे न।

मंदर च शिव पार्वती दी चिट्टे संगमरमर दी बड्डी मूर्ति ते गणेश जी दी निक्की मूर्ति स्थापित ऐ जि'नेंगी राजस्थान थमां आहनेआ गेदा ऐ। किश

मूर्तियां कारीगरें इत्थें बनाई दियां न जेहड़ियां गैहनें ते फुल्लें कन्नै सज्जी दियां भक्तें गी धन्न करदियां न। मूर्तियां दिक्खी बझोंदा ऐ जे शिव पार्वती गणेश कलाश पर वराजमान होन। श्री जी० एन० गनहार मताबक मूर्तियां राजस्थान थमां ते शिवलिंग नर्मदा थमां आंहदे गेदे न। इ'नेंगी महाराजा आपूं रणवीर सिंह पुरा थमां जम्मू आस्तै लोकें कन्नै लैन गै हे।

आखदे ने जे रेहड़े च जिसलै शिवलिंग जम्मू आहनेआं जा करदा हा तां उसदे पहिये गारे च फसी गे महाराजा ने उत्थें जाई शिव दी उपासना कीती ते रेहड़े गी धक्का दित्ता तां ओह बाहर उठी आए। रेहड़े गी मंदरे दे बेहड़े च आहनेआं गेआ ते शिवलिंग नकेवली थाहर रक्खेआ गेआ।

इक दंद कथा मताबक जिसलै मंदर बनी गेआ तां मंत्र उच्चारण कन्नै निकके शिवलिंगें दी स्थापना कीती गई पर जिसलै बड्डे शिवलिंग गी चुकेआ गेआ तां ओह होर भारा होई गेआ। मूर्त दा समां निकलदा दिक्खी महाराज गी खबर कीती गई। महाराज किश कसरी हे इसकरी उ'नें अपने सपुत्र राम सिंह गी उत्थें भेजेआ पर ओह बी सफल नेई होए। महाराजा होरें गी परतियै खबर मिली तां ओह बमार हालत च उत्थें हाजर होए ते हर-हर महादेव, बम बम भोले, जय शिव शम्भू दे नाहरे लांदे सब्भनें कन्नै शिवलिंग चुकेआ तां ओह हौला होई गेआ, आक्खो जे भगवान बी उंदे हत्थें दे स्पर्श दी निहालपा च हे।

भगवान शिव ते पार्वती दी मूर्तियें दे सामनै 11 चिट्टे पत्थर दे शिवलिंग इक थाहर स्थापित न। मंदर दे अंदर उच्चे चबुतरे पर सवा लक्ख निकके शिवलिंग स्थापित न जित्थें भक्त जल ते फुल्ल अर्पण करदे न। मंदर दे प्रवेश द्वार कोल कार्तिकेय जी दी मूर्ति कोल बी नेह शिवलिंग स्थापित न। मंदरै कोल इक पानी दा हौज ऐ जिस थमां भक्त चाढ़ने गित्तै जल लेंदे न। इ'यां ते भक्त रोज इत्थें औंदे न पर शिवरात्रि गी बड़ा भारी मेला लगदा ऐ ते उस दिन यज्ञ, ते भंडारे दा सरिस्ता कीता जंदा ऐ।

किश ब'रे पैहलें मंदरै दी अन्दरली कंधै पर भगवान शिव दियां कथां ते उंदी लीला पर अधारत चित्र बनाए गेदे न जि'नेंगी दिक्खी भक्तें गी भगवान

शिव दी भक्ति ते चमत्कारें दा ज्ञान होंदा ऐ। इ'नें चित्रें च शिव परोआर, शिव तांडव, राजा दक्ष दा यज्ञ, गणेश जी, भगवान कृष्ण ते भगवान शिव माता पार्वती दी अमरकथा सनादे, गंगा गी अपनी जटाएं च धारण करदे आदि केई चितर न।

इस मंदर दा सब्भनें थमां बड्डा कलश चं 'ऊ बड्डे-बड्डे सुन्ने दे घडें कन्नै बनाया गेदा ऐ। उप्परले पाससै चौने बक्खी त्रै-त्रै सुन्ने दे कलश न। भगवान शिव दे केई चमत्कार भक्तें इस मंदरै च अपनी अक्खीं दिक्खे दे न। आखदे न कडुकदी असमानी बिजली मंदरै अन्दरें प्रवेश करी क्षणें च बाहर निकली गई। उसलै भक्त शिवजी दी आरती करा करदे हे। कुसा गी बी कोई नुक्सान नेई पुज्जा ते सब्भै प्रसाद ग्रैहण करी घरें परतोए। धर्मार्थ ट्रस्ट दे सोल ट्रस्टी डा० कर्ण सिंह होरें अपने परदादा महाराजा रणवीर सिंह दा बुत 13 फरवरी 1986 गी मंदरै दे बेहडे च स्थापित कराया जिस च महाराज हत्थ जोड़ी खड़ोते दे न। कन्नै गै पीपले दे बूहटे हेठ मंदरै दे पैहले महंत जी दी समाधि ऐ। भक्त इत्थें सिर निमता करी मनोकामना मंगदे न।

आखदे न जे हून बी कदें रातीं बाबा सिद्ध नन्द गिरि जी मंदरे दे कोल चलदे बज्जोंदे न उंदी खड़ामें दी बाज साफ सनोचदी ऐ। मंदरे च बडे दे बूहटें दे लावा होर बी केई सायदार बूहटे न ते उत्थें लगगे दे फुल्ल खूब खशबो खलारदे न।

इसलै महंत जी मंदरे दी दिक्खरिक्ख बड़ी शैल चाल्ली करा करदे न ते मौके-मौके पर भंडारें बी कीते जंदे न। जहारें बद्धे लोक प्रसाद खंदे न। भक्तें दी सुविधा दा पूरा ख्याल रक्खेआ जंदा ऐ तां जे औने आहले श्रद्धालुयें गी कोई तकलीफ नेई होऐ।

०००

रपेऽ आह्ला मंदर

जम्मू च थाहर-थाहर मंदर होने कारण इसगी मंदरें आह्ला शैहर करी कुआलेआ जंदा ऐ। इत्थूं दे पराने मंदरें च 'पंजबक्खतर' मंदर राजेन्द्र बजार (पराना नां०, उर्दू बजार) दे दक्खन च ऐ। एह् शिव मंदर जम्मू दा सब्भनें थमां पराना मंदर ऐ। करीब छे: सौ बरै पैह्लें राजा मालदेव ने इस मंदर च शिवलिंग स्थापत करवाया हा। इस मंदर दा नांऽ पंजबक्खतर की रक्खेआ गोआ इसदा कोई सबूत नेई मिलदा ऐ। इसदा अर्थ पंजे मुहें आह्ला होंदा ऐ। पर इस शिवलिंग दे पंज मूह् नेई न। पुराणें मताबक जदूं शिवजी दे मुहां थमां पृथ्वी, वायु, अग्नि, जल ते अकाश निकले हे तदूं थमां उनेंगी पंजबक्खतर नांऽ कन्नै कुआलेआ जंदा ऐ। इक लिखत सबूत मताबक इस मंदर गी राजा रणजीतदेव होरें बनवाया हा। पर लोकें ते इत्थूं दे महंत जी मताबक 1356 ई० च इस मंदरें गी राजा मालदेव ने बनवाया हा। इत्थें आप शम्भू प्रकट होने कारण इत्थूं दी होर मती मानता ऐ।

आखदे न जे अदूं इत्थें घना जंगल हा। राजा मालदेव ने घोड़े दा अस्तबल बनाने गितै खुदाई दा कम्म शुरू करवाया तां इक दिन गैती इक बूहटे पर पेई तां उस थमां लहु निकली आया। सब्भै मजदूर डरी गे ते कम्म बंद करी राजा गी सारी घटना दी खबर सनाई तां राजा आपूं उत्थें आए ते अपने सामने खुदाई कराई ते उत्थूं इक शिवलिंग निकलेआ। राजा ने घोड़े दा अस्तबल बनाने दा कम्म बंद करवाया ते उत्थें शिव मंदर स्थापित करवाई दित्ता। उंदे परैत महाराजा प्रताप सिंह ने उत्थें इक होर नमां मंदर बनवाया ते शिवलिंग पर चांदी चढ़वाई। मंदर दे फर्श पर चांदी दे रपेऽ जड़वाए। इस्सै कारण इसगी रपेऽ आह्ला मंदर करी कुआलदे न। भगवान शिव दी सवारी नंदी दा नांऽ बी पंजबक्खतर ऐ खबरै इस्सै कारण मंदरें गी पंजबक्खतर बी आखदे न। शैहर दे बिच्च होने करी इत्थें म्हेशां भक्तें दी भीड़ होंदी पर रक्खड़ी शिवरात्रि ते

होरनें त्यहारें पर इत्थें खास भीड़ होंदी ऐ। दकानें पर मती भीड़ होंदी ऐ। शिव भक्त हत्थे च जल फुल्ल लेई लम्मी कतारें च इत्थें नजरी आँदे न। शिवरात्रि गी ते रातीं गै इत्थें भक्तें दी भीड़ लग्गी जंदी ऐ। वास्तुकला दे स्हाबें एह् मंदर उत्तर भारत च बने दे मंदरें आंहगर ऐ। पराने शिव मंदर दे सामने इत्थें बैरी दा बूहटा ऐ जेहड़ा उसै समें दा मन्नेआ जंदा ऐ। बेहड़े च इत्थें बौहड़ी ते पीपल दे बूहटे न जि'नेंगी भक्त पूजदे न।

हर सोमवार ते त्यहारें दे दिनें इत्थें साधुयें दी भीड़ होंदी ऐ। जि'नेंगी भक्त दान दिंदे न। मंदरें च अंदर जंदे गै सज्जे पाससै पानी दी हौजी ऐ जित्थुं शिवें पर जल चाढ़नें लेई भक्त पानी लैंदे न। उसदे कन्नै गै भगवान महावीर, विश्वकर्मा, माता दुर्गा दा मंदर ऐ ते इंदे बश्कार मैह्त श्री परशुराम गिरी, गुरु बलवंत गिरी जी दी समाधि ऐ। पराने मंदर कोल उ'नें मैह्तें दियां समाधियां न जेहड़े इत्थें महंत रेह्। मंदर दे सामनै माता शीतला दा मंदर ऐ ते कन्नै गै मनोहर गिरी जी दी समाधि ऐ। इत्थें गै शिव मंदर कन्नै महंत वीर गिरी जी, महंत बशेशर गिरी जी ते महंत मान गिरी जी दियां समाधियां न। मंदर दे फर्श पर संगमरमर लग्गें दा ऐ। पजारियें लेई कमरे बने दे न ते बाहर थमां औने आहले साधुयें लेई रौहने दा पूरा प्रबंध ऐ। जंदे मौके उ'नेंगी दक्षिणा बी दिती जंदी ऐ।

हून तगर तेरां महंत इत्थें गद्दी पर बैठे। चौहदवें मैह्त श्री परशुराम गिरी जी 29 मार्च 1965 च इस गद्दी पर बैठे। इंदा सरबंध संन्यास सम्प्रदाय कन्नै ऐ। इंदा मुख्यालय बड़ा हनुमान घाट काशी च ऐ। एह् स्वतंत्र गद्दी ऐ। इस मंदर कन्नै 182 कनाल जमीन ही ते कन्नै इक बाग हा जिस च फुल्ल बूहटे शोभदे हे पर हून बूहटें दी गिनतरी घटा करदी ऐ ते दकाना बनने करी जमीन बी घट्ट होई गेदी ऐ।

इत्थें गौशाला बी है जिसदी दिक्खरिख मंदर प्रबंधन आसेआ कीती जंदी ऐ। भक्त बी अपनी श्रद्धा मताबक गौशाला च दान दिंदे न। गमें दी सेवा लेई इत्थें सेवादार बी रक्खे गेदे न। इत्थें जो बी आई सच्चें मना कन्नै भगवान शिव थमां जे किश मनोकामना रखदा ऐ ओह् जरूर पूरी होंदी ऐ।

०००

महामाया माता मंदर

जम्मू शैहरा दे पूर्व च त'वी दे खब्बै कंठै इक उच्ची प्हाड़ी पर माता महामाया दा मंदर प्रकृति दी गोद च होने करी भक्तें गी अपने पाससै खिचदा ऐ। एह बाहबे मंदर थमां त्रै चार किलोमीटर दूर ऐ। बाहवे माता काली दे दर्शनें परैत भक्त महामाया मंदर मत्था टेकन जरूर औंदे न।

इस मंदर कोल पैहलें बड़ा घना जंगल हा ते भक्तें गी इत्थें पुज्जना बड़ा औक्खा हा। भक्त कदें त'वी पार करी बी इत्थें औंदे हे। बाहवे थमां रस्ता ठीक हा पर घना जंगल होने करी जंगली जानवरें दा डर हा इस करी थोड़ी औख ही। लगभग 368 हैक्टर जमीन च फैल्ले दा एह जंगल किश ब'रे पैहलें आम लोकें दी पुज्ज थमां दूर हा।

इ'यां मन्नेआं जंदा ऐ जे केई सौ ब'रे पैहलें इत्थें इक समृद्ध “धारा नगरी” ही। इत्थूं दा राजा प्रजा दा बड़ा हितकारी हा। इत्थें धन दौलत दी कोई कमी नेई ही जरूरत मौके राजा प्रजा लेई सरकारी खजान्ने तगर खुलवाई दिंदा। प्रजा बी राजा गी भगवान दा रूप मनदी ते उसदी लम्मी आरबला दी कामना करदी। अदूं थमां गै एह महामाया दा मंदर बी इत्थें ऐ जित्थें राजा ते प्रजा सच्चे मना कन्नै माता अर्गे नतमस्तक होंदी। धार्मक बचारेणें दा होने करी राजा अपने राज दी समृद्धि दा कारण माता महामाया दा आशीर्वाद मनदा ते म्हेशां माता पर विश्वास करदा।

राजा दी मौती मगरा इत्थूं दा पतन शुरू होआ। गद्दी दा उतराधिकारी जनता दी सेवा दे बजाए भोग बलास च मस्त रौंहदा। लोकें गी तंग करदा उंदे कशा टैक्स बसूल करदा। सारी प्रजा राजा थमां बड़ी तंग होई ते उस थाहर गी छोड़ी जान लगी पे। देवी महामाया राजा दी इ'नें हरकतें कारण नाखुश

होई गई ते उत्थें इक भूचाल आया ते सारा शैहर तबाह होई गेआ किश लोक दबोई मरे ते किश उत्थूं गे उठी।

इस बर्बादी कारण मंदर दी दिक्ख-रिक्ख लेई कोई बी नेई रेहा जिस कारण मंदर खतम होई गेआ ते माता दी मूर्ति त'वी कंठै जंगलें च केई ब'रें पेई रेही ते कुसा ने बी इस भेठा ध्यान नेई दिता की जे इस घने जंगल च आम आदमी दा औना संभव गै नेई हा।

गुलाब सिंह जदूं जम्मू दे महाराजा बने तां उ'नें केई कम्म लोकें दी भलाई लेई शुरू करवाए ते जम्मू च केई मंदर भवन बनवाए। पढ़ने गित्तै स्कूल बी बनवाए। आखेदे न जे महाराजा गी माता महामाया ने रातीं सुखने च दर्शन दिते ते आखेआ जे मेरी मूर्ति केई सौ ब'रें थमां त'वी कंठै पेई दी ऐ उसगी तुप्पी मेरा मंदर बनवाओ पर दूए रोज मूर्ति कुसा गी नेई लब्धी तां महाराजा बड़े परेशान होए। उससै राती माता ने सुखने च मूर्ति आहली थाहर बी दस्सी ते महाराजा ने माता दे आदेश मताबक मंदर बनवाया ते मूर्ति स्थापना कीती। दूर होने करी घट्ट गिनतरी च भक्त इत्थें पुजदे।

1986 च बरखा कारण एह मंदर डि'ग्गी गेआ। मूर्ति ते मोहरे गै रेही गे तां पही इत्थें परतियै मंदर बनवाया गेआ ते मोहरें ते मूर्ति स्थापित कीती गई। अदूं गै रियासता दे गर्वनर जगमोहन होरें उत्थें दौरा कीता ते उत्थें जंगलें दा वकास कम्म शुरू करवाया।

भक्तें दी सुविधा गित्तै बाईपास शिड़का थमां मंदरें तगर इक निक्की शिड़क बनवाई गई। लोड़चदे सब्भै प्रबंध कीते गे ते मंदरें दे आले दुआले मते बूहटे बी लाए गे।

मंदरें दे पूजारी बी भक्तें दा खास ख्याल रखदे न। मंदरें च जेहड़ी चढ़तर किट्ठी होई ते लोकें दे दान कन्नै भक्तें दे रौहने लेई इक बड्डा हाल बी बनवाया गेदा ऐ। महात्मा शंकर गिरी होरें बी कश गै इक महाकाली दा मंदर बी बनवाए दा ऐ। महामाया मंदर गी रंगदार शीशे ते देवी देवताएं दे फोटू लाई सजाया गेदा ऐ। दूरा-दूरा भक्त दर्शन गित्तै इत्थें औंदे न।

मंगल ते ऐतवार मती गिनतरी च श्रद्धालु इत्थें औंदे न। नरातें च इत्थें भक्ते दी बड़ी भीड़ होंदी ऐ। इत्थूं थमां मैहलें दा नजारा ते जम्मू त'वी कंठे बस्से दे घरे दा नजारा बड़ा शैल नजरी औंदा ऐ।

सरकार सैहजोग करै तां इत्थें होर बाद्धा होई सकदा ऐ ते सुख सुविधा कारण मते भक्त इत्थें औंगन। इस थाहर सरबंधी विभाग दुकाना आदि बनाई बी अपनी औंदन बधाई सकदे न।

वन विभाग ते सैल सफा विभाग बी इस भेठा अपना जोगदान देयै तां जम्मू औने आहले सैलानी इत्थें मती गिनतरी च औंगन ते एह् थाहरा मता विकास करग।

०००

हनुमान मंदिर-मोती बजार

जम्मू च हनुमान जी दी मूर्ति उ'आं ते हर मंदर च स्थापित ऐ। पंचमुखी हनुमान दे दर्शन बी होंदे न। किश मंदर खासतौर पर हनुमान जी दे बी एह न। मोती बजार च हनुमान दे दऊं मंदर न इक बजार दे शुरू च ते दूआ अखीर च। इत्थूं दे लोकें दे मना च इ'नें मंदरें प्रति खास श्रद्धा ऐ बपारी लोक ते दकानदार कम्मं दी शुरूआत इत्थें मत्था टेकने परैन्त करदे न। मोती बजार दे शुरू च गै हनुमान जी दा बड़ा शैल मंदर ऐ जित्थें अज्जें थमां त्रीह ब'रै पैहलें सिर्फ हनुमान दी गै मूर्ति ही पर इसलै केई होर देवी देवतें दियां मूर्तियां बी इत्थें स्थापित कित्तियां गेदियां न। हनुमान जी दी मूर्ति दे सज्जे पाससै दुर्गा देवी दी मूर्ति ऐ ते कन्धें च बने दे तौकड़े च धर्मराज, चित्रगुप्त, संतोषी माता, राधाकृष्ण, विष्णु लक्ष्मी, सीताराम, शिव पार्वती ते गणेश, वृहस्पति जी ते इक पाससै शिवलिंग स्थापित ऐ ते चिट्ठे संगमरमर दे नन्दी साम्मने विराजमान न। शिवलिंग पर धातु दे बने दे दऊं नाग देवता ते दऊं त्रिशूल बी इत्थें है न। किश ब'रै पैहलें इत्थें शनिदेवता दी मूर्ति स्थापना बी कीती गई। मंदरें अंदर म्हौल इन्ना शांत ऐ जे लोक मनचित लाई केई केई घेंटे हनुमान जी दा जाप करदे न।

इसलै मंदरै दी देखरेख दुष्यंत शर्मा करदे न। ओह म्हेशां भक्तें दी सुख सुविधायें मताबक इस थाहरा गी बनाने दा जतन करदे न तां जे इत्थें औने आहले भक्तें गी कुसा चाल्ली दी कोई औख नेई होऐ। इत्थें बिहार दे शम्भुनाथ ठाकुर जी पूजारी न जेहड़े भक्तें गी बड़ी श्रद्धा कन्नै चरणामृत ते प्रसाद दिंदे न। श्री दुष्यंत जी हर मंगल ते त्यहारें गी हनुमान जी दा चोला बदलदे न ते मंदर दी साजसज्जा करदे न। पंजाह ब'रै पैहलें इत्थें घट्ट लोक औंदे हे की जे इत्थें सिर्फ भांडे आहलें दियां गै किश हट्टियां हियां ते इस बजार कोई

रौनक नेई ही पर हून इत्थें मता बपार-कारोबार होंदा ऐ पैदल चलना तगर इत्थें मुश्कल ऐ।

पंत दुष्यंत हुंदे मताबक अज्जै थमां 125 ब'रे पैहलें इत्थें उत्तरप्रदेश दे मेंहत श्री नारद जी हरिद्वार थमां इत्थें आए हे। उ'नें भारत दे केई हिस्से च तीर्थ जातरा कीती ते फही अमरनाथ जातरा पर इत्थें आए। उ'नेंगी इत्थें प्रकृतिक नजारें इन्ना प्रभावित कीता जे उ'नें इत्थें गै अराधना करने दा मन बनाई लैता। अमरनाथ जातरा परैन्त ओह इत्थें रुके साफ सफाई करी कुटिया बनाई ते ईश्वर भक्ति च मग्न होई गे। बड़े घट्ट लोक इत्थें औंदे। इक रातीं मेंहतजी गी सुखने च महावीर जी लब्धे तां उ'नें इस थाहरा दा म्हत्तव समझेआ ते मिट्टी दी महावीर जी दी मूर्ति बनाई ते पूजा करन लगी पे। किश भक्त बी इत्थें औंदे जिं'दे च दुष्यंतजी दे दादा पंडत शिवराम ते उंदे मित्तर पंडत मोहनलाल बी हे। पंडत मोहन लाल साध-संगत च मस्त रौहदे ते धार्मिक ग्रँथ बी पढे। मेंहत नारद जी दे परैन्त मोहन लाल होरें पूजा दी जिम्मेदारी संभाली। उ'नें इत्थें लक्कड़ी दी छत पाई इक कमरा बी बनवाया ते हनुमान जी दी सेवा च लगगे रेह।

उ'नें दिनें दी घटना सनांदे होई दुष्यंत कुमार जी ने सनाया जे इक दिन तेज बरखा ब'रा करदी ही। पंडत मोहनलाल जी आरती करा करदे हे। असमानी बिजली ज्योति रूप च मंदर च प्रवेश करी हनुमान जी दी मूर्ति दी परिक्रमा करी बाहर निकली गई।

केई लोके बिजली गी बाहर निकलदे दिक्खेआ। दुष्यंत शर्मा दे पिता पंडित धनी होरें बी एह चमत्कार अक्खीं दिक्खेआ हा जि'नें पंडित मोहनलाल दे परैन्त मंदर दा कम्मकाज संभालेआ हा। ते फही उंदे मगरा 1976 थमां पंडित दुष्यंत शर्मा गै मंदरें दी देखरेख करा करदे न।

इत्थें पैहलें इक निक्का कमरा गै हा, पर 1978 च दुष्यंत होरें गी हनुमान जी ने सुखने च दर्शन दित्ते ते इस थाहरा गी ठीक करने गी आक्खेआ पर अदूं ओह विद्यार्थी हे ते आमदन दा कोई साधन नेई हा पर फही बी उ'नें धर्म च आस्था रक्खने आहलें दी मदद कन्नै इस कम्मा गी तोड़ चाढ़ेआ। इसलै

तगर इत्थें भक्त हनुमान जी गी दऊं मीटर चोला चाढ़दे हे पर हनुमान जी ने सुखने च आदेश दिता जे एह चोला मिगी पूरा नेई होंदा इस करी 11 मीटर चोला भक्त चाढ़गन तां गै उंदी मनोकामना पूरी होग। अदू थमां इत्थें 11 मीटर चोला चढ़दा ऐ। 1978 च नमां मंदर बनेआं तां हनुमान जी दी मूर्ति स्थापित कीती गई परानी मूर्ति बी मंदर च गै ऐ। उसदे परैन्त दुर्गा माता ते बाकी देवतें दियां मूर्तियां स्थापित होइयां। ते अदू थमां भक्तें दी मदद कन्नै मंदरें दा वकास होआ करदा ऐ।

धर्म ग्रैन्थें मताबक हनुमान जी दी माता दा नांऽ अंजनी हा। ओह भगवान शिव दे अवतार हे ते पवन पुत्र दे नांऽ कन्नै मशहूर हे। उंदे जनम पर देवते खुश ते राक्षस नराश होए। ऋषियें उंदा नांऽ हनुमान रक्खेआ। ऋषियें उ 'नेंगी लाल फल खाने गी आखेआ तां उ 'नें सूरज गी लाल फल समझीं मूह पाई लेआ। सारें हाहाकार मची गेआ चौनें पाससै न्हेरा छाई गेआ तां सब्भनें देवी देवतें हनुमान जी दी पूजा कीती ते ब्रह्मा जी ने संसार दी दशा दिक्खी उ 'नेंगी विनती कीती हे महावीर भगवान श्री रामचन्द्र जी लीला करडन तां तुस उंदी मदद करेओ अदू तगर तुस जंगलें च र'वो। हनुमान जी साथियें समेत जंगलें च भगवान राम दी निहालपा च रौहन लगी पे। भगवान राम दे मिलने पर ओह उंदे परम भक्त बनी गे ते सीता माता जी तुप्पना, लक्ष्मण मुर्छा, अहिरावण थमां राम लक्ष्मण दी रक्षा, समुद्र पर पुल बनाना आदि सब्भनें कम्में च भगवान राम कन्नै रेह। हनुमान जी अपनी माता दे परम भक्त हे ते उंदी आज्ञा दा पालन करदे हे। उंदे अंदर बचपन थमां गै केई शक्तियें दा किट्ठ हा तां गै जो कोई श्रद्धाभाव कन्नै उंदी भक्ति करदा उस पर मंगल, सूरज, राहु, शनि दा कोई प्रभाऽ नेई होंदा।

हनुमान जी दी शक्ति दा पता इस गल्ला बी लग्गी जंदा ऐ जे बाली ने अपने दुश्मन भ्राऽ सुग्रीव पर कदें हमला नेई कीता की जे हनुमान उसदे कन्नै हे। रावण ने जदू सीता हरण कीता ते राम उं'दी तपाश च हे अदू भगवान राम दा हनुमान ते सुग्रीव कन्नै मिलाप होआ हा।

हनुमान जी गी संकट मोचन करी बी कुआलदे न की जे ओह अपने भक्तें गी संकटें थमां बचांदे न। सरस्वती ते इन्द्र आखदे न जे, जो कोई हनुमान भक्त

ऐ उ'नेंगी ओह संकटें थमां बचांदे न। मंगलवारें जो कोई हवन करै धुफ दीया हनुमानजी गी समीपत करे तां उसदी मनोकामना पूरी होंदी ऐ। ते ओह भगवान राम दा बी परम प्यारा होई जंदा ऐ। भगवान शिव बी उस पर खुश रौहंदे न ते सब्भै देवता बी उस भक्त दा आदर करदे न। हनुमान जी करूणा बल बुद्धि ते शक्ति आहले न ते अपने चमत्कारें कन्नै भक्तें दी मदद करदे न। उस जाप करने आहले पर जादू मंत्र टोने माड़ेभाग ते बमारी दा कोई असर नेई होंदा।

इस हनुमान मंदर च उ'आं ते रोज गै भीड होंदी ऐ पर खास मौके पर जदूं प्रवचन जां कथा दा सरिस्ता कीता जंदा ऐ तां मती गिनतरी च भक्त इत्थें औंदे न। हनुमान जयंती पर भंडारा कीता जंदा ऐ ते सारा हफ्ता हनुमान कथा कीती जंदी ऐ। हनुमान जी गी रोट, देसी घ्यो दे लड्डू ते बूंदी दा प्रसाद चाढ़ेआ जंदा ऐ।

जिसगी शनि ग्रैह होए ओह हनुमान जी दी पूजा करै तां उसदा शानि शांत होई जंदा ऐ। हनुमान भक्तें गी बल, बुद्धि ते ज्ञान प्राप्ति होंदी ऐ ते ओह रोग मुक्त होई जंदे न। ओह म्हेशां अपने भक्तें दी रक्षा करदे न।

०००

श्री महालक्ष्मी मंदिर-पक्का डंगा

जम्मू शैहरा दे बशकार पक्का डंगा थाहरा पर माता महालक्ष्मी जी दा मंदर शोभामान ऐ। औने जाने आहले लोक इत्थें जरूर मत्था टेकदे न ते शाम सवेरे भक्त इत्थें बड़ी श्रद्धा कन्नै औंदे न।

पक्का डंगा कन्नै काली जन्नी, फत्तु चगान खिलौने आहली ग'ली, मोती बजार, अफगाना म्हल्ला दियां ग'लियां रलदियां न। बजार दा मुख बजार होने कारण इत्थें बड़ा घना बजार ऐ ते सारा दिन इत्थें चैहल पैहल रौहदी ऐ। लोकें मूजब इत्थें जेहड़ा बड़े दा बूहटा ऐ इसदे आले दुआले इक कच्चा थढ़ा (डंगा) बने दा हा जित्थें औने जाने आहले 'अ'राम करदे ते रुट्टी खंदे ते ठंडी हवा च गपशप मारदे। अदूं बिजली दे पखे घर-घर नेई हे इसकरी लोक बूहटें हेठ गै ठंडी हवा दा मजा लैंदे। किश धर्मप्रेमी लोके, समाज सेवकें ते पैहे आहले लोकें रलियै इस थढ़े गी पक्का करवाई दित्ता। इससै करी इत्थूं दा नांऽ पक्का डंगा ते कोल दे म्हल्ले दा नांऽ म्हल्ला पक्का डंगा पेई गेआ।

एह मंदर इक उच्ची फ्हाड़ी पर बने दा ऐ ते जम्मू दे बाकी मंदरें आहला लेखा गै ऐ। मन्नेआं जंदा ऐ जे महालक्ष्मी जी दा इन्ना बड्डा मंदर उत्तर भारत च होर कुसा बी थाहरा पर नेई ऐ। चिट्टे संगमरमर कन्नै बनी दी महालक्ष्मी जी दी मूर्ति गी गैहनें कप्पड़ें ते फुल्लें कन्नै सजाया गेदा ऐ। सिरै पर मुकुट ते उसदे पर सुन्ने दा छत्तर ते दौने पाससैं हाथियें दियां मूर्तियां न जेहड़े अपनी सूंढां कन्नै महालक्ष्मी दी मूर्ति पर फुल्ल माला पा करदे न। माता दी खब्बी भेठा हनुमान जी दी मूर्ति ऐ ते कंधा पर बने दे तौकड़े पर मती गिनतरी च शालीग्राम रक्खे दे न। मंदरें दी कंधें गी बी सजाया गेदा ऐ। केई देवी देवतें दे चित्तर बी कंधें पर बने दे न। मंदरे च भक्तें दे बौहनें दे थाहरा गी संगमरमर कन्नै बनाया गेदा ऐ। एह मूर्ति इन्नी सत्या आहली ऐ जे कोई चालीं दिन इत्थें

पूजा विधिपूर्वक करे तां उसदी, मनोकामना पक्क पूरी होंदी ऐ। इस माता दे दरबार थमां कोई खाल्ली नेई जंदा। ओह अपने भक्तें गी धन ते खुशियां दिंदी ऐ।

महालक्ष्मी जी दी पूजा सब्भनें देवी देवताएं कीती। पाण्डव पुत्र युधिष्ठिर ने अपने मुहाए ते राजपाठ गी वापस पाने गितै महालक्ष्मी जी दी पूजा कीती ही, ते उ 'नेंगी राजपाठ ते सुख दी प्राप्ति होई। माता दे चमत्कारें दा केई ग्रैन्थें च वर्णन लब्धदा ऐ। आखदे न जिसलै देवी देवतें ते राक्षसें रलियें समुद्र मंथन कीता हा तां चौदां रत्नें समेत लक्ष्मी जी प्रगट होइयां हियां। शास्त्रें च गलाया गेदा ऐ जे लक्ष्मी सिर्फ काबिल माहनू कोल गै रौंहदी ऐ। मूर्ख माहनू कोल लक्ष्मी कदे नेई रौंहदी की जे उसदी इसकी कोई कद्र नेई होंदी। लक्ष्मी जी गी महालक्ष्मी, सुर्ग लक्ष्मी, गृहलक्ष्मी, संतान लक्ष्मी ते राज लक्ष्मी दे नांऽ कन्नै जानेआं जंदा ऐ।

महालक्ष्मी जी दा एह मंदर छत्ता पर होने करी भक्तें गी किश पौड़ियां चढ़ी जाना पौंदा ऐ। ख'ल्ले पैहले मंदरा च इत्थूं दे पुजारी पंडित रत्नचंद जी दे गुरु दुद्धधारी जी दी मूर्ति ऐ। कन्नै आहले मंदरे च मां चंडी दे फोटू न जित्थें सं'जां बेल्लै कीर्तन मंडली कीर्तन करदी ऐ इसदे सामने वृहस्पति देवता दा मंदर ऐ कन्नै गै हनुमान जी दी मूर्ति ते शिवलिंग स्थापित ऐ। इत्थें गै ओह पराना बड़ दा बूहटा, शनि देवता दी मूर्ति ते अखण्ड जोत ऐ। मंदरें दा वातावरण धूप दीप ते फुल्लें दी सुगंधी कन्नै खशबोदार रौंहदा ऐ। श्रद्धालु मैत्र पढ़दे शिवलिंग पर जल ढालदे न ते हर ब'रै इत्थूं थमां गै भद्रवाह लेई माता मचेल दी जातरा शुरू होंदी ऐ।

डेढ़ सौ ब'रा पैहलें इत्थें फ्हाड़ी पर देहरी आहला लेखा इक निक्का जनेहा मंदर हा जित्थें भक्त आई पूजा करदे पर मंदरें दी कोई शैल चाल्ली दिखरिख नेई हा करदा। उ'नें दिनें मंडाल दे रौहने आहले पंडित जगन्नाथ अक्सर जम्मू औंदे। मंदरे दी हालत दिखी उ'नें इसगी बनाने सोआरने दा मन बनाया। ओह बड़े धार्मिक बचारें दे मन्ने परमन्ने दे माहनू हे।

लोकें दी मदद लेई उ'नें मंदरें गी नमां रूप देने दा फैसला कीता ते मंदरें

च मां महालक्ष्मी दी मूर्ति स्थापित कीती। मंदर बनवाने लेई उ'नें धर्मार्थ ट्रस्ट दी बी मदद लैती। मंदर दी जिम्मेदारी पंडित जगन्नाथ जी पर ही। ओहू गै मंदर च पूजा बी करदे। उ'नें दिनें धर्मार्थ ट्रस्ट दस्स रपेऽ म्हीना मंदरें गितै दिंदा जेहड़ा बाद च बीहू रपेऽ करी दिता गेआ। 1947 च पंडित जगन्नाथ जी दे काल होई जाने परैन्त पंडित रत्नचंद होरें उंदे आहंगर गै बड़ा मन लाई मंदरें दा कम्म काज अगड़ा बधाय। जदू पंडित रत्न चंद दा काल होई गेआ तां उंदी लाड़ी दयावन्ती होरें चार ब'रें मंदरें दी जिम्मेदारी नभाई। फही किश चिरै मगरा मंदर पर धर्मार्थ ट्रस्ट दा अधिकार होई गेआ ते किश म्हीने मगरा दयावन्ती दा बी सुर्गवास होई गेआ।

पंडित रत्नचन्द पढ़े लिखे दे माहनू हे उ'नें बी० ए० ते प्रभाकर दे लावा ज्योतिष दी शिक्षा बी हासिल कीती दी ही। ओहू कर्मकांड च रुज्जे दे सिर्फ इक डंग रुट्टी खंदे ते ईश्वर दी भक्ति च मग्न रौहंदे। महात्मा दुधादारी जी दी मूर्ति उ'नें अपने पैहें कन्नै जयपुर थमां मंगवाई ही पर उसदी स्थापना उंदे काल होई जाने परैन्त होई।

महालक्ष्मी मंदर दे चमत्कारें बारे बखान करदे होई पक्का डंगा रौहने आहले रामचन्द जी ने सनाया जे इक बारी कीर्तन मंडली च इक जागतै दी कुसा कन्नै लड़ाई होई गेई तां उसने अपनी जीह्व ब्लैड कन्नै कटी माता दे चरणें च इक डूने च पाई अर्पण कीती। पंडत जी ने दिक्खेआ तां जागतै दे मुहां थमां खून निकला करदा हा। पंडत जी ने लक्ष्मी मां अगें प्रार्थना करदे होई मंत्र पढ़े तां जागतै दी जीह्व ठीक होई गेई। एहू चमत्कार दिक्खी सब्भै र्हान होई गे।

नरातें च इस मंदर चा माता झांकी निकलदी ऐ ते फही भक्त मां वैष्णों दे दर्शनें गितै जंदे हे। एहू जत्था पैहलें पंडित जगन्नाथ ते फही रत्न चन्द हुंदी अगुआई च जंदा हा। पैहले दिन भक्त नगरोटे माता दी पिंडी दी पूजा करदे देवा माई मंदर पुजदे ते फही वैष्णों देवी दे दरबार हाजरी लाई कजंका पूजदे हे। पंडित जगन्नाथ महालक्ष्मी दे पूजारी होने दे कन्नै-कन्नै लोकें दे कश्टें दा निवारण बी करदे।

1947 च जदू रजौरी ते पूछ दे शरणार्थी मंदर च आऐ तां इत्थूं दे प्रबधकें ते लोकें रुट्टी टल्लें दे लावा लोकें दी होर बी मदद कीती।

इसलै मंदरें दे पुजारी नन्द किशोर हुंदे मताबक महालक्ष्मी ते हनुमान जी दियां मूर्तियां राजस्थान थमां आहनने लेई 42 दिन दा समां लग्गा हा। आखदे न जे कदें कोई बी भक्त जां पुजारी कोई भुल्ल करै तां मता दी अक्खें थमां अत्थरूं निकलदे न। पुजारी माता थमां हत्थ जोड़ी माफी मंगदे न। राज परिवार दे लोक बी माता पर आस्था रखदे न। पैहलें माता दा भोजन राजदरबार थमां औंदा हा। पुजारी पर्दा अगड़ा करी भोजन रखदा तां पर्दा खोह्लने पर ओह् अद्धा रेही जंदा। उस बचे दे भोजन गी प्रसाद रूप च लोक ते राजपरिवार दे लोक पैहलें ग्रैहण करदे ते फही रुट्टी खंदे। मां लक्ष्मी गुलाब कमल च विराजमान तेजवान देवी न। भगवान विष्णु जी दी अर्धांगिनी मां लक्ष्मी होरनें देवताएं दी बी पूजनीय न। महालक्ष्मी जी दा श्री यंत्र दे दर्शनें दे जाप कन्नै भक्तें दे दुख दूर होई जंदे न ते सब्भै मनोकामनां बी पूर्ण होंदियां न। ते घरै च धन दौलत दी कमी बी नेई रौंहदी।

०००

मंदर अम्बिकेश्वर महादेव नगरोटा

भक्त भगवान शिव गी केई नांऽ कन्नै चैता करदे न। इंदा इक नांऽ भोलेनाथ बी ऐ की जे ओह् भक्तें पर झट्ट खुश होई जंदे न। श्रद्धा ते विश्वास दा नांऽ शिव ऐ जेहड़े माहनू उस पर भरोसा करदे न सदा खुश रौंहेदे न। मंदरै च शिव पार्वती गणेश दियां मूर्तियां स्थापित कीती गेदियां होंदियां न पर केई थाहरें आप शम्भू बी प्रगट होए दे जित्थें भक्तें मंदर बनाई दिते न। नगरोटा थमां लगभग इक किलोमीटर पूर्व पास्सै अम्बिकेश्वर महादेव मंदर ऐ। एह जम्मू दे पराने मंदरें दी गिनतरी च औंदा ऐ। इत्थूं दा वातावरण बड़ा सुहाना ऐ। इत्थें पैहलें ते सिर्फ शिवलिंग गै स्थापित हा पर हून इक बड्डे शिव मंदर गी बनाई उत्थें पराने शिवलिंग गी स्थापित कीता गेदा ऐ। ते कन्नै गै इत्थें माता मंदर ते राधा कृष्ण मंदर बनाया गेदा ऐ। इत्थें सराय ते स्वामी हनुमान गिरि जी दा निवास बी ऐ। स्वामी जी पिच्छले 60ऐ बरें थमां इत्थें न। पैहलें इत्थें घना जंगल हा इस करी कोई बी महात्मा पक्के तौर पर इत्थें नेई रेह पर स्वामी जी ने आई इत्थें कुटिया पाई ते लोक उंदे कोल औन जान लगे ते इत्थूं दी रहोल च बाद्धा होआ।

इक बारी स्वामी जी गी भगवान शिव ने बाल रूप च दर्शन दिते। लम्मी जटाएं ते हत्थें च त्रिशूल लेदे भगवान ने आक्खेआ जे इस थाहरा दा बकास तेरे हत्थें होग। इस करी तूं डरेआं नेई ते इत्थूं दी दिखरिख भक्तें कन्नै रली मिली करो। मैहत हुंदा गलाना ऐ इत्थें सब किश शिव कृपा कन्नै होआ दा ऐ। जदूं कदें बरखा नेई होए तां लोक इत्थें आई पूजा करदे न ते बरखा होई जंदी ऐ। इत्थें इक पानी दी बौल्ली ऐ जिस च नाग देवता वास करदे न। इसदा पानी कदें नेई सुकदा। भक्त पूजा थमां पैहलें इत्थें गै बौल्ली दे पानी कन्नै स्नान करदे न।

नगरोटा निवासी शंकर दत्त मताबक अम्बीं मंदर जेहड़ा अम्बिकेश्वर दे

नांऽ कन्नै मशहूर ऐ इत्थूं दा पराना मंदर ऐ। इत्थें जदूं भजन कीर्तन ते यज्ञ होंदा हा बरखा जरूर होंदी। घम्मी जगटी दे जगत राम मास्टर इक धार्मिक माहनू हे ओह् अक्सर स्कूल दे बच्चे गी लेई मंदर औंदे यज्ञ हवन करवांदे ते मिट्ठा भत्त प्रसाद च बच्चें गी दिंदे। जिसलै बच्चे प्रसाद खाई लेंदे तां उ'नेंगी तौले घर पुज्जने गी आखदे की जे बरखा च सिज्जी नेई जान। पैहले इत्थें आम लोक औंदे हे पर इसलै फौज दे अधिकार च होने करी बड़े घट्ट लोक इत्थें पुज्जी सकदे न। शिवरात्रि पर इत्थें त्रै दिनें तगर यज्ञ पूजा चलदी ऐ। इत्थूं दा राधा कृष्ण मंदर 19 अप्रैल 2000 गी इन्दुगुप्ता ने अपने पति दी याद च बनवाया। माता वैष्णो देवी दा मंदर रिटायर्ड नेवी अफसर कृष्ण सिंह सलाथिया होरें बनवाया।

नगरोटा दे नम्बरदार शिवनाथ जी इस मंदर च रोज औने आहले भक्तें 'च न। गर्मी-सर्दी बरसात जां पही त'वी च आए दा हाड़ उंदे रस्ते दी कदें रोक नेई बनेआं। उंदा मनना ऐ जे शिव दा आशीर्वाद परिवार च सुख शांति आहनदा ऐ।

शिवनाथ होरें मंदर बारे प्रसिद्ध दंतकथा सनाई जे एह जमीन ठक्कर राजपूतें दी ही। इक दिन जमीनदार जमीन च कम्म करदे उसगी शिवलिंग लब्धा तां उसने बड़े आदर कन्नै इक बक्खी रक्खी दिता। दूऐ रोज जिसलै ओह् जमीन च पुज्जा तां शिवलिंग परतियै अपनी थाहर पुज्जी गेदा हा। ओह् रूहान होई गेआ। अगले रोज उसने शिवलिंग त'वी च जाई टकाया पर ओह् चमत्कारी शिवलिंग परती अपनी थाहर आई गेआ। जमीन दा मालक समझी गेआ एह शिवजी दा चमत्कार ऐ। उसने उस्सै थाहर शिवलिंग स्थापित करवाया।

ढोक वजीरा ग्रां च इक तरखान हा जेहड़ा लक्कड़ी दे कन्नै पत्थर बी घड़ी लेंदा हा उसने पत्थर घड़ियै चार पिल्लर बनाए ते शिवलिंग पर पत्थर दी सलैब पाई दिती। ओह् पिल्लर अज्ज बी इत्थें है न। भगवान शिव दे भक्तें गी कदें दुख नेई होंदा। धन दौलत कन्नै ओह् म्हेशा भरोचे दे रौहदे न।

०००

श्री रघुनाथ मंदर कैक

जम्मू थमां 15 किलोमीटर उत्तर च जम्मू गरोटा अखनूर शिड़का पर कैक ग्रां च श्री रघुनाथ मंदर ऐ। जित्थें राम, सीता लक्ष्मण जी दियां मूर्तियां न। राम जी दी मूर्ति काले संगमरमर दी ते माता सीता ते लक्ष्मण दियां मूर्ता चिट्टे संगमरमर दियां न। कन्नै गै कृष्ण जी दी मूर्ति ऐ। कन्नै राम परिवार दियां पित्तलू दियां मूर्ता बी न ते ख'ल्लें द'ऊं पक्तें च शालीग्राम न जिं'दी रोज पूजा कीती जंदी ऐ। इत्थें इक तलाऽ बी है जिसगी बाटली नांऽ कन्नै जानेआं जंदा ऐ। एह तलाऽ लोकें दी पानी दी जरूरतें गी पूरा करदा हा। आखदे न इक विधवा जनानी ने इसगी बनाया हा। तलाऽ पर लोकें दी खास भीड़ रौहदी ही। लोक स्नान परैत्त मंदरै च भगवान दे दर्शन करदे हे।

बझोंदा ऐ जे मंदर तलाऽ परैन्त बनाया गेदा ऐ की जे मंदर पिच्छूं उच्चाई पर ऐ। पिछली कंध इन्नी उच्ची ऐ जे पच्छम पास्सेआ दिक्खो तां पाकिस्तान दे केई ग्रां साफ लब्भदे न।

मंदर अंदरा शैल सजाया गेदा ऐ। सज्जे पास्सै महावीर दी मूर्ति, कंधा पर सज्जे पास्सै दुर्गा माता ते खब्बे पास्सै लक्ष्मी नारायण मंदर ऐ। सामनै महावीर मंदर ऐ कन्नै गै शिवलिंग स्थापित कीता गेदा ऐ। धर्मराज मंदर ते छैं मैहतें दियां समाधियां न।

मंदर दे मैहत प्रीतमदास जी ने दस्सेआ जे एह वैरागी गद्दी ऐ अर्थात् जेह्दे मैहत इत्थें बैठे ओह ब्याह नेई करदे। मैहत जी मताबक एह मंदर पौने दो सौ ब'रै पैहलें गुलाब सिंह दे राज च बनेआ हा। एह गद्दी मंदर बनने थमां पैहलें बी एह ही। पैहलें महंत नारायण दास जी हे जेह्दे चले कन्नै तीर्थ स्थानें दी जातरा करदे रौहदे हे। इक बारी ओह इत्थूं गुजरे तां उ'नेंगी एह थाहर बड़ा पसंद आया ते उ'नें इत्थें रौहने दा फैसला करी लैता। ते इत्थें ओह कुटिया च रौहदे ते भगवान भक्ति करदे।

जंगलै च मंगल होई गोआ लोक बी हून महात्मा हुंदे कोल आई प्रभु भक्ति दा आनन्द लैदे। महंत नरायाण दास जी परैन्त मैहंत साधुराम मैहंत जगन्नाथ मैहंत रामदास जी ते मैहंत मंगलदास बी गद्दी पर बैटे। महंत होरें सनाया जे मंदर बनवाने च इत्थूं दे शाह् गुरुमुख हुंदा बड़ा जोगदान रेहा। ओह् दरबार च बड्डे अधिकारी हे पर इन्ना पैहा खर्च करना उंदे बस्सा च नेई हा पही बी उ'नें खरे कम्मों लेई किश बुरा करना शुरू कीता। ओह् सरकारी पैहे बिच्चा किश पैहा मंदरै पर लाई दिंदे। राजे गी खबर पुज्जी जे गुरुमुख सरकारी पैहे दी हेराफेरी करा दा ऐ तां उसगी राजे ने दरबार च पुच्छेआ तां उ'नें सच्च-सच्च दस्सी दिता। उंदी खरी भावना दिखदे होई उ'नेंगी छोड़ी दिता गोआ।

गुरुमुख ने माफी मंगी ते राजा ने उंदी इच्छा मताबक मंदर बनवाने लेई मदाद देना शुरू कीती। उसलै महाराज ने दऊं मंदर बनवाए। इक इत्थें ते दूआ सूही। मंदर बनने परैन्त यज्ञ हवन करी भगवान राम सीता ते लक्ष्मण दियां मूर्ता स्थापित कीती गेइयां। राजपूत जमींदारें मंदर कोल किश जगह साधु सैंतें दे भोजन प्रबंध लेई छोड़ी दिती। हून किश लोकें मती जमीन घेरी लेदी ऐ ते बड़ी घट्ट मंदर कोल ऐ।

मते मैहंत इत्थें इस गद्दी पर बैटे। मैहंत चरंजी 20एँ ब'रें दी उमरी च गदी पर बैटे ते 1986 21 जून गी उ'नें मैहंत प्रीतम दास गी गद्दी पर बठाया। मैहंत चरंजी 7 जुलाई 1996 गी सुर्ग सधारी गै।

मैहंत साधुराम दास जी दे समें च इत्थें केई चमत्कार होए जिस कारण एह् गद्दी दूर-दूर तगर मशहूर होई गेई ते इत्थें मते लोक औन लगी पे। आखदे न इक बारी मैहंत साधु राम दास होरें भगवान श्री कृष्ण दी मूर्ति अग्गें खड़ोई अर्ज कीती जे प्रभु इन्ना चिर होई गोआ तुंदी भक्ति करदे पर खाने गी दुद्ध, घ्यो, मक्खन देहीं प्राप्त नेई होआ। भगवान कृष्ण ने अर्ज सुनी ते ग्रां च जाई तरखाने दी चाटी च जाई बैटे जिसलै रिड़कन चाटी च देंही ओह् लगे तां खड़-खड़ दी बाज सुनी उ'नें चाटी मंदर चाढ़ी दिती। जिसलै केई दिन इ'यां होआ तां घरेआले सोचेआ भगवान गी रोज मक्खन खान इत्थें औना पौंदा ऐ इसकरी मंदर जाई मैहीं मंदर ब'न्नी औन्ने आं। अदूं थमां उस परोआर ने ठाकुर जी गी कुल देवता मन्नी लैता ते अदूं थमां गै ओह् कृष्ण जी दी इत्थें पूजा करदे न। नमीं फसल बी पैहलें प्रभु चरणें च अर्पण करदे न।

इक बारी साधुराम दास जी अपने कुसा भक्ता दे घर पटियाल ग्रां गे तां उ'नें दिक्खेआ जे ओह सुक्के दे अम्बे दा बुहटा कप्पा करदे न। महात्मा होरें मना कीता तां ओह बोल्ले इसदा केह लाह एह हून फलदा नेई तां मैह्त होरें आक्खेआ जे एह जरूर फलग। किश चिरें मगरा बूहटा फली पेआ ते अज्ज बी एह बुहटा फलदा ऐ। ते घरैआहले पैहले मंदर अम्ब पंजादे न ते फही खंदे न। मैह्त जी दे समें च इत्थें मंदर च कोई कमी नेई ही। लंगर हर बेल्लै चलदा रौहदा। उंदे परैन्त किश कमी पेशी आई पर फही तौले गै पैहलें आंहगर इज्जत मान बधी गेआ।

एह कंडी लाका हा इत्थें पानी बड़ा घट्ट हा। तलाऽ च लोक न्हौने, कपड़े धोने, डंगरें गी पानी पलांदे तां पानी गंदा होई जंदा। इत्थूं दे इक भक्त नत्थू राम अबरोल होरें 24 जेठ 1947 गी इत्थें इक बौली बनवाई ते उसदा पानी सिर्फ भगवान ते शालग्रामें लेई गै इस्तेमाल कीता जंदा।

इत्थें मंदर च प्रवचन करने गित्तै बाहरा विदवानें गी बलाया जंदा ऐ ते मौके-मौके पर हवन यज्ञ ते भंडारे बी कीते जंदे न। राम जनम, जनमाश्टमी शिवरात्रि ते होर त्यहारें पर बड़ी रौनक होंदी ऐ। अज्ज बी मैह्त प्रीतम दास जी इस परंपरा गी नभाऽ करदे न।

बसंत पंचमी गी इत्थें सब्भनें थमां बड्डा कार्यक्रम होंदा ऐ। लोक भजन कीर्तन लेई इत्थें औंदे न। भंडारे आहले दिन जसवां, परियाल, बुर्ज मंदर, खालासे चक आदि ग्राएं थमां लोक इत्थें औंदे न। एह लोक इत्थूं गै गेदे न।

रामनौमी गी मंदर दे सामनै बने दे तलाऽ पर कुशती दा आयोजन कीता जंदा ऐ। जित्थें जम्मू हरियाणा पंजाब दे पैहलवान बी औंदे न। इत्थूं दा तलाऽ अनदिखी कारण सुक्की गेदा ऐ। सारी लुकाई अज्ज बाहरी दखावे च पेई सच्ची भक्ति ते भगवान गी भुल्ली गेदी ऐ।

०००

परमेश्वरी मंदर-जम्मू

त'वी कंठै सज्जी भेठा बस्से दा जम्मू अपने शलैपे लेई मशहूर ते भारत थमां ते दुनियां दे केई थाहरे दा सैलानी इसगी दिखने गी औंदे न। तीर्थ थाहरे भक्त बी दूरां-दूरां इत्थें औंदे न। इत्थूं दे बसनीक बी ईश्वर च भरोसा रखदे न शाम सवेरे मनचित लाई उस प्रभु दी भक्ति करदे न।

जम्मू म्हेशां आपसी भाईचारे लेई मशहूर रेहा ऐ, इत्थें हिन्दू, मुसलमान, सिख ईसाई ते होरने धर्मे दे लोक प्रेमभाव कन्नै किट्ठे रौंहदे न। जम्मू च मंदर पैहलें बी है हे पर डोगरा राजें खासकर महाराजा गुलाब सिंह महाराजा रणवीर सिंह, महाराजा प्रताप सिंह दे राज च ते केई मंदर बनाए गे। ते जम्मू धर्मस्थल बनी गेआ। रघुनाथ मंदर डोगरा राजें आसेआ ओह खास निर्माण ऐ जिसगी दुनिया भरा थमां लोक दिक्खन औंदे न। इत्थें देवी देवताएं दे मंदरें च हर बेल्लै भजन कीर्तन होंदा ऐ। एह मंदर गुलाब सिंह दे मौके शुरू होआ ते महाराजा रणवीर सिंह दे बेल्लै पूरा होआ।

मंदरें दे लावा इत्थें ढक्कियां बी मशहूर न जि'यां पक्की ढक्की, ढक्की पीर मिट्ठा, ढक्की सराजां, ढक्की मस्त गढ़, ढक्की दलपतियां आदि। इक सब्भनें थमां परानी ढक्की जिसगी लोक भुल्ली गेदे न ओह ऐ परमेश्वरी ढक्की। एह ढक्की पीर खोह शिव मंदर दे रस्ते ऐ जित्थें मस्तगढ़, पीर मिट्ठा, दलपतियां ते ढक्की सराजां दा मेल होंदा ऐ। एह सब्भै त'वी दे सज्जै कंठै पर न। इस ढक्की पर बने दे त्रै मंदर अज्ज बी इसदा चेता करांदे न। इत्थें किश चिर पैहलें चौथा मंदर बी बनाया गेआ जित्थें शिवलिंग स्थापित कीता गेआ। पीर खोह दी सज्जी भेठा नौ पोड़ियां चढ़ने परेंत इक पगडंडी इ'नें मंदरें पाससै दंरी ऐ। चाली, पंजाह मीटर चलने परेंत शीतला माता पिंडी औंदी ऐ जिसदे सामनै निक्का कुंड ऐ जिस च कच्ची लस्सी (दलस्सी) चाढ़ी जंदी ऐ

जिस कन्नै शरीरिक दुख मिटदे न ते संतान प्राप्ति होंदी ऐ। खास मौके पर लोक इत्थें आई मत्था टेकदे न ते अपने परोआर लेई सुख मंगदे न। इत्थूं दा वातावरण इन्ना शैल ऐ जे भक्त शांत मन चिर भर इत्थें पुजा अर्चना च मग्न रौंहदे न।

शीतला माता मंदर दे कोल गै परमेश्वरी मंदर ऐ जित्थें मां शक्ति दी चिट्ठे संगमरमर दी च'ऊं भुजाएं आहली मूर्ति ऐ। उप्परले हत्थें च गदा ते ख'लके च गोल अकार दा खप्पर ऐ। इ'यां गै उप्परले खब्बे इत्थें च गदा ते ख'लके च त्रिशूल ऐ। सिरै पर मुकुट ऐ। ते इसगी लाल कप्पड़े ते फुल्ल माला कन्नै सजाया गेदा ऐ। पैहलें लोक इस मूर्ति पर जल फुल्ल चाढ़दे हे जिस कन्नै मूर्ति दा शलैपा शराब होने दा डर हा इस करी हून माता दी इक पिण्डी किश ख'ल्लें बनाई गेदी ऐ जिस पर भक्त जल फुल्ल धुफ चाढ़दे न। कन्नै गै शिव लिंग बी स्थापित ऐ जित्थें भक्त जल ढालदे न। इत्थें मंदरें कन्नै गै माता बैष्णो ते नाग देवता दा पराना मोहरा बी ऐ।

परमेश्वरी मंदर बारै इक परानी कहानी इ'यां ऐ जे करीब जहार बरि पैहलें जम्मू दा राज राजा ब्रजधर गी मिलेआ।

बहादर राजा ने अपने राज गी बहादरी कन्नै खूब बधाया। पंजाब ते दिल्ली तगर दे राजा उसदी बहादरी गी मनदे हे। ब्रजधर ने रकवाल राजपुतें दे घर ब्याह कीता। रानी दां नांऽ परमेश्वरी हा। राजा दे घर कोई औलाद नेई होई इस कारण ओह म्हेशां दुखी रौंहदा ते रानी कशा दूर-दूर रौंहदा। दिल्ली दे राजा अनंगपाल ने राजा ब्रजधर गी अपनी धियु कन्नै ब्याह करने दा सनेहा भेजेआ तां ब्रजधर ने खुशी-खुशी मन्नी लैता तां जे उसगी औलाद ते राजगद्दी गी बारस थोई जाहग। ब्याह होआ तां राजा दूई रानी दे शलैपे पर इन्ना गुआची गेदा हा जे राजकाज परैत सारा समां उस कन्नै गजारदा ते बड्डी रानी गी कदें चैता बी नेई करदा। ओह अपने बक्खरे मैहलें च रौंहदी ते प्रभु भक्ति च लीन रौंहदी ते कन्नै गै पति धर्म दा निर्वाह करदी। रोज बड्डलै ते संजा राजा दे वस्त्रें दी बी पूजा करदी ते अपने बीते दिनें दा चैता करी वक्त गजारदी। सारे लोक रानी दा पतिधर्म नभांदे दिक्खी उसदी म्हेशां चर्चा करदे।

किश बरें मगरां राजा ने दूई रानी कन्नै भगवान जगनाथ जी दी यात्रा पर जाने दा सोचेआ। उस्स रातीं भगवान जगन्नाथ जी ने राजा गी सुखने च दर्शन दित्ते ते आक्खेआ- तूं रानी परमेश्वरी कन्नै जो कीता तुगी उसदी स'जा जरूर भोगनी पौनी ऐ। तूं उसगी दुखी करियै मेरे दर्शन करी मिगी खुश करना चांहना एह् मिगी मजूर नेई। ओह् तुगी सच्चे मनै चांहदी ऐ ते भगवान मनदी ऐ। जिस कोल नेही पतिधर्म नभाने आहली लाड़ी होऐ उसगी कुसै तीर्थ जाने दी लोड़ नेई। जेकर ओह् तेरे कन्नै नेई औग तां तुगी मेरे दर्शन नेई होडन।

एह् आक्खी भगवान छपन होई गे। राजे दी अक्ख खु'ल्ली तां ओह् बड़ा परेशान होआ। ते पछताया जे परमेश्वरी कन्नै उसने बड़ा बुरा कीता। तीर्थ यात्रा पर ओह् उसगी बी अपने कन्नै लेई गेआ। दमैं रानियां ते राजा उत्थें केई दिन रेह् ते फही रानी परमेश्वरी ने उत्थें गै समाधि लेई। उत्थें गै उसदा संस्कार कीता गेआ। राजा जिसलै घर परतोई आया तां बड़ा दुखी रौहन लगा की जे उसगी अजें बी कोई लोआद नेई ही।

इक राती रानी परमेश्वरी ने राजा गी सुखने च दर्शन दित्ते ते आक्खेआ “मेरा मंदर बनवाओ मेरी पुजा करो तां तुंदी परेशानी खतम होग। तेरे घर लोआद होग। राजा ने रानी दे कथन मताबक त'वी दी सज्जी भेठा शक्ति माता दा मंदर बनवाया जेह्ड़ा परमेश्वरी मंदर दे नांऽ कन्नै मशहूर होआ ते जिस ढक्की पर एह् मंदर बनेआ ओह् परमेश्वरी ढक्की खुआई। अज्ज घट्ट लोक इस बारै जानदे न।

इस मंदर कोल माता भद्रकाली मंदर माता बैष्णो देवी दे त्रै रूप, मां सरस्वती, मां लक्ष्मी ते मां काली। मां काली दे भक्त केई नाएं कन्नै माता दी भक्ति करदे न जिं'दे च भद्रकाली, श्याम काली, गुहाकाली ते रक्षा काली आदि प्रसिद्ध न। एह् देवी नील कमल आंहगर श्याम रंग दी ऐ। इस मंदर च मां भद्रकाली दा श्याम रंग, चार हत्थ, गले च मुंडमाला ते चोला ऐ। मां भद्रकाली दे लम्मे दंद, चंचल जीभ, लाल अक्खां, चौड़े कन्न ते खु'ल्ले दा मूंह ऐ। मां चमुंडा ने असुरें कन्नै लड़ाई च चंड मुंड नांऽ दे दं'ऊ राक्षसें दा खात्मा कीता हा इसकरी माता गी चामुंडा बी आक्खेआ जंदा ऐ। भद्रकाली संहार दी देवी ऐ। दुष्टें दा नाश करदी ऐ ते भक्तें दी रक्षा करी मनोकामना पूर्ण करदी

ऐ। माता दी मूर्ति साक्षात वीरता, अलौकिक शक्ति दी प्रतीक ऐ। माता दी द'स्सें बाहमें च तलवार, चक्र, गदा, बाण, धनख, त्रिशूल, **भुशुडि**, सिर ते शंख ऐ। इस मंदर दी कंधें पर देवी देवताएं दे चित्र बी बने दे न। एह जम्मू दे प्राचीन मंदरें चा इक ऐ। मंदर बनने थमां पैहलें इत्थें माता भद्रकाली दे मोहरे हे पही अज्ज थमां दऊं सौ ब'रें पैहलें महाराजा गुलाब सिंह दे राज च मंदर बनाया गेआ ते भद्रकाली दी श्यामरंग दी मूर्ति स्थापित कीती गई। भद्रकाली माता दे भक्त कदें डरदे नेई, कोई भूत प्रेत नेई डरांदा, अकाल मौत नेई होंदी ते समाज च उंदा आदरमान होंदा ऐ ते ओह मोक्ष प्राप्त करदे न। किश चिर पैहलें इत्थें शिव मंदर बी बनाया गेआ ते शिवलिंग दी स्थापना कीती गई। मंदरै च गणेश जी कृष्ण जी ते होर देवताएं दे बी चित्र है न। नंदीगण दी चिट्ठी मूर्ति ते त्रिशूल दी बी इत्थें लोक पूजा करदे न। मंदरै दे आहते च मैंहत चरणदास दी समाधि ऐ ते कन्नै गै इक होर समाधि बी है।

इत्थूं दे एकांत च भक्तें गी प्रभु भक्ति च बड़ा सुख थहोंदा ऐ। इत्थूं दे प्रबंधक इस थाहरा गी होर मता शैल ते साफ सुथरा बनाने दे हीलें च म्हेशां रौहदे न। तां जे मते भक्त इत्थें माता शीतला, मां शक्ति ते मां भद्रकाली दे दर्शनें गितै औन। मंदरै दे बेहड़े च केई परानें पीपलें दे बूहटे न जित्थें भक्त पुजा करदे न। अशोक दे बुहटे ते रंगबरंगे फुल्ल आक्खो इत्थें औने आहले दा सुआगत करदे न। इत्थूं दे पुजारी बी भक्तें दा पूरा ख्याल रखदे न ते हर चाल्ली दी सुविधा भक्तें गी देने दा हर हीला करदे न।

०००

बाबा लीखो

बाबा लीखो दा स्थान जम्मू दे मुट्ठी ग्रां च ऐ। उत्थूं दे लोकें मताबक बाबी लीखो ब्रैह्मण हे। ओह् इक गरीब ब्रैह्मण हे ते अपनी मां दी इकलौती संतान हे। गजारे लेई ओह् लोकें दियां ते अपनियां गवां चारने गितै रोज बडडलै लेई जंदे ते संजा उनेंगी लेई वापस आई जंदे। इक बारी उंदी गौ मन्हास राजपूतें दे खेतरा च जाई पेई ते किश फसल नास करी दिती। जिसलै खेतरा दे मालके ने दिखेया तां उसगी बडा गुस्सा आया ते गुस्से च उनें लीखो गी मारी दिता। जिसलै लीखो दी मां गी पता लग्गा तां ओह् रोंदी करलांदी पुतरे दे कोल गई ते ओह् बी पुतरे कन्नै गै सती होई गई। उंदी चिखा गी अग्नि इक हरिजन जागतै ने दिती। उंदे परैत उंदी हत्या दा दोश मंहास जाति गी लग्गा तां उंदा थाहर् बनाया गोआ ने अदूं थमां उंदे चैते च बरे च इक बारी उंदे स्थान पर भजन कीर्तन ते जातर किती जंदी ऐ। मती गिनतरी च लोक इत्थें औंदे न। इत्थें इस दिन मेला दी लगदा ऐ।

०००

सुनाड़ा देवता

सुनाड़ा देवता दा थान झज्जर कोटली ग्रां च जरनैली शिड़का थमां इक किलोमीटर दूर ऐ। एह स्थान घने जंगला च ऐ जित्थें देवता दी देहरी च मोहरा रखेया गेदा ऐ। इत्थें देवता दी मूर्ति बी ऐ जेहड़ी इक योद्धा दे रूपा च बनाई गेदी ऐ। मूर्ति दे कोल गै झुण्डे बी रखे गेदे न। देहरे कोल पानी दा इक नाड़ा ऐ। आक्खदे न जे इत्थें इयै जनैह सौ नाडे हे तां करी गै इस थाहरा दा नां सौनाड़ा पेआ जेहड़ा सौनाड़ा थमां सुनाड़ा होई गेआ। सुनाड़ा मुआला, धुरता ते झज्जर कोटली आदि ग्रां दे लोके दा देवता ऐ। इत्तें बरें च दऊं बारी हवन यज्ञ करने लेई लोके दा किट्ठ होंदा ऐ। ईशर जाति दे ठाकुरें दा एह देवता कुलदेवता ऐ। इत्थें पुजारी ब्रैह्मण न। इत्थें होर केई देवतें दे मंदर न।

०००

बाबा बनियार

बाबा बनियार दा थान जम्मू दे ग्रां जगती च स्थित ऐ। इस ग्रां दे लोक बाबा बनियार गी बडी आस्था कन्नै पूजदे न। सारा ग्रां इंदे पर पक्का विश्वास रखदा ऐ। इस्सै करी हर खरी बुरी च इंदे स्थान पर आई लोक अपना सिर इंदे अगें झंकादे न। इंदा मोहरा इक खुल्ले मदान च रखेया गेदा ऐ। जदूं कदें बरखा नेई होने कारण लोके दी फसल प्रभावित हौए तां सारे लोक इस मदान च किट्ठे होई जंदे न। गारडी ते उसदे साथी जोरें-जोरें ढोल बजांदे न। आखदे न इस विनती गी देवता जरूर मनदे न ते दऊं त्रऊं रोजे च बरखा पेई जंदी ऐ। हर बरे इत्थें यज्ञ कीता जंदा ऐ ते कन्नै भंडारा बी कीता जंदा ऐ।

०००

बाबा बल्लो

बाबा दा जरम मथवार ग्रां च हौआ। ओह् शुरू थमां गै पुजा पाठ च अपना समां गजारदे हे। इक बारी उंदा कोई दोस्त जेहड़ा ठाकर हा कुत्तें गेआ ते अपने अम्बें दे बागें दी रखवाली बाबा बल्लो गी सौंपी गेआ। इक संजा बाबा पाठ पूजा च मग्न हे तां कोई उनेंगी सनाई गेआ जे घरकाल जाति दे लोकें अम्बें दे बाग च आईयै सारे अम्ब त्रौड़ी ले न। बाबा द्रौड़दे बागें च पुज्जे ते उंदे थमां अम्ब लेई बुहटे बक्खी सुटटे सारे अम्ब बुहटे पर परतिए लग्गी गै। करकाल गुस्से च आई गै ते गल्ल लड़ाई तगर पुज्जी गई। लडने थमां परें होई बावे ने अपने आप गी कटार मारी खत्म करी लैआ। करकालें गी उंदी मौती परैन्त केई चाल्लीं दे दुक्ख होए। कुसै सेयाने उनेंगी बावे गी मनाने गी गलाया तां जे ओह् उंदी हत्या दे दोश थमां मुक्त होई जान। करकालें बावे गी मनाया अपना गुनाह बख्शाया ते उनेंगी अपना कुलदेवता बनाया। अज्ज बी होरनें लोकें दा बी बाबा बल्लो पर पक्का विश्वास ऐ ते करकाल उनेंगी हर खरे कम्में च चैता करदे न ते हर बरे उंदे स्थान पर यज्ञ भंडारा आदि कीता जंदा ऐ।

०००

बुआ पागड़ी

बुआ पागड़ी दी देहरी आर.एस. पुरा दे बौकड़ी ग्रां च ऐ। बुआ इत्थूं दे हरिजनें दी कुलदेवी ऐ।

बुआ दी कथा मताबक बुआ दी कडमाई बौकड़ी ग्रां च होई। उंदी जदूं कडमाई होई तां उंदा घरैआहला तपेदिक दा रोगी हा। उनें दिनें इलाज नेई होने कारण इस बमारी गी महाकाल मनेया जंदा हा ते रोगी गी बुरी चाल्ली बक्खरा करी दिता जंदा हा समेत कपड़े, भांडे खट्ट बिस्तरे दे। कोई बी उसगी अपने कोल नेई हा औन दिंदा। इयां गै जंदू बुआ दे घरैआहले गी इस बमारी ने घेरेया तां उनेंगी घरा भ्रा भरजाईये थमां बुरा व्यवहार थोंदा जिस करी ओह बडे दुखी रौहदे। इस्सै दुक्खा कारण उनें इक रोज पीपले दे बुहटे हेठ जाई आत्मदाह करी लेआ। बुआ गी जिसलै होने आहले घरैआहले दी मौती दा पता लग्गा तां उनें उंदे कनै सती होने दा फैसला करी लैता। घरैआहले बडा समझाया जे तेरा अजे ब्याह नेई होए दा तुं सती कीऽ होना पर ओह नेई मन्नी ते सती होने गी चली पेईयां रस्ते च जिसलै लोके उनेंगी रोकने दी कोशिश कीती तां ओह धरती च समाई गेईयां। उंदी ब्हादरी ते बलिदान कारण लोके दा मन उंदे प्रति श्रद्धा कनै भरोई गेआ ते उंदे घरै दे लोके बुआ गी मनाया ते उंदी देहरी बनाई। हर बरे इंदी देहरी पर किट्ट होंदा ऐ ते लोक हवन यज्ञ करदे न।

०००

बाबा जित्तो ते बुआ कौड़ी



जम्मू थमां करीब बीह् किलोमीटर दूर बाबे दे तलाऽ कन्नै मशहूर प्रसिद्ध थाहर बाबा जित्तो दा ऐ। करीब पंज सौ बरे पैहले बाबा जित्तो दा जरम अगहार रियासी च होआ। उंदे पिता जी दा नां रूपचंद ते माता दा नां जोजलां हा। बाबा जित्तो दा ब्याह माया नां दी कुड़ी कन्नै होआ जेहड़ी इक कुड़ी गी जरम देई सुर्ग सधारी गई। बाबा जित्तो दी मासी जेहड़ी उंदी चाची बी ही उंदे कन्नै बड़ा बुरा बर्ताव करदी उसदे सत्त पुत्र हे जेहड़े जित्तो गी बडा तंग करदे उंदे थमां तंग आई बावा अपनी धियु गी कन्नै लेई पंजोड़ ग्रां च आई बस्से ते अपने दोस्त रोल्लू ते घग्गी दी मदद कन्नै उनेंगी अम्ब घरोटा दे जगीरदास मेहता वीरसिंह थमां करसानी लेई जमीन थ्होई गई जिसदा चौथा हिस्सा वीरसिंह गी जाना हा पर जिसलै बंजर धरती पर शैल फसल होई तां मेहता अद्ध लेने पर अड़ी गेआ तां जित्तो ने कटार मारी अपना आप खत्म करी लेआ। कनका दा ढेर लहुयें कन्नै लथपथ होई गेआ जिस-जिस ने ओह कनक खाद्धी अज्ज बी उस कुले दे लोक हर बरे इत्थे औंदे न ते बावे थमां माफी मंगी मत्था टेकदे न। बावे जित्तो कन्नै गै उंदी धीऽ बुआ कौड़ी बी सती होई गई।



उंदे परैन्त बावे दी क्रोपी होई तां इत्थें उंदियां देहरियां बनाईया गेईया जित्थें हून मंदर बी बनाया गेदा ऐ। कत्ते म्हीने दी पुन्नेया गी झिड़ी च सत्त दिन मेला लगदा ऐ अदूं इत्थें बड़ी रौहल हुंदी ऐ। लोक इत्थें बावे दे तलाऽ च जाई स्नान करदे न ते फी इत्थें मोहरे दी पूजा करी झिड़ी जंदे न जित्थें बावा जित्तो ते बुआ कौड़ी दे पराने मंदर न। जदूं इत्थे मेला लगदा ऐ तां पंजाब, हरियाणा, हिमाचल, दिल्ली ते होरने थाहरें थमां लोक इत्थें मत्था टेकन औंदे न।

०००

त्रीआ ध्याऽ

जिला कठुआ दे धार्मिक ते सांस्कृतिक थाहर

कठुआ

जिला कठुआ जम्मू कश्मीर रियासत दे उतर-दक्खन च स्थित ऐ। इसदियां दक्खन पच्छिम दियां सरहद्दां पाकिस्तान दी तसील शक्करगढ़ ते पंजाब दे जिला गुरदासपुर कन्नै जाई रलदियां न। उत्तर पूर्व च हिमाचल दे चम्बा तगर। इस जिले च कंठी, मदानी ते प्हाड़ी अलाके असेंगी भांत संभाते लब्भदे न। कठुआ च जेहड़े लाके शामिल न ओह न बसोहली, बलौर, बनी ते इत्थूं दा कंठी लाका। कठुआ वर्तमान च पंजें तसीलें च बंडोए दा ऐ जिंदे च बनी बसोहली बलौर कठुआ ते हीरा नगर शामिल ऐ। इक जिले च भांत-संभाते मौसम, फसलां, रीति रवाज ते रैहन सैहन नजरी औंदा ऐ।

डुग्गर दा कुदरती शलैपा इस जिले गी चार चन्न लांदा ऐ। धार्मिक सद्भावना ते आपसी समोध इत्थूं दे लोके च खास नजरी औंदा ऐ। डोगरी इत्थूं दी आम बोलचाल दी भाशा ऐ। पंजाबी, गोजरी, प्हाड़ी, कश्मीरी आदि बी लोक इत्थें बोलदे न।

०००

मंदर कठुआ

बाला सुन्दरी माता

बाला सुंदरी माता दा मंदर कठुआ थमां कोई दस्स किलोमीटर अगैं नगरी (पड़ोल) ग्रा च स्थित ऐ।

बाला सुंदरी नां सुनियै इक बझोंदा ऐ पर ऐसा नेई बाला ते सुंदरी माता दमैं सक्कियां भैनां न ते मंदरें च दौंने माता दियां पिंडियां मजुद न।

नगरी मंदर च इक शिला लेख बी ऐ। इसगी अजें तगर पढ़ेया नेई जाई सकेयां पर विद्वानें दा मनना ऐ जे एह ब्राही लिपि च लखोये दा ऐ। इस लिपि दा समां 10मीं शताब्दी कोला बी पैहले दा ऐ। इस थमां पता लगदा ऐ जे एह मंदर 10मीं शताब्दी थमां पैहले दा ऐ।

बाला सुंदरी माता गी दुर्गा दा रूप मन्नेया जंदा ऐ। इक दंद कथा मताबक पराने समें च इत्थें बड़ा घना जंगल हा। साधु महात्मा इत्थें तपस्या करदे हे। इस करी इस थाहरा गी तपोभूमि करी कुआलेया जंदा हा।

इक ब्रैह्मण इत्थें इक बारी अपनी गवा लेई घाऽ कप्पा करदे हे तां उंदा खुरपा धरती अंदर कुसै चीजा कन्नै लग्गा ते उनें दिक्खेया जे खुरपें गी बड़ा मता खून लगी गेदा ऐ। ब्रैह्मण बड़े दुखी होए जे उंदे थमां नाग हत्या होई गेई। पश्चाताप च ओह बिजन खाद्धे पीते प्रभु भक्ति च केई दिन बैठे रेह तां इक रातीं माता उंदे सुखने च आई ते सनाया जे तेरे खुरपे गी जित्थे खून लग्गा उत्थे मेरी पिंडी ऐ। बड्डलै उस पिंडी गी उत्थूं कडढी पीपलें हेठ स्थापित करेयां। उसनै बड्डलै उयां गै माता दी आज्ञा मताबक पिंडी स्थापना कीती। माता अगली राती फही उसगी सुखने च लब्धी ते आखेया जे तूं मेरी पिंडी ते कडढी लेई पर मेरी भैन बाला अजें तगर धरती च दबोई दी ऐ उसगी बी बाहर आहन्न। माता दी आज्ञा मताबक देवी बाला दी पिंडी गी बी उत्थें गै स्थापित कीता गेआ। फही एह थाहर बाला सुंदरी दे नां कन्नै प्रसिद्ध होआ। माता सुंदरी दी पिंडी पर जेहडा खुरपा लग्गा हा उसदा नशान अज्ज बी साफ लब्भदा ऐ।

बाला सुंदरी नरातें च प्रगट होइयां इस करी मती गिनतरी च लोक इत्थें नरातें च जंदे न ते हवन यज्ञ करदे न।

किश विद्वान देवी बाला सुंदरी दा सरबन्ध कश्मीरी ब्रैह्मणें दी कुलदेवी बाला त्रिपुर सुंदरी कन्नै बी जोड़दे न। नगरी दा एह माता मंदर बड़ा पराना ऐ। इसदे लावा माता दा मंदर तहसील विलावर सुंदरी कोट थाहरा पर, हिमाचल प्रदेश दे ग्रां हरसार ते त्रिलोकपुर ते इक मंदर उत्तर प्रदेश दे देवबंद थाहरा पर बी है। त्रिलोकपुर दा मंदर राजा प्रदीप प्रकाश होरें 1627 ई० च बनवाया हा। लोकें गी माता पर अननुट्ट भरोसा ऐ ते ओह श्रद्धा भाव कन्नै माता दी भक्ति करदे न।

०००

मंदर कठुआ

मंदर नीलकंठ बसोहली

जम्मू कोला 140 किलोमीटर दूर बसोहली नगर ऐ। एह् थाहर अपने शलैपे ते चित्रकारी लेई बड़ा गै मशहूर ऐ। बसोहली दे राजा भोपतपाल धार्मिक स्थाऽ दे माहनू हे ओह् म्हेशा प्रभु दा ख्याल मना च रखदे। राजा भोपतपाल ने मैहलें दे कोल मंदर बनवाया ते नीलकंठ शिवलिंग दी स्थापना करवाई। एह् शिवलिंग पैहले किशतवाड़ च हा। उत्थूं दे राजा शिवलिंग गी कुल देवता दे रूप च पुज्जदे हे।



इस शिवलिंग गी महाभारत काल दा मन्नेया जंदा ऐ। चन्द्रवंशी राजा भूरी-श्रवा सच्चा शिव भक्त हा, ओह् म्हेशां शिवलिंग अपनी बांह पर बन्नी रखदा। महाभारत दी लड़ाई च अर्जुन ने उसदी बांह कप्पी दित्ती। इक इल्ल बाह् लेई गई ते भार होने कारण ओह् खूह् च पेई गई। किश चिरै परैन्त ओह् इल्ल कुड़ी रूप च ब्रैह्मण दे घर जन्मी ते इक दिन जिसलै उसनै इक इल्ल दिक्खी तां उसगी पिच्छला जरम चैता होई गेआ। उसनै सारी कहानी किशतवाड़ दे राजा गी सनाई। राजा ने अपने सपाही कुरुक्षेत्र पेजे ते ओह् उत्थूं ओह् नीलकंठ लेई आए। राजा ने मंदर च ओह् शिवलिंग स्थापित कीता। सौ थमां बी मता समां शिवलिंग किशतवाड़ मैहलें च रेहा। ते फी इक बारी रानी ने इस नीले शिवलिंग च अपना पिच्छला जरम दिखेया जे ओह् पैहले बांदरी ही उसगी गुस्सा आया ते उसनै शिवलिंग अगी च सुट्टी दित्ता ते एह् नीले थमां काला होई गेआ।

इस घटना कन्नै किशतवाड़ दा पतन शुरू होआ। बसोहली दे राजा गी सुखने च शिवलिंग दे दर्शन होए। राजा ने किशतवाड़ पर हमला कीता ते उत्थूं

दे राजा गी हराईयै उत्थूं दी राजकुमारी कन्नै ब्याह करी शिवलिंग गी बी अपने कन्नै बसोहली लेई आया ते मंदरे च स्थापित करवाई दिता। चम्बा ते नुरपुर दे राजे दे बसोहली दे राजे कन्नै सरबन्ध खरे नेई हे जिसलै उनेंगी इस चमत्कारी शिवलिंग दा पता लगगा तां उनें चुपचाप शिवलिंग उत्थूं लेने आस्तै सपाही पेजे पर शिवलिंग इन्ना भारा होई गेआ जे सिपाही उत्थें गै छोड़ी आपूं नस्सी गै। बड्डलै राजपरोआर ने मंदर खाली दिखेया तां बड़े दुखी होए। तपाश करने परैन्त शिवलिंग लब्धी गेआ। राजा ने फी नमी बसोहली नगरी बसाई उत्थें मैहल बनवाया ते नीलकंठ दा मंदर बी बनवाया।

इस मंदर दी बनावट होरनें मंदरें थमां किश बक्ख ऐ। मंदर दे बाहर हनुमान जी दी इक बडी बड्डी मूर्ति ऐ जेह्डी नमीं गै ऐ किश बरे पैहले इसगी स्थापत कीता गेआ हा। उयां ते इत्थें भक्तें दा रोज औना जाना रौहदा ऐ पर शिवरात्रि गी खास भीड़ होंदी ऐ। इस दिन इत्थें हवन यज्ञ ते भंडारा बी कीता जंदा ऐ।

०००

मंदर कठुआ

घौले माता मंदर

तहसील बसोहली जिला कठुआ दा इक फ्हाड़ी इलाका ऐ। बसोहली थमां कोई इक सौ किलोमीटर दूर उत्तर दिशा च बनी लाका ऐ जित्थें मौसम बड़ा ठंडा होंदा ऐ ते इसदा शलैपा सराहने जोग ऐ तां गै लोक गर्मियें च इस थाहर सैर करन जंदे न।

बनी दे घौले गां च चौण्डा माता दा मंदर ऐ। एह मंदर कोई जहार बरे पराना ऐ। माता दा पराना मंदर इत्थूं दी सब्भनें थमां उच्ची घाट “मन्दीघाट” दी नुक्खनाली थाहरा पर ऐ। इत्थें गद्धी बक्करबाल भिड्डा बकरियां ते गौ बच्छु चारदे न।

इस्सै थाहर इक गद्दी जिसदा नां रूपा हा उसगी माता ने सामधाम दर्शन दित्ते ते उसगी हुक्म दिता जे घौले मेरा स्थान बना में उत्थें बास करना चाहनीं।

गद्दी ने घौले ग्रं परतोईयै फ्हाड़ी दे उप्पर “चौण्डा माता” दा मंदर बनाया। रूपा गद्दी दी जाति सुजान ही। अज्ज बी इत्थें सुजान जाति दे गद्दी ग्रं च रौहदे न।

अस्सु म्हीने नरातें च माता दी जातरा उंदे पैहले थाहर जंदी ऐ। इस जातरा गी माता दी कैलाश जातरा बी आक्खदे न। एह जातरा कोई चार दिन चलदी ऐ।

माता दा मंदर बड्डी बड्डी धारें बश्कार कुदरती नजारें च बड़ा मनभाना लगदा ऐ।

उयां दे बरा भर भक्त मौका दिक्खी माता दे दर्शनें गितै जंदे न पर नरातें च इत्थें माता दे भक्तें दा मता किट्ठ होंदा ऐ। भक्तें दे रौहने गितै इत्थें सरांय बी बनी दी ऐ। इत्थूं दे लोक माता पर पक्का विश्वास रखदे न।

मंदर कठुआ

सुकराला माता मंदर



जिला कठुआ दे बिलावर थाहर थमां नौ किलीमीटर उत्तर पूर्व च इक पहाड़ी पर माता सुकराला देवी दा मंदर ऐ जिनेंगी “मल्ल देवी” दे नां कन्नै बी भक्त चैता करदे न। मंदर च मल्ल देवी दी पिंडी ऐ जेहड़ी शैल गैहने कपड़े कन्नै सजाई दी ऐ।

आखदे न पराने समें च इत्थें महींष शुक्राचार्य दा आश्रम हा इस करी इस थाहरा गी पैहले शुक्रालय ते पही सुकराला नां कन्नै बलाया जान लगा।

माता दे मंदर बारै इत्थूं दे लोकें दा मनना ऐ जे एह मंदर चम्बा दे राजा उमेद सिंह ने 1755 ई० च बनवाया हा। चम्बा पर उंदा राज 1748 थमां 1764 तगर रेहा। राजा ने मंदर बनाने आस्तै सारा समान चम्बा थमां आनेया हा ते राजा ने आपूं हत्थें कम्म बी कीता हा। इक डोगरी लोक गाथा च इसदा वर्णन इयां मिलदा ऐ :-

**आपूं राजा ईटां टौंहदा, गारा टौहन सपाई
पत्थर लाये शैल घाड़मां, दित्ता सैंख भर भर लाई।**

सम्बत 1811 च मिथिला नगरी थमां मशहूर तांत्रिक सुर्यनरायण सुकराला

आये हे केई लोके दा मनना ऐ जे उनें सुकराला मंदर दा निर्माण कराया पर माता दी कारक च बी राजा उम्मेद सिंह दा वर्णन थ्हांदा ऐ ते स्थानी लोक बी मनदे न जे सुर्यनरायण होंदे औने शा पैहले मंदर एह हा।

इक होर दंदकथा मताबक बसोहली दे इक महात्मा अमरनाथ दर्शनें गितै गै ते उत्थें उनें श्री माता शारदा दे बी दर्शन कीते ओह माता दे परम भक्त हे। इक दिन माता ने उनेंगी दर्शन दित्ते ते वर मंगने गी आक्खेया। तां उनें माता थमां अपने बसोहली कोल पधारने दा आग्रह कीता। माता ने प्रार्थना स्वीकार कीती ते गलाया तेरे पोतरें दे समें च में प्रगट हौग।

महात्मा हुंदी अपने क्षेत्र च भड्डू बसोहली दे राजा बडी कद्र करदे हे। उंदे दो पुत्र हे। इक बलौर ते दुआ बसोहली रौंहदा हा। बसोहली दे राजा मेदनीपाल ने महात्मा हुंदे पोतरे शिवनन्दन गी सुकराला दा जंगल देई दित्ता।

इक रातीं उनेंगी सुखने च माता मल्ल ने दर्शन दित्ता ते आक्खेआ तेरेदादा मेरे भगत हे में उनेंगी इत्थें औने दा वचन दित्ता हा इस करी सुकराला दे जंगलें च मेरी तलाश करो, में तुगी पिंडी रूप च दर्शन देंग।

अगलें रोज शिवनन्दन जिसलै जगलें तपाश च गै तां माता ने पिंडी रूप च उनेंगी दर्शन दित्ते। उनें उत्थें गै माता रूप पिंडी दी स्थापना करी दित्ती ते रोज उत्थें पुजा लेई औन लगी पे। ते पही बल्लें-बल्लें माता दी शक्ति दी लोकें च प्रसिद्धी होई लोक इत्थें माता मल्ल गी मत्था टेकन औन लगी पे। माता दे केई चमत्कारे लोकें दे विश्वास गी होर पक्का करी दित्ता।

०००

मंदर कठुआ

रोहट ढा आप शम्भु मंदर

बलौर रोहट ग्रां च आप शम्भु मंदर बड़ा प्राचीन मंदर ऐ। इत्थें इक बडे दे बूहटे हेठ लोके गी आप शम्भु दे दर्शन होऐ तां लोके बडे श्रद्धा भाव कन्नै किट्ठे होईए मंदर बनवाया। इस मंदरे दी बशेशता एह् ऐ जे जेकर इत्थें बरखा नेई होऐ तां इस मंदरै दी जलैहरी गी बंद करियै उस च लोक पानी भरदे न ते जिसलै पानी शिवलिंग तगर पुजदा ऐ तां अपने-आप बरखा ब'रन लगदी ऐ। अज्ज बी करसान सोका पौने उप्पर इस मंदरै च हवन-जग्ग करदे न ते जेकर बरखा नेई होऐ तां जलैहरी दा जल डकदे न ते पानी शिवलिंग तगर पुजदे गै बरखा होई जंदी ऐ।

०००

मंदर कठुआ

शिव मंदर बलौर

एह मंदर बलौर नगरै च स्थित ऐ। एह प्राचीन मंदर ऐ। इस मंदर दी उच्चाई 70 फुट ऐ ते एह पत्थरें कन्नै बने दा ऐ। पत्थरें पर बाहरें बी देवी देवतें दियां मूर्तियां न। एह मंदर पुराना होने करी केई थाहरे थमां त्रुट्टी गेदा ऐ। इस मंदर गी बिल्वकेश्वर जां बिल्लकेश्वर दे नांऽ कन्नै बी जानेया जंदा ऐ। मंदर दे अंदर शिवलिंग दे इलावा केई देवी देवतें दियां मूर्तियां भी स्थापत न।

तारीख डोगरा देश दे मताबक बिल्वपुर (बलौर) दी स्थापना पाल वंश दे राजा भोगपाल ने कीती जिसदा सरबंध चंद्रवंशी तोमर राजपूत परोआर कन्नै हा, ओह अलमोड़ा थमां केई थाहरे फिरदा होई बलौर आई पुज्जा। इक दिन इत्थें जंगलें च फिरदे होई उसगी गद्दी मिले।

जिनें सनाया जे घने जंगले च इत्थें इक शिवमंदर ऐ जिसदी पांडवे अपने बनवास मौके बनाया हा। राजे दे मना च मंदर दिखने दी लालसा होई। राजा जिसलै उत्थें पुज्जा दा मंदर दिक्खीये बड़ा खुश हौआ ते इत्थें इक नगर बसाने दी सोची। इस थाहर बिल्व (बिल) दे बड़ी मती गिनतरी च बुहटे हे जेहडे शिवजी पर चढ़ाए जंदे न। इनें बुहटे करी गै राजा भोगपाल ने इस थाहरा दा नां बिल्वपुर रखेआ जेहड़ा आहिस्ता-आहिस्ता बलौर बनी गेआ।

इस मंदर दे बनाने बारै कोई पुख्ता जानकारी नेई ऐ। दंद कथाए पर आधारित जानकारी मूजब शिव मंदर गी पांडवें अपने बनवास मौके बनवाया।

इक होर दंद कथा मताबक इस मंदर गी आपूं देवतायें बनाए दा ऐ।

इस मंदर बारै लोके दा विश्वास ऐ जे जदूं कोई अनिष्ट होना होऐ जां कोई बड्डी घटना घटनी होऐ तां इस मंदरै दी इक इट्ट डिगदी ऐ। 1043 ई० च विलावल दी राजगद्दी करी राजपरिवार च अदूं बडी लड़ाई होई जदूं राजा कलश ने अपने बड्डे जागत तोगपाल गी गद्दी पर बठाया ते निक्के पुत्तर तोखपाल ने अद्धे राज दी मंग कीती। बड्डे भ्रां दे खलाफ लाहौर राजे गी


शकैत कीती तां उसने बलौर पर हमला करवाया जिस हमले कारण होर नक्सान दे कन्नै-कन्नै शिव मंदर गी बी बड़ा नक्सान पुज्जा। अज्ज बी इत्थें खंडित मूर्तिया मजूद न।

डुग्गर दे लोके गी ते बलौर दे लोके गी भगवान शिव दे इस पवित्र थाहरा पर बड़ी आस्था ऐ। इयां ते इत्थें रोज लोक शिवजी दे दर्शनें गितै औंदे न पर महाशिवरात्रि ते जेठे सोमवार इत्थें लोके दी दर्शनें गितै खास भीड़ रौंहदी ऐ। मूर्तिकला दी द्रिश्यी कन्नै बी एह इक प्रसिद्ध मंदर ऐ।

०००

मंदर कठुआ

माता महाकाली मंदर जसरोटा



जसरोटा जिला कठूआ च उज्झ नजी दे कंढै इक्क फ्हाड़ी पर बस्से दा ऐ। सन 1019 च राजा जसदेव ने एह नगर अबाद कीता ते अपने भ्रा कर्णदेव गी जसरोटे दा राजा बनाया। कर्णदेव ने अपनी ताकत कन्नै केई ग्रां अपने राज च रलाये ते इक बक्ख फ्हाड़ी राज दी स्थापना कीती जिसगी जसरोटा नां दित्ता गेआ। जसरोटे दी निक्की जनैही फ्हाड़ी पर माता महाकाली दा प्राचीन मंदर ऐ।

इसलै इत्थें त्रै मंदर न। पैहले मुख मंदर च माता महाकाली दी प्राचीन मूर्ति दी स्थापना कीती गेदी ऐ जिसदे सज्जे पाससै गणेश जी ते खब्बे पाससै मां दुर्गा दियां मूर्तियां स्थापत न। इत्थें अखण्ड जोत जगदी रौहदी ऐ। दुए मंदर च शिवलिंग दी स्थापना कीती गेदी ऐ जिसदे सामने चिट्टे संगमरमर दे नंदी न।

त्रीयें मंदर च धर्मराज दी मूर्ति ऐ। मंदरे सामने हवन कुंड बने दे न जित्थें हवन कीता जंदा ऐ। नराने च इत्थे मती गिनतरी च भक्त औंदे न।

डॉ० बी० के० शास्त्री हुंदे मताबक श्रीनगर रौहने आहले माता दे भक्त प्राणनाथ मट्टु, होरेंगी एह थाहर माता दी मूर्ति आदि सुखने च लब्भदे। ओह जसरोटे आए ते लोके दी मदद कन्नै उनें सुखने च लब्भने आहला थाहर तुप्पना

शुरू कीता खीर उनेंगी ओह थाहर मिलेया उनें जंगल च सफाई कराई माता दा मंदर ते मूर्ति बड़े तरीके कनै उत्थें रखी ते सजाई संवारी गई। सारे ग्रां आहले भजन कीर्तन ते भंडारे च शामिल होए। इक पवित्र थाहरा दी प्रसिद्धी दूरा तगर फैली गई माता दे चमत्कारें कारण भक्त बड़ी श्रद्धा भावना कनै इत्थें औंदे ते मत्था टेकदे। मट्टू परोआर दे लोक अज्ज बी इत्थें माता दे दर्शनं गितै औंदे न।

इस पवित्र थाहरा पर फही सुब्रामणियम स्वामी पधारे ते ओह माता महाकाली दी भक्ति च लीन रौहदे। उनें इस थाहर दे वकास लेई बड़ा मता कम्म कीता। उंदे थमां पैहले स्वामी बुद्धनाथ जी जसरोटा आए अदूं जसरोटा पूरी चाल्ली उजड़ी चुके दा हा। मैहल त्रुट्टी गेदे हे मंदरें दा हाल बी खरा नेई हा इस कारण मंदरें थमां मूर्तियां बाहर कडढी सुरक्षत थाहरें पर रखेया जा करदा हा। स्थानी लोकें दे गलाने पर स्वामी बुद्धनाथ जी महाकाली मंदर दी पहाड़ी पर गै ते पत्थरें हेठा माता दी मूर्ति गी बाहर कडढेयां ते उत्थें गै रौहन लगे ते माता दी भक्ति करन लगी पे। किश चिर उत्थें रेह पर पानी दी तंगी कारण उनेंगी एह थाहर छोड़ना पेआ।

महन्त श्री नारायण गिरि हुंदे मूजब इक दंद कथा मताबक इत्थें पानी दी कमी दा कारण इक इच्छाधारी नाग ऐ। जेहड़ा इत्थें केई चिर त्रेहाया रेहा पर उसगी कुसा ने पानी नेई दित्ता। गुस्से च उनें इत्थूं दे राजा ते राज गी नश्ट होई जाने दा श्राप दित्ता।

अज्ज भामें जसरोटा च पैहले जनेहा समां नेई पर माता महाकाली दे मंदर दी मैहमा नित बद्धा करदी ऐ? नरातें च इत्थें बडी रौनक हुंदी ऐ ते लोक बड़ी श्रद्धा कनै इत्थें औंदे न।

०००

मंदर कठुआ

माता बाला सुन्दरी-भड्डू

जम्मू थमां लगभग 90 किलोमीटर दूर कठूआ जिला दे ग्रां भड्डू दे सुन्दरी कोट थाहर ऐ जिसदा नां माता बाला सुन्दरी दे नां कन्नै पेआ। इत्थें जिला कठुआं दे लगभग सभ्भनें थाहरें दे लोक मत्था टेकन औंदे न। माता दा मंदर बडी उच्ची थाहरा पर होने करी इत्थूं दा दूरा-दूरा तगर नजर जंदी ऐ। एह मंदर सलेटी रंगे दा बने दा ऐ जिसदे बाहरले पाससै देवी देवतायें दियां मूर्तियां बनी दियां न। मंदरें दी कंधें पर केई तौकडे बने दे न जिंदे च दीयें बगैरा रक्खे जंदे होने। मंदरे दी कंधें पर नक्काशी होई दी ऐ जेहडी समें कन्नै खराब हौआ करदी ऐ। केई लोक माता बाला सुंदरी गी कुल देवी दे रूप च पूजदे न ते अपने केई रीति रवाज इत्थें आई करदे न।



इत्थें पैहले घना जंगल हा पर हून एह थाहर बडी रौनक आह्ला ऐ ते इत्थें भक्तें दा औना जाना रौहदा ऐ खास करी नरातें च मते भक्त इत्थें औंदे न अदूं इत्थें मेला बी लगदा ऐ।

एह बड़ा पराना मंदर ऐ, इसगी कुस बनवाया इस बारै कोई पुख्ता सबुत नेई मिलदे। लोके दा गलाना ऐ जे एह मंदर अखनूर दे इक सेठ ने बनवाया हा। सेठ दे घर औलाद नेई ही जिसदा उसगी बड़ा दुक्ख हा। इक रातीं सुखने च माता बाला सुन्दरी ने सेठ गी दर्शन दिते ते गलाया भड्डू दे कोल सुन्दरी कोट च इक फ्हाड़ी पर मेरा वास ऐ उत्थें जा ते मेरा मंदर बनवा तुगी संतान सुख मिलग। सेठ अखनूर थमां किश समें परैन्त भड्डू पुज्जी गेआ ते माता दा दस्से दा थाहर तपाश करन लगा पर उसगी थाहर नेई लब्भा। इक रातीं माता

ने फही दर्शन दित्ते दे उसगी थाहर दस्सेआ सेठ ने उत्थें तलाऽ बनवाया ते मंदर दा बनाना शुरू होआ। सेठ गी खबर मिली जे उसदे घर जागत हौए दा ऐ। किश चिरै सेठ मंदर दा कम्म कुसा गी सौंपी जागत दिक्खन घर गोआ ते कन्नै पैहा बी होर लोड़चदा हा उसनै सोचेआ ओह् बी लेई आँग। सेठ घर जाई बमार होई गोआ ते किश चिरै मरी गोआ। मरने शा पैहले उसनै घरै दे गी मंदर पूरा करने गी गलाया।

उसलै भड्डू भडवाल राजा अवतर सिंह भडवाल दा राज हा। इक बारी जदूं उसनै मंदर दिक्खेआ तां उनें इत्थें इक किला बनवाया की जे उच्ची थाहर होने करी इत्थें दुश्मन सौक्खा नेई हा पुज्जी सकदा। भडवाल राजा ने मंदर कन्नै लगदी थाहर मंदर गी दान देई दित्ती ते कन्नै पूजा लेई पुजारी बी रक्खेआ।

समां बीतेआ मंदरे दा उप्परला हिस्सा त्रुट्टी गोआ जिसगी पूर्ण गिरी जी ने बनवाया।

नराते दे मेले च इत्थें बड़ी रौनक हुंदी ऐ।

०००

थान कठुआ

बाबा उग्घर

बाबा उग्घर ब्रह्मण जाति दे हे ते हीरानगर दे तमाल ग्रां जेहड़ा छन्नी रोड़ेयां कोला त्रै किलोमीटर उतर दिशा च ऐ उत्थें रौहदे हे। उनेंगी गवां मेंईयां पालने दा बड़ा शौक हा। ओह उनेंगी खूब चेचे तौर पर रखदे। जेहड़ा बी उनेंगी दिक्खदा तां दिक्खदा गै रेही जंदा। इक बारी बाबा उग्घर दी गवें मेंइयें दे बारै घलोय राजपूते, जेहड़े राजा हीरा सिंह दे दरबार च कम्म करदे हे, उनें राजे गी सनाया जे उग्घर दियां गवां मेंईयां मतियां शैल न ते दुद्ध बी बड़ा मता दिंदियां न। राजा ने सुनदे गै सपाहियें गी हुकम दिता जे जाओ उग्घर दे घरा गवां मेंईयां खोली लेई आओ। सपाही उंदे घर जंदे न तां उग्घर घर नेई होंदे पर उंदी त्रीमत घर ही।

ओह घरैआहले दी गैर मजूदगी च उनेंगी गंवा मेंईयां नेई लेने गी गलांदी ऐ पर ओह जर्बदस्ती लेई जंदे न। जिसलै बाबा उग्घर घर पुज्जदे न तां उनेंगी राजा पर सारा मामला जानने परैन्त बड़ा रौह चढ़दा ऐ। ओह उसलै गै राजा कोल जंदे न ते बड़े दे बुहटे पर चढ़िये राजा गी गलांदे न जे पैहे भामें लेई लाओ पर में अपने डंगर नेई देने, पर राजा उसदे पाससै कोई ध्यान नेई दिंदा। खीर बाबा आत्मघात करने दी गलांदे न पर राजा पर कोई असर नेई हुंदा। बाबा बड़े दे बूहटे थमां खल्लें उतरी जंदे न ते कटार कन्नै आत्मघात करी लैंदे न। राजा उंदी लोथ दिक्खी डरी जंदा ऐ। मरने परैन्त बाबा राजे गी ते घलोये गी जिनें राजा गी सनाया हा बड़ा दुख दिंदा ऐ। राजा पागल होई जंदा ऐ।

बड़ी मुश्कलें राजा ते घलोच राजपूत बाबे दा थान तमाल ग्रां च बनादे न। बाबा उग्घर दा थान पैरी ग्रां दा तरखान चेला मनोती करी बनादा ऐ। बाबा घलोचे कन्नै अपने कुले गी छिन्ना करने गी आखदे न। सोमवारे बाबे दा दिन मनाया जंदा ऐ ते इत्थें रूट्ट चाढ़दे न। गुढ़ छोले ते मेंईयें दे सुच्चे बी चकाई इत्थें चाढ़े जंदे न। बाबे दे थान पर कत्ते म्हीने जेठे सोमवार घलोचे दी मेल लगदी ऐ। उस दिन इत्थें जग दिंदे न ते जातर बी होंदी ऐ।

थान कठुआ

बाबा बदना

बाबा बदना दा थान जिला कठुआ दे खरोट ग्रां च ऐ। बदना जाति दे लखनोतरे झीर हे। ओह राजे दे घर पानी भरने दा कम्म करपदे हे। रोज सवेरे तलाऽ थमां बैंगी भरी-भरी पानी लेई जंदे। बदना दा शलैपा सब्भने च म्हेशां चर्चा च रौंहदा। ग्रां दे जसरोटिये बदना दा शलैपा दिक्खी म्हेशा परेशान रौंहदे। उनेंगी लगदा जे कुडियां जनानियां उंदे शलैपे पर जेकर मोहत होई गेईयां तां बड़ा माड़ा हौग। इस्सै गल्लां गी बचारदे उनें बदने गी मारने दी सोची। इक रातीं राठिये उनेंगी शकार जाने दे बाहने मंडी बलाया ते सारें किट्ठे होई उसगी मारी-मारी खत्म करी दित्ता। ते पही बड़ा दे बुहटे कन्नै लोथ फाह लाई दित्ती। आक्खो जे बदना ने फाह लाई लेआ हौये।

बड्डलै मां सारे ग्रां बदना गी तुप्पदी मण्डी जाई पुज्जदी ऐ ते उत्थें अपने पुतरें गी फाह लगे दा दिक्खी वरलाप करदी ऐ ते सारे लोक किट्ठे होई बदना दा संस्कार करी दिंदे न। मरने परैन्त बदना दी आत्मा गी शान्ती नेई मिलदी ते ओह जसरोटिये गी खूब दुख दिंदा ऐ। जसरोटिये डरै दे हत्या थमां बचने दे केई उपाय करदे न पर कोई लाभ नेई होंदा। जसरोटिये तंग आई जंदे न। केई जोगी चले इलाज करन औंदे न बाबा बदना नेई मनोदा। खीर इक चेला प्हाड़ा थमां औंदा ऐ बाबे दा थान बनादा ऐ ते जसरोटिये गी शांति थ्हांदी ऐ।

हून जसरोटिये बाबा बदना गी मनदे न मेल होंदी ऐ ते जातर बी कीती जंदी ऐ। लखनोतरे झीरें दी बी इत्थें मेल होंदी ऐ ते ओह बावे गी कुलदेवता मनदे न।

०००

बाबा थोलू थान

17वीं सदी च बाबा थोलू दा जरम ब्रैहमण परोआर च कटुआ दे खरोट ग्रां च होआ। उंदे पिता दा नांऽ पारस हा। ओह् बड़े पुजापाठी हे। ब्याह् दे मते बरें परैन्त उनेंगी थोलू संतान रूप च थ्होआ। ओह् उसगी बड़े लाड़ कन्नै पाला करदे हे।

भरोली दी प्हाड़ियें पर मेहतावगढ नां दी जगीर ही जिसदा राजा बड़ा क्रूर हा। ओह् आम जनता कन्नै बड़ी बेन्याई ते सख्ती करदा। जनता उस शा बड़ा डरदी। इक बारी राजा दे मना च नमां मैह्ल बनाने दी गल्ल आई तां उसनै जनता पर जुर्म करना शुरू कीते ते उंदे थमां पैहा वसूल करन लगी पेआ। जनता बड़ी परेशान ही पर किश करी नेई ही सकदी।

राजा दा मैह्ल बनना शुरू होआ तां बड़ी हैरानगी दी गल्ल होई जे कंधे पर ईट्ट खडोंदी गै नेई ही। राजा ने पंतें गी बलाया ते कारण पुच्छेआ तां उनें सनाया जे इस धरती अंदर इक राक्षस रौंहदा ऐ ते ओह् गै कंधा नेई खडोन देआ करदा। राजा दे उपाय पुच्छने पर उनें सनाया जे इत्थे नर बलि लगगे तां मैह्ल बनी सकदे न पर जिसदी बलि दित्ती जाग उसदा रंग कक्का भूरा होना लोड़चदा। राजे दे सपाही कक्का भूरा माहनू तुप्पन चली पे तां उनेंगी थोलू ब्रैह्मण अपने घर बेहड़े खेढदा लब्धा ते पारस अंदर पुजा करा करदा हा। सपाहियें थोलू गी उत्थूं अपने कन्नै लेई लैआ। रस्ते च ओह् रोन लगदा तां सपाही उसगी गुड देईयै चुप्प कराई लैदे। राजे कोल पुज्जे तां उनें पंजीह ते दशाला ईनाम च लेआ। पतें थमां मुहंत पुच्छेआ ते राजा औंदे मंगलबारे थोलू दी बलि देने गी तेआर हा। मंगलबार थोलू गी नमें कपड़े स्नान परैत्त लोआईयै नीह् दे उप्पर लटाई दित्ता ते थोलू गी ईटे च चुनाई दित्ता। मरने कोला पैहले थोलू ने राजा गी ब्रह्मण हत्या दी दुहाई दित्ती पर राजा नेई मनेया। बाबा पारस

पुत्र वियोग च तडपदा रेहा। इक रोज सुखने च थोलू ने सारी गल्ल अपने पिता गी सनाई ते अपना पिंड दान ते गति करवाने गी गलाया। थोलू दी मौत परैन्त मेहताव सिंह बतोई गेआ ते उसदा मैहल बी पूरा नेई होआ ते ग्रां दे लोके उत्थें गै थोलू दा थान बनाया ते ग्रां दे सारें लोक उसगी देवता मन्नन लगगी पे। हर बरे थोलू दी याद च इत्थें इक मेला लगदा ऐ।

०००

थान कठुआ

बाबा रणियां

बाबा रणियां दा जन्म जिला कठुआ दे बलोड़ (कठेरा) ग्रां च होआ। बाबे दे पिता दा नां बलोड़ू हा। इस करी इस० ग्रां दा नां बलोड़ू पेआ ते फही एह नांऽ बलौड़ बनी गेआ। बलोड़ू कोल ग्यारह सौ घमाऽ जमीन ही जेहड़ी उसगी उसदे सौहरे रामदयाल ने दाज च दिती दी ही। रामदयाल राजा ताज खां दे दीवान हे।

रणिये दे पिता दा काल उदी बाल अवस्था च गै होई गेआ हा। इक बारी लखनपुर दे राजा ने रणियें गी दरबार च बलाया ते पुच्छेया तूं मालियां कीऽ नेई दिंदा तां रणियां बोलेया में आपूं बलौड़ दा राजा आं तुगी मालियां कीऽ देना। राजा गी उसदे पर बड़ा गुस्सा आया ते उनें बाबे गी मारने गितै घलोये गी हुक्म दिता।

उनें बाबे गी तलवारें दे फट्टे कन्नै मारी टकाया। मरने परैन्त बाबा रातीं जिस घलोये गी बाज मारदा ओह दुयै दिन मरी जंदा। हून घलोचे गी अपनी जान पर बनी आई दी लब्धदी। उनें केई चले योगी सद्दे ते बाबे गी मनाने दी कोशिश कीती पर बाबा नेई मन्ने। आखिर निभू चेला बाबे गी मनादा ऐ ते उत्थें उंदा थान स्थापत करदा ऐ। बाबे दी इच्छानुसार ऐतबारें सारे उत्थें मत्था टेकदे न ते नमी फसला पर जग दिंदे न। कुसा ने सुक्खन कीती दी हौये तां बावा बकरे बी लेंदे न। इस सारे ग्रां ते आले दुआले सारे बाबे दी शक्ति अगें सिर झकांदे न।

०००

थान कठुआ

बाबा मानक

बाबा मानक दा थान जिला कठुआ दे कुमरी ग्रां च ऐ। ऐ बौड़ राजपूतें दे कुल देवता न। बाबा मानक दे घर कुमरी ग्रां च हे। ओह पठानियां जाति दे राजपुत हे। बाबे ने बचपन थमां पढ़दे पढ़दे बौंसरी बजाना बी सिक्खी। जिसलै बाबा बौंसरी बजांदे तां सारियां जनानियां कुड़ियां कम्म छोड़ी उसदी बौंसरी दी तान मग्न होई सुनदियां न। लाहड़ी ग्रां दे राजपूते गी बाबे दी एह बौंसरी बजाने दी आदत पसंद नेई ही। इक बारी बाबे दी मां ने जग रचाया ते बाबे गी लाहड़ी ग्रां धाम गलाने गी पेजेआ। उत्थें लाहड़ी दे राजपूतें माशें गी आक्खेआ जे बाबे गी खत्म करी दे। जिसलै बाबा घर नेई परतोए तां मां लाहड़ी बाबे दा पता करन जंदी ऐ तां बाबा नेई लब्भदे। सुखने च मां गी सिम्बलें दे बूहटे च मां गी लब्भदे न ते सारी होनी सनांदे न। माँ संस्कार करदी ऐ तां बाबा बौड़ राजपूतें दी दुख देना शुरू करी दिंदे न। बडे चेले मनान औंदे न पर अखिर बाबा अन्दड़े दे चेले थमां मनोदे न ते ओह उत्थें बाबे दा थाम बनादा ऐ। बाबा बौडे गी सोमवारें मनाने गितै गलांदा ऐ ते नमीं फसला पर जग लेने दी गल्ल उनेंगी मनादे न। कन्नै बाबा माशें गी इस ग्रां नेई बसने गी गलांदे न। अज्ज बी श्रद्धा कन्नै बाबे दे थान पर जाई मत्था टेकदे न।

०००

थान कठुआ

बाबा बंगी

बाबा बंगी दा जन्म ठारमीं सदी च कठुआ कोल कठेरा ग्रां च मुडेलिया ब्रह्मण परोआर च हौआ। ओह् इक आम आदमी आंहगर करसानी दा कम्म करदे ते घृस्ती दा निर्वाह चलदा। उंदी लाड़ी दा नांऽ रूपवती सुखदेई पुत्रे दा नां उछव हा।

बाबा बंगी दी लाड़ी गी जेहड़ा दिखदा तां दिखदे गै रेही जंदा। इक बारी ओह् आप मुहारी डंगर लान जा करदी ही तां उसदे झुण्ड नेई कडढने करी ग्रां दे लम्बडदार हीरू ने उनेंगी दिक्खी लैता। सारा ग्रां ते घरै दे लोक उंदे खलाफ होई गै ते थाहर-थाहर उंदा चर्चा होन लगी पेआ। जिसलै बाबा बंगी गी पता लगा तां उनें लाड़ी गी बडी यातना दित्ती ते उसदे माफी मंगने पर बी उस बेकसूर दी कोई सनाई नेई होई।

बाबा बंगी इन्ना करने पर बी मन नेई भरोआ तां उनें दराट कनै उसदी मुंठी बड्डी टकाई। मरदे होई सुखदेई ने बाबे गी गलाया जे जो तुसें मेरे कनै कीता तुंदे कनै बी इयां गै होना ऐ।

सुखदेई गी मारने परैन्त बावे दा मन कठेरा नेई लग्गा ते ओह् पुत्र उछव गी लेई केआला ग्रां च साधु भेस च रौहन लगी पे। उनें घृस्त जीवन दा त्याग लाड़ी कनै गै त्यागी दित्ता। भिक्खेआ मंगी खंदे ते प्रभु भक्ति करदे। इक बारी भिक्ख मंगन गेदे बावा लशमन बडलुये दे घर झांकी मारदे न तां अंदर खूब दौलत दिखदे न। जेहड़ी उनें त्रऊं जनें कुसै घर चोरी करी आहन्नी दी ही ते अपना-अपना हिस्सा ले करदे हे बावे ने उन्दे थमां अपने लेई धोती ते उछव लेई कुर्तु मंगेया पर चोरें किश नेई दित्ता। जिसलै बाबा आई गै तां चोरें दे मनां च भेद खुलने दा डर सतान लगा तां उनें बाबे गी तलाऽ कोल बलाया। हत्थें च दराट दिक्खी बाबा घाबरें दा नेई मारने दी दुहाई दिंदे न जे उंदा जागत बड़ा निक्का ऐ उसदी सम्भाल कुन करग। इसलै बाबे गी मिन्नता करदी सुखदेई दा

चैत्ता औंदा ऐ ते कन्नै उसदे बचन जे जि'यां मेरे कन्नै करगै उयां पाई लैगे। ओह इन्ने च मुंडी पर फट्ट मारी दिंदे न ते खूनें दी घर निकलदे गै बाबा खत्म होई जंदे न। उसदे परैन्त मारने आहले हत्यारके गी रूट्टी च कीड़े नजरी औंदे न रातीं बागी बाबे दियां हक्का पौंदियां न ते सबेरे गी ओह मरी जंदा ऐ जिसगी बाबा हक्क दिंदे न। मारने आहले राठिये गी बाबे दी हत्या लगदी ऐ ते ओह बाबे दी मनाने दा जल्न करदे न। बड़ी मुश्कलें बाबा मनदे न ते बावे दा, सुखदेई ते उछव दा थान बनाई दिता। बाबा दा ब'रे च इक बारी जग दिंदे न ते इयां उत्थें जात्तर बी होंदी ऐ। बावा माल मनुक्खें दी रक्षा करदे न।

०००

थान कठुआ

सचाई देवता

सचाई देवता दा थान बलौर थमां 15 किलोमीटर दूर इक उच्ची फ्हाड़ी पर ऐ। डोगरी लोक गाथा मताबक सचाई देवता बी नागराज बासक दे पुत्र न। अपने सब्भने पुत्रे गी जिसलै नागराज बासक ने अपने पुत्रे बश्कार राज बण्डेआ तां उनें अपने निक्के पुत्र सचाई गी फ्हाड़े दा राज दिता। जित्थें सचाई देवता दा थान ऐ उत्थूं दी उच्चाई लगभग छै: ज्हार फुट ऐ। इत्थूं दा रस्ता बड़ा औक्खा ऐ। सेयाले इत्थें बर्फ जमी दी होने कारण जाना बड़ा मुश्कल होई जंदा ऐ। सचाई देवता दे पजारी राजपूत न। भाद्रों म्हीने इत्थें मेला लगदा ऐ। मती गिनतरी च लोक इत्थें दूरा-दूरा औंदे न, खासकरी बलौर बसोहली थमां लोक इत्थें दर्शन करन औंदे न।

इंदा मंदर बड़ा पराना ऐ ते इत्थें सचाई देवता दी चार फुट उच्ची पत्थर दी मूर्ति ऐ। इस मंदरें कोल परानें किले दे नशान लब्भदे न।

इत्थें सिर्फ माहनु दी भलाई लेई गै सुक्खना नेई करदे बल्कि गवें मेइयें दी बमारी जां होर मुश्कलें लेई बी लोक सुक्खना करदे न ते ओह राजी होई जंदियां न। इत्थें गै लोक सुच्चा चकांदे न ते मत्था बी टेकदे न। सचाई देवता गी लोक फ्हाड़े दा रक्षक बी आक्खदे न।

०००

थान कठुआ

दाता ब्रीजो

दाता ब्रीजो जाति दे ब्रैह्मण हे। उंदा जरम होने परैन्त उंदी माता गी बात (वायु) रोग हौआ ते ओह इक्कीयें दिनें दे ब्रीजो गी छोड़ी दुनिया थमां गई उठी। ब्रीजो दी नानी तुलसी उनेंगी अपने ग्रां बाडमां लेई आई ते उत्थें उंदी पालमा कीती। जिसलै ओह दस्सें बरें दे होए तां बाकी जागतें कन्नै ओह बी घरा दे डंगर चारन जान लगगी ऐ। इक रोज खेढ़दे-खेढ़दे उनेंगी कोई खजाना हत्थ लगगा तां उनें सारे न्याने गी दस्सी दिता। उंदे चा इक सलारिया जेहड़ा उंदे कन्नै गेदा हा उसदे मना च लालच आई गेआ। उनें ब्रीजो गी खेढ़ने दे बहाने उच्ची थाहर लैता ते फही उत्थूं धक्का मारी दिता। ब्रीजो दी मौत होई गई ते उनें उत्थें गै उसगी बट्टें हेठ दबाई दिता।

‘सोहनी भावड़ा’ एह सब्भै किश दिक्खी बी चुप्प रौहदा ऐ। नानी गी सजां बैल्ले फिकर होंदा ऐ तां ओह जागतै गी ब्रीजो बारे पुच्छदी ऐ पर कोई सच्च नेई सनादा। रातीं सुखने च नानी गी ब्रीजो सनादा ऐ जे नानी मिगी सलारिये ने मारी सेआड़े मेरी लोथ दब्बी दी ऐ। नानी उत्थें जाई लोथ बाहर कडूढदी ऐ ते चिखा बनाई ब्रीजो गी उस पर रक्खी आपूं बी सती होने करी चिखा पर बेही जंदी ऐ पर कोई उनेंगी अग्नि नेई दिंदा तां आपमुहारी अग्नि कन्नै चिखा धूं-धूं करी जली जंदी ऐ। मरने परैन्त बाजमा आई दाता ब्रीजो जिस सलारियें गी हक्क मारदा ऐ उय्यै मरी जंदा ऐ। भावड़ा जिसनै उनेंगी मरदे दिक्खे दा हा उसगी बी ब्रह्म हत्या दा दोश लगदा ऐ। ओह बावे गी मनाने दी बडी कोशिश करदा ऐ पर ओह मनदे नेई। घोई जोगी ते गंगाराम परोहत छै: महीने इक थाहर पैरे भार खडोते तां बावा मन्नी जंदे न। सौहनी भावड़े ने बौल्ली कढ़ाई ते मोहरे उत्थें टकाई दिते। ते जेठ म्हीने दे जेठे ऐतबारे दाते दी मेल

उंदी मर्जी मताबक रखाई। अदूं थमां भावड़े बावे गी पुज्जदे आवा करदे न। नमां पराना अन्न, सौंगला, मिट्टी दे पडोले आदि बावे दे चाढ़दे न। जोगी ते परोहत बावे दी चड़तर लौंदे न। बावे दे थान पर लोक मत्था टेकन औंदे न ते इत्थें मेला बी लग्गदा ऐ। इनेंगी खासतौर पर सलारियें, भावडें ते ब्रैह्मण मनदे न ते होर लोक बी इत्थें औंदे न। बावा सब्भनें दियां मरांदा पूरी करदे न।

०००

थान कठुआ

बाबा कैल्लू

बाबा कैल्लू दा थान तहसील हीरानगर च 'मलाघर दी छन्नी' ग्रां च ऐ। एह मलाघर जाति दे ब्रैह्मणे दे कुलदेवता न। बाबा कैल्लू दा एह थान डुग्गर च सब्भने थमां पराना ते पैह्ला थान ऐ।

बाबा कैल्लू हुंदी माता दा नां काश्ला हा। बाबा दा जरम हौआ ते किश चिर पढ़ने गै ते फही अपने आप गी गुरू सेवा च लाई दिता। ते फही घर छोड़ी बाबा हत्थें च चिमटा ते झोली लेई अंग वभूति मली ते सन्यासी होई गै। धुनी च लौंग सपारी धखांदे ते लोकें दा न्याऽ करदे। बाबा अपने भक्तें गी सब्भै मुरांदा दिंदा ऐ ते आपूं बर्मी च बारु करदा ऐ। बाबे दे आई लोक गांवे मेईये दे सुच्चे चकांदे न ते मनता मंगदे न। बाबा कैल्लू दा इक थान बसोहली दे ग्रां सुलाड़ी च बी ऐ।

०००

थान कठुआ

बाबा बलिकरण

तहसील हीरानगर दे पंजग्राई ग्रां च बाबे बलिकरण दा थान शिङ्का कण्डै बराजमान ऐ। लोकगाथा च जिक्र अनुसार नागदेवता बलिकरण बाबे सुरगल दे निक्के भ्रा न ते रानी नैबला दे गै पुत्तर न। पिता बासक होरें बलिकरण गी जसरोटे दा राज दित्ता। बाबा बलिकरण दा इत्थें बड़ा जस्स ऐ। कुसै गी डंग होई जा तां लोक बलिकरण दे थान पर औंदे न। इत्थें फांडा करांदे न ते शक्कर लांदे न ते ठीक होई जंदे न। नाग पंचमी गी बलिकरण दे थान पर बड़ा बड्डा भण्डारा ते मेला होंदा ऐ। एह बाबा बलिकरण दा कठुआ जिले च इक्को इक्क थान ऐ।

०००

बाबा सुरगल दा थान

बाबा सुरगल दी कथा मताबक सुरगल दे दंऊ ब्याह् होए पर उनेंगी संतान प्राप्त नेई होई। त्रीआ ब्याह् उनें त्रलोक चन्द दी धीऽ ते जवाहर रत्न दी भैन नैवला कन्नै कीता। सुरगल दे पिता नागराज बासक ने अपने बड्डे पुतर भैड़ गी जम्मू दा राज दित्ता, दुए पुतर 'काई' गी अखनूर दा राज ते त्रीए पुतर सुरगल गी ठेड़ा (कठुआ) दा राज दित्ता। राजपाठ थहोने पर बाबा सुरगल पताल लोकें थमां चली पोंदे न ते गिदड़पुर आई पुजदे न फही साम्बा पुज्जदे न तां बाबा अपने चले माशे ईस्सो गी इत्थें गै थान बनाने गी आक्खदे न साम्बे दिए 22 मण्डियें चा कोई भी थान बनाने गितै थाहर देने गी राजी नेई होंदा तां ईस्सो माशे कन्नै बाबा सुरगल कठुआ आई जंदे न। ईस्सो इत्थे बी थान बनाने गितै थाहर नेई दिंदा तां बाबा गुस्से च 'टारड़ा' ग्रां दे लम्बड़े दी लत्ता पर बिराजमान होई जंदे न। लम्बड़ बाबे गी जगह दिंदा ऐ ते उत्थें ईस्सो बड़ा दे बुहटे हेठ बाबे दा थान बनाई दिंदा ऐ। गोविन्दसर कठुआ पाद्ये दे घर बी बाबे दा थान ऐ। एह थान गोविन्दसरे दे पाधे तुल्लोशाह ने बनवाया हा। बेडियां पतन दी शिडका पर कण्ठै करी बाबे दा इत्थें इक होर थान ऐ। एह थान गोकल मशोआलिये ने बनवाया हा। एह इक धनवान माहनु हा। इनें बाबे थमां बख्खा लेई ते अर्ज कीती जे तुस हंसो गी चेला बनाई लाओ। बाबे दी हां पर हंसो चेला बनेया ते बाबे दी सेवा कीती।

कठुआ च बाबे दा जेहड़ा थान ऐ उत्थें नाग पंचमी गी भण्डारा होंदा ऐ ते इत्थें मते लोक भण्डारें च शामिल होन औंदे न ते बाबे अगमें शीश झकांदे न।

०००

थान कठुआ

बाबा कौड़ा जंगलोट

कठुआ दे जंगलोट थाहरा पर करीब पंज सौ बरे पैहले बाबा कौड़ा जी होये । जिनें जंगलोट दे राजा जसबीर सिंह (जस्सो) दे जुल्में खलाफ बरोध कीता ते अपनी जान तगर जुल्में खलाफ देई दित्ती। बावा कौड़ा दा जन्म लगेट च इक ब्रैह्मण परोआर च होआ। उंदा मुख पेशा करसानी हा, जदूं बाबा जी दे पिता जी दा काल होई गेआ तां करसानी दा सारा भार उंदे पर आई पेआ। ओह अपनी जमीन ते पाले दे जानवर गौ, दांद आदि गी जान थमां बी मता प्रेम करदे हे। उंदा ग्रां



उसलै जंगलोट दे राजा दे अधीन हा। राजा जस्सो हर मौके ऐब करने च डुबे दा रौहदा ते गरीब जनता पर नित नमें टैक्स (पंजियां) लाई उंदे थमां पैहा बसूल करदा। लोक बडे दुक्खी होंदे पर कुसा च बी राजा दे खलाफ बोलने दी हिम्मत नेई ही। इक बारी राजा ने करसाने दे जानवरें पर पंजियां (टैक्स) लाई दित्ता ते जेहड़ा करसान पैहा नेई देई सकदा सपाही उंदे माल बच्छू दांद कन्नै लेई जंदे। इक दिन सपाही बाबा कौड़े दे घर पंजियां लेन आए तां ओह घर नेई हे। उंदी लाड़ी इक्कली घर ही उसदे लक्ख मिन्नता करने पर बी सपाही दांदे दी जोडी खोली लेई गै। जिसलै बावा कौड़ा घर परतोए तां उनें सारी गल्ल सुनी ते राजे दे सामने पेश हौये ते अपने दांदे दी जोडी छोड़ने दी अर्ज कीती पर राजे दे सपाहिये राजा गी सलाह दित्ती जे कुसा कन्नै ढील नेई बरती जा तां जे सब्भै लोक चुपचाप पंजियां देन। राजा दे नां करने पर बावा क्रोधित ते दुक्खी हौये। कोल गै इक बोहड़ा दा बूहटा हा बावा जी ने पंज टके पंजियां उसदे हेठ इक बहटे पर रखेआ ते अप्पू विरोध करदे होई बुहटे पर जाई चढे।

किश दिन बुहटे पर रौहदे होई उनें अपने शरीर थमां कटार कनै शरीर दे हिस्से कटी हेठ सुट्टना शुरू करी दित्ते। इक दिन राज परोहत उत्थूं निकला करदे हे तां उनें बाबा कौडे गी आकखेया गुल्ला खाना चांहदे ओ तां होर दनाऽ उप्पर जाओ तां बाबा रोहे च आई गै ते बोले जा तुगी श्राप नेई दिंदा पर जित्थें मेरा नां लैता जाग तूं उत्थे शामल नेई होगा।

राज परोहत डरी गेआ ते मैहलें च रानियें गी सारा किस्सा सनाया। बड्डी रानी सारी गल्ल सुनी डरी गई जे ब्रह्म हत्या असेंगी लगी जाग। रानी उससे मौके बाबे गी रोकन गई ते नंगे पैरें उत्थें पुज्जी ते हत्थ जोड़ी प्रार्थना कीती जे बाह्यण देवता गुस्सा छोड़ो ते असेंगी माफ करो। उसदी विनती सुनने परैत ओह बोले तेरा व्यवहार दिक्खी में तुगी आशीर्वाद दित्ता जे तूं पुतरें दी मां बने ते तेरा परोआर खूब बड्डा होये। इस सारे मामले च तेरा कोई कसुर नेई कसूर राजा जस्सो दा ऐ।

दूई रानी बी मनान आई पर उसगी अपने रानी होने पर घमंड हा। उसगी बाबा जी ने गलाया ते तेरे अभिमान कारण में तेरे थमां खुश नेई ते तुगी श्राप ऐ जे तेरा परोआर फलग नेई। पुतर जोआन होंदे गै पिता दा काल होई जाग।

किश दिनें परैन्त जिसलै बाबा कौडा कमजोर होई गै तां ओह बोहड़ा थमां खल्ल डिग्गे ते उंदा काल होई गेआ। जिस पत्थर पर ओह बूहटे थमां डिग्गे ओह अज्ज दंऊ हिस्से च उत्थें पेदे न।

बाबा जी दे काल परैत राजा घाबरी गेआ जे मिगी ब्रह्म हत्या दा दोश लगना ऐ तां कुसै सलाह दित्ती जे लोथ गधे दी खल्ला च भरो ते जमीना च दब्बी देओ। इयां गै कीता गेआ।

चिरै परैन्त इक दिन बाबा जी अपने लोहार मित्ते दे सुखने च आये ते बोले जे में बडे दुक्ख च आं मेरी आत्मा भड्का करदी ऐ। मेरी आत्मा दी शांति लेई मेरा संस्कार करी अस्थियां हरिद्वार पजाओ तां जे मेरी मुक्ति होये। उनें एह बी गलाया जे जेकर तेरे कोल पैहे नेई तां मेरे घर चुल्ली दे पचोले जगह खोदेआं ते उत्थूं 70 रपे तुगी थहोई जाडन।

इयां गै होआ उसगी 70 रपे थ्होई गै ते उनें सभ्भनें थमां चोरी जंगल जाई बाबा जी दा संस्कार कीता ते अस्थियां गंगा जी च प्रवाही दित्तियां। मुक्ति थ्होंदे गै राज घराने पर कश्ट शुरू होई गै। बड़ा लाज कराने पर बी जिसलै फायदा नेई होआ तां कुसा ने ब्रह्म हत्या बारे राजे गी सचेत कीता ते बाबे गी मनाने ते माफी मंगने गी गलाया। राजा ने जित्थे बाबा जी ने प्राण त्यागे दे हे उत्थें उंदा थान बनाया ते थान बनाने लेई सारा कम्म अपने हत्थें कीता।

अज्ज बी लोक बाबा जी दे बड़ी श्रद्धा भावना कन्ने अपना सीस झकांदे न।

०००

थान कठुआ

बाबा बैँहसर

बाबा बैँसर दे थानें बारै लोके दा विश्वास ऐ जेकर लोक बरसांत शुरू होने थमां पैहले गै ओहदे रूट्ट देई दिंदे ते एह प्रार्थना करदे न जे बरसांती सप्प कीड़े कोला ओह उंदे डंगरें दी रक्खेआ करै। जेहड़ा रूट्ट बाबे दे चाढ़ेया जंदा ऐ उसगी पूरे ग्रां चा आट्टा मंगियै जिसगी “बैँहसरे दा ओड़ा” आखेआ जंदा ऐ, किट्टा कीता जंदा ऐ ते फही सारे आट्टे चा किश आट्टा लेइयै ओहदा रूट्ट बनाया जंदा ऐ, जिसगी जग च मजूद सारे लोक खंदे न। बाबा बैँसर दी ग्रां काह ते एहदे कन्नै लगदे होर सतें अट्टें ग्रां च काहर ऐ, इस थाहर दे अंदर औने आहले खेतरे च जेकर कुसै गी किश डंगी जा तां ओहदा जैहर नेई चढ़दा।

०००

कठुआ थान

घुंगर वीर

घुंगर बीर दा थान बलौर दे रोहट ग्रां च ऐ। इनेंगी माल बच्छु दी रक्खेआ लेई पूजेआ जंदा ऐ। घुंगर वीर दे दूरै-दूरे थमां लोक औंदे न ते अपने माल्लै दी रक्खेआ आस्तै सुक्खना करदे न। डंगरें दियां बमारियां जियां 'मोहखर', 'गलघोटु' ते बाहुपाड़ आदि घुंगर वीर दी दया कन्नै औंदियां गै नेई ते जेकर होई बी जान तां घुंगर वीर दी जल ते भबूती कन्नै ठीक होई जंदिया न। लोक बरसाती इसदे थानें पर जाई पूजा करदे न ते जग्ग बी दिंदे न, जिसगी घुंगर बीरै दै बली देना गलाया जंदा ऐ। उस रोज लोक अपने घरै च सुच्चा रखदे न ते अग्ग जां नाज घरै चा बाहर नेई कड्ढदे।

०००

कठुआ थान

चमोती माता

राजा हीरा सिंह ने चम्बे ब्याह कीते दा हा। उंदी रानी दा नां चमोती हा। ब्याह परैन्त जिसलै राजा ने चमोती गी दिक्खेया तां उंदा रंग काला होने करी राजा ने रानी गी स्वीकार नेई कीता। चमोती गी एह अपमान बर्दाशत नेई होआ तां उनें आत्महत्या करी लैती। उंदे मरने परैत हीरा सिंह ने पछौता करदे होई रानी दे देहरी बनाई ते उनेंगी देवी रूप च मनेया।

०००

देहरी कठुआ

माता कुलदेवी भड़वाल वंश सती माता मंढर

सती माता होर दऊं भैन भ्रा हे। अपनी मां दा काल होई गेदा हा, इसकरी मातरेया अगें रौहना पेआ। मातरेया दा अपना बी इक पुत्तर हा जिसगी ओह बड़ा लाड़ करदी पर उनें दौंने भैन भ्रा गी बकरिया चारने गितै सारा दिन जंगलें च गजारना पौंदा ते उसदा अपना पुत्तर घर राज करदा। इक दिन चानचक्क उंदा भ्रा गुआची गोआ। भैनू ने बड़ा तुप्पेआ पर ओह नेई लब्भा। किश दिनें मगरा उनेंगी पता लग्गा जे उंदे भ्राऊ गी मरोआई दित्ता गेदा ऐ। उनें पलें गै उनें रोना शुरू कीता ते अटल इरादा बनाई लैआ जे ओह अन्न पानी छोडी अपने प्राणें दा त्याग करी देडन। इक पत्थरें पर बैठे दे उनें अपने कोल “छज्ज” दे ब्हारी रक्खी लेई। छज्ज प्रतीक हा खिरू खिरू (खिल्लरने दा) होने दा। माता ने प्राण त्यागने थमां पैहले श्राप दित्ता जे जियां छज्जे च पेदी चीज छनोई जंदी ऐ इयां गै भड़वाल वंश बी थाहरें थाहरें खिल्लरी जाग उसगी किट्ठा च रौहना नेई थ्होग ते ब्हारी प्रतीक ही सर्वनाश दा। माता ने दुआ श्राप दित्ता दे बल्लें-बल्लें सारा भड़वाल वंश खत्म होई जाग उसदा नामोनशान मिटी जाग। लोके हत्थ जोड़ी माता अगें अर्ज कीती जे अपना एह श्राप तुस वापस लेई लाओ माता तां माता ने तरस खाई अपना एह श्राप वापस लेई लेआ। उस्सै बहटे पर भुक्खें त्रैह्आए दे माता ने अठमें दिन अपने प्राणें दा त्याग कीता ते इयां बिजन भ्रादे भैनू ने जीना छोडी भ्रा दी आत्मा कनै मेल कीता। मां दा त्याग भड़वाल वंश लेई उंदे प्रति आस्था जगाई गोआ ते अदूं थमां सारे भड़वाल हर बरे बसाखी दे दुए ध्याड़े सती माता दे मंदर किट्ठे हुंदे न ते नतमस्तक होई सारी बरादरी मेल च माता गी मत्था टेकदी ऐ ते सुख समृद्धि दी कामना करदी ऐ।

०००

देहरी कठुआ

दाती शीला दी देहरी

दाती शीला दा जन्म कठुआ थमां नगरी जाने आहले रस्ते च औने आहले खखेयाल ग्रां च हौआ। सम्पन्न घर होने करी माता पिता ने छीयु गी बड़े लाड़ प्यार कन्नै पालेया। अजें दाती अट्ठें बरें दी गै ही जे उंदी कड़माई माता पिता ने उंदी कड़माई कलशपुर (गोविन्दसर) च करी दित्ती ते फही तौले गै उंदा ब्याह बी होई गेआ। बुआने सौहरियें घर आई घरै दी सारी जिम्मेदारी बड़ी शैल चाल्ली सम्भाली लेई। घरा दे सारै उंदे कन्नै बड़े खुश हे। किश चिरै मगरा किश बमार रौहन लगी पेई। सौहरियें बड़ा लाज कराया पर कोई फर्क नेई आया। केई क्हीम बदले पर बमारी लाईलाज होंदी जा करदी ही। बुआ बमारी च प्यौकियें गी बड़ा चैता करदी पर कोई नेई आया। इक रोज कोई ओवड़ क्हीम आया ते दाती गी दवाई देई गेआ ते घरैआहले गी ठाक्की गेआ जे बुआ गी उसलै तगर रूट्टी पानी नेई देओ जिसलै तगर में नेई परतोआं। दाती पानी मगदी रेही पर घरा दे कुसा माहनु ने पानी नेई दित्ता ते उंदा त्रेहाये दे गै काल होई गेआ।

मरने परैन्त दाती ने प्यौकियें गी उंदी लापरवाही कारण क्रोपी दस्सी, उनेंगी नित नमें कश्ट होन लगे तां उनें कलशपुर (गोविन्दसर) जाई दाती गी मनाया ते उंदी देहरी बनाई। हून उंदी देहरी पर प्यौकियें ते सौहरियें दमें खानदान मौके-मौके पर दाती गी मत्था टेकदे न ते उंदी सेवा करदे न। आम लोक बी इत्थें देहरी पर मत्था टेकन औंदे न।

०००

देहरी कठुआ

लडोयाले आहली दाती

जिला कठुआ दे हीरानगर थाहरा पर बुआ कौड़ी जिनेंगी लडोयाल थाहर देहरी बनाने कारण लडोयाले आहली बुआ करी चैता कीता जंदा ऐ। आखदे न जिसलै बाबा जित्तो ते बुआ कौड़ी ने अपने पर होने आहले अत्याचार खलाफ अवाज चुक्की ते विरोध कीता ते बाबा जित्तो ने आत्मघात करी लैआ उंदी धीयु ने पिता कन्नै गै अपने प्राण त्यागी दित्ते। उसलै ब्रह्म हत्या कोला डरदे वीर सिंह ने बाबा जित्तो ते बुआ गी गंगा जाई पिण्ड दान कीता तां जे ब्रह्म हत्या थमां छटकारा होई जा पर किश चिरै मगरा गै आखदे न जे बाबा जित्तो ते बुआ परती अपने हत्यारे गी सजा देने लेई उठी आए।

लडोयाल हीरानगर कोल पुज्जी बुआ बाबे ने बुहटे हेठ रमान कीता। पतैआ ब्रह्मणे गी जिसलै पता लग्गा तां ओह बाबे कोल आई पुज्जे तां बाबे ने पानी ते बुआ गी दुद्ध पलाया। तां बुआ कौड़ी ने गलाया जे तुंदा कुल मिगी मनाई ले तां मैं इत्थें रौहना ऐ।

पतैआ ब्रह्मणें बुआ दी इच्छेया दा सत्कार कीता ते उंदी मन्शा मताबक लडोयाल थाहर बुआ दी देहरी बनाई। लडोयाल थाहर बुआ दी अज्ज बी बडी मैहमा ऐ। दूरा-दूरा लोक इत्थें मत्था टेकन औंदे न ते बुआ दे दर्शन करदे न। बुआ सब्भने दी मना दियां इच्छेया पूरी करदी ऐ ऐसा इत्थूं दे लोके दा विश्वास ऐ। लडोयाल च बुआ शक्ति दा प्रतीक ऐ।

०००

देहरी कठुआ

बुआ वचनु

बुआ दा थान कठुआ ओआरलीबंड बौहली पर ऐ। बुआ वचनु दा चम्बे दे राजपूत घराने च जरम हौआ। जिसलै बुआ दी उमर बारह बरे होई तां उंदा ब्याह कठुआ दे पठानियां राजे कन्नै करी दित्ता गेआ। बुआ दा स्भाऽ बचपन थमां गै पुजापाठी हा ओह म्हेशां शिव भक्ति च रूज्झी दियां रौंहदियां। शिवजी दी दया कन्नै उंदे घर पुत्तर दा जरम हौआ। पर विधि दा बदान जे किश चिरै मगरा उसदा काल होई गेआ। बुआ गी पुत्तर वियोग सैहन नेई हौआ ते उनें उसदे कन्नै गै सती होने दा फैसला कीता, पर परिवार ने उंदा गल्ल नेई मन्नी। बुआ हून होर मता समां भगवान दी अराधना च दुखी मना कन्नै लीन रौंहदी। किश चिरै मगरा उंदे घर जिसदा नां “बाला” रक्खेआ गेआ। इक बारी जदूं बाला कोई पंजे बरें दा हा तां चम्बे थमां उसदा मामा आया। इक दिन मामा बाले गी कुसा जंगल च लेई गेआ ते बाले दे सारे गैहने बंधे तुआरी ले ते बाले गी मारियै उत्थें गै सुट्टी दिंदा ऐ ते आपूं जंगलों जंगल चम्बें गी चली पौंदा ऐ। उसगी रस्ते च अक्खें किश नेई लब्भदा नां ओह अपनी भैनु वचनू गी सारी घटना दा सच्च सनाई दिंदा ऐ। बुआ बड़ी दुखी होई जंदी ऐ ते सारा परोआर किट्ठा करी आक्खदी ऐ जे मेरी चिखा बनाओ में बाले कन्नै गै सती होई जाना ऐ। इस बारी मिगी कोई नेई रोकेयो। मरने थमां पैहले बुआ परोआर गी पठानियां जात बटाने गी आक्खदी ऐ ते कन्नै अपने दिन बार पर भ्रायें गी नेई औने गी आक्खदी ऐ।

बुआ वचनू दी मर्जी मताबक पठानियें अपनी जात बटाईये टडेयालिये करी लैती ते बुआ दी देहरी बनाई।

बुआ वचनू दी हाड़ महीने दे पैहलें बीरवारें मेल लगदी ऐ। जिस च सारे टलेयालिये राजपूत शामिल हुंदे न। इस रोज इत्थें जग दित्ता जंदा ऐ ते जातरां बी करदे न। जेहड़े टडेयालिये बाहर रौंहदे न ओह बी इत्थें शामिल होंदे न।

०००

देहरी कठुआ

दाती संतो

दाती संतो दा जरम कठुआ दे दक्खन पाससै इक निक्के जनैह् ग्रां मसूसपुर च होआ। निक्की बरेसा च गै दाती दा ब्याह् खरोट (कठुआ) च जसरोटिये दे घर हौआ। बुआ दे पति फौजा च नौकरी करदे हे इसकरी घर रौहनें दा मौका बरे च दऊं महीने गै थ्हांदा। बाकी दा समां दाती गी घर सस्स, दरानी ते जठानी कन्नै गै गजारना पौंदा। इक रोज दाती जियां श्रृंगार करी अंदरा बाहर आई हा उसगी दिक्खी सस्स जठानी ने मजाक कीता जे एह् श्रृंगार कुसगी दस्सना ऐ तेरा घरैआह्ला ते घर नेई। दाती गी उंदी गल्ल बुरी लग्गी ते दाती ने तलाऽ पर जाई अपनी गोद बट्टे कन्नै भरी ते तलाऽ च छाल मारी दिती। सुआस ते निकली गै पर दाती दा क्रोध मरने परैन्त बी नेई घट्ट होआ। उनें जसरोटियें गी कश्ट देना शुरू कीता। मते चिरै मियां दम्मू जेहडा उंदा देर हा ते जम्मू रौंहदा हा उसगी सुखने च आई ते गलाया जे मियां मिगी मनाओ तां तुंदे जसरोटिये दे सब्भै कश्ट दूर होई गै समझो। दम्मू ने खरोट जाईयै बुआ गी मनाया ते उंदी देहरी खरोट बनाई। इत्थें अज्ज बी लोक इंदी बड़ी मैहमा करदे न ते माघ महीने दे पैहले सोमवारें इत्थें मेल लगदी ऐ। सारे जसरोटियें इस मेल च शामिल होंदे न। इत्थें इस रोज जात्तर बी होंदी ऐ ते जग बी दिता जंदा ऐ।

०००

देहरी कठुआ

शिला बैती अम्मां बाईं दी देहरी

बदलू (अम्मा बाईं) दे प्यौके ग्रां “रखेंह” च हे। दाती दा ब्याह हटली दे निक्के जनैह ग्रां विसथा च टरपैल राजपूते दे घर हौआ। इक बारी दाती अपने प्यौके रौहन गई तां पिच्छूं उंदा घरैआहला मता बमार होई गोआ। प्यौकियें गी घरैआहले स्नेहा पेजेआ जे बदलू गी वापस विसथा पेजी देओ की जे उसदा घरैआहला मता बमार ऐ। स्नेहा थ्होंदे गै बदलू सौंहरे घर आई गई ते घरैआहले दी सेवा च रूज्झी गई। इक दिन बदलू ने सस्सु ते जठानी गी सनाया जे स्नेहा थ्होंदे गै ओह आई गई ते तौला च उसदे गैहनें प्यौके रेही गै। सस्सु जठानी ने गल्ल छुहाई जे तां केह ऐ तूं केहड़ा घरैआहले कन्नै सती होना ऐ जे तुगी गैहनें लोडचदे न। जिसलै बमारी कन्नै उंदे घरैआहले दा काल हौआ तां ओह बी सती होने गी चली पेईयां ते जाई चिखा पर बैठी। मरने परेंत टरपैले घर अम्मा उठी लगी ते उनेंगी केई दुख होन लगे। टरपैले केई जोगी चले सद्दी अम्मां गी मुश्कलें मनाया। अम्मां ने टरपैले गी हुक्म दित्ता जे मेरी देहरी पर नराते च मेल करेओ। में तुंदे माल मनुक्खें दा बाद्धा करंग। में तुंदे डंगरें दी रखवाली करंग ते उंदे दुद्धे दा पैहला घ्यो दा सुच्चा मेरे आई चकाएओ। अज्ज बी लोक उंदे आक्खने मताबक देहरी पर श्रद्धा भाव कन्नै जंदे न ते मेल बी लगदी ऐ।

०००

देहरी कठुआ

बुआ भुक्खी

बुआ भुक्खी दा जरम कठुआ दे कोल ग्रां मदून च होआ। बुआ दे नां बारै अज्ज कुसा गी पता नेई। भुक्खा कन्नै मौत होने करी उनेंगी लोक बुआ भुक्खी दे नां कन्नै चेता करदे न। निक्की बरेसा च गै बुआ दा ब्याह होई गोआ। जित्थें उंदा ब्याह हौआ ओह् परोआर आर्थक तौर पर सौक्खा नेई हा। बुआ गी सारा कम्म हत्थें करना पौंदा। निक्की बरेस ते खाने गी घट्ट होने करी बुआ सुकदी गई। इक बारी ऐसा ताप चढ़ेया जे उनें बुआ गी भलेयां रैहत करी दित्ता। कमजोर काया ने बुआ गी लचार करी दित्ता। उनें प्यौके भ्रामें गी स्नेहा पेजेआ जे मिगी लेई जाओ पर भ्रा नेई आये ते बुआ दा बमारी ते भुक्खा कारण काल होई गोआ। मरने परैत बुआ प्यौके आई भ्रामें गी सतान लगी पेई। शरीरी कश्ट कन्नै ओह् हारी गै ते फही जिसलै उनेंगी बुआ दी क्रोपी दा पता लगा तां उनें बुआ थमां माफी मंगी अपनी गलती मन्नी ते बुआ गी मनाया।

ग्रां मदुन च बुआ भुक्खी दी देहरी पर हाड़ म्हीने दी संक्रति गी मेल लगदी ऐ। इस दिन लोक जग करदे न ते जातरां बी होदियां न।

०००

देहरी कठुआ

बुआ सोवां

बुआ सोवां दा जरम गोविन्दसर कठुआ च लक्ष्मण शाह दे घर हौआ। ओह जाति दे पाद्ये ब्रैह्मण हे। उनेंगी गोविन्दसर च मलवारच करी कुआलेया जंदा ऐ। आक्खदे न जे उंदा कोई बर्जुग मलबारा ग्रां थमां इत्थें आया हा तां गै उनेंगी मलवारच करी सब्भै बलांदे न। बुआ गी बचपने थमां गै आदत ही जे ओह अपनी मां कशा घड़ी-घड़ी खाने गी किश-किश मंगदी रौहदी मां कदें खिन्झी बी पौंदी। इक बारी बुआ ने मां थमां पीने गी पानी मगेंया तां मां किश कम्म लग्गी दी ही उनें गुस्से च गलाया जे मेरे थमां घड़ी-घड़ी तेरी कान नेईं करन हुंदी। बुआ गी मनोमन इन्ना रौह चदेया जे उनें डंगरें आहली छन्ना च जाईं मालें दे रस्से कन्नै उत्थें गै गलफाह लाईं लेआ।

संजा जिसलै मां पिता ने बुआ गी फाह लगे दे दिक्खेया तां उनें लोकलाज थमां डरदे गुमचुप गै बिजन कुसा गी सनाये दे संस्कार करी दित्ता।

मरने परैत बुआ लक्ष्मण शाह गी कश्ट देन लगी पेईं ते फही कश्टें थमां छटकारा पाने लेईं बुआ ने गलाया जे मिगी मनाओ ते मेरी देहरी बनाओ।

सारे पाद्ये जाति आहलें किट्ठे होईं बुआ गी मनाया ते गोविन्दसर तलाऽ पर उंदी देहरी बनाईं।

बुआं सोवां दी मेल कते म्हीने दी पुन्नेया गी लगदी ऐ। उस दिन सारे पाद्ये किट्ठे होईं जग करदे न ते जातरां करदे न। मती गिनतरी च दूरा-दूरा बी लोक इत्थें औंदे न।

०००

देहरी कठुआ

दाती नागरू

दाती नागरू दी देहरी भड्डू दे पराने किले कोल इक प्हाड़ी पर बराजमान ऐ। नागरू दी पुजा भड्डवाल जाति दे राजपुत करदे न।

राजा पृथ्वीपाल दे राज च कुसै घटना कारण राजे ने दाती नागरू दे पुत्र दौलतपाल गी पृथ्वीपाल भड्डवाल ने धोखे कनै मरवाई दित्ता। जिसलै दाती नागरू गी पता लग्गा तां उनें चिखा बनाई ते पुतरें गी उस पर रखेया ते आपूं बी पुतरा कनै सती होने लेई उस पर बेही गई। दाती ने लोकें दियां मिन्नता करदे त्रै दिन चिखा पर बताये पर उनेंगी अग्नि नेई थ्होई की जे राजा पृथ्वीपाल भड्डवाल दा सख्त हुक्म हा जे चिखा गी कोई बी अग्नि नेई देग। त्रीयें रोज टुठे नां दे ब्रह्मणे ने अग्नि दित्ती पर पैहले दाती थमां वचन लेआ जे कुले दी तुस रक्षा करगियां। सती होने परैन्त राजा पृथ्वीपाल गी दाती ते उंदे पुतरें दी हत्या लग्गी ते नित राजे गी क्रोपी लगन लग्गी। इक रोज सुखने च दाती राजें गी आई ते गलाया जे जदूं तगर तूं मिगी नेई मनाई लैग अदूं तगर मेरी क्रोपी तेरे पर बनी रौहनी ऐ। राजे ने जयकृष्ण नां दे जोगी थमां दाती गी मनाया उंदी देहरी च मोहरे स्थापित करवाये ते अपना अद्ध दाती ने परोहते दी देने लेई आव्खेया। दाती ने अपनी पुजा करने दा हक बी सिर्फ कुल परोहत गी दित्ता, उस्सै परोहता दा परोआर अज्ज बी दाती दी सेवा करदा ऐ। राजा पृथ्वीपाल भड्डवाल ते उसदे सारे परोआर ने दाती गी मनाया ते अज्ज बी पृथ्वीपाल दे कुले दे लोक कल्याणपुर कांगड़ा थमां आई दाती अग्गें नतमस्तक होंदे न।

०००

मंदर कठुआ

माता जौडेआं

जिला कठुआ दे बसोहली थाहरा थमां 40 किलोमीटर दूर उत्तर आहली पेठा इक फ्हाड़ी ग्रां बांजल ऐ। बांजल थमां कोई पंज किलोमीटर दूर इक निक्का जनेहा मदान ऐ इसगी जौडेआं नांऽ कन्नै जानेआ जंदा ए। गर्मी दे मौसम च आले दुआले दे ग्रां थमां लोक अपना डंगर बच्छू इत्थें लेई औंदे न।

इत्थूं दे लोके मताबक जेहड़े डंगर चरदे होई इस फ्हाड़ा दी चोटी पर पुज्जी जंदे तां ओह उत्थें गै मरी जंदे। लोक मालबच्छू इधर आहन्ना बंद करी दित्ता। इत्थें इक निक्के जनैह ग्रां दन्नी च इक ठक्कर जाति कुडेरिया दा इक गरीब परोआर इत्थें रौंहदा हा। इंदा बड्डा पुत्तर परागा बी गर्मी च जौडेआ फ्हाड़ा पर डंगर बच्छू लेई जंदा ते राती अपनी कुली च सेई रौंहदा।

इक राती परागें गी मां ने सुखने च हुक्म दित्ता जे में इत्थें रौहना चाहन्नी तूं इत्थें मेरा मंदर बनवा दे मेरी सेवा कर। परागे ने सुखने दी परवाह नेई कीती। इयां लगातार चार रोज उसगी सुखना औंदा रेहा। इक दिन तलाऽ पर पानी पलाने गितै गेआ तां डंगरे पर काऽ ते ईल्लड़ झपटा मारन ते ओह बेहोश होई डिग्गी जान। परागा डरै मारे अपने ग्रां परतोई आया। रातीं फ्ही माता सुखने च आई तां परागा उठी बैठा ते सारी गल्ल माता पिता ते घरै दे बाकी जनें गी सनाई। ओह सारे माता दे हुक्म मताबक उस्सै शिला ते बुहटे दी तपाश च चली पे जियां माता ने सनाये दा हा। तलाऽ पर पुज्जे तां बेहोश माल ठीक हा ते घाऽ चरा करदा हा। फ्हाड़े दे उप्पर पुज्जे तां उनेंगी उत्थें इक निक्का बुहटा ते उस्सदे कोल शिला जनैही पिण्डी लब्धी। उनें माता गी प्रणाम कीता ते स्थापना लेई चले गी बलाया। स्थापना थमां पैहले बकरे ते चोहटे दी बलि दित्ती। मां इत्थें 1898 ई० च प्रगट होई। लोके च माता दी अदूं थमां गै बड़ी मानता ऐ। परागा माता दा पैहला पुजारी बनेया। हर बाहरें बरें माता दा पुजारी मरी जंदा ते फ्ही परोआर दा होर जागत पुजारी बनी जंदा पर फ्ही लगातार बारहें बरे पुजारी दा काल होने कारण सारे भक्तें माता गी प्रार्थना कीती जे एह होनी रोको तां माता

ने वरदान दित्ता जे हून इयां नेई हौग पर हर चऊं बरे तुसेंगी चोटे दी बलि देनी हौग। अदू थमां अजे तगर एह बलि दित्ती जंदी ऐ।

मंदरे अंदर माता जिस पिण्डी रूप च बराजमान ऐ ओह पिंडी अपने आप घटदी बद्धदी रौहदी ऐ। जिसगी भक्त माता दा चमत्कार मनदे न।

नराते च माता दे दरबार भक्तें दी बड़ी चैहल-पैहल होंदी ऐ। सबने धर्मे दे लोक माता गी बड़ी श्रद्धा कनै मन्दे न। जौडेआ माता दे खुले मदान च नराते च छिंज होंदी ऐ। भद्रवाह च एह माता रियोशर माता दे नां कनै प्रसिद्ध ऐ।

०००

देहरी कठुआ

बुआ सत्यावती दी देहरी

कठुआ थमां चार किलोमीटर दूर चन्न ग्रां च बुआ सत्यावती दा जरम झंडेयाले दे घर होआ। माता पिता ने धीयु कन्नै बड़ा प्रेम हा। बुआ गी मठोंदे दिक्खी ओह बड़े खुश होंदे। जियां जियां बुआ बड्डी होन लगी ओह बाकी बच्चे आहंगर खेढ़ खडोने च कोई दिलचस्पी नेई लैंदी ते म्हेशा ईश्वर ध्यान च भजन गांदी फिरदी ते बड्डलै तडके उट्ठी भक्ति करन बेही जंदी। उसदी माता म्हेशा धीयु धन होने करी बुआ लेई चिंता च रौंहदी। इक रोज बुआ गी मां ने समझाया जे तूं बड्डलै पुजा भक्ति च मग्न होई जन्नी घरा दा कम्मकाज नेई करदी। किश कम्म बी करा कर अजें तेरी भक्ति दी उमर नेई। मां दी द्रंड सुनी बुआ गी बड़ा रौह आया ते उन्नं अपने हत्थें अपनी चिखा बनाई ते आपूं उप्पर जाई अग्नि देव थमां प्रार्थना करी अग्नि मंगी। दिक्खदे गै चिखा गी अग्नि थहोई ते चिखा च बुआ सड़ी सुआह होई गई। बुआ दे मरने परैंत बुआ ने परोआरे गी दुख देना शुरू कीता ते दखाला दिता जे मिगी मनाओ ते मेरा थाहर बनाओ तां गै तुंदा कश्ट दूर हौग। सारे परोआर ने किट्ठे होई बुआ दी देहरी बनाई ते उनेंगी क्षमा याचना करी मनाया। अदूं थमां गै सारी भंडेयाल बरादरी कत्ते म्हीने दी पुनेयां गी बुआ दी मेल च किट्ठी होंदी ऐ ते मत्था टेकदी ऐ। उस दिन उत्थें हवन यज्ञ बी कीता जंदा ऐ।

०००

देहरी कठुआ

बुआ बंगालू

बुआ बंगालू दा जरम सुखोचक च बडेरे दे घर हौआ। बचपन थमां गै बुआ पुजा पाठ जे तुलसी माता दी सेवा च मग्न रौहदी। नौ बरे दी बेरसा च बुआ दा ब्याह सुचानी च हौआ। उंदे घरैआहले दा नां ज्वाला हा। इक रातीं बुआ गी सुखने च तुलसी माता ने दर्शन दित्ते तां उनें बड्डलै अपना सुखना सस्सु ननानु कन्नै सांझा कीता तां उनें मीहना मारेया जे तूं इन्नी गै भक्तनी ऐ। बुआ गुस्से च प्यौके आई गई ते माता तुलसी दी परतियै सेवा करन लगी पेई। किश चिरै बुआ दे मां पिता दा काल होई गेआ बुआ इक्कली रेही गई। बुआ ने अपने मामे गै पैहे ते गैहणे दित्ते जे उसदे मां पिता दा गंगा जाई क्रिया क्रम करग पर मामा अपने वचनें थमां फिरी गेआ। दुखी बुआ गी उसदे पिता दा दोस्त जेहड़ा जात थमां खतरी हा हरिद्वार लेई गेआ उत्थें जाने परैत बुआ घर परतोने गी नां करी दिंदी ऐ ते गंगा च छाल मारी प्राण त्यागी दिंदी ऐ। प्राण त्यागने परैन्त बुआ हीरानगर मामें गी आले दिंदी ऐ तां दमैं मामें मेघु ते टेकु बुआ गी दिक्खी बतोई जंदे न। मामें दी जात पटारे दा सभ्भनें पास्सै विनाश होन लगी पौंदा ऐ। सारी बरादरी बुआ थमां माफी मंगदी ऐ ते पटारे बुआ बंगालू गी मानता करदे न ते घरा च बुआ दी देहरी बनादे न।

अज्ज बुआ बंगालू दे इस देहरी दी मानता सिर्फ हीरानगर च गै नेई जिला कठुआ दे दूरा-दूरा लोक इत्थें मत्था टेकन औंदे न। बुआ दी देहरी पर बरे च इक बारी मेल लगदी ऐ ते सारी बरादरी किट्ठी होई बुआ दे मत्था टेकदी ऐ ते जग बी दित्ता जंदा ऐ। इत्थें जातरां बी करदे न।

०००

देहरी कठुआ

बुआ भांगा



बुआ भागां दा जरम गरनेडा (सेयालना) च हौआ। उंदा ब्याह थड़ा कलोआल च प्रजा पाद्या हुंदे कनै होआ। प्रजा पाद्या होर अपने ग्रां दे लम्बड़दार हे। इक बारी उत्थूं दे राजे ने मालिये च बाद्धा कीता ते पंज पंचीए (पंज पैहे) मालियां बधाई दित्ता जेहड़ा के गरीब करसानें दे बसा च नेई हा। सारे लोक परेशान होई गै पर उप्पर सुनाई नेई होई। राजें दे ऐहलकार कोतवालें गुढा कलेयाल च चौकीदारें गी पेजेया ते स्नेहा दित्ता जे ग्रां दे लम्बड़दार प्रजा पाद्या लोके कोल मालिया किट्टा करे ते जेहड़ा नेई दे उस थमां जर्बदस्ती हासल कीता जा। प्रजा पाद्या हुंदी घरैआहली भागां ने बी मालिया बद्ध करने दा विरोध कीता ते स्नेहा लेईयै आए दे चौकीदारें हत्थ आक्खी पेजेया जेकर तुस अपना एह हुक्म वापस नेई लैता तां में इसदा विरोध करदे हेई अपनी जान देई देंग। जिसलै कोतवालें तगर स्नेहा पुज्जा तां उनें गुस्से च अगग बबुला हुंदे होई गलाया जे तेरे जनैहियां मतियां दिक्खियां ब्राह्मणियां प्राण देने आहलियां। जिसलै भागां

गी पता लग्गा तां उनें कटार हत्थें च लेई ते अपने आप गी खत्म करी दित्ता ते अपनी आक्खी दी पूरी कीती। जिसलै भागां ने प्राण त्यागें उसलै प्रजा पाद्या घर नेई हा। इससै कारण अजें तगर पाद्ये ते कोतवाले दा छिन्ना ऐ। पाद्ये कोतवालें दा पानी तगर नेई पी सकदे पर हां कोतवाल पाद्ये हत्था पानी जरूर पी सकदे न। बुआ भांगा दी मानता अज्ज बी उत्थूं दे लोक हत्थ जौले करी करदे न ते अपने वंश लेई आशींवाद मंगदे न।

०००

मंदर कठुआं

जौड़ेआं माता मंदर

बसोहली थमां 40 किलोमीटर दूर इक ग्रां ऐ बाजंल। बाजंल थमां पंज किलोमीटर दूर फ्हाड़ी पर उच्चा मदान ऐ जिसगी जौड़ेआ नां कन्नै जानेया जंदा ऐ। गर्मियें च कोल कश दे लोक इत्थें अपने डंगर लेई औंदे न। इत्थें गै कोल इक ग्रां दन्नी ऐ। इस ग्रां च इक गरीब ठक्कर जाति दा परोआर रौंहदा हा। इंदा निक्का जागत परागा हर बरे अपने डंगर जौड़ेआ फ्हाड़ी पर लेई जंदा हा ते उत्थें गै इक कुल्ली च रात गजारदा हा।

इक रातीं परागा गी माता ने सुखने च दर्शन दित्ते ते हुक्म दित्ता जे इत्थें मेरा मंदर बना ते मेरी सेवा कर।

उसनै सुखने पर कोई ध्यान नेई दित्ता। माता ने उसगी फ्ही सुखने च आई हुक्म दित्ता। जिसलै परागा ने ध्यान नेई दित्ता तां उसदे डंगरा बेहोश होई डिग्गी पे। उस रातीं मां ने परागे गी फ्ही दर्शन दित्ते तां उस पुच्छेया माता तुस कुन ओ। मां बोली में शीतला माता आं तूं मेरी आपशंभु शिला दी तपाश कर ते मेरा मंदर बना सब ठीक हौग। उस शीला कोल इक बूहटा ऐ इयै उसगी पंछान ऐ। उत्थें गै तूं मेरा मंदर बनाना ऐ।

दुयै रोज ओह् सभ्भने कन्नै फ्हाड़ पर गेआ तां इक बुहटे कोल उसगी शिलानुमा पिण्डी दे दर्शन होऐ। उत्थें माता दा मंदर बनाया गेआ ते सारे लोक उत्थें पाठ पूजा करन लगी पे।

लोक दा मती गिनतरी च इत्थें औना जाना शुरू होई गेआ। इत्थूं ग्रां कोडली, नगाली, स्थालग, पिक्कड़, ड्योड़ी, हल्ल, दन्नी बांजल ादि थमां लोक चांदी दे त्रिशूल बनाई माता दी शिला कन्नै स्पर्श करी अपने घरें च रखदे न।

परागा माता दा पैहला पुजारी हा। 12ऐ बरें उसदा काल हौआ तां परागा

ता भ्रां मोती पुजारी बनेआ 12एँ बरें उसदा बी काल होई गेआ ते एह सिलसिला मता चिर चलदा रेहा तां सब्भनें किट्ठे होई माता गी प्रार्थना कीती माता दया करो। तां माता ने बरदान दित्ता जे हर चऊं बरें मिगी संडे दी बलि दित्ती जाग तां पुजारी गी कोई हानि नेई हौग। अदू थमां अजें तगर मंदर थमां किश खल्ल महाकाल दे स्थान पर संडे दी बलि दित्ती जंदी ऐ। किश लोक सुक्खन पूरी होने पर बकरा चाढदे न पर बलि नेई दिंदे। उसगी खुल्ला छोड़ी दिंदे न। सदी होने पर बर्फ पेई जंदी ऐ इस करी मंदर दे द्वार बंद करी दिन्ते जंदे न। इस मौके पुजारी मंदर थमां माता गी अपने घर दन्नी लेई औंदा ऐ। गर्मी दा मौसम औने तगर माता दा वास इत्थें गै होंदा ऐ।

०००

मंदर कठुआ

शिव मंदर

एह प्राचीन मंदर बनी दे प्रवेश द्वार पर ऐ। लोकें दी इस मंदर पर अटूट आस्था ऐ। एह बनी दा पराना ते मशहूर मंदर ऐ। इस मंदर गी दो सौ बरें थमां बी मता पराना मन्नेया जंदा ऐ। मंदर दे अंदर भगवान शिवजी दी चमुखी मूर्ति विराजमान ऐ। एह मूर्ति काले पत्थर दी बनी दी ऐ ते दिक्खने गी बड़ी गै शैल ऐ। इस मूर्ति दी स्थापना बाबा नारायण पुरी ने कीती ही। बाबा पूर्ण गिरी ने इस मंदर गी पक्का बनवाया हा। इस मंदर पर लोके दी बड़ी पक्की आस्था ऐ मते लोक इत्थें सुक्खना करदे न ते सुक्खन पूरी होई जाने पर इत्थें सुन्नं दियां चीजां चाढ़दे न। इस मंदर लेई इस कन्नै सोलह घमांऽ जमीन लाई गेदी ऐ जेहड़ी अटूठ घमांऽ सलाना ग्रां ते अटूठ घमांऽ कलाड़े कौण्डी ग्रां कन्नै लगदी ऐ। मते लोक इत्थें पुत्तर मंगदे न ते उंदियां सुक्खना पूरियां बी होंदिया न। इस करी लोके दा इस मंदर पर भरोसा बड़ा पक्का ऐ।

०००

कठुआ मंदर

शिव मंदर धनारा डुग्गन

एह मंदर इस लाके दा पराना शिव मंदर ऐ। एह बनी थमो 10 किलोमीटर दूर पच्छम च डुग्गन (धनारा) ग्रां च ऐ। एह शिव मंदर बनी, ढग्गर, रस्ते च इक निक्के जनैह मदान च ऐ। मंदर च शिवलिंग जलैहरी च वराजमान ऐ। इत्थें पार्वती, गणेश ते नन्दीगण दियां मूर्तियां पत्थर दियां बनी दियां न। एह दिक्खने गी मतियां शैल न। एह मंदर औने जाने आहले दे रस्ते च ऐ इसकरी भक्त मती गिनतरी च इत्थें औंदे न। डुग्गन इक बड़ा गै शैल ग्रां ऐ जेहड़ा अनौर फ्हाड़े पर बस्से दा ऐ। इत्थूं दा चीड़े दे बूहटे ते खेतर बड़े गै शैल लब्भदे न। इत्थूं दे लोक बड़े कर्मठ ते मिट्ठा बोलने आहले न।

०००

मंदर ठुआ


शिव मंदर काथल बनी

एह शिवजी दा पराना मंदर ऐ। एह मंदर सेवा नदी दे पच्छमी तट पर काथल घाट दे शिखर पर ऐ। इस मंदर गी डुग्गर दा “मणि महेश करी बी कुआलेया जंदा ऐ। आक्खदे न जे जिसलै भगवान शिन सुद्धमहादेव थमां मणि महेश जा करदे हे तां उनें इस काथल घाट पर अराम कीता हा। इस करी इत्थें शिवजी दा बड़ा गै शैल काले पत्थर दा शिवलिंग ऐ जेहड़ा दिक्खने गी बड़ा गै शैल ऐ। इत्थूं दे बसनीक इस मंदरा गी बड़ा गै पवित्र मनदे न। इस मंदर दे पजारी ललहाल गद्दी न। ललहाल इस मंदर दी पूजा सदिये थमां करदे आवा करदे न। लोक इस मंदर दी मणि महेश दा गै रूप मनदे न। मणिमहेश दे पुजारिये दा बी एह गलाना ऐ जे इस लाके दे लोक दा मणिमहेश सेवा नदी दे कनारे काथल घाट बनी च बराजमान ऐ।

०००

ॐ
प्राचीन मन्दिर माता वुशां भागा
धडा कलवाल विलवर (जम्मू)
इस मन्दिर का नव निर्माण
स्वर्गीय पुत्र सुभाष शर्मा
दि. 2.10.1999
स्वर्गीय धर्मपत्नी विद्या देवी
दि. 20.10.1999 इनकी पुण्य स्मृति
में पंडित दिवान चन्द शर्मा जी
द्वारा कराया गया
ॐ

बुआ भागा कठुआ



बुआ भागा कटुआ



बुआ भागा कटुआ

देहरी कठुआ

नृसिंह मंदर कोहग

जम्मू थमां करीब नब्बे किलोमीटर पूर्व आहली भेठा मांडली कोला चार किलोमीटर उपपर कोहग गां च नृसिंह गी दा मंदर ऐ। एह मंदर इक कच्चे मकान दे कमरे च बने दा ऐ जिसदी पूजा सदिये थमां इक हरिजन परोआर करा करदा ऐ। एह परोआर पैहले कपड़ा बुनने दा कम्म बी करदा हा। मंदर दे आले दुआले दा वातावरण बड़ा गै शैल ऐ। इस मंदर च सब्भनें जातियें दे लोक श्रद्धाभाव कन्नै दर्शने गितै औंदे न ते मत्था टेकदे न।

अज्जा थमां कोई पंज सौ बरे पैहले इत्थें साहिया नां दा हरिजन रौंहदा हा जेहड़ा करसानी करदा ते कपड़ा बुनने दा कम्म करदा ओह सब्भै किश करदे होई भगवान दी भक्ति च बी मग्न रौंहदा। इक बारी राजा ने उसगी कपड़ा बुनने गितै सूतर पेजेआ। इक साधु ने उस थमां थोड़ा कपड़ा मंगेया तां उसनै साधु गी थोड़ा कपड़ा देई दित्ता। जिसलै राजा कोला कपड़ा पुज्जा तां ओह किश घट्ट हा राजा ने उसदे तोलने आहले जव्त करी ले ते साहिया गी बी कैद करी लैआ। साहिया दी अन्नी मां ने अन्न जल दा त्याग कीता। दुए रोज बट्टे अपने आप साहिया दे घर आई गै तां राजा ने परितयै उनेंगी अपने मैह्ला च मंगवाने लेई आदमी पेजे जेहड़े बट्टे गी चुकदे तां अन्ने होई जंदे छोड़दे तां नजर परतोई औंदी उनें राजा गी सारी गल्ल सनाई तां राजा ने साहिया गी बी छोड़ी दित्ता। पुत्तर घर आया तां मां ने बी अन्न जल ग्रैहण करी लैआ।

एह बी कहानी मंदर बारै मशहूर ऐ जे इक बारी साहिया गी इक दकानदार ने कपड़ा बुनने दी सूतर दित्ता जिसलै ओह कपड़ा लेई गेआ तां तौल घट्ट हौआ। उनें राजा गी शकैत कीती राजा ने साहिया गी खूहें च सुट्टी दित्ता। रातीं राजा गी शेर सुखनें च आया ते साहिया गी छोड़ने गी गलाया। राजा ने बड़े आदर कन्नै साहिया गी उसदे घर पालकी च पाई पजाया। जिसलै साहिया घर आया तां उसदा भरोसा पक्का होई गेआ जे नृसिंह भगवान ने उनेंगी बचाया

ऐ। उसनै कपड़ा बुनना छोड़ी दित्ता ते अपने बट्टे गी भगवान रूप मन्नी पूजा शुरू करी दित्ती। अज्ज बी साहिया दे परोआर आहले इनें बट्टे गी पिंडी रूप च पूजदे न।

कच्चे कमरे च बने दे इस मंदर गी पक्का करने लेई लोकें राजा गी अर्ज कीती तां पक्का मंदर बनाने दा राजा ने हुक्म जारी कीता पर एह कम्म तोड़ नेई चढ़ेया। अज्ज बी ओह अधूरियां कथां इत्थें एह न। इत्थें मंदरें कोल साहिया दी समाध बी बनी दी ऐ।

इत्थें पवित्र जलधारा ऐ जित्थें स्नान करी लोक नृसिंह दे दर्शन करदे न। इस थाहर बारै आखदे न जे साहिया दी अन्नी मां ने गंगा स्थान दी इच्छा जताई तां उसनै मां गी इक थाहर बठायया ते उसलै पत्थरें थमां पवित्र गंगा दी धार निकली जित्थें उसदी मां ने स्नान कीता। अदूं थमां एह पवित्र जल इस थाहर मज्जूद ऐ। इत्थें यज्ञ भंडारा बी होंदा ऐ ते लोक किट्ठे होई इत्थें मत्था टेकन औंदे न।

०००

ऐरवां मंदर



ऐरवां मंदर जिला कठुआ च ऐ। कठुआ शैहर थमां इसदा शिंडा लगभग 14 किलोमीटर ऐ। एह् इक प्राचीन प्रसिद्ध तीर्थ स्थान ऐ। इत्थें शिवजी दे दऊं मंदर न। दूरा-दूरा थमां लोक इत्थें बड़ी श्रद्धा कन्नै औंदे न। लोकें दा मनना ऐ जे इत्थें इक सौ इक बौलियां हियां पर हून इसलै त्रै गै बौलियां न। इत्थें स्नान करने परैंत भक्त भगवान शिव दे दर्शनें गितै अंदर जंदे न ते शिवलिंग पर पानी ढालदे न। बौली पर गंगा माता दा मंदर ते शिव मंदर बी बने दा ऐ। मंदरें दी कंधे पर देवी देवते दियां मूर्तियें दे चितर बी बने दे न। इत्थें धर्मराज दा मंदर बी ऐ जेहड़ा नमां ऐ ते 1992 च इसी बनाया गेआ हा। इस धार्मिक थाहरा पर सौना महीने दी पैहली तरीक गी हवन यज्ञ ते भंडारा कीता जंदा ऐ। इस रोज इत्थें मेला बी लगदा ऐ।

इत्थूं दे लोकें मताबक नगरी ग्रां च इक ब्रैह्मण रौंहदा हा जेहड़ा शिवजी दा पक्का भक्त हा ते निज्म कन्नै रोज जसरोटा मंदर जाई शिवजी दी पूजा करदा हा। इक दिन बरखा होने करी उझ च बडा मता हाड़ आए दा हा पर ओह् रोजा आंहगर उझ च तरदा होई मंदर पुज्जा। शिवजी उसदी भक्ति पर बड़े प्रसन्न हे इक रोज सुखने च उनें ब्रैह्मण गी दर्शन दित्ते ते गलाया जे इत्थें गै

तेरे कोल जंगल च मेरा स्थान ऐ तूं उसदी तपाश कर ते ओह् भगवान दी रस्सी दी थाह्र पुज्जा तां उसगी आप शंभु दी पिंडी लब्धी उसनै जमीन थमां उसगी बाहर कडढने दी कोशश कीती तां उत्थूं खून निकली आया ओह् ब्रैह्मण बड़ा परेशान होआ। लोकें च चर्चा हुंदे होई गल्ल राजा तगर पुज्जी तां उनें इस्सै थाह्रा पर मंदर ते बौलियां बनवाईयां।



किश लोकें दा एह् बी मनना ऐ जे एह् मंदर राजा विक्रमादित्य ने चौथी शताब्दी च बनवाए हे।

०००

आशापूर्णी मंदर

कठुआ शैहरा दे बजार च शैहरा दे बश्कार मां श्री आशापूर्णी जी दा प्राचीन मंदर ऐ। इत्थें माता पिण्डी रूप च बराजमान ऐ। इत्थें इक बड़ा गै पराना बड दा बूहटा ऐ ते कन्नै गै इक खूह बी इत्थें ऐ। बजारें च होने करी मंदर जाने आह्लें दी गिनतरी मती खास ऐ। दकानदार, बजार रौहने आह्ले बसनीक ते आले दुआले दे लोकें लेई एह् थाहर खास आस्था दा केन्द्र ऐ। इत्थें औने आह्ले दा मनना ऐ जे माता सब्भनें दियां आशां पूर्ण करदी ऐ, कश्ट हरदी ऐ ते भक्तें पर अपनी दया दा हत्थ रखदी ऐ। एह् मंदर कुंजा पवित्र पीठें च वर्णित थाहरें च इक ऐ।

०००



चौथा ध्याऽ

जिला सांबा दे धार्मिक ते सांस्कृतिक थाहर

सांबा

सांबे दे नां बारै इक किंवदती मताबक भगवान कृष्ण दे पुत्र सांब दे नां पर सांबा दा नां पेआ। इक बारी सांब कुसै बमारी दा शकार होई गेआ बड़ा मता इलाज करवाया गेआ पर ओह ठीक नेई होआ तां उसगी कुसा सेयाने ने सनाया जे जम्मू च विश्वामित्र (बसंतर) नांऽ दी नदी बगदी ऐ उस नदी दे कंढै चीची मां दा मंदर ऐ। तूं जेकर उस थाहर जाई नदी च स्नान करी माता दे दर्शन करी उत्थूं दो किलोमीटर दूर शिवलिंग पर जल चाढ़े ते उत्थें उंदी अराधना करे तां तेरा रोग दूर होई सकदा ऐ। राजे ने पूरे 40 रोज इत्थें उयां गै शरधा कनै भक्ति कीती ते ओह पूरी चाल्ली ठीक होई गेआ।

इक रातीं मां ने राजे गी सुखने च जगाऽ दित्ता ते गलाया-राजा हून इत्थें मेरे नांऽ दा भंडारा कर ते इक नगर बसाऽ। राजे ने भंडारा कीता ते इक नगर बसाया जेहडा सांबेश्वर नां थमां वर्तमान साम्बा बनी गेदा ऐ। भूगोलिक द्रिष्टी नै सांबे गी त्रऊं हिस्से च बंडेआ जाई सकदा ऐ उप्परला हिस्सा फ्हाड़ी, कंढी ते मदानी। इत्थूं दे लोक अपनी वीरता लेई टकोहदे तौर पर मन्ने जंदे न। फौजा दी नौकरी इंदा मुख पेशा ऐ।

०००

सांबा मंदर

रघुनाथ मंदर कैहली मंडी



एह मंदर मुगले थमां बी पैहले दा बने दा ऐ। एह हनुमान मंदर हा जिस च हनुमान जी दी मूर्ति ही। पर मुगलकाल च जिसलै दिल्ली दरबार दे हुक्म पर मूर्तियां खंडित करने दी कबुद्ध शुरू होई तां इत्थूं दे बसनीके मूर्ति गी तलाऽ च छपैली दिता। एह तलाऽ मंदर दे सामने ऐ जेहड़ा लोके लेई पानी दी लोडे गी पूरा करदा। इस तलाऽ दा मंगेयाल ऐ। इस दे नां बारै गलाया जंदा ऐ जे इत्थूं दे लोके ते कोटली मंडी दे लोके लेई एह तलाऽ बनाया गेआ। कोटली दे लोके कैहली आई तलाऽ दी मंग कीती इसकरी इसदा नां मंगेयाल पेआ।

इसदी 16 कनाल जमीन कोटली मंडी ते 4 कनाल कैहली मंडी आहले दी ऐ। अज्ज इस इनें बड्डे तलाऽ दा रूप भलेयां करूप होई गेदा ऐ। हनुमान जी दी मूर्ति मता चिर तलाऽ च रेही। मंदर खाली रेहा। फी मते चिरै इत्थें रघुनाथ जी दियां मूर्तियां स्थापित कीतियां गेईयां ते तलाऽ थमां हनुमान दी मूर्ति

गी दुयै मंदर रखेया गेआ। बाबा इन्द्र सिंह जेहड़े पानीपत दी दूई लड़ाई च मारे गै उनेंगी इस मंदर कनै लगाऽ हा तां करी उंदा नां बी मंदर कनै आई जुड़दा ऐ ते उंदे चैते च वचित्र सिंह होरें दो सौ 19सौ 40 थमां पैहले इत्थूं दे बाबा लक्ष्मण दास होरें गी दित्ते तां जे मंदर दा वकास होई सके। बाबा लक्ष्मण दास होरें मंदर लेई अपना सारा समां ते मैहनत लाई इसगी नमां सरूप प्रदान कीता।

जेहड़ी मंडी च मजूद अम्मा दी देहरी ऐ ते उंदी मंडी सती रूप च पूजा करदी ऐ एह सती अम्मा जेहड़ियां रकवाल जाति दियां हियां ओह बाबा इन्द्र सिंह हुंदियां धर्मपत्नी हियां ते इन्द्र सिंह हुंदे फौजा च मारे जाने परैन्त सती होईयां हियां।

०००

सांबा मंदर

जगन्नाथ मंदर

सांबा दी बद्धुआनी थाहरा पर तला कनारे जगन्नाथ जी दा एह् मंदर स्थित ऐ। इस मंदर गी राजा सुचेत सिंह दे राज मौके इत्थूं दी हरिजन जनानी ने लोके थमां चंदा किट्ठा करी एह् मंदर बनवाया हा। एह् मंदर किले थमां डेढ मील दी दूरी पर ऐ। इस मंदर गी उस हरिजन जनानी ने अपने पुतरे दे कलकाता थमां ठीक ठाक वापस औने पर बनवाया हा। इस मंदर च इत्थूं दे सब्भै लोक बिजन कुसै जातपात भेद दे जंदे न। रोज संजा ते बड्डलै इत्थें मती गिनतरी च लोक औंदे न।

लोके दा मनना ऐ जे वदुआनी शब्द “बुद्धावाणी” अर्थात् बुद्ध दी अवाज थमां बने दा ऐ। मनासब ऐ जे बुद्धमत दे संत इत्थें रौहदे हे ते लोके च धर्म सरबंधी शिक्षा दिंदे हे।

०००

थान कठुआ

बाबा बिरपा नाथ जी



बाबा बिरपा नाथ जी दा स्थान बीरपुर ग्रां च ऐ। अज्जे थमां 550 बरें पैहले इस ग्रां च बाबा लद्धा नां दे इक ब्रैह्मण रौंहदे हे। उंदे घर औलाद नेई ही। मते चिरै उंदे घर जागत हौआ जिसदे परैन्त उंदे गरीबी ने पैर पसारी ले। उंदा जागत जिसदा नां वीरू हा ग्रां च गवां चारदा ते प्रभु भक्ति च मग्न रौंहदा। इक दिन वीरू गवां चारा करदा हा तां गुरू गोरखनाथ जी अपने चले कन्नै उत्थूं जा करदे हे। किश विश्राम करने लेई गुरू जी बीरू कोल बेही गै। उनें वीरू गी पानी पलाने गी गलाया तां वीरू बौली थमां पानी लेई आया ते उनें सब्भनें गी पलाया। गोरखनाथ जी बड़े खुश होए। गुरू जी ने उनेंगी अर्शीवाद दित्ता ते गलाया। जदूं बी मेरी लोड़ होग तां मैं आई जाग।

अदूं गै राजा ते इत्थें इक खूह बनाना शुरू कराया उस थमां पानी नेई हा निकला करदा। राजा गी सेयाने ने गलाया जे बिजन कुसै बालक दी बलि दिते दे पानी नेई निकलना। राजा ने सपाहियें गी बालक तुप्पी आहन्ने गी गलाया। जिसलै सपाही वीरपुर पुज्जे तां वीरू गी दिक्खी, फगड़ी लेई गै। जिसलै बलि

देने गी हवन यज्ञ हौआ करदा हा तां वीरू ने गुरु गोरखनाथ जी गी चैता कीता ते राजा गी पुच्छेआ तुस मिगी कीऽ मारा करदे ओ तां राजा ने गलाया पानी लेई तेरी बलि जरूरी ऐ। वीरू ने पुच्छेआ पानी आई जा तां, इन्ना आक्खदे गै ओह ध्यान च बैठे ते खूहें च पानी आई गेआ। सारे लोक हरान होई गै। ते उसदी जय-जयकार करन लगी पे। राजा ने उसगी अपने मैहल चलने गी गलाया पर ओह नेई मन्ने ते वापस घर बी नेई गै। उनें घरै दा त्याग कीता ते फकीर बनी गुरु गोरखनाथ जी दी सेवा च रौहन लगे।

०००

थान कठुआ

मलगुर देवस्थान

कोई पंज सौ बरे पैहले मलगुर
ग्रां च जेहड़ा जिला सांबा च ऐ,
महाजन रौहदे हे जेहड़े हर तरीके
कनै समृद्ध हे गल्ल भामें रपे पैहे
दी होए जां पढ़ाई दी। सारे ग्रां दे
लोक बड़ी शैल स्थिति च जीवन
गजारा करदे हे। इक बारी कोई




ऐसी बमारी फैली जे सब्भनें लोकें गी मजबूरी च ग्रां छोड़ना पेआ। मते लोक
सांबा, कोहग डरूंग, जम्मू ते उद्यमपुर च जाई बस्से। इनें लोकें चा गै इक
परोआर जंदे बारी इक मती उमरी दे बुड्डा बुड्ढी गी ग्रां च गै छोड़ी गै। उंदी
दिक्खभाल करने आह्ला उत्थें कोई नेई हा इस करी ओह बड़े दुक्खी रौहदे
ते मना थमां बददुआ दिंदे जे जिनें असेंगी इयां बेस्हारा छोड़ेया उंदा कदें भला
नेई होना।

जित्थें बी लोक जाई रौहदे हे उनेंगी उत्थें-उत्थें मता दुक्ख होन लगा।
पैहा सेहत सब्भै किश उंदे कोल नेई रेहा। सारे इनें दुक्खें दा कारण तुप्पदे होई
साधु, सेयाने, योगी चले आदि दे जाई अपनी हालत दा कारण पुच्छदे। कुसै
इक सेयाने ने उनेंगी गलाया जे ग्रां थमां जंदे जिस बर्जुग जोड़े गी तुस पिच्छें
छोड़ी गै हे एह उंदी गै करोपी ऐ। उनेंगी जेकर तुस सारे किट्ठे होई मनाई
लाओ तां गै तुदें दुक्ख दूर होई सकदे न। सारे महाजन जित्थें बी बस्से दे हे
उत्थूं आए ते अपने बर्जुग जोड़े थमां क्षमा याचना कीती। एह लोक मनदे न
जे इत्थें दर्शन देने आहले नाग देवता उंदा गै रूप न। सारी बरादरी ने उनेंगी

अपने कुल देवता दे रूप च मनाया। उंदा थाहर बनाया ते बरे च दो बारी इस थाहब्र मेल होंदी ऐ जिस च सारी बरादरी किट्ठी होई इत्थें मत्था टेकदी ऐ। इत्थें रौहनें खाने दा पूरा प्रबंध ऐ। एह मेल निर्धारित दिनें पर चार नबंवर ते अप्रैल च होंदी ऐ। अज्ज उंदे अशीर्वाद कन्नै उंदा परोआर खूब तरक्की करा करदा ऐ।

०००

साम्बेश्वर मंदर सांबा



साम्बा दे मशहूर साम्बेश्वर मंदर बारे धारणा ऐ जे एह मंदर महाभारत काल दा मंदर ऐ। महाभारत दी लड़ाई मगरा भगवान श्री कृष्ण जी दे कुल थमां कुसै इत्थें आई तपस्या कीती ते भक्ति थमां प्रसन्न होई भगवान शिव ने उनेंगी सामधान दर्शन दित्ते। दर्शनें परैत्त उनें इत्थें एह मंदर बनवाया। साम्बेश्वर मंदर जिन्ना गै पराना इत्थें स्थापित शिवलिंग बी ऐ। इत्थें पराने समें च आश्रम हा जित्थें ऋषि मुनि तपस्या करदे हे। इसलै एह मंदर इक घनी अबादी आहले थाहर ऐ जित्थें म्हेशां लोकें दी चैहल-पैहले रौहदी ऐ। इस मंदर च शिवलिंग दे कनै इक होर शिवलिंग ऐ जेहड़ा माता पार्वती दे नां कनै पुजेया जंदा ऐ। इत्थें शिवलिंग करीब इक फुट उच्चा ऐ ते कनै गै धातु दे बने दे नाग देवता बी है न। इक दंद कथा मताबक कृष्ण जी दे वंश थमां राजा साम्ब गी इक ऋषि ने श्राप दित्ता ते उसगी कोढ़ पेई गेआ। बड़ी लाजकारी करने परैन्त बी राजा दा हाल बुरा होंदा गेआ ते कोई बी इलाज कम्म नेई आया। इस ज्योतिषी ने राजा गी सलाह दित्ती जे नन्दनी प्हाड़ी जेहडी उत्तर दिशा च ऐ उत्थें बसैन्तर

(विश्वामित्र) नदी च रोज स्नान करी महेश्वर शिव मंदर च जेकर रोज तुस शिवलिंग पर जल चढ़ाओं तां किश रोजे च ठीक होई जागे। राजा अपने पूरे दल बल कन्नै इस थाहरा दी तपाश च निकली पेआ ते केई महीनें मगरा उनेंगी एह थाहर लब्धी गेआ। ज्योतिषी दे दस्से मताबक राजा नित नियम कन्नै स्नान परैन्त शिवलिंग पर जल चाढ़दा ते किश दिनें मगरा ओह बिलकुल ठीक होई गेआ।

“तारीख डोगरा देश” मताबक लखनपुरिया वंश दे राजा संग्रामदेव दा दुआ पुत्तर मल्हू दिल्ली दरबार च नौकर हा। बादशाह ने उसगी खान दी उपाधि दिती दी ही ते ओह मलखान नां कन्नै मशहूर हा। उनें सांबा ब्याह कीता ते पही अपने सौहरियें गी इत्थूं नस्साई दिता ते अपना राज कायम करी लेआ। उसदे 22 पुत्तर हे जिसदे नां पर साम्बे दियां मंडियां बनाईया गेइयां। हर मण्डी दा राज मुखिया चलांदा हा।

०००

उत्तर बैहनी मंदर

पार्वती स्वरूपा देवक नदी इत्थें दक्खन सा उत्तर गी बगदी ऐ इसकरी इसदा नां उतरबैहनी पेआ। राजा गुलाब सिंहे होरें इत्थें गदाघर मंदर बनवाया, ते दस्सें अवतारें दे मंदर बी बनवाए। इनें इत्थें इक संस्कृत पाठशाला बी बनोआई जित्थें दूरा-दूरा विद्यार्थी पढ़ने गितै औंदे। इंदे परैन्त रणबीर सिंह होरें शिवपूजन लेई तिब्बत थमां 42 मनपक्के घैंटा मंगवाया। जिसलै मंदर आरती हुंदी तां घैंटा बज्जने पर सारे लाके च पता लगदा जे आरती हौआ करदी ऐ। इनें इत्थें



शिव मंदर बनाने दा कम्म शुरू करवाया ते 9-9 फुट उच्चे शिवलिंग मंगवाये पर उंदें इत्थें एह कम्म पूरा नेई होआ ते फही प्रताप सिंह होरें कम्म पूरा कीता। पुरमंडल गी उत्तरकाशी दा स्वरूप देने लेई इनें त्रौनें राजे इत्थें शिवमंदर ते केई होर मंदर बी बनोआए। उनें इत्थें इक 'गया' घाट बी बनाया तां जे इत्थें औने आहले लोक बाहर नेई जाई सकदी इ 'नें मंदरें पूजा करने ते जल ढालने दा म्हातम गेआ काशी आंहगर प्राप्त करी सकन।

०००

बाबा तल्लन ढा थान

बाबा तल्लन नाग-राज बाबा सुरगल दे लौहके भ्रा न। धगवाल थमां इक कि. मीटर घरौंदे दराकड़ नांऽ दे ग्रां च इसदा थान ऐ। इत्थें नाग पंचमी गी मेला लगदा ऐ। जग बी दित्ता जंदा ऐ ते इत्थें छिंज बी करोआई जंदी ऐ। सप्प डंगने-त्रिण कंडा होने पर इत्थूं दे पजारी फांडा करदे न ते जैहर उतरी जंदा ऐ। डंगे आहले थाहर शक्कर (बर्मी दी मिट्टी) मलदे न ते जल जख्म धोने गितै दित्ता जंदा ऐ। नाग पंचमी ते खास मौक पर ते भक्त इत्थें औंदे गै न पर इयां बी पूरा बरा भक्त इत्थें मत्था टेकदे न।

०००

बाबा कौल्लू

बाबा कौल्लू दा थान घगवाल थमां त्रै कि० मीटर दूर दक्खन पच्छम च पंचैत संगवाली दे छन्न मलागरू थाहरा पर ऐ। इत्थें गै किश देहरियां ते थड़े बी लब्भदे न। एह् लोक देवता आहले दोआले दे सभनें ग्राएं दे माल मवेशी दी रक्षा करदा ऐ। लोक फसल राहनें थमां पैहलें इक बुक्क दानें बाबा कौल्लू दे नां कड्ढी खेतरां दी उतरी-पूर्वी भेठा टकांदे न ते अपनी नरोई फसल होने दी सुक्खन करदे न। लोकें दा पक्का विश्वास ऐ जे कोई गौ, मेंहई दुद्ध नेई दिंदी होऐ तां बाबा कौल्लू दे मत्था टेकने पर ओह दुद्ध देन लगी पौंदी ऐ ते पही लोक उस गौ मेहई दा दुद्ध 21एं दिनें सुच्चा होने पर बाबा कौल्लू दे चाढ़दे न। अज्ज बी लोक इस प्रथा गी नभा करदे न।

०००

बाबा बलिकरण

नागराज बाबा बलिकरण दा असल स्थान चंजाल थाहर पर हा, पर हून एह थाहर पाकिस्तान च ऐ। एह थाहर सद्दे चक्क थमां खल्लकी भेठा ऐ। इंदा स्थान अजें बी पंजग्राई कोल फरलाई दी बनी बिच्च बिराजमान ऐ। पनगोतरा बरादरी ने हून बड़ी श्रद्धा ते भक्ति भाव कन्नै बार्डर कण्डें बस्से दे ग्रां नडाला च इंदे थान दी स्थापना कीती दी ऐ। इसदी मेल पर धियें भैंने गी खास करी चैता कीता जंदा ऐ ते चेचे तौर पर घर बलाया जंदा ऐ।

०००

बाबा शिवो दा थान गोर्न

बाबा शिवो दा थान जिला साम्बा दे गोरन ग्रां च ऐ। एह थाहर साम्बा बस अड्डे थमां उत्तर पूर्व भेठा सुम्ब गोरन शिड़का पर साम्बे थमां 20 किलोमीटर दूर गोरन ग्रां दे नाले दे पूर्वी कंठे पर मजुद ऐ। इत्थें हर ऐतवारें मेला लगदा ऐ ते दूरा-दूरा लोक इत्थें मत्था टेकन औंदे न ते अपनी सुक्खना पूरी होने पर भेटां बी चाढदे न।

बाबा शिवो दा नां शिवदेव हा ते उंदे पिता दा नां लब्छदेव हा जिनेंगी लोक प्यार कन्नै लद्धा आक्खदे हे ते जित्थें गोरन उंदा राजा हा उस प्हाड़ी श्रृंखला गी 'लद्धे दी धार' आक्खदे हे। जम्मू दे राजा मालदेव ने अपने मित्तर राजकुमार गी कश्मीर थमां जम्मू आई बस्सने दा साद्दा दित्ता ते उंदे औने पर उनेंगी प्हाड़ी राज सौंपी दित्ता। एह भुतेआल राजपूत हे। इंदी रानी दा नां कलावती हा जिनेंगी जनता रानी कल्ली करी कुआलदे हे। राजा लद्धा बड़े न्याऽ प्रेमी हे। उंदे कोई औलाद नेई ही राजा ते रानी ने गुरू गौरखनाथ जी दी तपस्या कित्ती तां शिवो दा जरम हौआ। राजा लद्धा दा काल होई जाने पर शिवो राजा मालदेव कोल रेह ते जिसलै जोआन होए तां उनेंगी राजा ने उंदे पिता आह्ला राजा सौंपेया। ओह बी पिता आंहगर बड़े न्यायप्रिय। किश शराखी तत्त्वे जिंदा राजा मालदेव ने जनता कन्नै बुरा व्यवहार करने कारण राज खुस्सी लैते दा हा, शिवो कन्नै दुश्मनी रखदे हे ते उनेंगी खत्म करने दा मौका तुप्पदे। आखिर ओह उंदे मनसुबे पूरे हौये ते उनें शिवो दा धोखे कन्नै सिर कलम करी दित्ता ते वीर शिवो विजन सिरें सिर्फ धड़ गै उंदे पिच्छे लगा ओह टुरी गै ते उसदी शक्ति गी सब्भने मन्नेया।

राजा शिवो ने उनें लोकें गी माफ नेई कीता जेहड़े उनेंगी मारने च शामिल हे। उंदा सर्वनाश होन लगगी पेआ। उंदे लोकें चा किश उत्थूं नस्सी गै ते किश

लोकें अपनी जात बदली लेई। सढ़माल बरादरी दे लोके अपनी करनी लेई नक्क रगड़ी-रगड़ी माफी मंगी ते बावे दी आज्ञा कनै उंदी समाधि बनाई ते सेवा करना शुरू कीता। गढ़ समोठा च अज्ज बी राजा लद्धा ते माता कल्ली दा स्थान ऐ। जित्थें बाबा जी दा धड़ डिग्गेया हा अज्ज उस्स थाहरा पर काफी किश बनाई लैता गेदा ऐ। इत्थें इक प्रबंध कमेटी बनाई गेदी ऐ जेहड़ी इत्थें होने आहली सारी आमदन इत्थूं दे बाद्धे वकास लेई गै खर्च करदी ऐ।

बावा शिवो भामें शारीरिक तौर पर मजुद नेई पर अज्ज बी ओह लोकें दी भलाई लेई अपने थाना पर मजुद न। इत्थूं दे केई लोक इनेंगी अपने कुल देवता दे रूप च पुज्जदे न।

०००

बाबा सिद्धगौरिया



बाबा सिद्ध गौरिया जी दी पवित्तर समाधि जिला सांबा दे सुआखां ग्रां च ऐ। उनें इक बारी गुरू गौरखनाथ थमां आज्ञा मंगी जे मिगी तीर्थ करन जाने दी आज्ञा देओ। गुरू ने खुशी-खुशी आज्ञा दित्ती ते ओह तीर्थ करन निकली गै। तीर्थ करी ओह ग्रां सुआखां च आये ते उत्थें रौहने दी सोची तां जे इत्थूं दे लोकें च बी भक्ति भाव जगाई सकन। इक दिन बाबा जी गी दुद्ध पीने दी इच्छा होई तां उनें किश जागतें गी आक्खेया। जागतें उनेंगी दितु ब्राह्मण दे घर पेजी दित्ता। उत्थें उनें दिक्खेया जे घरा च बड़ी गरीबी ही। ब्राह्मणी ने उनेंगी औने दा कारण पुच्छेया तां उनें दुद्ध मंगेया ओह सारा ग्रां फिरी आई पर उसगी दुद्ध नेई थ्होआ। ओह आपूं जगताली ही ते उनें अपना दुद्ध कडिठयै बाबा जी दे अर्पण कीता। ओह सब्भै किश जानदे हे उनें गलाया माता में तेरा दुद्ध पीता इस करी तेरा पुत्तर होई गेआ। में तुंदी ते पिता जी (दित्तु ब्राह्मण) दी सेवा च इत्थें गै रौंहग। ओह जंगल माल बच्छु चराने गितै लेई जंदे ते उत्थें गै भक्ति करदे। बाबा जी ने जिनेंगी माता पिता आक्खेया उंदा साथ कदें नेई छोडेया इसदा सबूत ओह समाधियां न जेहड़ियां उत्थें बनी दियां न उंदी माता मथरा, भ्राऽ बालकू ते पिता दित्तु। इस थाहर इक पवितर सरोवर ऐ जिस च मत्था टेकन

आये दे लोक पैहले स्नान करदे न ते फही बावे दी समाधि पर मत्था टेकदे न।

उंदी समाध सरोवर दे बश्कारें बनी दी ऐ जित्थें उनें जींदे जी समाधि लेई ही। इत्थें अखण्ड जोत जगदी रौंहदी ऐ। बाबा जी दी समाधि अज्ज बी कच्ची गै ऐ। इत्थें इक बोहड़ा दा बूहटा ऐ जिसदे साम्मने दित्तु दा घर हा। लोक इस थाहर पर बड़ी श्रद्धा रखदे न ते भक्ति भाव कन्ने बाबा जी दे मत्था टेकन औंदे न। इत्थें जेहड़ा प्रवेश द्वार बनाया गेदा ऐ आखदे न एह 1942 च कुसा सेठ ने बनवाया हा की जे बाबा जी दे अर्शीवाद कन्ने उसगी औलाद दी प्राप्ति होई ही। सरोवर दा पवित्तर जल लोकें दे केई कष्ट दूर करदा ऐ।

इत्थूं दे वकास कम्म दिक्खने गितै इत्थें कमेटी दा गठन कीता गेदा ऐ। तां जे कम्में च कोई रोक नेई आवे।

०००

अम्मा देवती दी देहरी

सांबा दी कैहली मंडी च अम्मा देवती दी देहरी ऐ जिसदी मानता सारी सम्याल बरादरी जेहड़े कैहली मंडी दे बसनीक न करदे न। हर ऐतवार मंगलवार इत्थें बड़े श्रद्धाभाव गै मत्था टेकन बरादरी दे लोक औंदे न।

जगनन्दन सिंह हुंदे मताबक अम्मा इत्थूं दियो नूंह हियां। इक बारी उंदे घरैआहले जेहड़े फौजा च नौकरी करदे हे, लड़ाई च गेदे हे तां उत्थें गै उंदा काल होई गेआ। जिसलै मंडी खबर पुज्जी दा अम्मा ने अपना सारा शृंगार कीता ते पति कन्नै गै सती होने दा फैसला कीता। जिसलै अम्मा तैय्यार होआ करदियां हियां तां परतैनी ने तौल-तौल करने गी गलाया ते अम्मा दी सस्सु ने बी तौल लाई। अम्मा ने रौह बुझेआ ते गलाया जदूं में ब्याह परैत इत्थें आई तां तुसें दौंने अंदू बी मेरे मगर, काहली लाई ते अज्ज में सती होन चली आं तां बी तुसे काहली लाई दी ऐ। गुस्से च अम्मा ने गलाया जे मेरे मरने परैत परतैनी ते मेरी सस्सु दी जाति आहले जेहड़ियां सलारियां राजपूत हियां मेरे थडे पर नेई चढेयो। अज्ज बी जिसलै बच्चे दे मूनन सुतरे ते जां रकाधे दी रस्म नभाई जंदी ऐ तां परैतेनी ते सलारिया जाति दे लोक थड़े थमां बाहर गै रौहदे न देहरी अंदर नेई जंदे जित्थें निक्का जनेहा मंदर बने दा ऐ।

०००

लसोत्रे मेघें दी शिलाबैंती

गरडानी ग्रां च हरिजनं दी लसोत्रा मेघ जाति दी शिलाबैंती दी देहरी। बरीताराम भगत हुंदे मताबक शिलाबैंती आपूं ब्रैह्मण जाति दियां हियां। इक बारी भौर छिड़ी गेआ ते उंदे पुत्तरें गी पलची गेआ। कोला जा करदे मेघा गी उनें जागतें गी छडकाने दी अर्ज कीती पर उसनें उंदी मदद नेई कीती ते जागतै दी मौत होई गेई। शिलाबैंती अपने जागतै कन्नै गै सती होई गेईयां। सती होने परैन्त शीलाबैंती ने अपनी ते अपने जागते दी लसोत्रे मेघा थमां मानता करोआई।

थोडूराम हुंदे मताबक शिलाबैंती दी अपनी जात ब्रैह्मण ही इस करी अज्ज बी अस मत्था बाहरा गै टेकने। पंते गी सुक्की रसद देई उंदे थमां गै अंदर प्रसाद बनाई चढ़ाया जंदा ऐ ते चढ़तल बी उनेंगी गै दित्ती जंदी ऐ। देवी गी शुआड़ बस्त्र बी ब्रैह्मण गै चाढ़दे न।

०००

बिनालोच ब्रैह्मणों दी शिलाबैंती

ग्रां कोटवालता च बिनलौच ब्रैह्मण जाति दी शिलाबैंती दी देहरी ऐ। एह बड़ी निक्की उमरी च अपने पिता कन्नै सती होई गईयां हियां।

श्रीमती सरस्वती हुंदे मताबक इंदे सती होने दा कारण इयां ऐ जे एह गैआसन लैन ठोकरे दे घर जा करदियां हियां ते रस्ते च लगगी दी कनकें दे सिट्टें गी हत्थ मारा दियां हियां। तां कुसै ठोकर राजपूतां ने इनेंगी चण्ड मारी जे तूं कनक खराब कीती ऐ। एह उत्थूं गै घरै गी परतोई आईयां ते सारी गल्ल अपने पिता गी सनाई। पिता ठोकर गी पुच्छन गै तां उसनै उंदी बी बड़ी बेइज्जती कीती ते खूब खरी खुट्टी सनाई। शिलाबैंती दे पिता अपना अपमान सैहन नेई करी सके ते उनें आत्मघात करी लैआ। शिवाबैंती गी पता लगगा तां उनें गी पिता कन्नै सती होने दा निर्णया करी लैता पिता दी बलदी चिता च इनें बी अपने प्राण त्यागी दिन्ते।

अज्ज इस जाति दे लोक अनाज दे निकलने पर खारकें देन औंदे न ते अपने पुरखें दी गलती दी माफी मंगदे न।

०००

मांडलें राजपूतें दी देहरी

ग्रां मण्डल च मांडले राजपूतें दी शिलाबेंती दी देहरी ऐ। इस शिलाबेंती गी मण्डल ते कोठवालता ग्रां दे मांडले राजपूतें अलावा होर बी मती जातें दे लोक मनदे न ते कते म्हीने दी पुन्नेआ गी आईयै मेल करदे न। इनें लोकें कुसा समें शिलाबेंती दी क्रोपी कारण अपनियां जाता बटाई लेईयां हियां। एह लोक डिग्याना, मालशाह रडमां बगैरा ग्रांयें च रौंहदे न।

हरिसिंह हुंदे मताबक शिलाबेंती दे सती होने दी कोई तरीक दिन बार आदि दा पक्का पता ते नेई पर लगभग ज्हार बरा परानी घटना दस्सी जंदी ऐ। शिलाबेंती गी बुआ बोली करी बलांदे हे। एह चाड़कें दी धीऽ ते मांडलें दे ब्याह होआ। पैहले इंदा रिश्ता कुसा होर कन्नै होए दा हा पर तोड़ नेई चढ़ेया। कुत्तै होर जिसलै इंदा ब्याह हौआ तां रस्तें च गै इंदे घरैआहले गी उस जागतें ने मारी दित्ता जिस कन्नै पैहलें रिश्ता होए दा हा। बुआ गी पता लगगा तां ओह उत्थें गै सती होई गेईयां। जिसलै इस जाति गी बुआ दी क्रोपी लगगी तां उनें इंदी मानता कीती।

पैहलें शिलाबेंती दे बकरे दित्ते जंदे हे पर हून बकरे दे कन्ना दा खून कड्डयै शिलाबेंती गी तिलक लाया जंदा ऐ ते बकरा ब्रैह्मणें गी चढतल च दित्ता जंदा ऐ।

०००

मन्हास राजपूतों दी शिलाबैती दी देहरी

ग्रां समैलपुर च मन्हास राजपूतों दी शिलाबैती दी देहरी ऐ। इनेंगी ग्रां समैलपुर च रौहने आहले मन्हास बड़ी शरधा कन्नै पूजदे न।

इत्थूं दे बसनीक कृष्ण सिंह हुंदे मताबक इंदी शिलाबैती दा नां कांगना हा। इंदे सती होने दा कारण इंदे पुत्तर तारिया दा कत्ल हा जेहड़ा कुसै मन्हास राजपूत ने कीता, की जे तारियां, ब्रैह्मण सिद्धे स्भाऽ दा हा। ओह तलाऽ पर पानी भरन गेदियें जनानियें दे घडे ते गागरा भन्नी दिंदा हा। इस करी कुसा मन्हास राजपूत ने उसदा कत्ल करी उसदी लोथ पीपले दे बूहटे कन्नै टंगी दिती। इस लोथा गी इत्थें रौहने आहले योगी ने दिक्खेआ ते कांगना गी सनाया जे तेरे पुत्तरें दा कत्ल होई गेआ ऐ। कांगना ने पुत्तरें दी लोथा कन्नै सती होने दा फैसला कीता ते पुत्तरें कन्नै सती होई गेई। कांगना ने बाद च इस खानदान गी क्रोपी दस्सी। इस कारण केई मन्हास मुसलमान बनी गै ते विजयपुर ग्रां छन्नी मन्हासा च जाई बसे ते 1947 च पाकिस्तान गै उठी।

बाद च ठा० पराग सिंह जेहड़े उस मौके गिलगित हे उत्थें गै उनेंगी कांगना दी क्रोपी होई तां उनें समैलपुर आई इंदी मानता कीती। अदूं थमां इत्थूं दी सारी मन्हास जाति इस शिलाबैती गी कुलदेवी दे रूपा च मनदी ऐ।

०००

नरैनियेँ राजपूतेँ दी शिलाबैती दी देहरी

नरैनियेँ राजपूतेँ दी शिलाबैती दी देहरी ग्रां नथवाल च ऐ। जिसगी इत्थूं दे नरैनियेँ राजपूत कुल देवी दे रूपा च पुजदे न। एह शिलाबैती अपनी सस्सु दी सेवा बड़े तनमन कन्नै करदियां हियां। इक दिन उनेंगी कम्मा च रूज्जे दे थोडा चिर होई गेआ सस्स किश गुस्से होई गई ते बोली जे लोके दियां नूहां सस्सु दी सेवा मना कन्नै करदियां न पर तूं मनचित कन्नै सेवा नेई करदी। नूहां गी मना च बड़ा दुक्ख हौआ जे में ते सस्सु गी मां आंहगर गै समझनी ते सेवा करनियां पर केह करं जिस कन्नै इनेंगी विश्वास होई जा। ओह सस्सु गी आक्खन लगी जे में सती होईयै तुसेंगी अपने साफ मना दा ते तुंदे प्रति सच्ची श्रद्धा दा सबुत देई सकनियां। ते इन्ना आक्खी ओह सती होई गईयां। बाद च औकार सिंह होरें इंदी मानता कीती देहरी बनाई। अज्ज ग्रां नथवाल दे सारे नरैनिये राजपूत इस शिलाबैती गी कुलदेवी दे रूपा च मनदे न ते अपनियां राह-रीतां इत्थें करदे न। कत्ते म्हीनें दी पुन्नेया गी इत्थें हवन यज्ञ कीता जंदा ऐ। सारे लोक बड़ी श्रद्धा भाव कन्नै इत्थें मत्था टेकदे न।

०००

भड़वाल दाती दी देहरी

मंडी अन्दराड दे सलाथियें राजपूतें दी एह शिलावैती जाति दियां भड़वाल हियां ते सलाथियें दे इंदा बयाह हौये दा हा। इंदे घरा आहले चम्बा च सिक्ख हकूमत च महाराजा रणजीत सिंह दे सफीर हे। दाती दे घरैआहलें दा काल करवाचौथ आहले रोज हौआ जदू उनें वर्त रक्खे दा हा। इनें वर्त पोआरे बिजन गै सती होने दा संकल्प लैता। ते अपनी औने आहली पीढ़ी गी एह हिदायत कीती जे अज्जे थमां कोई बी करवाचौथ दा वर्त नेई रक्खग। ते आपूं सती होई गेईयां। अज्ज बी मंडी अन्दराड दे कोई 50-60 घर करवाचौथ दा वर्त नेई रक्खदे न। इत्थें बी उतरैनी गी हवन यज्ञ हुंदा ऐ। लोक इत्थें राह रीतां बी करदे न।

०००

दाती लगैह दी देहरी

दाती लगैह दा सती होने दा कारण ठाकुर आत्मा सिंह हुंदे मताबक इयां ऐ जे सलाथियें दा जागत लगैह दे घर जान्नी लेई उंदी कुडी ब्याहने गितै गेआ। लग्न होने परैत वेदी दे मौके लगैह राजपूतें दे रवाज हा जे ओह इक मुण्ड धरती च दब्बी दिंदे हे ते लाडे गी घोड़े पर चाढ़िये नेजे कन्नै उसगी पुट्टने गी आखदे। लाडे ने घोड़े पर चढ़िये मुण्ड ते पुट्टी दित्ता पर घोड़े दा लक्क जुट्टी गेआ। तां शिलाबैंती लाड़ी ने आक्खेआ जे इयै घटना मेरे घरैआहले कन्नै बी होई सकदी ही इस करी अज्जा थमां कोई बी लगैह दे घर ब्याह नेई करन ते लगैह कन्नै छिन्ना कीता जाग। जिसलै ओह ब्याह परैन्त गुढ़ा पुज्जियां तां राजा संग्राम देव खाली घोडा ते तलवार पेजी ते एह स्नेहा दित्ता जे मिगी लड़ाई दे मोर्चे पर तेरी सख्त लोड ऐ तां ओह बिजन रकाधे फिरे दे लड़ाई पर गै उठी ते उत्थें शहीद होई गै। दाती लगैह अजें उनें ब्याहून टल्लें च गै ही जेहड़े उनें रकाधे फिरने लेई लाये दे हे। पति दे शहीद होने दा पता लगदे गै ओह उनें टल्लें च गै सती होई गेई। अज्ज बी सलाथियें लाड़ी दा ब्याहनू सूट नाई गी देई दिंदे न।

एह सती अन्दराड़, सानी गढ़ ते दब्बड़ मंडी दे सलाथियें दी शिलाबैंती ऐ। पैहलें सारा सलाथियां खानदान इंदी मानता करदा हा पर हून कोई ज्हार घर इंदी मानता करदा ऐ ते बाकी आहले घर अपनियें शिला बैंतियें दे जंदे न। उत्तरैनी आहले दिन इत्थें यज्ञ हवन होंदा ऐ।

०००

* ठाकुर आत्मा सिंह/मंडी अंदराड/जिला सांबा/ग्रां गुढ़ा

चगदाले दी शिलाबैंती दी देहरी

गुढ़ा सलाथियां दे चगदाल हरिजने दी शिलाबैंती दी देहरी देवका कंढे बनाई गेदी ऐ। कन्दू राम गी गुढ़ा दे गै पंत दामोदर होरें ते विक्रम सिंह होरें रामनगर थमां 30एँ रपेऽ च कुड़ी आहन्नी दित्ती ते कन्दूराम दा ब्याह कराई दित्ता। उंदे सत्त पुत्तर ते छैः धियां हियां। जिसलै कन्दूराम होंदा सुर्गवास होआ तां उंदी लाडी ने बी उंदे कन्नै गै सती होने दा फैसला कीता। पर गुढ़ा दे राजपुतें निक्की जात होते करी उंदे सती होने दा बरोध कीता। ते आक्खेया जेकर तूं सती होना ऐ तां कोई चमत्कार दस्स। उनें गलाया जे मेरी धीऽ मिगी मिलने गितै इत्थूं त्रै क्रोह दूर आवा करदी ऐ चमत्कार दिक्खी लेओ। धीऽ आई गेई ते उसगी मिली शिलाबैंती सती होई गेईयां। इंदी देहरी पर हाड़ म्हीने दी पड़ेयां गी यज्ञ कीता जंदा ऐ इत्थें खारके मरुण्डे दे रूपा च चाडे जंदे न। गुढ़ा दे इलावा इत्थें रक्ख बरोटिया सिम्बला आहली अमोआल, मनानू, मूल्था कैहरां आहली, आदि थाहरें थमां बी लोक इत्थें औंदे न ते पड़ेयां गी बी मती गिनतरी च बरादरी दे लोक इत्थें किट्टें होंदे न। इत्थें बी लोक अपने कुला दियां राहरीतां करदे न।

०००

चीची माता सांबा

चीची माता दा मंदर सांबे दा प्राचीन मंदर ऐ। इत्थें पैह्ले घने बियाबान जंगल च माता दी निक्की जनैही देहरी बनी दी ही जिस च माता दी पिंडी ते मोहरे रखे गेदे हे। सवंत 2018 विक्रमी च इत्थें इस थाहरा गी नमां रंग रूप दित्ता गेआ। फर्श गी संगमरमर, मंदर पर कलश ते होर सारी सजावट कीती गई। भक्तें लेई सराऽ बनाई गेदी ऐ। इत्थें नरातें च बड़ी भीड़ होंदी ऐ। इत्थें किश होर बी मंदर बने दे न। शिव परोआर, महालक्ष्मी जी, भगवान राम लक्ष्मण ते सीता माता जी दा मंदर ते कन्नै हनुमान जी दियां मूर्तियां बी एह न। बेहडे च पराना महावीर मंदर बी ऐ। इत्थें गै शिवालय ऐ जिस च शिवलिंग स्थापित ऐ।



माता दे इस मंदर बारै कहानी प्रसिद्ध ऐ ते माता पार्वती दे पिता ने इक यज्ञ रचाया सब्भने गी सद्दा दित्ता पर अपनी धीऽ जुआई गी नेई सद्देआ। पार्वती उत्थें जाने गी बिजन साद्दे दे गै तैयार होई गई ते शिवजी दे मना करने पर बी नेई रूकी। उत्थें पुजने पर पार्वती दा कोई आदर सत्कार नेई हौआ तां उनें अपने पिता पर क्रोधित होई गलाया जे तुसें मेरे पति दा अपमान कीता ऐ जेहड़ा में बर्दाश नेई करी सकदी ते तुंदी दित्ती दी एह जान में इत्थें गै हवन कुंड च समाप्त करी देंग। पार्वती ने हवन कुंड च छाल मारी ते अपनी जान देई दित्ती।

शिवजी गी पता लगगा तां ओह अपने गणें समेत उत्थें पुज्जे। सारा यज्ञ दा थाहर खत्म करी दित्ता ते राजा दक्ष दा सिर कलम करी हवन कुंड च सुट्टी दित्ता।

ते पार्वती दी लोथ लेई शिवजी थाहर-थाहर फिरदे रेह। भगवान विष्णु ने सुदर्शन चक्र गी पार्वती दे टोटे करने गी गलाया तां उनें पार्वती दे 51 टोटे करी दित्ते। जित्थें पार्वती दी लोथा दे एह हिस्से डिग्गे उनें सब्बनें थाहरें गी शक्ति पीठ मन्नेया जंदा। ते उनें थाहरें माता दे मंदर बनाए गे। आक्खदे न इस थाहर माता दे हत्थें दी चीची ओँगल डिग्गी ही इस करी एह मंदर चीची माता मंदर दे नां कन्नै प्रसिद्ध हौआ।

इक होर कत्थ मताबक राजा साम्ब गी दरभासा ऋषि ने गुस्से च श्राप दित्ता जे उसदी काया गी कोढ़ पेई जा। राजा ने बड़ा इलाज करवाया पर उसगी कोई फर्क नेई पेआ। आखर कुसै साधु महात्मा ने राजा गी दुग्गर प्रदेश च जाने गी गलाया जे उत्थें बसंतर च नहाने परैत महेश्वर शिव मंदर जा ते शिवजी गी पानी चाढ़े ते चीची माता दी भक्ति करें दर्शन रोज सवेरे करें। राजा ने इयां गै कीता ते किश चिरै ठीक होई गेआ। राजा ने दौने थाहरें मंदर बनवाये ते इत्थें अपने नांऽ पर इक शैहर बसाया जिसदा नां साम्ब रखेया जेहड़ा अज्ज साम्बा खुआंदा ऐ।

०००

बाबा ब्रह्म देव

बाबा ब्रह्मदेव जी दा स्थान सांबा थमां कोई सत्त किलोमीटर दूर बसैंतर दरेया कंढै ग्रां चक जंडेली च स्थित ऐ।

इस थाहरा बारै एह कथा ऐ जे राजा जन्मेज सिंह दे राज दा हिस्सा चक जंडेली इक समृद्ध थाहर हा। इत्थें इक ब्रह्मण परोआर रौंहदा हा। उंदा ग्रां च बड़ा आदरमान हा। पंत हुंदा नांऽ वासुदेव ते उंदी लाड़ी दा नांऽ लक्ष्मी हा। उंदे घर इक जागतें दा जरम होआ



जिसदा नां भागी हा। इयै भागी बाद च बाबा ब्रह्म दे नांऽ कन्नै मशहूर हौआ।

इक बारी पंत होर ते उंदी लाड़ी हरिद्वार न्हौन जाने लेई तैय्यार होए पर जागतें गी कुस कोल छोड़ेया जा एह मुश्कल बनी आई। आखर उनें भागी गी राजा जन्मेज कोल छोड़ी दित्ता ते आपूं हरिद्वार चली गै? राजा जन्मेज दे सत्त पुत्तर ते इक धीऽ ही। सत्ते राजकुमार भागी गी बड़ा प्यार करदे ते भागी बी उंदे कन्नै मैहलें च रौंहदा। राजकुमारी गी भागी भलेयां खरा नेई लगदा। केई बरें परैंत राजकुमारी ने भागी लेई राजकुमारें गी बहकाया जे पिताजी इसगी बड़ा चांहदे न ऐसा नेई होयै जे ओह अपने राज थमां इसगी बी हिस्सा देन इस करी तुस इसगी मारी मकाओ। राजकुमार भैनु दी चाल च आई गै ते जंगल जाई उसगी मारी दित्ता ते उत्थें गै दब्बी दित्ता। भागी दा कुत्ता सब्भै किश दिक्खा करदा हा। राजा ने भागी गी बड़ा तलाश कीता पर कोइ पता नेई लग्गा। इक रातीं भागी दा कुत्ता राजे दा कपड़ा खिच्चदा होई उसगी जंगल लेई गेआ ते राजे ने भागी दी लोथ दिक्खी तां ब्रह्म हत्या दा डर उसगी सतान लग्गा। राजे ने भागी दा संस्कार विधि कन्नै कीता।

किश बरै मगरा भागी दी मां परतोई आई ते उसदे पिता दा काल उत्थें गै होई गेदा हा। जिसलै भागी दी मां लक्ष्मी राजा कोल अपना पुत्र वापस लेने गी गई तां राजा ने अपनी विवशता दस्सी पर ओह उत्थें गै बैठी दी अपना पुत्र मंगदी रेही तां राजा ने उसगी उसदा पुतला दिता। ओह ग्रां कटैड़ा आई ते उत्थूं उतरबैहनी गी चली पेई, उत्थें जाई उसनै अपनी चिखा बनाई ते पुतला गोदी च पाई बैठी गई। अपने कशा लंघा करदे मांडे गी अग्नि देने गी गलाया तां उसदे नां करने पर उसगी गलाया जे अग्नि नेई दिती तां तेरा सब किश नाश होई जाग। ते जेकर मेरे आक्खने पर चलेया तां तुगी कोई कश्ट नेई होग। मांडे ने अग्ग लाई तां राजे दे मैहले च बी अग्ग लगगी गई। राजा जन्मेज गी अवाज आई तुस सब जात बटाओ ते इत्थूं दूर चली जाओ। लोक ते राजा उत्थूं तौले-तौले गै उठी ते अपनी जात बी बटाई लेई। आज्ज 37 ऐं जातें दे लोक बाबे गी अपना कुल देवता मनदे न। जेहड़े लोक बाबे गी कुलदेवता मनदे न उंदियां धियें गी बाबे दे जाने गी मनाही ऐ। इसदा कारण शायद राजे दी धीऽ होनी जिसनै भागी गी मखाया हा।

अज्ज चक जंडेली च बड़ा शैल बाबे दा मंदर बनाया गेदा ऐ जिस च ब्रह्मदेव ते उंदी माता दी मूर्ति स्थापत ऐ। बड्डी मूर्ति पिच्छें पंज मुखी शेषनाग दी मूर्ति ऐ। होर केई मूर्तियां बी इत्थें एह न। मंदर दे बाहर ब्रह्मदेव दे कुत्ते दी मूर्ति बी ऐ।

इत्थें कत्ते म्हीने दी पुनेया गी हवन यज्ञ हुंदा ऐ ते लोक अपने कुलदेवता दा अशीर्वाद लैंदे न।

०००

खजूरिया ब्रह्मणं दी शिलाबेंती

ग्रां समैलपुर च गै खजूरिया ब्रह्मणं दी शिलाबेंती दी देहरी ऐ। इस शिलाबेंती गी माता परमेश्वरी दे नां कन्नै जानेया जंदा ऐ। इस शिलाबेंती दे सती होने दा थाहर ते बाहवा ऐ पर खजूरियें जित्थें बी रौहदे न उत्थें गै इस शिलाबेंती दी मानता करदे न। गुढा सलाथियां च बी इस शिलाबेंती दी देहरी एह् ऐ। इस गल्ला गी करना बी जरूरी ऐ जे मती मानता शिलाबेंती दे पति बावा अम्बो गी दित्ती जंदी ऐ।

बाबा अम्बो न्याऽ खांतर रली नां दे खतरी लेई राजा दे दरबार हाजर होई उसगी मुक्त कराया। उससै मौके मैहले च रोला पेआ तां माता परमेश्वरी ने समझेआ जे राजे ने उंदे घरैआहले दी गल्ल नेई मन्नी ते उनें आत्मघात करी लेआ लब्भदा। एह् रोला सुनदे गै माता परमेश्वरी ने अपनी घरै गी अगग लाई लेई ते उस अग्गी च परमेश्वरी घरै दा नौकर, कुता दे नाग जिसगी बावा जी रोज दलस्सी पांदे हे सब्भै इस अग्नि च जली मरे। जिसलै बावाजी घर परतोए ते उनेंगी सारा पता लग्गा तां उनें सोचेया में इक्कले जींदे रेही केह् करना ऐ ओह् बी उससै अग्नि च जाई बैठे। रली खतरी गी जिसलै पता लग्गा तां उसने उंदी मानता उससै थाहर कीती जित्थें ओह् खत्म हौये हे। हून लोक इत्थें मती गिनती च औदे न।

०००

रसकोत्रे ब्रह्मणं दी शिलाबेंती

ग्रां दयोन परमंडल च रसकोत्रे ब्रह्मणं दी शिलावंती दी देहरी ऐ। इनेंगी सारी बरादरी कुलदेवी दे रूप च मनदी ऐ। श्रीमती तारो देवी हुंदे मताबक इस देहरी गी ताई तातो दी देहरी करी कुआलेया जंदा ऐ। जिसलै शीलाबेंती दे घरैआहले दा काल हौआ तां एह् गर्भवती हियां इस करी संस्कार मौके इनेंगी परमंडल थमां वापस पेजी दित्ता सती नेई होन दित्ता गेआ। किश दिनें मगरा इंदे इक कन्या जा जरम हौआ। इंदे मना च अजे बी सती होने दा वचार हा। इनें अपनी धीयु गी लैता ते उत्थें गै जाई सती होई गईयां। बाद च इंदी मानता सारी बरादरी ने कीती।

लोक इस थाहर बड़ी आस्था रखदे न जेकर कुसागी खारश, ददरी जां गला पकने दा रोग हौये तां शिलाबेंती दे मोहरे गी घ्यो दा शनान करी बाकी घ्यो अपने मलने कन्नै रोग ठीक होई जंदा ऐ। इस बरादरी दे लोक जेह्ड़े अमृतसर, पंजाब ते किशनपुर मनोआल बस्से दे न ओह् बी इत्थें औंदे न ते राह रीतां बी इत्थें गै करदे न।

०००

दाती कौडी दी देहरी

म्हीन ग्रां च रेहान तरखान जाति दी शिलबेंती दी देहरी ऐ। जिसगी रेहान तरखान बड़े आदर कन्नै पुजदे न।

चन्नो हुंदे मताबक दाती दा नां कौडी हा। उंदे घरैआहले कोल मती धन दौलत ही। इस करी भीक्खी जात दे झीरें इनेंगी मारी दित्ता। घरै दा पालतू कुता जेहड़ा उत्थें हाजर हा। उनें वापस घर परतोई कौडी दी जेहडी चरखा कत्ता करदी ही उसदी माहल त्रोडी दित्ती तां उनेंगी एह बसगन बझोआ। उनें नूंह कौडी गी पुत्तरें दा पता करने गितै गलाया। कौडी गी पता लग्गा जे उसदे घरैआहले दा कत्तल होई गेदा ऐ। कौडी अपने घरैआहले कन्नै गै सती होई गई ते जेहड़ा उंदा जागत हा उसगी उंदी ननानु ने पालेया जिस कन्नै रेहान तरखान जाति चली।

हाड़ म्हीने दी पुन्नेया गी इत्थें मेल लगदी ऐ ते केई थाहरें थमां लोक इत्थें मत्था टेकन औंदे न ते हवन यज्ञ च हिस्सा लेंदे न।

इत्थें चढ़ने आहला समान कुड़ियें गी ते चढ़तर योगी गी दित्ती जंदी ऐ। खारके बी हाड म्हीने दी पुन्नेया गी गै दित्ते जंदे न। रेहान तरखान अपनियां राह रीतां बी इत्थें गै करदे न।

०००

सपोलियेँ दी शिलाबैती दी देहरी

सपोलियेँ ब्रैह्मणेँ दी शिलाबैती दी देहरी विजयपुर दे ग्रां सलम्हेरी च ऐ।

सवित्री देवी हुंदे मताबक जेहड़ियां इत्थूं दियां बसनीक न दाती शिलाबैती लगभग इक ज्हार बरे पैह्लेँ धरती च समाईं गेईयां हियां।

दाती दे सौहरे पाकिस्तान दी भगोर थाहरा पर हे। इक बारी इंदे प्योक्कियेँ दा कोई योगी कुसा दे घर आया तां दाती आपूं गै योगी गी मिलन उंदे घर चली गेईयां। प्योक्कियेँ दा सुखसांद लेईं जिसलै ओह् घर परतोईयां तां घरे दे कुसा बर्जुगा ने उनेंगी मिहना मारेया जा इन्ना चिर लाया, उसदे कन्नै गै चली जाना हा। उनेंगी उंदे चरित्र पर बी भला बुरा आक्खेया। दाती ने उसलै परमात्मा की प्रार्थना कीती जे जेकर में सच्ची आ तां धरत फट्टी जा जे मिगी अपनी गोदा पाई ले। घरत फट्टी ते दाती उस च समाईं गेई। सपोलियेँ ब्रैह्मणेँ गी दोश लगगा तां इनेँ दाती गी मनाया।

सन् 1971 च जिसलै भारत पाक युद्ध हौआ तां इस ग्रां सलम्हेरी दे विशम्बर होर इंदे मोहरे लेन भगौर गै ते मोहरे लेईं आये। उनेंगी इस मौके गोलियां बी लगियां ते ओह् जखमी बी होये पर ओह् बची गै। फही सलम्हेरी च मोहरे दी स्थापना कीती गेई ते इयां 1971 च देहरी बनी।

छैं-छैं म्हीने इत्थेँ खारके दित्ते जंदे न। घरा च जागत होने पर इक्कियेँ रोजेँ इंदे नां दा गुड मनसेआ जंदा ऐ। लोहड़ी परैन्त औने आहली पुन्नेया गी इंदी देहरी पर मेल लगदी ऐ जिस च शेरपुर, पैँठी, सेडी, त्रलोकपुर, डलैनी शामेचक्क, अब्दुल्लापुर ते पंजाब थमां लोक शामिल होंदे न ते दाती दा गुनगान करदे न। कुला दियां बाकी रीतां बी इत्थेँ कीतियां जंदियां न।

०००

पतेआह् ब्रैह्मणं दी शिलाबैंती दी देहरी

गपोआल ग्रां च पतेआह् ब्रैह्मणं दी शिलाबैंती दी देहरी ऐ।

श्री कृष्ण कुमार पतेआह् हुंदे मताबक कोई त्रै सौ बरें पैहले इंदी शिलाबैंती सती होईयां हियां। उंदे सती होने दा कारण एह् हा जे उंदा निक्का जनैहा जागत खट्टा पर सुत्ते दा हा। जागतें दे पिता जिसलै बाहरा आये दा ओह् भलेखे कन्नै खट्टा पर बेही गै जित्थें जागत सुत्ते दा हा। जागते दी मौत होई गई तां ओह् सदमा सैहन नेई करी सकिया ते सती होई गईयां।

अज्ज बी पतेआह् जाति च पिता छैं महीने पुत्तरे दा मूंह् नेई दिक्खदा ते जनानी मर्द बी आपूं च बोली बी नेई सकदे। इस दौरान मां पुत्तर नमां कपड़ा बी नेई लांदे ते सिर कंघी करने दी बी मनाही ऐ। छैं म्हीने परैन्त मुहंत मताबक जागतै दी सांत कीती जंदी ऐ ते मामा बा'रे भरदा ऐ। सांती दियां सब्भै रस्मां नभाईयां जंदियां न। सगतालें होने कारण जेकर एह् रस्मा नेई नभाईयां जान तां परती मर्हत कढाया जंदा ऐ।

छिन्ना जेकर भज्जी जां तां चमडी दे रोग प्रबल होंदे न ते जागत रोंदा ऐ। दाती जे जाई क्षमा याचना करी इनें रोगें थमां छटकारा होई जंदा ऐ।

बसैन्त पचंमी गी इत्थें देहरी पर हवन यज्ञ कीता जंदा ऐ, कंजकें गी मिट्ठा भोजन कराया जंदा ऐ। बाकी लोकें लेई सादी रूट्टी बनाई जंदी ऐ।

कृष्ण हुंदे मताबक तालबरीन गुज्जर खानदान बी इनेंगी बड़ी शरधा कन्नै पुज्जदा ऐ।

शिलाबैंती दे प्योके अखनूर कडगेल थाहरा पर हे इस करी कोई डेढ़ सौ बरे पैहले इत्थें देहरी बनाई गई। कडत्रोल अखनूर च पजमें नरातें गी यज्ञ कीता जंदा ऐ। जिस च सब्भै शामिल होंदे न। शिलाबैंती दी देहरी पैहले निक्की ही पर हून बड्डा मंदर बने दा ऐ।

०००

बगूना-देहरी सती माता

बगूना दे जम्बाल राजपूतें दे कोई बजुर्ग दिल्ली कुसा गद्धर च शहीद होई गै। उसलै उंदे घर बगूना च उंदी लाड़ी ते निक्का जनैहा पुत्र हे। जिसलै उंदी लाड़ी ने घरैआहले दे शहीद होने दी गल्ल सुनी तां ओह बी सती होने गी तैयार होई गईयां पर की जे उंदा पुत्र बड़ा निक्का हा इस करी बजुर्गें शिलाबैंती गी सती होने थमां रोक़ी लेआ। जिसलै जागत जुआन हौआ तां ओह बी कुसा लड़ाई च शहीद होई गेआ। शीलाबैंती ने उसलै गै अपने घरैआहले दा साफ़ा ते पुत्रें दे कपड़े ले ते सती होई गईयां। ओह परमण्डल थाहरा पर सती होईयां इसकरी उत्थें गै उंदी देहरी बनाई दिती गई पर बरादरी दे लोकें दाती दी देहरी पर कोई औन-जान नेई रक्खेया तां दाती ने अपनी करोपी दस्सी सारे बमार ते परेशान रौहन लगी पे। तां सारे कुला दे लोके किट्ठे होई दाती दे मोहरे परमण्डल थमां बगूना लेई आहन्दे ते इत्थें अपने कोल देहरी बनाई।

हर शनिचर-बार इत्थें कीर्तन होंदा ऐ ते कत्थें म्हीने दी पुन्नेआ गी दाती दे स्थान पर हवन यज्ञ ते भंडारें दा अयोजन कीता जंदा ऐ।

०००

जन्नियें महाजन बरादरी दी शिलाबैती

बगूना जिसगी हून राजेन्द्र सिंहपुरा करी कुआलेया जंदा ऐ इत्थें जन्नियें महाजनें दी शिलाबैती दी समाध ऐ। सोमादेवी होंदे मताबक इंदी बरादरी च रवाज ऐ जे जिसलै इंदी बरादरी च कुसा कुड़ी दा ब्याह होंदा ऐ तां भ्रा कन्नै पेजदे न ते जिसलै नूह घर औंदी ऐ तां बी उस्सदा भ्रा कन्नै औंदा ऐ। इंदी शिलाबैती दा कोई भ्रा नेई हा इसकरी इंदे घरा आहले नाग देवता गी इंदा भ्रा बनाई इंदे कन्नै पेजी दित्ता। इंदे सौहरियें गी नाग देवता भलेयां पसन्द नेई हे। इक दिन मौका थ्हांदे गै उनें जिसलै शिलाबैती तलाऽ टल्ले धोन गेदियां हियां नाग दी हत्या करी दित्ती। शिलाबैती दे टल्ले पर उत्थें गै लहुयें दे छिट्टे लग्गे तां उनें घर आई अपने नाग भ्रा दी तपाश शुरू कीती पर ओह् नेई लब्भा। तां एह् समझी गेईयां जे भ्रा दी कुसै हत्या करी दित्ती दी ऐ। उनें बी भ्रा खातर सती होने दा फैसला कीता ते सती होई गेईयां। भारत पाकिस्तान बटवारे थमां पैहले इस बरादरी दे घर कुन्नुवाल पाकिस्तान च हे ते हून आर०एस पुरा च बी इस बरादरी दे घर एह् न। किश लोक पंजाब, चंडीगढ़, यू० पी० ते दिल्ली च जाई बस्से दे न। कत्ते म्हीने दी पुन्नेया गी जदूं इत्थें कुला दी मेल लगदी ऐ तां बाहरा दा सारे लोक इत्थें हाजर होंदे न। राह् रीतें लेई बी सारे इत्थें औंदे न। मेल आहले रोज खिचवड़ी दहीं खाद्धा जंदा ऐ। एह् शिलाबैती ज्हार बरे पैहले सती होईयां हियां।

०००

सती ग्यानो (ज्ञान देवी) दी देहरी

ग्रां संगोआल च असकोत्रे जाति दे ब्रैह्मणें दी शिलाबैंती दी देहरी ऐ। राधे श्याम हुंदे मताबक कोई ज्हार बरे पैहले इस दाती दे सती होने दा समां हा। रकडियें ब्रैह्मणें दी धीऽ ज्ञान देवी जिनेंगी लाडे कन्नै ग्यानो कुआलदे हे, उंदा ब्याह् असकोत्रे ब्रैह्मणें दे घर हौआ। सौहरे घर ग्यानों जिसलै पैहली बारी रसोई लग्गी तां सब्जी बनांदे होई डोई (लकड़ी दी कडछी) कन्नै सब्जी दी खश्वो लेई तां उंदी ननान ने गलाया जे तूं रसोई झुठी करी दित्ती ऐ में भ्राऽ गी ते होरनें गी सनानी आं। ग्यानों जेहड़ी कुसरवार नेई ही इस तौहमता कन्नै बडी शर्मसार होई ते धरती माता गी अर्ज कीती जे मां मिगी बिरल दे ते अपनी गोदा पाई ले। धरती ने बिरल दित्ती ते ओह धरती च समाई गई पर उंदे ओढनु दी चूहक बाहर रेही गई। घरैआहले धरत पुट्टन लग्गे तां वाज आई जे किश हासल नेई होना तुसेंगी। इस जगह दा नां पैहले सनेहरी हा पर फही इंदे नां कन्नै जुड़ी गेआ। शीलाबैंती दी इत्थें ऐसी क्रोपी होई जे लोक चमड़ी रोग कन्नै ग्रस्त होई गै ते सारे हिले करने पर बी जिसलै ठीक नेई होए तां एह थाहर छोड़ी ऐम्बलपुर “गगयाना” पाकिस्तान च जाई बस्से। उत्थें बी जिसलै ठीक नेई होए तां क्रोपी दा पता लग्गा। लोकें इत्थें आई उनेंगी मानता दित्ती ते उनेंगी कुलदेवी रूप च पुज्जेया। अज्ज लोक सनेहरी थमां कोई किलोमीटर दूर बस्से दे न ते इस थाहरा गी सनेहरी दे बजाय ग्यानी आकखेआ जंदा ऐ।

इत्थें ग्यानी शिलाबैंती दी देहरी कोल इक पराना तलाऽ जित्थें लोक मंगल ते ऐतवार शनान करदे न ते इंदी चमड़ी दे रोग दूर होई जंदे न। इत्थें देहरी पर असकोत्रे गै नेई जिला सांबा दे मते ग्रायें थमां लोक मत्था टेकन औंदे न ते रोग मुक्त होई जंदे न। इत्थें देहरी पर सिर्फ नूंहां गै नेई असकोत्रे दियां धियां बी रकाधे फिर दियां। ब्होने गी आये दा जुआई ते धीऽ पैहली फराटी च गै एह रस्म नभांदे न। जेठ म्हीने दी पुन्नेया गी इत्थें देहरी पर हवन यज्ञ कीता जंदा ऐ ते सारा किट्ठ भंडारें दा कुनका चखदा ऐ। बरखा नेई होने पर लोक हवन यज्ञ करी इत्थें बरखा मंगदे न।

०००

सघाथियें ब्रैह्मणें दी शिलाबेंती दी देहरी

शिलाबेंती दे नां बारै कुसा गी कोई पता नेई पर ओह् शाहबलोट थाहरा दियां हियां ते उंदा ब्याह् संगोआल ग्रां च हौये दा हा। जिसलै इंदे पति बमार हौये तां ओह् प्योकै शहबलोट हियां। उंदे सोहरियें कुसा परोता गी सनेहा देन पेजेया तां ओह् चरखा कत्ता करदियां हियां। परोता ने कोई सनेहा नेई दित्ता ते रूट्टी खान बेई गेआ। चरखा कतदे जिसलै इंदे घरा दे पालतु कुत्ते ने चरखे दी माहल त्रौड़ी दित्ती तां उनेंगी इसगी बसगन बुज्जेया ते परोहता गी औने दा कारण पुच्छेया पर उसनै फही बी किश नेई दस्सेया तां शीलाबेंती सौहरे घर चली पेईयां। अज्जे सौहरे पुज्जी बी नेई तां महल्ले च गै जनानी ने मीहना मारेया जे मोए दे पर गै परतोई ऐं। ओह् उत्थूं गै परतोई घरैआहले दी चिखा कोल पुज्जी ते उस्सै चिखा पर सती होई गेईयां। शिलाबेंती कन्नै उंदी निक्की जनैह् धीऽ बी सती होई गेई ही ते कन्नै गै उंदा कुत्ता बी। इत्थूं दे बसनीक भजनू होर दस्सदे न जे जिसलै सती होन चिखा पर बौहन लग्गी आं तां नाग उनेंगी दिक्खा करदा हा तां उंदी धीऽ डरी गेई। शीलाबेंती ने गलाया जे इस कशा नेई डर एह् तेरे भ्रांऊ आंहगर ऐ। एह् सुनदे गै नाग बी सती होई गेआ। बाद च कुला च बड़ा कश्ट हौआ तां सघाथियें ब्रैह्मणे इनेंगी मनाया। रकडियै इंदी राहरीतें च शामिल नेई होई सकदे। उंदे कन्नै भलेयां छिन्ना ऐं।

नाग पंजमी गी इत्थें बरादरी दी मेल लगदी ऐ। ते हवन यज्ञ कीता जंदा ऐ। न्याने दे मुन्नन कीते जाने पर इत्थें सूट चाढे जंदे न। दऊं नूहां ते इक धीऽ गी बी पुजेआ जंदा ऐ। होर राह-रीतां बी इत्थें सारी बरादरी बड़ी श्रद्धाभाव कन्नै करदी ऐ।

०००

राधा मां दी देहरी

गुढ़ा सलाथियां दी उड्ड मंडी दे महल्ला सुचानी ते ग्रां सरदला च रौहने आहले सलाथियें राजपूत मां राधा दी कुलदेवी दे रूप च पुजदे न। ओह अपनियां सब्बै राह रीतां बुआ राधका दे गै करदे न। राजा सुचेत सिंह होंदे कन्नै गै गुढ़ा सलाथियां दे कुमेदान गोपाल सिंह होर शहीद होऐ हे। राजा दियां रानियां राजा दे कन्नै गै सती होईं गेईयां पर मां राधा अपने घरैआहले गोपाल सिंह कन्नै सती नेई हियां होईयां, की जे ओह अपने प्योके कांगडा दे ग्रां हर च हियां। करगाले दे फुल्ल चुगदे उनेंगी आगम होई गेआ जे गोपाल सिंह होर शहीद होई गेदे न। उनें अपने भ्रां गी गलाया जे ओह उनेंगी सौहरे छोड़ी आवे पर भ्रां छोड़न नेई आया तां ओह इक्कली गुढ़े औने गी तेआर होई गेईयां ते भ्रा गी गलाया जे जियां में इक्कली जा करनियां इयां गै तूं बी इक्कला गै जायां। गुढ़ा पुज्जी उनें सती होने लेई गलाया ते कन्नै गलाया जे कोई बी हथियार कन्नै नेई ले। देवका सती होन जा करदियां हियां तां लोके इनेंगी पुच्छेयां जे असेंगी क्रियां पता लग्ग जे तुस गोपाल होंदी आत्मा कन्नै जाई रलियां तां उनें पलाह दी दातन आंहगर इक पतलीं लकड़ी दब्बी ते गलाया जे जिसलै तुस वापस परतोगे तां इसगी पत्तर ते फुल्ल लग्गे दे होडन ते कन्नै निब्बलें च गै बरखा ते ऐहन पौग।

ग्रां दे बजुर्ग अमर सिंह जेहड़े अपने कन्नै तलवार छपैली लेई आये दे हे उनेंगी गलाया जे तूं मेरे चरितर पर शक कीता जे खबरे में सती हौंग जां नेई। सजा च जा तेरे त्रऊं पीढ़ियें थमां उप्पर औलाद नेई हौंग। ठीक उयां गै हौआ जिसलै लोक वापस परतोए तां साफ मौसम च बरखा ऐहन पवा करदी ही ते लकड़ी पर पत्तर ते फुल्ल आई गेदे हे। अमर सिंह दे पोतरें मंगल सिंह दे चार ब्याह करने परेंत बी उंदे घर औलाद नेई होई। दाती राधका देवी दे

* जानकारी- पवित्तर सिंह सलाथियां, गुढ़ा सलाथियां, जिला साम्बां।

सक्के भ्राएं दे घर कोई लौआद नेई होई पर तायें-चाचें दी लौआद हरसर
कांगड़ा च चला करदी ऐ।

हर बरें उतरैनी आह्ले दिन उत्थें मेल लगदी ऐ। हवन यज्ञ कीता जंदा
ऐ। ग्रां दे फौजी घर औंदे जंदे इत्थें मत्था टेकदे न। हर वीरवार इत्थें कीर्तन
भजन कीता जंदा ऐ।

०००

अम्मा कटोचनी दी देहरी

मंडी गरोटा गुढा सलाथियां च अम्मां कटोचन दी देहरी ऐ, जिसगी सारी मंडी अपनी कुलदेवी दे रूप च पुजदी ऐ। अम्मां दी अपनी जात कटोच ही इस करी उनेंगी अम्मा कटोचनी करी कुआलेया जंदा ऐ। अम्मां दा ब्याह सलाथियें दे होए दा हा। करण सिंह सलथियां हुंदे मताबक अम्मा दा सती होने दा कारण इंदे घरेआहलें बाबा निम्मा हुंदा कुसा लड़ाई च शहीद होई जाना हा। जिसलें बाबै दा घोड़ा घर खाली परतोआ तां अम्मा कटोचनी ने उसगी पुच्छेयां ते तेरा सोआर कुत्थें ऐ? तां घोड़े दी अक्खें थमां अत्थरूं किरि पे। अम्मां सब्भै किश समझी गईयां ते अपनी मर्जी कन्नै देवका जाई सती होई गईया। गरोटा मंडी दे सलाथियें राजपूत अम्मा गी अपनी कुल देवी दे रूपा च मन्नदे न। अपनियां सारियां राह कीता इत्थें गै करदे न। उतरैन आहले दिन इत्थें यज्ञ कीता जंदा ऐ।

०००

* करण सिंह सलाथियां, मंडी गरोटा, गुढा सलाथियां, जिला साम्बा

बुआ दी देहरी

गुढ़ा सलाथिया दी मण्डी उ'ड्ड खल्लका च बुआ करी बलाई जाने आहली शिलाबैंती दी देहरी ऐ। बुआ दे सती होई जाने बारे ठाकुर ध्यान सिंह होरें दस्सेआ जे बुआ कोई त्रै सौ बरे पैहले सती होईयां हियां। ओह अप्पू बौगल राजपूतें दी धीऽ हियां ते ग्रां सुचानी दियां हियां। इंदी कडमाई उड्ड मंडी गुढ़ा च होई दी ही, उसलै इंदी बरेस कोई अट्ट बरे ही। इनें अपने घर मरूए दा बूहटा लाये दा हा जिसगी एह रोज पानी दिंदियां हियां। इक दिन इनें बूहटा कलमायें दा दिक्खेया तां अपनी मां गी सनाया जे बझौंदा ऐ जे जिस कन्नै मेरी कडमाई होई दी ही उसदा काल होई गेदा ऐ। मां बोली तुगी केह अजें कडमाई गै होई दी ऐ कोई ब्याह थोड़ी होऐ दा ऐ तां बुआ बोली जे मैं मना कन्नै उसगी अपना पति मन्नी लैता दा ऐ। गुढ़ा जाई पता कराया तां सच्च गै लड़ाई च उंदे पति शहीद होई गेदे हे। पता लगदे गै बुआ ने मरूए दा बूहटा कन्नै लेआ ते सती होई गेईयां। मरूए दे बूहटे कन्नै इस सलाथिया खानदान दा छिन्ना ऐ। मता चिर बुआ दी देहरी सुचानी रेही ते फही बुआ ने गुढ़ा च अपने खानदान गी जगाऽ दिता जे में अपने कुल च रौहना चाहनी। तां उड्ड मंडी दे बर्जुगें बुआ दे मोहरे डोली च पाई गुढ़ा लेई आये ते इंदी मानता कीती। इत्थें उतरैनी दे दिन हवन यज्ञ कीता जंदा ऐ ते कुल दे लोक इत्थें आई मत्था टेकदे न ते बुआ दा अर्शीवाद लैंदे न।

०००

* जानकारी ध्यान सिंह, गुढ़ा सलाथिया, जिला सांबा

सस्स नूहां दी देहरी

मंडी उड्ड महल्ला उप्परला गुढा सलाथिया दा खानदान सस्स नूह गी जेहड़ियां दमें किट्ठे सती होई दियां न उनेंगी कुल देवी दे रूप च पूजदा ऐ। दौनें दियां देहरियां देवका कंढे न। एह दौने कांगड़ा च सती होईयां हियां। भगवान सिंह होंदे मताबक पिता ते पुत्र किट्ठे लामा पर गेदे हे ते उत्थें शहीद होई गै। जिसलै इसदा पता कांगड़ा च गेदी सस्स नूह गी लगगा जेहड़ी अपने प्यौके गेदी ही ते नूह बी अपने सस्सू दे प्यौके गेदी ही तां उनें उत्थें गै सती होई अपने प्राणें दा त्याग करी दित्ता। सती होने मौके जिसलै उनेंगी पुच्छेया जे तुसेंगी इत्थें अग्नि कु'न देग तुंदे कुल दा ते इत्थें कोई नेई? तां उनें गलाया जे अग्नि अपने आप प्रगट होई जाग ते जिसलै चिखा पर उनें प्रार्थना कीती तां चिखा च अपने आप अग्नि प्रगट होई गई। गुढा च कुल दे लोकें गी जिसलै पता लगगा तां उनें उत्थें जाई उन्दियां देहरियां बनाई दित्तियां। मता चिर कुला दे लोक उत्थें जंदे रेह पर दूर होने कारण मोहरें गी इत्थें लेई आये ते देवका दे कंढे देहरियां बनाईथै इंदी मानता कीती। इत्थें उतरैनी आहले दिन यज्ञ कीता जंदा ऐ ते कुल दे लोक किट्ठे होई मत्था टेकदे न।

०००

* भगवान सिंह, मंडी उड्ड, गुढा, सलाथिया जिला सांबा

बाबा चमलियाल जी

धार्मिक थाहर चमलियाल सांबा च अन्तराष्ट्रीय बन्ने पर स्थित ते जिसदी मान्ता सिर्फ जम्मू च गै नेई बल्कि पाकिस्तान च बी ऐ। एह थाहर दलीप सिंह मंहास जिनेंगी बाबा चमलियाल बी आक्खदे न उंदे चेतें च बनाया गेदा ऐ।

लोके मताबक बाबा चमलियाल अपनी भक्ति ते चमत्कारें कारण लोकें च बड़े मशहूर हे ते लोक उनेंगी भक्ति भाव कनै खूब इज्जत दिंदे ते उंदी शरण च रौहदे। किश शरारती तत्वे गी बाबा जी दी भक्ति पर संदेह हा ते ओह म्हेशां उंदी खलाफत करदे। इक दिन उनें बाबा जी गी सैय्यदा बाली (वर्तमान पाकिस्तान च) बलाया ते धोखे कनै उंदी मुंठी पर फट्ट मारेया ते मुंठी उन्धें डिग्गी पेई ते धड़ अद्दा किलोमीटर दूर चमलियाल आई पेआ जित्थें इसलै उंदा स्थान ऐ। लोकें जेहड़े बाबा जी गी मनदे हे उनें इत्थें इंदा स्थान बनाया ते उनेंगी पूजन लगी पे। इक बारी बाबा जी दा कोई भक्त चमड़ी दे रोग कारण बड़ा परेशान हा पर फही बी ओह इत्थें रोज औंदा। इक रातीं बाबा जी उसगी सुखने च आए ते गलाया जे तूं किश दिन इत्थूं दी शक्कर (मिट्टी) ते शर्बत (पानी) पूरे शरीर पर लेप कर तां तूं ठीक होई जागा। उसनै इयां गै कीता ते किश दिनें च गै ठीक होई गेआ। एह खबर सारे लाके च ते फही इत्थें औने आहले सब्भनें भक्तें च फैली गई। दूरा-दूरा रोगी औंदे ते ठीक होई जंदे। एह सिलसिला अज्ज बी इयां गै चला करदा ऐ लोक इत्थूं ठीक होई अपने घर जंदे न। इत्थें लोकें दे रौहनें खाने दा पूरा इंतजाम ऐ।

हर बरे जून महीने दे चौथे वीरवार इत्थें मेला लगदा ऐ ते दूरा-दूरा दा लोक इत्थें मत्था टेकन औंदे न। इस मौके पर पाकिस्तानी बी०एस०एफ कमांडर स्तर दी इत्थूं दी बी०एस०एफ० पलिस अफसर आदि कनै Flag Meeting होंदी ऐ ते उस भेठा दा अफसर इत्थूं दे अफसरें गी इक ट्राली ते इक ट्रैकर

सौंपदे न जिस च और शकर ते शर्बत लेई जंदे न। एह ओह इक रोज पैहले बुधवारें इत्थें दिंदे न ते उनेंगी वीरवारें भरने परेंत वापस दित्ता जंदा ऐ। इस पवित्र स्थान दी दिक्खभाल जिला प्रशासन ते उत्थूं दे लोक करदे न। लाजकारी लेई औने आहले लोक गी पूरा बरा भर मुफ्त रूट्टी ते रौहने लेई मनासब थाहर दित्ता जंदा ऐ।

ooo





अभिमुक्तेश्वर मंदर-उत्तरवैहनी

जम्मू कश्मीर राज दे संस्थापक महाराजा गुलाब सिंह ने उस थाहर बी मंदर बनवाए जित्थें उ'नें सुखने च इक महात्मा ने दर्शन दित्ते ते भविक्खवाणी कीती जे उ'नेंगी जम्मू दा राज मिलने आह्ला ऐ। जदूं गुलाब सिंह जम्मू दे राजा बने तां ओह थाहर गै जिसदा पैहला नांऽ नन्दपुर हा ते हून उत्तरवैनी। इत्थूं दी पवित्रता गी दिक्खदे होई उंदा मन बनेआं जे इत्थें देविका कंढै गदाधारी जी दा मंदर बनाया जा। ओह काशी आ ते उत्थें अपने कुल परोहतजी गी प्रार्थना कीती जे ओह जम्मू चलन ते उत्थें मंदर दा कम्मकाज अपनी दिक्खरिक्ख च करवान तां जे जेहड़े लोक हरिद्वार, गया ते प्रयाग नेई जाई सकदे ओह इत्थें देविका च स्नान करी अपने पूर्वजें दे पिंडदान बी इत्थें करी सकन। महाराजा गुलाब सिंह होरें मंदर पूरा होने पर परोहत होरें गी सौंपी दित्ता। इत्थें गै संस्कृत पाठशाला बी बनाई गई तां जे पढ़ने आहलें गी काशी नेई जाना पवै। इसदा नांऽ गदाधर संस्कृत पाठशाला उत्तरवैहनी रक्खेआ गेआ। इत्थें पढ़ने आहलें दी कताबां, कप्पड़े दे रुट्टी सब्भै किश मुफ्त हा।

महाराजा होरें गै गदाधर मंदर दे पिछले पाससै देवका दे खब्बै कनारे अभिक्तेश्वर भगवान दा मंदर बी बनवाया। एह मंदर भगवान शिवजी दे बड्डे मंदरें च गिनेआ जंदा ऐ। अभिमुक्तेश्वर भगवान शिवजी दा गै नांऽ ऐ। भगवान शिव सारे दियां कामनां पूर्ण करदे न ते सब्भनें गी पापें थमां मुक्त करदे न तां गै उ'नेंगी मुक्तेश्वर नांऽ कन्नै याद कीता जंदा ऐ। इस मंदरै च पंज फुट्ट उच्चा पंजमुखी शिवलिंग स्थापित ऐ। मंदरें दी ड्योढी पर संगमरमर दे नन्दीगण स्थापित न ते उंदे पिच्छें लोहे दे गार्डरें पर 27 मन घंटा लगे दा ऐ। भक्तें दे बजाने पर इसदी अवाज दूर तगर जंदी ऐ। मंदरै दे उप्पर सुन्ने दे पतरे जड़े दे न जेहड़े दूरा लब्धी जंदे न। अजें इस मंदर च शिवलिंग दी स्थापना होनी

ही महाराजा गुलाब सिंह जी दा सुर्गवास होई गेआ। उंदे परैन्त महाराजा रणवीर सिंह जी ने इस तीर्थस्थान दी दिक्ख रिक्ख दा जिम्मा लेआ।

मंदर दे आलेदुआले दा वातावरण बड़ा सुहाना ऐ। बेहड़े च केई अम्बे दे छायादार बूहटे न जित्थें भक्त अराम करदे न। मेले दे दिनें इत्थें बड़ी रौनक होंदी ऐ सारा वातावरण शिव भक्ति च डुब्बे दा लब्भदा ऐ। एह् मंदर धर्मार्थ ट्रस्ट दे अधीन ऐ। इत्थें औने आहले भक्तें दा म्हेशा सुआगत होंदा ऐ।

मंदर थमां कोई इक फरलांग दूर प्रयागराज ते गयाजी तीर्थ ऐ। पूजा मौके बड्डा घंटा बजाया जंदा ऐ जिसदी अवाज 8 किलोमीटर तगर जंदी ऐ। हून एह् केई थाहरें थमां खंडत होई गेदा ऐ। मंदर दा वातावरण बड़ा पवित्र ऐ। इक स्टैंड दी मदद कन्ने शिवलिंग दे उप्पर पित्तलू दी गागर रक्खी दी ऐ। जिस थमां बूंद-बूंद जल शिवलिंग पर डिग्गदा ऐ। महाराजा गुलाब सिंह इत्थें 33 सौ करोड देवतें दी स्थापना करना चांहदे हे पर उंदे सुर्गवास कारण कम्म अद्धा रेही गेआ। संस्कृत पाठशाला दे बच्चे लेई इत्थें कमरे बनाए गेदे हे जेहड़े लोड़ मताबक गिनतरी च बाद्ध होंदे गे। इस तीर्थस्थान पर भक्तें दे रुकने दा कोई इतंजाम नेई। पुजारी जी अपनी थवीक मताबक दिखरिख करदे न पर धर्मार्थ ट्रस्ट दी गेनमी तनखाह् कन्ने ओह् मता किश करने च सर्मथ नेई। मते कमरे इत्थें महाराजा रणवीर सिंह होरें बी बनवाए हे। हून किश बगैर छत दे कमरे जां किश त्रुट्टे कमरे ते मंदर दे शिखर पर उग्गे दे बूहटे इत्थूं दी दशा दा ब्यान करदे लब्भदे न।

मंदर दी परिक्रमा च 9 ग्रैहें दे यन्त्र न जिं'दे पर सवा लक्ख शिवलिंग लग्गे दे न। शिवलिंग नर्मदा थमां आंहदे दे न। इसलै बी इत्थें मते शिवलिंग कमरें च रक्खे दे न जिसगी शिवलिंग स्थापना करवानी होऐ इत्थूं धर्मार्थ ट्रस्ट दे अफसरे थमां लिखित आज्ञा कन्ने लेई जंदे न। शिवभक्त इत्थें शिवजी दी पूजा करी मानसिक शांति प्राप्त करदे न। दिनें त्यहारें पर लोक इत्थें देवका स्नान ते शिवजी दे दर्शनें गित्तै औंदे न।

महाराजा गुलाब सिंह होरें मंदर मैहत्त कृष्ण गिर होरें गी सौपेआ हा उंदे परैन्त केई होर मैहत्त मंदर दी दिक्खरिक्ख करदे रेह् ते हून पंडित देवराज

गोस्वामी होरें गी ट्रस्ट ने इत्थें रक्खे दा ऐ। शिवलिंग पर इत्थें लगातार जलधारा पौंदी र'वै इस लेई खूहें पर पम्पिंग सैट लगे दा हा। पर अज्ज इंदी दशा खराब होने करी राजें महाराजें आसेआ कीते गेदे हीले विफल होआ दे दिक्खी बड़ा दुख होंदा ऐ। जि'नेंगी इस थाहरा दी जिम्मेदारी दिती गेदी ऐ उ'नेंगी अपना कम्म समझना लोड़चदा ऐ।

बड्डे नन्दीगण दी मूर्ति ते घेंटा नेपाल थमां उत्तरवैहनी आंहदा गोआ हा। पैहलें गड्डी पर ते फही बैलगड्डी पर। नमंदर थाहर कोल जित्थें देविका बसंततर च समाई जंदी ऐ।

ओह देवका दे कन्नै लगदे गै नदी च घुसी गई केई जतन कीते पर कोई लाभ नेई होआ। जिसलै सारे थकी गे तां महाराजा गुलाब सिंह गी सारी गल्ल सनाई। गुलाब सिंह उत्थें पुज्जे शिवजी ते नंदीजी दी पूजा कीती तां हाथी ने खिच्ची गड्डी बाहर कड्डी ते उत्तरवैहनी नंदीगण ते 27 मन घेंटा पुज्जा।

इत्थें इक कथा होर प्रचलत ऐ जे काशी च इक विद्वान पंत भगवत कथा करा करदे हे ते उ'नें उत्तरवैहनी दा जिकर कीता जे उत्थें गुप्त गंगा देविका बगदी ऐ ते उत्थें इक बड़ दा बूहटा ऐ जिसदे पत्तर सुन्ने दे न ते गुप्त गंगा दी धारा दुद्ध दी ऐ।

इक आदमी ने पंत होरें गी टोकेआ जे एह सच्च नेई ऐ इ'यां नेई होई सकदा। उसने पंत होरें गी झूठा साबित करने दा फैसला कीता। ओह उत्थूं जम्मू उत्तरवैहनी आया ते दिक्खेआ देविका दी धार आम पानी दी ऐ ते बड़े दे पत्तर बी आम न। उसने पत्तर ते पानी लेआ वापस काशी गोआ उत्थें पंत होर कथा च जिसलै परतियै उत्तरवैहनी बारै सनाया तां उसने लोकें गी सनाया पंत होर झूठ बोल्ला दे न एह दिक्खो में उत्थूं दा पत्तर ते पानी आहन्ने दा ऐ जेहड़ा आम ऐ। पर जिसलै सब्भनें दिक्खेआ तां पत्तर सुन्ने दे हे ते पानी दुद्ध। ओह बड़ा शर्मसार होआ।

इत्थूं दे लोक हरिद्वार अस्थियां प्रवाह करने दे बजाए इत्थें गै औंदे न कीजे गंगा मैया दी बड्डी भैन देवका दा प्रवाह बी गंगा आंहर पवित्र ऐ। महाराजा रणवीर सिंह ने परमंडल थमां उत्तरवैहनी तगर मंदर बनाने दा फैसला कीता

हा। इन्द्रेश्वर थमां उतरवैहनी तगर दे मंदरे दे दर्शनें गितै पंज क्रोह सफर करना पौंदा ऐ। इसकरी पंज कोसी गलाया जंदा ऐ। त्यहारे पर भक्त पंचकोसी परिक्रमा करदे न।

कुसै समें च इत्थें बड़ी रौनक ही। एह थाहर तीर्थराज ते साधु महात्माएं दी तपोभूमि रेहा। इसलै एह मंदर खंडहर बनदे जा करदे न। लोड़ ऐ जे सारे धर्मप्रेमी सरबंधी अफसरें कनै मिलन ते इत्थूं दी सांभ-संभाल बरै गल्ल करन तां जे इस थाहरा गी पैहलें आह्ला रुतवा हासल होऐ।

०००

तीर्थ परमण्डल ते मंढर

जम्मू थमां 30 किलोमीटर दूर परमण्डल इत्थूं दा मश्हूर तीर्थ स्थान ऐ। इत्थूं दा पराना शिव मंदर “उमापति महादेव” दे नांऽ कन्नै जानेआं जंदा ऐ। परमंडल देवका दे कंढै बस्से दा ऐ। देवका गी धार्मिक ग्रैन्थें च गुप्त गंगा आक्खेआ गेदा ऐ। इत्थें स्नान करने कन्नै मनुक्खी पाप धनोई जंदे न। जरा भर रेत खोदने पर निर्मल जल धारा बाहर उठी औंदी ऐ। देवका कंढै इक पाससै आ उमापति महादेव मंदर ते दूऐ पाससै भक्तें लेई हवेलियां ते सराय बनी दियां हियां जेहड़ियां इसलै खंडहर बनी गेदियां न। देवका स्नान गी गंगा स्नान बराबर मन्नेआ गेदा ऐ। देवका गी मां पार्वती दा रूप मनेआ गेदा ऐ। इसकरी आखदे न जे शिवरात्रि पर मां गंगा आपूं स्नान करने गित्तै देवका औंदी ऐ। मंदर च अनगिनत शिवलिंग न जित्थें भक्त जल ढालदे न। इत्थें भक्त उ’आं ते रोज औंदे न पर शिवरात्रि, चैत्र चौदेआ, सोमवती मस्सेआ ने त्यहारें पर मते भक्त इत्थें औंदे न। इत्थें जम्मू ते दूर लाके दे लोक गुप्त गंगा च स्नान करने गित्तै औंदे न। आखदे न जे पर्व त्यहारें गी 33 सौ करोड़ देवते स्नान करन औंदे न। देवका गी पाप नाशनी बी गलाया जंदा ऐ। इत्थें पितरे दे नांऽ दा पिंडदान बी करदे न तां जे ओह् सदगति गी प्राप्त होन। जम्मू दे डोगरा राजें गी इस थाहरा कन्नै खास लगाऽ हा। महाराजा गुलाब सिंह शिवभक्त हे इसकरी उ’नें इत्थें केई शिव लिंगें दी स्थापना करवाई इस करी परमंडल गी शिवपुरी बी आक्खेआ जंदा ऐ। महाराजा रणवीर सिंह ने इस पवित्र थाहरा दा बकास लेई मता कम्म करवाया, ते उमापति महादेव मंदर दे अगें शिवलिंग स्थापना करवाए। महाराजा रणवीर सिंह इस थाहरा गी काशी बनाना चांहदे हे पर उंदा काल होई जाने कारण एह् कम्म तोड़ नेई चढ़ेआ। गुलाब सिंह ने 1843 च एह् मंदर बनवाया हा पर इ’यां बी आक्खेआ जंदा ऐ ते छेमीं जां अठमीं शताब्दी च अवंतीपुर कश्मीर दे राजा देवी दत्ता ने एह् थाहर बनवाया हा।

इस तीर्थ स्थान पर सब्भनें थमां बड्डा मंदर उमापति महादेव दा ऐ। इत्थें

शिव पार्वती कन्नै होर देवी देवतें दे दर्शन बी होंदे न। इस मंदरै दा कुण्ड बड़ा चमत्कारी ऐ। दिनें त्यहारें पर इत्थें भामें भक्त जिन्ना मर्जी जल चढ़ान पर पता नेई लगदा जे पानी कुत्थें जंदा ऐ। आखदे न इक बारी इक राजा ने परख करने गितै सपाहियें गी हुक्म दिता जि'नें चिर कुण्ड भरी नेई जा जल चाढ़दे र'वो पर सपाही थक्की गे कुण्ड नेई भरोचा। राजा ने भगवान शिवजी थमां हत्थ ब'न्नी माफी मंगी। इत्थूं दा दूआ मंदर अकबर दे सैनापति मानसिंह ने बनवाया। अकबर ने जिसलै मान सिंह गी काबुल पर चढ़ाई करने गितै भेजेया तां मानसिंह इत्थें परमण्डल रुकेआ हा। लोकें थमां इत्थूं दी शिवमंदर दी गल्ल सुनी जे इस मंदर च हर मनोकामना पूरी होंदी ऐ तां मानसिंह ने सुखन कीती जे जेकर में काबुल जित्ती लैग तां इत्थें मंदर बनांग। काबुल जित्तने पर वापसी च मानसिंह ने इत्थें मंदर बनवाया।

आखदे न जे गुरुनानक देव बी इत्थें आए हे। ते सिक्खें दे दसमें गुरु गोविन्द सिंह बी इत्थें आए, स्नान कीते ते फही शिवजी दे दर्शन कीते। ते फही जम्मू दे राजा गजे सिंह दे किश दिन परौहने रेह ते फही वैष्णो माता दर्शनें गी गे उठी। बन्दा वैरागी बी इत्थें किश दिन रेहा। मुगल राज च बी इस थाहरा दी बड़ी मानता ही। औरंगजेब दा गर्वनर वकील खान राजा गजे सिंह दे राज च परमंडल आया हा। महाराजा रणजीत सिंह बी किश दिन इत्थें रेह। मस्सेआ ते नरातें गी स्नान कीता ते यात्रुयें लेई हवेलियां बनवाइयां। महाराजा रणजीत सिंह उ'नें दिनें गुलाब सिंह दे परौहने रेह।

इक कत्थ मताबक द्वापर दे अन्त च कश्यप ऋषि ने घोर तपस्या कीती। भगवान शिव उंदी तपस्या थमां खुश होए ते बर मंगने गी आक्खेआ। कश्यप ऋषि बोल्ले प्रभु कलियुग शुरू होने आहला ऐ इसकरी डुग्गर प्रदेश च कोई तीर्थ प्रगट करो तां जे डुग्गर वासियें दा कल्याण होऐ। कलियुग च लोक पाप मुक्त होई सकन। भगवान शिव ने पार्वती पाससै दिक्खेआ तां ओह नदी दा रूप धारण करने गी तयार होई गेइयां पर शर्त रक्खी जे शिवजी बी अंग संग रौहन। शिवजी मन्नी गे। सुद्धमहादेव कोल माता ने देविका रूप धारण कीता ते उत्थूं उधमपुर, जिन्दराह ते फही परमंडल कोल प्रगट होइयां ते उत्थें गै शिवजी बी प्रगट होऐ।¹

परमंडल उमापति महादेव मंदर कन्नै केई धार्मिक कथां जुडी दियां न। आखदे न कश्मीर दे राजा वेणी दत्त दे घर कुड़ी दा जरम होआ जिसगी सिर पीड़ म्हेशां रौहदी। इलाज पर कोई फर्क नेई होआ तां राज ज्योतिषियें राजा गी दस्सेआ जे एह कन्या पिछलें जनम च गिदड़ी ही। कुसै शकारी ने इसदे सिरै च देविक कंठे तीर मारेआ ते हवन कुंड च पेई इसदी मौत होई गई। उस पवित्र हवन कुंड कारण इसदा जरम राजघराने च होआ। जिसलै तगर उसदी खोपड़ी थमां तीर नेई निकलग राजकुमारी दी सिर पीड़ ठीक नेई होनी।


राजा परमंडल आया ते दस्सी दी थाहरा थमां गिदड़ी दे सिरा थमां तीर कड्ढेआ तां राजकुमारी दी सिर पीड़ ठीक होई गई। राजा ने इस थाहरा दी चमत्कारी शक्ति थमां प्रभावत होई इत्थें इक शिव मंदर बनवाया ते परक्रमा च गिदड़ी दे सिरै दी मूर्ति लोआई। इस चाल्ली राजा ने भगवान शिव पार्वती प्रति अपनी श्रद्धा व्यक्त कीती।

इक होर कथा दे मताबक चनैहनी दे राजा ने सुद्धमहादेव दे जगलें च शकार खेढे इक गिदड़ी गी तीर मारेआ जेहड़ा उसदे सिरै च लग्गा। मरने परैन्त गिदड़ी ने राजा ने घर कन्या रूप च जरम लेआ। राजकुमारी गी म्हेशां सिर पीड़ रौहदी। इलाज परैन्त बी जिसलै ओह ठीक नेई होई तां ज्योतिषी ने राजा गी आक्खेआ जे तुंदे कोला कोई पाप होए दा ऐ तां गै राजकुमारी गी कष्ट ऐ। राजा गी शकार दी गल्ल चेता आई तां प्रायश्रियत करने गित्तै राजा ने इक जनेह त्रै मंदर इक सुद्धमहादेव, दूआ कामेश्वर मंदर उधमपुर ते त्रीया उमापति महादेव परमंडल बनवाया तां राजकुमारी ठीक होई गई।

इत्थूं दे पराने मंदर ते हवेलियां दिखने पर मसूस होंदा ऐ जे परमंडल पैहलें इक बड्डा नगर हा। पर अज्ज हवेलियां ते मंदर खंडहर बनदे जा 'रदे न। पर्यटन विभाग गी इसदी मरम्मत बक्खी ध्यान देना चाहिदा ऐ तां जे इत्थें औने आहले यानुए गी कोई तंगी नेई होऐ।

०००

श्री नृसिंह धाम-घग्वाल



जम्मू च देवी-देवतें दे केई मंदर न जित्थें भक्त शाम-सबेरे मत्था टेकदे न। इ'नें मंदरें च मती गिनतरी माता बैष्णो देवी, शिवजी, लक्ष्मी-नारायण, राम लक्ष्मण माता सीता ते महावीर जी दे मंदर न। बाकी देवतें-देवियां, कुल देवतें दे मंदर बी इत्थें है न। किश थाहरें पर विष्णु भगवान दे अवतार नृसिंह जी महाराज दे मंदर बी है न जिं'दे च मांडली कोल कोहग, जम्मू वीरपुर च, रामनगर ते उसदे कोल गोरलांग, डालसर, नगेतर ते घगोट ग्रां च बने दे मंदर मशहूर न। इत्थें मतीं गिनतरी च भक्त भजन कीर्तन करदे न ते खास मौके पर मेले बी लगदे न।

धार्मक ग्रैन्थें मताबक भगवान विष्णु होरें अपने भक्त प्रह्लाद गी बचाने गित्तै ते उसदे पिता हरिण्यकश्यप गी उसदे कुकर्मिं दी स'जा देने लेई नृसिंह अवतार लेआ हा। हरिण्यकश्यप अपने आप गी भगवान आखदा हा ते प्रजा गी हुक्म दिंदा हा जे मेरी पूजा करो ते भगवान दी कोई पूजा नेई करग। उसने

केई साधु महातमा मरवाए जि नें उसगी भगवान नेई मन्नेआं। उसदा अपना पुत्र प्रहलाद बी उसदी आज्ञा नेई मन्नेआं तां उसगी मारने दे बी केई उपाऽ कीते गे पर भगवान ने उसगी बचाई लेआ। हरिण्यकश्यप ने भगवान दी भक्ति करी वर मंगे दा हा जे उसदी मौत नां माहनू करी सकै, नां पशु करै उसलै नां शाम होए ते नां सवेरा, नां हथियार, न अंदर नां बाहर होए। इस्सै कारण ओह घमंडी होई भगवान दी बराबरी करने दी भुल्ल करी बैठा। भगवान ने उसदे अत्याचारें कारण उसगी मारने गित्तै नृसिंह रूप धारण कीता।

जम्मू पठानकोट जरनैली शिड़का पर जम्मू थमां 55 किलोमीटर दूर घगवाल ग्रां च नृसिंह दा पराना मंदर ऐ जित्थें भक्त बड़ी श्रद्धा कन्नै मत्था टेकने गित्तै औंदे न। इत्थें इक तलाऽ बी है जित्थें स्नान करने परैन्त मत्था टेकदे हे पर अज्ज इसदी साफ सफाई बक्खी कोई ध्यान नेई दिंदा ते ग्रां दे जागत गै कदें कदालें इसगी साफ करदे न। मंदर च अंदर जंदे गै सज्जे पाससै मैह्त नृसिंह दास जी दी समाधि ऐ, ते इसदे कन्नै गै पराने समें दे पंज बूहटे अज्ज बी मजूद न। जिं 'दे च पीपल, नीम, ग'रना, मिट्ठी नीम ते रेहाड़ न। एह बूहटे सबूत न जे इत्थें कदें जंगल हा। कन्नै गै धर्मराज जी ते महावीर जी दियां मूर्तियां न। इसदे सामनै भगवान नृसिंह जी दा मंदर ते बरांडे दी कंधा पर मां वृन्दा दी मूर्ति ऐ, पालकी च द'ऊं लोकें चुके दा ऐ।

कोल गै मैह्त नृसिंहजी दी गद्दी ते बाकी मैह्तें दियां समाधियां न। मंदर दी सफाई पर खास ध्यान दिता जंदा ऐ। मंदर च नृसिंह जी दी पिंडी, भगवान कृष्ण, रघुनाथ जी ते केई देवी-देवतें दियां मूर्तियां न। इत्थें ब'रे च दऊं बारी मेले लगदे न। पैह्ला पौह म्हीने दी 12-13 तरीक गी रथखड़ा मेला। इस मेले गी लोक भड्डू रामनगर, बसोहली दे लोक सनटब्बरें दर्शनं गित्तै औंदे न ते कन्नै कम्बल लोइयां बेचने गी आहनदे न। दूआ मेला कृष्ण अष्टमी गी लगदा ऐ जेहड़ा हफ्ता भर चलदा ऐ। आले दुआले दियां भजन मंडलियां अदूं इत्थें औंदियां न ते सारा म्हौल भक्ति रस च रंगोई जंदा ऐ। केई भक्त इत्थें लंगरें दा बी सरिस्ता करदे न तां जे बाहरा थमां औने आहलें गी मुश्कल नेई होए।

आखदे न एह मंदर सदियां पराना ऐ। नमारक खानदान दे साधु नरसिंहदास

जी “नीम” ग्रां वृन्दावन थमां भ्याड़ी ग्रां च आए ते अम्बा दे बूहटे हेठ आसन लाई प्रभु भक्ति च लीन होई गे। उंदी भक्ति दे कारण इत्थें लोकें दी फसल केई गुणा बद्ध होई गेई कोई गरीब नेई रेहा। लोकें गी मसूस होआ जे एह सारा चमत्कार साधु महात्मा जी दा ऐ। लोक किट्टे होई उंदे कोल आए ते मना दी गल्ल सनाई तां महात्मा होर उंदे कनै अनाज दे ढेरें कोल आई पुज्जे। उ'नें ढेर पर गंगाजल छिड़केआ तां उत्थूं अन्नपूर्णा दी मूर्ति प्रगट होई। किश चिर मगरा महात्मा होर अन्नपूर्णा दी मूर्ति लेइयै घगवाल आई गे। अदूं इत्थें घना जंगल हा। इक थाहर उ'नें पंज बूहटे निमा, मिट्ठी निम्म, ग'रना, पीपल ते रेहाड़ दिक्खेआ। उ'नें इत्थें अपनी कुटिया बनाई ते सारा जीवन इत्थें तपस्या करदे रेह ते फही जींदे जी समाधि लेई। उंदी समाधि कोल अज्ज बी ओह पंज बूहटे है न।

उ'नें दिनें घगवाल जसरोट राज दा गै हिस्सा हा। वर्तमान महात्मा जी मताबक इक बारी राजा घगवाल दे जगलें च शिकार खेढन आया। मैह्त होरें म'ना कीता पर राजा नेई मन्नेआ सारा दिन शकार खेढदा रेहा ते सं'जां बेल्लै मैह्लें च परतोई गेआ। राती रुट्टी खान लगा तां थाली च सिर्फ खून ते कीड़े लब्भे तां राजा रातीं भुक्खा गै सेई गेआ। सवेरे रानी कनै राजा घगवाल मैह्त हुंदे कोल माफी मंगन आया ते कदें उत्थें शकार नेई खेढने दी कसम लेई। मैह्त होरें उ'नेंगी माफ करी दित्ता। इसदे परैत्त राजा ते राज परोआर दे लोक मैह्त हुंदे दर्शन करन ते अर्शीवाद लैन उंदे कोल औंदे। इक बारी मां वृन्दा अमरनाथ जातरा पर निकली। उंदे कनै होर केई लोक हे। ओह इक रात मैह्त जी दी कुटिया च ठैहरियां। अगले रोज बड्डलै उत्थूं चली पेइयां, अजें साम्बे पुज्जियां तां मैह्तजी दे चेले उंदे सुन्ने चांदी दे गैहनें आहली पटारी देन आई पुज्जे तां मां वृन्दा ने उ'नेंगी वापसी पर लेई जांग करी उ'नेंगी परताई दित्ता। इस घटना परैत्त रानी वृन्दा दे मना च मैह्त हुंदे प्रति आदर भाव होर बद्ध होई गेआ। वापसी पर वृन्दा ने इत्थें मंदर बनवाने दी इच्छा दस्सी। ओह रोज इत्थें भजन कीर्तन करदियां ते भक्तें गी फुल्लियें दा प्रसाद दिंदियां। इक दिन थैले थमां फुल्लियें थाहर नृसिंह भगवान दी मूर्ति निकली। उसदे परैत्त इत्थें नृसिंह मंदर मां वृन्दा ने बनवाया ते बाकी मंदर मैहत्तें बनवाए। सारा बाकी

जीवन मां ने इत्थें गजारेआ। मां ने इत्थै इक तलाऽ बनावया। नृसिंह मंदर मां वृन्दा ने इत्थे बताया ते खीर इत्थें गै समाई गई। उंदी समाधि अज्ज बी इत्थें ऐ। इस गद्दी दी महानता दिक्खी लोक दूरा-दूरा इत्थें औन लगी पे। महंत हुंदे मजूब जसरोटा दे राजा ने मंदरै गी मती जमीन दान दिती तां जे अन्न दी मंदरें च कमी नेई होऐ। इत्थूं दे गै मुसलमान लम्बड़दार ने बी किश ग्रां इस गद्दी गी दान दिते। किश जमीन ललोत्रा बरादरी दे राजपूतें बी मंदर दे नांऽ दिती। इसलै एह जमीन बड़ी घट्ट बची दी ऐ।

6 अप्रैल 1970 गी महंत हरिदास दे सपुत्र नृसिंह दास गद्दी पर बैठे। एह महामंडलेश्वर जी दी गद्दी ऐ ते इस पर 15वें मैहत बैठे दे न। 1970 थमां हूनै तगर लक्खां रपेआ इसदी दिक्खरिक्ख च खर्च कीता गेआ ऐ। इत्थें भक्तें दियां मनोकामनां पूर्ण होंदियां न।

मैहत होरें इक स्कूल खुलवाए दा ऐ जित्थें बच्चे पढ़ाई दे कन्नै-कन्नै धार्मिक शिक्षा बी ग्रैहण करदे न।

श्री 1008 महामंडलेश्वर नरसिंह दास जी लगभग 40एं ब'रें थमां मंदर दी दिक्खभाल करा करदे न। साधुए लेई इत्थें कमरे बनाए गेदे न। इसदे इलावा गीता भवन, होस्टल, समाधियां, सरांऽ, लंगर लेई पक्के कमरे आदि बनाए गेदे न। इत्थें गै ठारां भुजा मातेश्वरी (मां वृन्दा) दा मंदर बी बनवाया गेदा ऐ।

लोकें दा भरोसा ऐ जे इस इलाके दी समृद्धि नृसिंह भगवान जी दे अशीर्वाद कन्नै ऐ।

०००

बाबा कान्ह

बाबा कान्ह जिला सांबा दे रामगढ़ थाहरा दे इक शाहुकार हे जेहड़े करसाने गी निक्का मुट्टा कर्ज दिंदे। उनें दिनें रामगढ़ जगीर दा मुखिया विशम्भर देव हा। उसदे पुतर बड़े नकम्में ते ऐबी हे। इक बारी ओह बाबा कान्ह कोल कर्ज मंगन गे तां बाबे ने उनेंगी जगीरदार दा पुतर सोची पैहा देई दित्ता। मता समां बीती गेआ पर उसने बाबे गी पैहा वापस नेई कीता तां बाबे ने उंदे कश जाई अपना पैहा वापस मंगेया पर कोई फायदा नेई होआ। बाबे ने जगीरदार गी बी पैहा देने गी गलाया पर उनें बी किश सुनाई नेई कीती बाबे गी जिसलै कुसै कुसै शा बी न्याऽ नेई मिलेया तां उनें बरोध करदे होई इक पीपले दे बुहटे पर चढ़ी गै। केई दिन बीते कोई उनेंगी पानी तगर बी पुच्छन नेई आया। बाबा अपनी गल्ला पर कायम रेह ते भुक्खे त्रेहाये बुहटे पर गै बेही रेह। केई दिनें बीते तां ओह कमजोर होई गै ते कि दिन बुहटे उप्पर डिगी गै ते उंदा काल होई गेआ। उंदा मौती परैन्त जगीरदार गी केई चाल्ली दे दुक्ख ते घाट्टे होए, बमारी ने उनेंगी घेरी लेआ तां कुसै सेयाने ने उनेंगी बाबे गी मनाने गी गलाया तां जे ओह उंदा हत्या थमां मुक्त होई सकन। जागीरदारें बाबे गी मनाया उंदा मोहरा बनाया ते उनेंगी अपना कुल देवता मनेया।

०००

बाबा रजूल

बाबा रजूल दा थान सांबा परमंडल दे रजूल ग्रां च ऐ। बाबा रजूल केसर ब्रह्मणें दे कुल देवता न। बाबा पंताई दा कम्म करदे हे। उनें दिनें यजमानें दे कुड़ी जागतें दी कड़माई पंत गै बाजव थाहर दिक्खी करी औंदे हे। इक बारी उनें राजपूतें दी कुड़ी दी कड़माई इक ग्रां च करी दित्ती। पर कुसै कारण कुड़ी दे घरा आह्लें कुड़ी दी कड़माई कुसा होर ग्रां बिच्च बी करी दित्ती। इक्कै रोज दौनें थाहरें दी जान्नी आई पुज्जी। एह दिक्खी बाबा होर इनें पशेमान ते परेशान हौए जे उनें शर्मा मारे आत्मघात करी लैत्ता।

केसर ब्रह्मण अपने बर्जुग दे इस चाल्ली आत्मघात करने पर बड़े दुखी होए ते उनें उंदी आत्मा दी शान्ती लेई सारियां अन्तम रस्मां कीतियां ते उंदा देवस्थान बनाया ते केसर ब्रह्मणें उनेंगी अपना कुल देवता मनेया। बरें च इत्थें हवन यज्ञ ते मेल होंदी ऐ। सारे किट्ठे होई अपने कुल देवता अग्गें सिर झकांदे न। होर लोक ते ठोकर बी इत्थें औंदे न हाड म्हीने दी पुनेया गी इत्थें मेल ते मेला होंदा ऐ। मती गिनतरी च लोक इत्थें औंदे न।

०००

बाबा अरजो

बाबा अरजो दा जरम अला ग्रां च हौआ। इंदी माता दा नां हस्सों हा। जदूं बाबा बारहें बरे दे हे तां इंदे पिता दा काल होई गोआ। घरै दी जिम्मेदारी इंदे पर आई गई। एह् खेतरें च कम्म करदे तां जे अन्न दाना घर पुज्जी सके। इक दिन बाबा अपने खेतर कम्म करा करदे हे तां उंदे खेतरां कशा जयसिंह नां दा माहनू जेहड़ा ओबड़ा जाति दा हा निकलेया। बाबा जी गी खबरै उस कन्नै केह् कम्म हा जे उनें उसगी पिच्छूं अवाज दित्ती। इस्सै कारण जयसिंह गुस्सा होई गोआ जे अपसगन होई गोआ ऐ ते उसनै बाबा अरजो दी हत्या करी दित्ती। हत्या दे परैन्त ओबड़ा जाति दे लोके गी केई चाल्ली दे दुक्खें ते बमारी ने घेरी लैत्ता। इस करी उनें बाबा अरजो ते उंदी माता जिनें पुत्रे कन्नै गै अपनी जीवन लीला सती होईयै खत्म करी दित्ती ही उनेंगी मनाया ते उंदी देहरी बनाई मोहरे स्थापित कीते ते उनेंगी अपने कुल देवता दे रूपा च मन्नेया। बरें च इक बारी सारे ओबड़ा जाति दे लोके दी इत्थें मेल होंदी ऐ ते यज्ञ भंडारा कीता जंदा ऐ। इयां बी पूरा बरा ब्याह् मुंडन आदि पर मत्था टेकन इंदे थान पर औंदे न।

०००

सांबा

दाता रणपत वीरपुर



लगभग चार सौ बरे पैहले वीरपुर ग्रां च महापुरुष दाता रणपत जी जन्म होआ। उनें न्याऽ दी खातर अपनी जान तगर देई दिती। ते म्हेशां लेई अमर होई गै। बाबा रणपत दे दादा जी दा नां उग्रदेव हा ते उंदे दऊं पुतर हे, बड्डा लद्धा ते निक्का निट्टा। एह् दमै परोहतें दा कम्म करदे ते कनै लोके दे मामले नबेडने च बी न्याऽ करदे। दाता रणपत दी माता दा नां आलमा ते पिता दा नां लद्धा हा। बड्डे होने पर उंदा ब्याह् अखनूर कोल मांडा ग्रां च होई गेआ। ब्याह दे किश चिरै मगरा उंदे पिता दा काल होई गेआ। हून दाता रणपत गै चाडक राजपूतें दे परोहत हे ते कनै गै ओह् उंदे निक्के मुट्टे मसले दा न्याऽ बी करदे। उसलै वीरपुर च चाडक राजपूत ते उंदी दूई शाख दरहालिये जेह्दे सुंजवां थमां हे दमै नित आपूं च खुडबदे रौंहदे। दरहालिये चाडकें दा नेता बांगी बड़ा घमंडी ते जोरा आहला हा उसदे अगें कोई नेई बोलदा हा। ओह् अरनियें कोल ग्रां कूलपचेत रौंहदा हा पर आमतौर पर अपने घोडे पर बेही अपने लाके च गश्त करदा। म्हीने च इक बारी जनता दरबार ग्रां चूहे चक्क च लांदा। बांगी दा भ्रा इस ग्रां रौंहदा हा ते लोहारें दा कम्म करदा। ओह् बड़ा ईमानदार ते मेहनती हा उसगी बागी दे कम्म पसंद नेई हे।

बांगी दा जमीन गी लेईयै केई बारी वीरपुर दे चाड़कें कन्नै लड़ाई होई जिस च केई लोक मारे गै पर बांगी तां बी नेई मन्नेया। जिसलै रणपत दे पिता दा काल होआ हा तां बांगी ने रणपत गी ग्रां दा सरपंच ते परोहत बनाने गितै अपनी पूरी सहमति दित्ती की जे उसगी मेद ही जे दाता रणपत सेही गल्ल च उसदा साथ देडन। वीरपुर ग्रां दे चाड़कें कोल जेहड़ी जगह ही उसदे लेई बांगी अपना कब्जा चांहदा हा ते उनें इस्सै दा फैसला कराने गितै दाते गी स्नेहा पेजेआ। दाते ने जिसलै इस बारे च ग्रां दे बर्जुगें कन्नै गल्ल कीती तां उनेंगी पता लग्गा जे इसदा फैसला ते उसदे दादा उग्रदेव होरें करी दित्ते दा ऐ। बांगी गी एह मंजूर नेई हा तां दाते बड़ी-ब्राहमणा च बैठक कीती जिस च बांगी उसदे लोक ते वीरपुरें दे लोक शामिल हे। दाते ने बैठक च ओह फैसले दे कागज रक्खे जेहड़े फैसला होने दा सबूत हे ते वीरपुर दे चाड़कें दे हक च फैसला सनाया। बांगी गुस्से च दाते गी मारने दी साजिश करन लगी पेआ ते दाते दे मसरे भ्रायें गी एह जिम्मेदारी दित्ती। पिता दी चव्वरी आहले रोज जिसलै कोई उंदे दांद खोली लेई गेआ तां ओह अपने घोडे पर उनेंगी तुप्पन गैऽ उसलै उंदे मसरे भ्रायें उनेंगी मारी दित्ता।

दाते दा सिर बांगी ने तलवार दा फट्ट मारी धडे थमां बक्ख करी दित्ता। अज्ज जिस थाहर दाते दा तलाऽ ऐ। इत्थें उंदा सिर डिग्गेया हा ते जित्थें अज्ज उंदा देहरा ऐ उत्थे उंदा धड घोडे थमां डिग्गेया हा। दाते कन्नै उंदी मां आलमा बी सती होई गेईयां हियां। बांगी गी ब्रहम हत्या लग्गी। सारा परोआर कष्ट भोगन लग्गा किश उत्थूं थडा छोडी गैऽ ते अपनी जात बटाई लेई।

किश लोके दाते थमां माफी मंगी ते उनेंगी अपना कुल देवता मन्नेया। बांगी दे परोआर ने कूल ग्रां च दाते दा मंदर बनवाया जेहड़ा अज्ज बी ऐ।

सती होने थमां पैहले माता आलमा ने सढोतरा ब्रैह्मणें गी किश आज्ञा दित्ती जिसदा पालन सढोतरें ब्राहमण अज्ज बी करदे न। ओह इत्थें दातें दे आई कम्म शुरू होने पर मत्था टेकदे न। बच्चे दे मुन्नन करदे न ते हर ऐतवारें दर्शन करी मत्था टेकदे न। सिर्फ सढोतरे गै नेई होर बी मती गिनतरी च लोक इत्थें औंदे न।

०००

पंजमां ध्याऽ

जिला उधमपुर दे धार्मिक ते सांस्कृति थाहर

उधमपुर

रियासत जम्मू कश्मीर दा सब्भनें थमां बड्डा जिला उधमपुर हा जिस च पंज तसीलां हियां। पर हून इसलै उधमपुर दियां चार तसीलां न जिंदे च चनैहनी, रामनगर, मझालता ते उधमपुर शामिल न। इत्थू दी जन-संख्या 1475068 ऐ। इत्थें सब्भने धर्मे दे लोक रौहंदे न। इत्थूं दी भाशा डोगरी ऐ। फ्हाड़ी लाके दे लोक गद्दी बोल्ली बोलदे न। गुज्जर गोजरी बोलदे न। उप्परले लाके च किश लोक कश्मीरी भाशा बी बोलदे न। जिला उधमपुर च सब्भै तेआर रियासत दे बाकी हिस्सें आंहगर गै मनाये जंदे न जियां देआली, लोहडी, बच्छ दुआह, होली, रक्खड़ी टिक्का, करवाचौथ, नागपंचमी, शिवरात्रि ते ठौगरें दा वर्त आदि। इत्थें केई प्राचीन मंदर न जेहड़े कला दी नजरी कन्नै बी कला दा अदभुत नमूना न। मुसलमान अबादी आले इलाके च इत्थें मसीतां बी हैन। रली मिली अबादी आले इस जिले च लोक रली मिली रौहंदे न ते इक दुयै दी धार्मिक भावनाएं गी कदें ठेह् नेई पजांदे।

०००

सांकरी देवता मंदर

उधमपुर थमां 35 किलोमीटर दूर पंचैरी कस्बा ऐ जेहडा बड़ा गै शैल ऐ। उधमपुर थमां पंचैरी तगर दा सारा रस्ता फ्हाड़ी ऐ। सांकरी देवता दा पवित्र थाहर पंचैरी थमां 2.5 किलोमीटर दूर फ्हाड़ी पर बने दे इक प्राकृतिक मदान च स्थित ऐ। इत्थें इक निक्का जनेहा मंदर ऐ जिस च काले पत्थर दी सांकरी देवता दी मूर्ति ऐ। भगवान शिव गी इस थाहर सांकरी देवता दे नांऽ कन्नै जानेआ जंदा ऐ। सांकरी देवता दा एह मंदर सदियां पराना ऐ। इस च स्थापित मूर्तियां रेतले पत्थर कन्नै स्थानी कारीगरें बनाई दियां न इयां बझोंदा ऐ। बड्डी मूर्ति दियां छै बाहमा न, खल्ले इक जानवर दा चित्तर ऐ जिसगी किश लोक घोड़ी ते किश शेर आक्खदे न। इत्थें मजूद मूर्ति दे हत्थें च त्रिशूल, डमरू, कमंडल ते किश होर चीजां न। इत्थें जेहडी दूई मूर्ति ऐ उसदियां चार बाहमां न। मंदर दे बाहरें कंधा पर नाग देवता दी तस्वीर बनी दी ऐ। मंदर अंदरा दा बड़ा लौहका ऐ इत्थें सिर्फ त्रै जां चार लोक गै किट्ठे बेही सकदे न। मूर्ति कोल पराना नगाड़ा, छैने, त्रिशूल ते खड़ामां रखी दियां न। सांकरी देवता दी जातरा थमां किश दिन पैहले ढोल ते बाजे कन्नै पुजारी भक्ते कन्नै ग्रां दा चक्कर लांदे न तां जे लोकें गी मेल दी तरीक दा पता लगी जा।

किश लोकें दी धारणा ऐ जे मंदर च स्थापत मूर्ति इन्द्र देवता दी ऐ की जे फ्हाडी थाहरें नैहरा बगैरा नेई होने करी फसल लेई बरखा पर गै निर्भर रौहना पौंदा। इसकरी प्राचीन समें च जदूं बरखा नेई हुंदी तां सारे ग्रां दे लोक इस मदान च किट्ठे होई पूजा करदे ते हवन यज्ञ करदे तां जे बरखा होने पर ओह फसल बाड़ी लाई सकन। सांकरी देवता केई जातियें दा कुल देवता ऐ इसकरी लोक नमीं फसल दुद्ध घ्यो खाने थमां पैहले इत्थें चाढ़दे न।

मंदर दे साम्मने मदान च इक वजनदार पत्थर ऐ जिसगी मेले च नौजवान अपने मुंढे पर रक्खी सांकरी देवता दा चक्कर लादा ऐ। जेहड़ा पूरी प्रक्रिमा

करी लैंदा ऐ लोक उसदा सुआगत करदे न। इस दिन लोक अपने घर स्थापत देवी-देवतायें गी बाजे गाजे कन्नै इत्थें आंहदे न। लोकें दा मनना ऐ जे इयां करी ओह इत्थूं दे देवते दी मलाटी करांदे न।

मदन लाल केसर हुंदी लिखी दी पुस्तका कताब शांकरी, संखपाल, सपेर ते लादों सांकरी चार भ्रा हे ते दो भैनां। ओह बड़े बहादर हे। ओह एह लाके जितने गितै किरमची मानसर दे रस्ते इत्थें आए। उंदा घोड़ा फ्हाड़ी थमां डिग्गी मरी गेआ। लोक अज्ज बी इत्थें घाऽ सुट्टदे न। उनें भैन भ्रायें दे नां इत्थें स्थान बने दे न। सपेर देवता दे स्थान कोल दौनें भैनां पत्थर बनी दियां न। पंचैरी ग्रां कोल मीर च इक फ्हाड़ी पर सांकरी देवता, लद्दे दी धार पर शांकरी ते लांदर ग्रां कोल संखपाल देवता दा पवित्तर स्थान ऐ। सांकरी देवता दे पुजारी राजपूत न की जे उंदे परोआर दे बजुर्गे गी गै ओह सुखने च लब्भे ते पुजा दा हुक्म दिता हा। इयां ते भक्त वीरवार ते ऐतवार इत्थें मत्था टेकन औंदे न पर बरे च इक बारी इत्थें त्रै दिन मेला लगदा ऐ अदूं लोकें दी बड़ी भारी भीड़ हुंदी ऐ।

०००

मानसर शेषनाग मंदर

झील मानसर जम्मू थमां 57 किलोमीटर पूर्व पाससै जिला उधमपुर दे मजालता ब्लाक दे ग्रां मानसर च निक्की-2 फाडिडुयें कन्नै घिरे दे नीले साफ पानी दी झील ऐ। इसदे पूर्वी कंठै पर प्राचीन शेषनाग जी दा मंदर ऐ।

इक कथा मताबक महाभारत युद्ध च पांडवें अपनी जित्त परैन्त जिसलै सोचेया जे उंदे हत्थें किन्ने अपने सरबंधी ते लोक युद्ध च मरे उंदा पाप सारा उंदे सिर जरूर औग। उनें सब्भनें दी आत्मा दी शांति लेई युधिष्ठिर ने अश्वमेघ यज्ञ करने दा फैसला कीता तां जे ओह् इ'नें हत्याएँ दे दोश थमां बची जान। इक घोड़ा शूरवीरें दी नगरानी च छोड़ी दित्ता गेआ ते अर्जुन गी उसदी जिम्मेदारी दिती गई। जिनें बी घोड़ा फगड़ने दी कोशिश कीती अर्जुन ने उनेंगी युद्ध च हराया। जिसलै घोड़ा राजा बभ्रुवाहन दे राज च पुज्जा।

बभ्रुवाहन अर्जुन दी पैहली लाड़ी गंधर्व कन्या विचित्रागंदा दा पुत्र हा ते उसदी पालमां अर्जुन दी दूई लाड़ी नाग कन्या अलूपी ने कीती ही। बभ्रुवाहन पिता अर्जुन लेखा ब्हादर हा उनें घोड़ा फगड़ी लैआ। वजीरें राजा गी समझाया जे अर्जुन तुन्दे पिता न इसकरी युद्ध करना ठीक नेई तुस आदर कन्नै घोड़ा परताई देओ। जिसलै ओह् अर्जुन कोल गेआ तां अर्जुन ने उसगी गलाया जे तूं मेरा पुत्र हुंदा तां घोड़ा नेई परतांदा ब्हादरी कन्नै युद्ध करदा। बभ्रुवाहन अपमान नेई सैहन करी सकेआ ते युद्ध लेई मैदान च आई पुज्जा। पिता पुत्र च खूब लड़ाई होई केई वीर गति गी प्राप्त होयै। बभ्रुवाहन दे इक तीर कन्नै अर्जुन दा सिर धड़ थमां बक्ख होई गेआ। हा-हा कार मची गेआ जिसलै बभ्रुवाहन दी माता गी पता लग्गा तां ओह् युद्ध भूमि च आई ते अर्जुन दा शरीर गोद च लेई खूब वरलाप करन लगी पेई। बभ्रुवाहन बी दुक्खी होई गेआ। ते पिता कन्नै गै चिता च बौहने दा फैसला करी लेआ तां जे प्रायश्चित करी सके।

उसलै नाग कन्या अलूपी ने पुण्डरीक नाग गी आज्ञा दित्ती जे नागलोक जा ते मेरे पिता शेषनाग गी सारी घटना सना ते कन्नै जीवनी मणि लेई आ। अलूपी दी आज्ञा पर पुण्डरीक नाग, नाग लोक गेआ ते सारी गल्ल नागराज गी सनाई। नागराज ने ओह मणि पुण्डरीक गी नेई दित्ती तां पुण्डरीक खाली हत्थ परतोई आया तां अलूपी ने पुत्तर वभ्रुवाहन गी मणि लेने गितै भेजेआ। जिसलै नागराज ने उसगी बी मणि नेई दित्ती तां उनें नागें कन्नै युद्ध कीता ते जीवनी मणि पताल लोक थमां लेई आया। जित्थें ओह मणि समेत धरती पर आया ओह झील मणिसर नां कन्नै प्रसिद्ध होई ते फी मणिसर थमां अज्ज बिगड़े दा रूप मानसर बनी गेआ। मणि कन्नै गै नागें दा जीवन ऐ इसकरी बभ्रुवाहन दे पिच्छें शेषनाग बी धरती पर आये। उसलै गै द्वापर युग दा अंत होई गेआ ते कलिजुग दी शुरूआत इसकरी शेषनाग बाकी नागें समेत वापस नेई जाई सके ते उनें नागशिला दे रूप च अपने आप गी बदली लेआ। अदूं थमां इस थाहर दा महत्व बधी गेआ ते लोक इत्थें नागराज ने दर्शनें गितै चेचे औन लगी पे।

०००

उधमपुर मंदर

जगन्नाथ जी दा मंदर

भगवान जगन्नाथ जी दा मंदर उधमपुर थमां चार किलोमीटर दक्खन पाससै धार रोड़ कंठै रठियां ग्रां च स्थित ऐ। इस मंदर गी कृष्ण भक्त गोदावरी दी याद च बनाया गोदा ऐ। एह मंदर उधमपुर दे बाकी मंदरें थमां थोड़ा भिन्न ऐ। मंदर च भगवान कृष्ण, बलराम ते उंदी भैन सुभद्रा दियां मूर्तियां स्थापित न। आक्खदे न जे इक बुड्ढी जनानी भगवान कृष्ण दी परम भक्त ही उसनै केई बारी जगन्नार्थें दी जातरा कीती ते ओह् म्हेशां प्रभु भक्ति च लीन रौंहदी।



जियां-जियां उम्र बधदी गई ओह् पैदल जातरा करी भगवान जगन्नार्थे दे दर्शनें दे समर्थ नेई रेही तां इक बारी भगवान ने उसगी सुखने च दर्शन दिते ते गलाया तूं घर गै मेरी भक्ति कर में तेरी भक्ति थमां खुश आं। में तेरे कोल इत्थें म्हेशां रौंहग।

ओह् रोज गोये कन्नै कृष्ण बलराम ते सुभद्रा दियां मूर्तियां बनांदी ते पूजा परैन्त पानी च प्रवाह करी दिंदी। इक रोज उसदे मना च इच्छा होई जे दिक्खा एह् मूर्तियां सच्च बी एह् न जां नेई उसनै इक मूर्ति थमां थोड़ा गोआ त्रोडेआ तां उस थमां खून दी धार चली पेई। उसगी पक्का भरोसा होई गोआ जे भगवान सच्चै गै इत्थें न। जिसलै एह् खबर रठियां च फैली तां मती गिनतरी च लोक उत्थें औन लगगी पे। इस गल्ला दा कोई लिखत प्रमाण नेई जे मंदर कदूं बनेआ पर पुजारी जी दे मताबक एह् मंदर सौ थमां बी बद्ध बरे पैहले बनेआ। मंदर

च इक त्रामें दा पट्टा बी ऐ जिस पर टाकरी भाशा च किश लिखे दा ऐ।


ओह जिसलै बड़ी कमजोर होई गई तां ओह रोज नमीं गोये दी मूर्ति नेई बनाई सकदी ही इसकरी मूर्तियां खंडित होई जंदियां। इक बारी काशी दे पंडित जी उत्थूं दा गुजरे तां उस थाहर उनें भगवान दियां खंडित मूर्तियां दिक्खी उत्थें भगवान दी मूर्ति स्थापना करने दी सोची ते उत्थूं दे लोकें थमां मदद लेई उनें मूर्तियां स्थापित करवाईयां। ते लोकें थमां मंदर कन्नै लगदी जमीन बी दान च लेई ते फी उत्थें होने आहली आमदन कन्नै साधु-संतें दा लंगर शुरू करवाया।

इस्सै मंदर दे बेहडे च गोदावरी दी समाध बनाई गेदी ऐ। अज्ज बी गोदावरी दे कुला दे लोक इत्थूं दी दिक्खरिक्ख करदे न। कोई पंजीह बरें पैहले पंडित सोमनाथ होरें नमियां मूर्तियां बी स्थापित करवाईयां हियां। गोदावरी दी समाधि दे साम्मने राजा मंडलीक ते कालीवीर जी दे पवित्र स्थान न। जिनें लोकें गी भूत-प्रेत दा साया होए ओह बी इत्थें आईयै कश्टें थमां मुक्त होंदे न।

०००

किरमची दे मंदर

जम्मू थमां 65 किलोमीटर दूर लघा धार दी खब्बी भेठा किरमची दा लाका ऐ जित्थें किरमची दे मंदर न। किरमची अज्ज इक निक्का जनेहा ग्रां ऐ पर देवक नाला दे कंठे खंडरात इस गल्ला दे साक्षी न जे कुसा मौके एह राजधानी ही। किरमची बारै मनेया जंदा ऐ जे इसगी महाभारत दे मौके राजा कीचक ने अबाद कीता ते उसगी अपनी राजधानी बनाया। किश चिर पैहले इत्थें भुतियाल वंश दे राजा राज करदे हे जेहड़े जम्मू दे राजा दे अधीन हे ते बरे च इक बारी उनेंगी दो ज्हार रपे ते लोड़ पौने पर दस्स हथेयारबंद घुड़सोआर दिंदे हे। राजा गुलाब सिंह ने भुतिराज थमां सब्भै किश लेना बंद कीता ते एह राज जम्मू राज च रलाई लेआ।



एह मंदर लगभग इक ज्हार वर्ग मीटर च बने दे न। एह वास्तुकला दे अदभूत नमूने न। इनें मंदरें दी गिनतरी सत्त ऐ जिंदे च पंज पूरे बने दे न ते दो अद्ध बनदे रेही गेदे न। किश लोक इनें मंदरें गी कुशनवंश दे राजा कनिष्क दे समें दा दस्सदे न जेहड़ा भारत दा शासक पैहली सदी ईस्वी च बनेया हा। उत्थें रौहने आहले दा मनना ऐ जे एह मंदर पांडवें अपने बनवास काल च बनाए इसकरी इनें मंदरें गी पांडू मंदर बी आक्खेआ जंदा ऐ। पंडित केदारनाथ शास्त्री हुंदे मताबक इनें मंदरें दे शिखर भुवनेश्वर दे लिंगराज ते राजारानी मंदर आंहगर न इसकरी एह डोगरा कारीगरें नेई बल्कि उड़ीसा दे कारीगरें दे बनाए दे लगदे न। इत्थूं दा राजा बजरघर इक बारी अपनी लाड़ी कन्नै जगन्नाथ पुरी यात्रा पर गेआ। रानी गी उत्थूं दे मंदर बडे पसन्द आए। रानी ने इयै जनेह मंदर अपने इत्थें बनवाने दी मन्शां राजा गी सनाई। सम्भव ऐ वापसी पर राजा

ने अपने कन्नै कारीगरें गी कन्नै आंहदा होग ते इनें मंदरें दा निर्माण होआ होग। एह बी सम्भव ऐ जे किरमची दा लाका बबोर दे राजा बजरघर दे अधीन होग ते उसदे जागत उमघर ने इनें मंदरें गी पूरा करवाया होग। एह बी आक्खेया जंदा ऐ जे बबोर दे राजें शेवमत दी मशहूरी लेई एह मंदर बनवाये होन। बबोर दे राजें दे कश्मीर दे राजा कन्नै संबंध खरे हे। हर्ष मौके कश्मीर च शेवमत तेजी कन्नै फैला दा हा। बबोर थमां कश्मीर जंदे होई किरमची इक महत्वपूर्ण पड़ाऽ हा जेहड़ा बबोर थमां बीह मील दूर ऐ। संभव ऐ जे किरमची दे राजें मसाफरें ते बपारी लोके दे अराम लेई इनें मंदरें, बौलियें ते सायेदार बूहटें लाने दा सरिस्ता कीता होग। मते विशेषज्ञ दा बचार ऐ जे मंदर नौमीं थमां जांरमी शताब्दी दे मझौटे बने दे न। पुरातत्व विभाग दे जानकारें मूजब इनें मंदरें गी बनाने च मता समां लगा होना ऐ।

इनें मंदरें गी बड्डे-बड्डे पत्थरें गी बिजन चूने, मिट्टी जां सीमेंट दे इक दुयै पर इस ढंग कन्नै जोड़ेआ गेदा ऐ जे सदियां बीती जाने परैन्त बी पत्थर अपनी थाहरा पर उयां गै कायम न। पत्थरें गी तराशियें देवी-देवतें दियां मूर्तियां बनाई गेदियां न। मूर्तियां रखने लेई इत्थें थाहर ते बनाया गेदा ऐ पर इक मंदरें च गै मूर्तियां न बाकी खाली न। मलबे थमां गणेश, त्रिमूर्ति शिव ते विष्णु भगवान दियां मूर्तियां खास न। शिव गणेश दियें मूर्तियें थमां लगदा ऐ जे इनें मंदरें च शिवलिंग होने जेहड़े कुसै चुराई ले होडन। मंदरें दी बाहरली कंधें परबने दे देवी देवतें ते चितर बड़े गै शैल बने दे न। आक्खो जे तराशे दे एह पत्थर जीवत होई गेदे होन। मंदरें दी ढयोडी पर बड्डे-बड्डे पत्थरें पर बेल-बूहटे बने दे न जेहड़े सराहनेजोग न। पत्थरें गी जोड़िये पोढ़ियां बनाई गेदियां न जेहडियां उप्पर जाई खुले थाहर खत्म होंदियां न फी इक निक्के दरोआजे चा मंदर जाई पुज्जदे न। जिस मंदर च मूर्तियां न उत्थें लोक अज्ज बी पूजा करदे न। दऊं मंदरें दी कुल नीह गै इत्थें लब्भदी ऐ। इत्थें सारे मंदर चबूतरे पर बने दे न। इत्थे इक बौल्ली ऐ जिसदा पानी ठंडा ते शैल ऐ। इत्थें खुदाई दरान कीमती पत्थर त्रामें दे सिक्के, मूर्तियां, लोहे दे तीर, मनके, गुप्त काल दे बाद दियां ईटां, भांडे ते लोहे दे चुलहे बी लभदे न। जेहड़े इसलै पुरात्व विभाग कोल न। एह मंदर सच्च गै उस मौके दी अदभुत कला दे नमूनें न।

०००

मंदर उधमपुर

बबोर दे मंदर

कुसै बी देसा दे पराने भवन, दुर्ग, मंदर ते इमारतां उस थाहरा दियां कीमती विरासतां होंदियां न जेहड़ियां उस मौकै दे राजकाज, लोकें दा रैहन सैहन ते उस समें दी सभ्यता बारै जानकारी दिंदियां न। हर इमारत दी इक-इक ईट्ट अपने च उस मौकै दियां केई कहानियां समेटी अदू थमां अडिग न। इस चाल्ली दे निर्माण अदू गै संभव होई सकदे न जदू राज च चौने पाससै सुख शांति होऐ। जेकर अशान्ति जां युद्ध दा समां होऐ तां एह संभव नेई। हर राजे दी एह इच्छा होंदी ऐ जे उसदे आसेआ बनाया गेदा भवन केई बरै कायम र'वै तांजे लोक पराने इतेहास ते समें बारे जानकारी हासल करी सकन। उ'नें भवनें गी बनाने आहले भामें दुनिया थमां जंदे उठी न पर उ'नें भवनें दी कंधें पर केई कहानियां छोड़ी जंदे न तां जे दिखने आह्ला उ'नेंगी पढ़ी सकै।

प्राचीन काल थमां गै जम्मू सांस्कृतिक ते प्राकृतिक शलैपे लेई ते अमूल्य विरासत दी खान रेहा ऐ। इत्थूं दे मंदरें ते भवनें कनै केई धार्मिक कथां जुड़ी दियां न जेहड़ियां पराने समें कनै सक्षात झत्त करांदियां न।

जम्मू थमां लगभग 60 किलोमीटर दूर पूर्व पाससै त'वी दे कंठै दऊं ग्रां न मनवाल ते बबोर (थलोरा) इत्थूं दे आलेभोले लोक इ'नें मंदरे बारै कोई मता किश नेई जानदे हे। पिछले किश ब'रें थमां गै इंदे बारै लोके गी जानकारी मिली। इ'नें मंदरें बारै जानकारी इतिहासक जानकारी कठेरने आहले इतिहासकारें दी मैहनत दा गै नतीजा ऐ जे हून एह मंदर सारे विश्व च मशहूर न। केई विदेशी यात्री बी इत्थें गे ते इंदी जानकारी लेई पर ओह सिर्फ कताबें च गै रेही। बबोर गी प्राचीन काल च बबापुर दे नांऽ कनै जानेआं जंदा हा।

इक दन्तकथा मताबक बबापुर अर्जुन पुत्र बब्बरूवाहन दे राज दी

राजधानी ही। पाण्डवों दे अश्वमेव यज्ञ दे घोड़े की बब्बरुवाहन ने फगड़ी लैता हा। अर्जुन ते बब्बरुवाहन बशकार युद्ध होआ जिस च पाण्डवों दी फौज मारी गई ते अर्जुन बेहोश होई गेआ। जित्थें लड़ाई होई ही उस थाहरा गी खूहन आखदे न। बबोर थमां एह थाहर 20-21 किलोमीटर दूर ऐ। जिसलै बब्बरुवाहन गी पता लगगा जे अर्जुन उसदे पिता न तां उसने नाग लोक थमां मणि आंहदी ते अर्जुन गी जींदा कीता।

बबोर दे एह मंदर बसोहली दे उत्तर पच्छिम च न। इ'यां बझोंदा ऐ बबोर कदें बड्डा नगर हा की जे इत्थूं खुदाई मौके भवनें दियां कंधां, भांडे, मनके मोती आदि मिले जेहड़े इत्थूं दे राजें ते जनता दे उच्चे जीवन स्तर दे गवाह न। खुदाई मौके इत्थूं कश्मीर दे राजा कलश दे बेल्लै दा इक सिक्का बी मिलेआ हा।

किश लोकें दा मत ऐ जे इत्थें 12-13 मंदर हे पर हून कुल्ल पंज छे रेही गेदे न जेहड़े खंडहर बनदे जारदे न। हालैंड दे इक विद्वान फोगल इत्थें आए हे ते उंदा गलाना ऐ जे दसमीं-ग्यारवीं सदी च जम्मू राज दी राजधानी हा ते एह मता फैले दा हा। भूंचाल करी एह थाहर नष्ट होई गेआ सिर्फ मंदरें दे अवशेष बचे हे, पर एह भूंचाल कदूं ते कुस राजा दे राज च आया इस बारै कुसा गी कोई जानकारी नेई।

एह बी मन्नेआं जंदा ऐ जे डोगरा राजें उसलै इस थाहरा गी राजधानी बनाया होना जदूं महमूद गजनवी ते अरब ते हमलावरें दा ओह मकाबला नेई हे करी सकदे। सुरक्षा कारणें उ'नें इस थाहरा गी चुनेआं होना। हमलावर जम्मू लुट करी जंदे उठी हे। हमलें दा डर हर मौकै लोकें च बनेआं रौंहदा हा इससै कारण ओह इत्थूं थमां गे उठी होने।

बबोर फ़ाड़ी लाका होने करी बड़ा शांत ते शैल ऐ। मन्दरें बारै विद्वानें दे केई मत न। पक्के तौर पर किश नेई आक्खेआ जाई सकदा पर वास्तुकला दी गल्ल करचै तां एह अदभुत नमूनें न जेहड़े इस गल्ला दी पक्की पुष्टि करदे न जे अज्जै थमां जहार बरै पैहलें जम्मू च मूर्तियां बनाने ते पत्थरें पर बेल बूहटे बनाने आहले कारीगर मजूद हे। इत्थूं दे लोकें दा मन्नना ऐ जे पांडवें

अपने आज्ञातवास मौकै एह मंदर बनवाए जदू ओह इ'नें जंगलें च छप्पे दे हे। ओह जित्थें बी रेह उ'ने मंदर ते बौल्लियां बनवाइयां। लोक मनदे न जे बड्डे-बड्डे बट्टे गी भीमसैन ने उप्पर मंदर पर लाने गित्तै पजाया हा। इतेहासकार इस गल्ला थमां सैहमत नेई। उंदे मताबक मंदरें दी बनावट हिन्दू तर्ज पर ऐ ते एह उस मौके दे न जंदू हिन्दू राजें दा राज ऐन्त पर हा। इ'नें मंदरें दी बनावट ललिता-दित्य ते अवंती वरमन दे राज मौके बने दे मंदरें कन्नै रलदी-मिलदी ऐ।

एह मन्नना ऐ जे बबोर गी अठमीं नौमीं ई. च जम्मू दी राजधानी बनाया गेआ होना ऐ। ते फही इत्थें राजें दे मैहल ते जनता दे मकान बने होने। राजे जेहडे मंदर बनवाए उत्थें लग्गे दे पत्थरें दी लंबाई 12 फुट्ट दे करीब ऐ। निक्के बड्डे पत्थर इ'यां जोड़े गेदे न जे दिखने आह्ला हैरान होई जंदा ऐ। बबोर 500 ब'रे जम्मू दी राजधानी रेहा। 14मीं 15मीं शताब्दी च राजा मालदेव ने फही जम्मू गी राजधानी बनाया।

एह बी संभव ऐ जे बबोर कुसै बड्डै सम्राट दी राजधानी रेहा होग। जि'नें इत्थें मंदर बनवाए होंगन। इत्थूं दियां बौल्लियां दिक्खी मसूस होंदा ऐ जे इत्थें तीर्थ करन जम्मू थमां ते दूरा-दूरा लोक दर्शनं गित्तै औंदे होने न। होई सकदा ऐ इत्थें सरांउ बी होंगन पर हून कोई चि'न्न नजरी नेई औंदा। एह बी मनासब ऐ जे बबोर कश्मीर गी भारत कन्नै मलाने आह्ला इक म्हत्तवपूर्ण रस्ता होऐ ते बपारी यात्रा मौकै इत्थें बसांउ करदे होने न इस कारण राजें इत्थें धार्मिक भागीदारी बी करी सकन।

इसलै बबौर दे मंदरें च लोक देवी भगवती दे मंदर गै पूजा गित्तै जंदे न कीजे एह मनवाल धार रोड दे कोल ऐ। एह बबौर च बने दे सब्भनें मंदरें थमां निक्का ऐ ते एह केई थाहरें दा त्रुट्टी गेदा ऐ। इत्थें कंधें पर बने दे तौकडें च केई थाहरें मूर्तियां न ते केई दीयें बालने गित्तै न। मंदरें दे स्तभें दा बाहरला हिस्सा शैल सजाया गेदा ऐ जिसदे दरवाजें पर नच्चदियें यक्षनियें दियां मूर्तियां न। उसदे पिच्छें महाकाली ते गणेश जी दियां मूर्तियां न। मंदरै च लग्गे दे हर पत्थर पर मूर्तियां बनी दियां न।

एह मंदर बाकी मंदरें दे मकाबले च खरी हालत च ऐ। इत्थूं दा वातावरण बड़ा शैल ऐ। इसदे कोल गै भारत सरकार दा पुरातत्व विभाग दा दफ्तर ऐ। जेहड़े इ'नें मंदरें दी दिक्ख भाल बी करदे न। खुदाई च मिले दा समान इत्थें संग्रहालय च रक्खेआ गेदा ऐ। एह मंदर शिव शक्ति दौनें दा होई सकदा ऐ। मंदर च शिवलिंग ते मूर्तियां बी रक्खी दियां न। बनाए होने जे एह लोक इत्थें च जेहड़े पत्थर खिल्लरे दे न उंदे पर नालीदार खम्बे, गणेश जी, भगवान शिव, कार्तिकेय ते केई देवी देवतें दियां मूर्तियां न।

दूआ मंदर शिवजी दा ऐ जेहड़ा पैहले मंदर थमां किश छिंडे पर ऐ। इस मंदरै दी बी कंधें ते थ'म्में पर मूर्तियां बनी दियां न। मंदर उच्चे चबूतरे पर बने दा ऐ। लोक इत्थें घट्ट गै औंदे न। मंदरै दी छत नेई है पर खम्बे मजूद न। इक थाहर शिवलिंग स्थापित ऐ जिसदे पिच्छें तौकड़े च त्रिमूर्ति भगवान शिव ते माता पार्वती दियां मूर्तियां न। इत्थें चार गर्वगृह न जेहड़े इक मण्डप कन्नै आई जुड़दे न इत्थें पुज्जने लेई पौड़ियां न। मंदरै सामनै दऊं खिड़कियां ते पिच्छें इक खिड़की ऐ। मंदरै दी छत दा सारा समान आले दुआले खिल्लरे दा ऐ। इ'यां बझोंदा ऐ जे एह मंदर दछत्ता हा मंदर लेई लगभग पंदरां पौड़ियां न। इत्थें कंधें पर गंगा मां, शेष नाग पर बैठे दे विष्णु, भगवान कृष्ण, हरिण्यकश्यप दे ढिड्डे गी फाड़दे नृसिंह भगवान ते धार्मिक ग्रैंथें पर अधारित मूर्तियां बी मजूद न।

त्रीया मंदर काला डेरा न 1. शिव मंदर ऐ जेहड़ा शिड़का दे पच्छम च ऐ ते इसदा मुख्ख दरोआजा पूर्व बक्खी ऐ। इसदी बनावट बड़ी शैल ऐ मंदर पुज्जने लेई पौड़ियां चढ़ना पौँदियां न। मंदरै दी छत्त डिग्गी पेदी ऐ पर खम्बे उ'आं गै खलोते दे न। एह मंदर पूरी चाल्ली खंडहर बनी गेदा ऐ।

चौथा मंदर काला डेरा न. 2 ऐ। एह बी मजबूत मंदर ऐ। इत्थें बी इक गर्भघर ते मण्डप ऐ। इत्थें बी पौड़ियां चढ़ना पौँदियां न। इसदी छत चार नालीदार स्तम्भें ते बारां अर्ध स्तम्भें पर बनी दी ऐ। इसदे किश हिस्से बड़े शैल सजाए गेदे न।

पंजमां मंदर बी उच्ची थाहर बने दा ऐ। मंदरै दे अंदर बाहर कंधें पर

देवी देवतेँ दियां मूर्तियां बनी दियां न। इसदी छत ठीक ऐ पर गर्भघर च कोई देवी देवता दी मूर्ति नेई ऐ।

इस गल्ला दा भामें पता नेई जे एह् मंदर कु'न ते कदूं बनाए पर फही बी एह् मंदर जम्मू दी कीमती विरासत ऐ ते वस्तुकला दे अद्भुत नमूनेँ न जिं'दे पर हर डुग्गर-वासियें गी मान ऐ। भारत सरकार दा पुरातत्व विभाग इ'नेँ मंदरें गी पैह्लें जनेहा बनाने लेई खूब कम्म करा करदा ऐ ते किश हद्द तगर कम्म होए दा बी है।

०००

उधमपुर मंदर

कामेश्वर मंदर उधमपुर

जम्मू प्रदेश दी धार्मिक म्हाता दा पता इस गल्ला थमां लाया जाई सकदा ऐ जे इत्थें केई ऋषि-मुनियें तपस्या कीती ते इत्थूं दे लोकें गी अपने प्रवचनें कन्नै धन्न-धन्न कीता।

धार्मिक ग्रैन्थें मताबक ऋषि कश्यप ने लम्मे समें तगर कश्मीर यात्रा कीती। अपनी यात्रा मौकै ओह् डुग्गर प्रदेश बी आए ते इत्थें दे लोकें दे बैहमें ते अन्धविश्वासें गी दिक्खी उ'नेंगी इ'नें लोकें पर दया आई ते उ'नें भगवान शिव दी अराधना कीती ते शिवजी ने उंदी भक्ती थमां खुश होई उ'नेंगी दर्शन दित्ते ते बर मंगने गी आक्खेआ। ऋषि कश्यप ने भगवान गी प्रार्थना कीती जे स्वामी डुग्गर प्रदेश दे लोकें दा कल्याण करो। शिवजी ने पार्वती जी गी आज्ञा दित्ती जे ओह् देविका दा रूप धारण करी डुग्गर च प्रवाहित होन ते लोक उस च स्नान करी सद्बुद्धि हासल करन ते बुराई छोड़ी धर्मकर्म दे रस्ते पर चलन। पार्वती जी ने शिवजी दा साथ मंगेआ तां शिवजी मन्नी गे, इससै कारण देविका जित्थूं बी बगदी ऐ उत्थें-उत्थें जरूर शिवमंदर बी विराजमान ऐ।

सुद्धमहादेव लाके च देविका कंठै केई तीर्थ स्थान न। देविका इसगी गुप्त गंगा बी आखदे न। एह् केई थाहरें गुप्त ते केई थाहरें जलधारा दे रूप च ऐ। सुद्धमहादेव थमां गुप्त होने परैन्त उधमपुर दर्शन होंदे न। इत्थें गै शिवजी दा पराना मंदर ऐ जिसगी कामेश्वर मंदर करी जानेआं जंदा ऐ। इस सारे लाके गी कामेश्वर बी आखदे न जित्थें शिव सब्भनें दियां कामनां पूर्ण करदे न। इत्थें अज्ज बी लोकें दी भीड़ हुदी ऐ पर घरें-घरें नलके लग्गी जाने कारण 50 ब'रें पैहलें दी रौनक अज्जे इत्थें नेई रेही दी जदूं लोक इत्थें स्नान करदे ते मंदर दर्शन करदे हे।

उधमपुर दा एह कामेश्वर मंदर बड़ा पराना ऐ। धार्मिक ग्रैन्थें च बी इसदा जिक्क मिलदा ऐ जे जेहड़ा माहनू देविका च स्नान करग तां उसदे सारे कश्ट खतम होई जाडन ते ओह नर्क जाने थमां बी बची जाग। इत्थें साधु महात्माएं लेई ठैहरने दा बी प्रबन्ध हा। आखदे न लंगर लेई अन्न गित्तै राजें मती जमीन इस मंदरै कन्नै दिती दी ही पर 1947 परैन्त भूमि सुधार कनून लागू होआ। तां इत्थूं दी मती जमीन गई उठी। उधमपुर दा फौजी अस्पताल शिव नगर दे आले-दुआले दे मकान ते केई दफ्तर मंदरै दी जमीन पर बने दे न। कामेश्वर मंदर दे बनने बारै लोकें दे बक्ख-बक्ख बचार न। इस कन्नै केई कत्थां जुड़ी दियां न। आखदे न जे केई सौ बरें पैहलें कश्मीर दे राजा बेनीदत्त ने इसगी बनवाया हा। राजे दे घर कुड़ी दा जरम होआ जिसगी सिर पीड़ रौहदी ही। इलाज कराने पर बी कोई फायदा नेई होआ तां राजा ने पंते गी पुच्छेआ तां उ'नें दसेआ जे एह कन्या पिछले जनम च गिदड़ी ही जिसगी शकारी दा तीर सिरे च लगा ते एह हवन कुंड च जाई पेई। तीर अज्ज बी उत्थें पेदी गिदड़ी दे सिरे च चुब्भें दा ऐ उसगी तुप्पी कड्ढी दिता जा तां राज कन्या ठीक होई जाहग। तुप्पने पर गिदड़ी लब्धी ने उसदे सिरे थमां तीर कड्ढी देने परैन्त राजकुमारी ठीक होई गई। राजा एह चमत्कार दिक्खी खुश होआ ते उसने शिवमंदरै दा निर्माण करवाया। मंदरै दी पच्छमी कंधा पर गीदड़ी दे सिरे दी मूर्ति अज्ज बी बनी दे ऐ।

इक होर कथा मताबक इस मंदर गी चनैहनी दे 35 वें राजा रामचन्द ने बनवाया हा। इक बारी राजा ने शकार खेढदे गीदड़ी गी तीर मारेआ ते ओह मरी गई। राजा दे घर कन्या जरमीं जिसगी सिर पीड़ रौहदी। विद्वानें राजा गी हत्या दस्सी जिसदा दुख राजकुमारी गी होआ दा ऐ। राजा गी ओह घटना चेतै आई तां उ'नें प्रायश्चित्त करने गित्तै इक्कै जनेह त्रै मंदर बनवाए इक मंदर सुद्ध महादेव, दूआ कामेश्वर मंदर उधमपुर ते त्रीआ उमापति मंदर परमण्डल।

इ'नें मंदरें दे बाहर कंधा पर गीदड़ी दी मूर्ति बनी दी ऐ।

किश लोकें दा मत ऐ जे चनैहनी च अनताल राजें थमां पैहलें राणा जाति दा राजा हा। चनैहनी दे सभ्भनें थमां पैहले राजा गंभीर चंद ने उंदा

राज खुस्सी लैता। उधमपुर दा लाका बी चनैनी दा गै हिस्सा हा इसकरी होई सकदा ऐ जे इस मंदर गी उ'नें राजे बिच्चा गै कुसै ने बनवाया होग। एह् मंदर बड़ा पराना ते लोकें दी आस्था दा केन्द्र ऐ।

इस मंदर गी केई बारी नमां रंगरूप दिता गेआ। उधमपुर दे लाला फकीर सिंह होरें 13 पौह संवंत 1992 गी मंदर दी मरम्मत करवाई ते देविका घाट बी ठीक करवाए। ओह् शिव भक्त हे ते उ'नें मंदर च इक शिलालेख पर अपना नांS शिव सेवक लिखवाए दा ऐ।

मंदरै च त्रैमुखी रेतली पिंडी जमीन दे बराबर ऐ। ज्हारें बरिं थमां इत्थें लोक जल ढालने गी आवा दे न जेहड़ा झट्ट जमीन च खप्पी जंदा ऐ। विश्वास ऐ जे एह् पानी देविका च जंदा ऐ। इत्थूं दी खास गल्ल एह् ऐ जे इत्थें भैरों दी मूर्ति ऐ ते उधमपुर जटूं कोई मरदा ऐ तां देविका कंठै उसदे संस्कार थमां पैहलें रूकफनें दा थोहड़ा कप्पड़ा भैरों गी चाढ़ेआ जंदा ऐ ते पीपलै कन्नै ब'न्नी दिता जंदा ऐ। इसदा अर्थ ऐ मरने आह्ले दी भैरों कोल हाजरी। लोकें दा आक्खना ऐ जे इ'यां नेई करने पर मुर्दे गी अग्नि नेई लग्गदी। ऐसा इक राक्षस कन्नै वचन नभानै गितै कीता जंदा ऐ।

आखदे न पराने समें च इत्थें घनां जंगल हा। लोक इद्धर नेई हे औंदे। इस जंगलै च इक राक्षस रौहदा हा जेकर कोई इत्थें औंदा तां राक्षस उसगी मारी दिंदा। लोकें राक्षस गी विनती कीती जे ओह् बेकसुर लोकें गी नेई मारै। तां राक्षस ने गलाया जे रोज इक आदमी आपूं मेरे कोल आई जा तां में इ'यां नेई करंग। लोक मन्नी गे ते रोज इक माहनू उसदे कश जंदा। लोकें दा मन्नां ऐ जे अज्ज बी उधमपुर इक माहनू दी लोथ इत्थें औंदी गै ऐ। इत्थें संस्कार करने परैन्त अस्थि प्रवाह् बी लोक इत्थें गै करदे न की जे देविका गी गंगा दी निक्की भैन मन्नेआं जंदा ऐ।

मंदर च आप शम्भु शिवलिंग, उसदे सामनै कंधा पर बी भगवान शिव माता पार्वती गणेशजी ते बाकी देवी देवतें दियां मूर्तियां बनी दियां न। मंदर बड़ा शैल सजाया गेदा ऐ ते बेहड़े च पराने समें दे शिवलिंग, नंदीगण शिव पार्वती, हनुमान जी, गंगा मां, गुरु गोरखनाथ जी ते भैरों दियां मूर्तियां न। बरांडे

च पराने समें दा धूना ते मंहते दियां समाधियां न जेहड़े इत्थें गद्दी पर बैठे हे। देविका कंठै केई देवी देवताएं दे मंदर न। जनानियें लेई न्हौने गित्तै घाट बने दे न। पैहलें इत्थें 108 घाट हे पर हून गिनतरी बड़ी घट्ट ऐ।

किश चिर पैहलें कामेश्वर मंदर दे मुख्ख द्वार पर देविका मां दा मंदर बनवाया गेआ ऐ। जित्थें साधु सैंतें दे रौहने लेई कमरे बी बनाए गेदे न। शिवरात्रि, मस्सेआ, चैत्र चौदेआ, ते बाकी त्यहारें पर मती गिनतरी च लोक इत्थें औंदे न। कामेश्वर मंदर च बसाखी गी मेला बी लगदा ऐ। जेहड़ा त्रै दिन चलदा ऐ। पैहलें इत्थें बड़ी रौनक होंदी ही पर अज्ज ओह गल्ल नेई रेही दी।

उधमपुर दे लोकें दा मन्नना ऐ जे इत्थूं दी समृद्धि भगवान शिव दे आशीर्वाद कन्नै ऐ ते उंदी किरपा कन्नै गै इत्थूं दे बसनीक कश्तें थमां मुक्त होंदे न। ते घर खुशियें भरोचा होंदा ऐ।

०००

सुद्ध महादेव



एह तीर्थस्थान जम्मू थमां 120 किलोमीटर उत्तर पाससै चनैहनी तसील च ऐ। इत्थें होर बी पवित्तर थाहर न जि'यां गौरी कुण्ड मानतलाई, बुड्ढी सुद्ध, गौकरटि, वैनी संगम, दशाला, हरद्वार ते बुड्ढा केदार खास न। सुद्ध महादेव दे दर्शनें गित्तै औने आहले भक्त इंदे चा किश थाहरें दी जात्तरा गड्डी उत्थें तगर पुज्जने करी जरूर करदे न पर किश थाहरें पैदल जाने करी उंदी जात्तरा मुश्कल होई जंदी ऐ। सारा साल भक्त इत्थें औंदे न पर जेठ म्हीनें दी पुनेआं गी इत्थें मेला लगदा ऐ ते त्रै दिन चलदा ऐ। इत्थूं दी जात्तरा बी श्रीनगर च अमरनाथ आंहगर गै खास ऐ। इत्थें बी भक्त शिवजी दे दर्शन करदे न ते मनोकामनां पांदे न।

इस थाहरा कन्ने शिवजी दे चमत्कारें दियां केई कहानियां जुड़ी दियां न। देविका कंठै होने करी बी इत्थूं दा खास म्हत्तव ऐ। शिवजी दे पराने मंदर च इत्थें काले संगमरमर दियां माता पार्वती ते भगवान शिव ते गणेश जी दियां मूर्तियां न। इत्थें गै इक कोने च ओह शिवलिंग बी है जिसदी पुजा माता पार्वती

करदियां हियां। मंदरें दे सामनै खण्डित त्रिशूल त्र'ऊं हिस्सें च गड़ोए दा ऐ। बड़डा हिस्सा कोई 8 फुट्ट ऐ उस थमां निक्का 3 फुट्ट ते सब्भने थमां निक्का धरती बराबर ऐ।

इस त्रिशूल बारे केई कहानियां मशहूर न। इक कत्थ मताबक सुद्धमहादेव थमां अट्ट दस्स किलोमीटर पच्छम भेठा मानतलाई च राजा हिमालय राज करदा हा, उंदी थीऽ गौरी शिवभक्त ही। ओह शिव गी पति रूप च पाना चांहदी ही। ओह रोज मानतलाई थमां गौरी कुंड जाई स्नान करदियां ते फही घनें जंगला चा जाई शिवलिंग पर जल चढ़ादियां ते भगवान शिव दी पूजा करदियां। मुश्कल भामें मौसम होंदा जां जगंली जानवर ओह अपनी तपसया च कदें विघ्न नेई पौन दिंदियां। सुद्ध महादेव थमां दो किलोमीटर दूर इक ग्रां नाड़ा ऐ उत्थें सुद्धान्त नांऽ दा इक आदमी रौंहदा हा। ओह अपने जोरा कन्नै लोकें गी डराइयै रखदा हा। ओह गौरी गी रोज जंदे दिक्खदा ते उसगी रस्तै च बदनियती कन्नै तंग करदा। गौरी उसदी बुरी नजर थमां अपने आप गी बचांदी ते कुसै बी तरीके कन्नै उस थमां पिच्छा छुड़ाना चांहदी।

इक दिन गौरी अपनी भक्ति च मग्न ही तां सुद्धान्त उत्थें आई पुज्जा ते गौरी दी भक्ति च विघ्न पान लगी पेआ ते गौरी कन्नै जर्बदस्ती करन लगा। गौरी ने मना च गै शिवजी गी चेता कीता ते विनती कीती जे प्रभु मिगी इस दुष्ट थमां बचाओ ते इसगी इसदे बुरे कर्में दी स'जा देओ। गौरी दी विनती सुनी भगवान शिव गी गुस्सा आया ते उ'नें उत्थूं गै त्रिशूल मारेआ जेहड़ा सुद्धान्त गी लहुलुहान करी गोआ। भगवान शिव बी उत्थें प्रगट होए ते सुद्धान्त ने मरने कोला पैहलें अपने पापें दी प्रभु थमां क्षमा मंगी ते अपने आप गी खुशकिस्मत समझेआ जे भगवान दे हत्थें उसदी मृत्यु होई ऐ।

भगवान शिवजी गी उस पर क्यास आया उ'नें उसगी गलाया जे तेरा अन्त होए उस थमां पैहलें अपनी कोई इच्छेआ दस्स, में जरूर पूरी करंग। ओह बोल्लेआ प्रभु मेरी मुक्ति ते तुंदे हत्थें होई पर मिगी पापी गी दुनिया च कोई बी कदें चेता नेई करग। में चाहना जे तुंदे नांऽ कन्नै मेरा बी नांऽ लोक आदर कन्नै लैन।

भगवान ने उसगी वचन दित्ता जे औने आहले समें च एह थाहर सुद्ध महादेव दे नांऽ कन्नै जानेआं जाहग ते इक तीर्थ स्थान दे रूप च मशहूर होग। मेरे नांऽ थमां पैहलें लोक तेरा नांऽ बोलगन। इन्ना सुनदे गै सुद्धान्त दे प्राण पखेरू उड्ढरी गे।

सुद्धान्त कारण परेशान लोक उसदी मौती पर बड़े खुश होए। भगवान दी जय-जय करदे उसदी लोथा कोल पुज्जे। सब्भने त्रिशूल दी पूजा कीती ते अपने घरें गी परतोए इसदे परैन्त एह थाहर सुद्ध महादेव दे नांऽ कन्नै जानेआ जान लगी पेआ ते लोक इत्थें तीर्थ करन औन लगी पे। भगवान शिव गौरी दी भक्ति कन्नै खुश होए ते उ'नेंगी अपनी अर्धअंगनी बनाया। मानतलाई थाहर उंदा ब्याह होआ। इक मत एह बी ऐ जे सुद्धान्त बुरा माहनू नेई हा ओह् इस करी गौरी दी भक्ति च रुकावट पांदा हा तां जे गौरी शिव जी भक्ति च उस थमां अगमें नेई निकली जा।

इस त्रिशूल दी इक कहानी चनैहनी राज-परिवार कन्नै बी जुड़ी दी ऐ। इस वंश दे 35में राजा रामचन्द ने त्रिशूल दी खुदाई करवाई पर इसदा 'अ'खीरी सिरा नेई लब्भा। इक रातीं शिवजी राजा गी सुखने च लब्भे ते आक्खेआ हे राजा सब्भनें दी भलाई चाहन्ना तां खुदाई दा कम्म रोकी दे ते त्रिशूल दे उप्परले हिस्से कन्नै तलवार बनाई अपने कोल रक्ख ते उसदी नियम कन्नै पूजा कर। जदूं तगर तलवार तेरे कोल रौहग तुगी कोई हराई नेई सकग। राजा ने उ'आं गै कीता ते उसदी म्हेशां हर लड़ाई च जित्त गै होई। फही तलवार राजे दे कुसै रिशतेदार ने लेई ते उसदे बाद इसदे बारे किश थोह नेई लगगा।

सुद्धमहादेव मंदर उच्ची थाहर बने दा ऐ जिस तगर पुज्जने लेई 15 बीह पौड़ियां चढ़नियां पौंदियां न। उत्थें भगवान शिव, माता गौरी, गणेश, ब्रह्मा, विष्णु महेश दे दर्शन करियै मंदर दी पूरी परिक्रमा लैती जंदी ऐ जद के बाकी शिव मंदर च शिवलिंग दी अद्धी परिक्रमा होंदी ऐ। इस पराने मंदर दे अगमें गुरुगोरखनाथ जी दा मंदर ऐ। इक कमरे च बाबा रूपनाथ जी दे समें दी धूनी जला करदी ऐ। मंदर दे बेहड़े च बाबा रूपनाथजी, बाबा मिश्री नाथ जी, बाबा गोपालनाथ जी ते बाबा धूनी नाथ जी दियां समाधां न। नन्दी गण ते भैरों दी

मूर्ति दे इलावा इत्थं दे शिल्पकारें होरनें देवी-देवतें दियां मूर्तियां बी बनाई दियां न।

जोगी राज रूपनाथ जी सुद्धमहादेव तीर्थ दे पैहलें मैहत हे ते धूनीनाथ जी तेरहमें। मौजूदा मंदर ते सरांऽ चहनैनी दे राजें बनवाई उंदे परेंत डोगरा महाराजें इस भेठा खास ध्यान दिता। सरांऽ च चनैनी दे राजा रामचन्द्र, राजा केदारनाथ, राजा गजेन्द्रचन्द्र, राजा दयाल चन्द, राजा गगेचन्द्र, जम्मू कश्मीर दे महाराजा गुलाब सिंह, महाराजा रणवीर सिंह, महाराजा प्रतापसिंह, महाराजा हरिसिंह ते महाराजा कर्ण सिंह दे फोटू लगे दे न। नमीं सरांऽ बी बनाई गेदी ऐ पर उत्थें थाहर नेई होऐ तां भक्त परानी सरांऽ च राँहदे न ते केइयें गी खु'ल्ले च बी राँहना पाँदा ऐ। इ'नें मुश्कलें दे बावजूद बी भक्तें दी गिनतरी दिनो-दिन बधा करदी ऐ। इसदी जिम्मेदारी धर्मार्थ ट्रस्ट कोल ऐ पर विकास कमेटी बी बनाई गेदी ऐ। पर इत्थें कोई विकास नजरी नेई आँदा। गड्डियें दी पार्किंग नेई ऐ। सुद्धमहादेव, गौरी कुण्ड, पापनाशनी बौल्ली, मानतलाई ते दूए थाहरें जनानियें दे न्हौने लेई पर्दे दा कोई इंतजाम नेई है। जेकर सैलसफा विभाग इस बक्खी ध्यान देऐ तां भक्तें दी गिनतरी च बाद्धा जरूर होग।

०००

थान उधमपुर

बाबा इन्दो

बाबा इन्दो दा पवित्र थान उधमपुर दी तसील मझालता दे ग्रां गढ़-धम्मा च ऐ। बाबा इन्दो इत्थूं दे करसान हे। खेतीबाड़ी करदे ते शाम सवेरे पूजा पाठ च मन लांदे। इक बारी उनें इक बकरा पालेया जेहड़ा खूब तगड़ा ते शैल हा। उस बकरे दी पूरे लाके च खूब चर्चा ही। सधारण लोकें थमां गल्ल इत्थूं दे राणा तगर पुज्जी तां उंदे मना च बी बकरा दिक्खने दी इच्छा जागी। इक दिन ओह अपने सेवकें समेत बाबा इन्दो कोल आई पुज्जे ते बेहड़े बज्जे दे बकरे गी दिक्खी ओह बड़े खुश होए ते उसगी हासल करने दी उंदे मना च इच्छा होई। उनें अपनी मर्जी जिसलै इन्दो गी सनाई तां ओह खुशी कनै उसगी बकरा देने गी तेआर होई गै पर उनें उंदे शा वचन लैता जे ओह कदें बकरे दी हत्या नेई करडन। राणे ने वचन दित्ता ते बकरा मैहलें आई पुज्जा। किश चिरें परैन्त मैहले च कोई उत्सव हा ते होर कुतें धाम लेई बकरा नेई थोआ तां उनें उस बकरे गी मारी टकाया। बाबा इंदो गी जिसलै पता लग्गा तां ओह गुस्से ते पछताऽ च बेहाल होए दे राणे कोल मैहले जाई पुज्जे ते उत्थें जाई अपने आप गी आपूं खत्म करी टकाया।

राणे गी हत्या दा दोश लग्गा ते उसनै बावे गी मनाया। बाबे दा मोहरा स्थापित कीता ते इत्थें गै इक सौ इक बौलीयां बी बनवाईयां जेहड़ियां अज्ज नेई रेही दियां। बावे दे स्थान पर रेतले पत्थर कनै बनाया गेदा मोहरा बरजामान ऐ जित्थें लोक बरे च दऊं बारी फसल निकलने पर औंदे न ते हवन यज्ञ करदे न ते भंडारा बी कीता जंदा ऐ।

०००

उधमपुर थान

बाबा फितु

बाबा फितु दा स्थान तसील मझालता च स्थित ऐ। बाबा जी पंतैई दा कम्म करदे हे। अपने यजमानें दे बच्चे दे ब्याह कड़माई ते होरनें शुभ कम्में गी पूरी जिम्मेवारी कन्नै नभांदे। इक बारी उनें इक कुड़ी दा ब्याह करवाया पर उसदे सौहरियें चंगें नेई निकले ओह कुड़ी गी खूब मारकुट्ट करदे ते रोज तंग करदे। परेशान होई दी कुड़ी इक रोज चोरी गै अपने प्यौके आई गई। प्यौकिये जिसलै उसगी वापस सौहरे जाने दी तकीद कीती तां ओह नेई मन्नी। मते दिनें जिसलै परोहत होर उत्थें आए ते यजमानें गी मिले तां उनें कुड़ी दा किस्सा उनेंगी सनाया ते अर्ज कीती जे कुसा चाल्ली कुड़ी दा घर बसाओ। परोहत होरें कुड़ी गी समझाया ते कन्नै करी उसगी सौहरे छोड़न चली गै। जिसलै कुड़ी दे सौहरियें उसगी दिक्खेया तां उसगी मारन कुट्टन लगी पे परोहत होरें बड़ा समझाया पर ओह नेई समझे तां उनें गलाया जेकर कुड़ी गी तुस शान्ती कन्नै अपने घर नेई रखगे तां में इत्थें गै आत्मघात करी लैंग। उनेंगी परोहत उंदी गल्ल सिर्फ धमकी लगी ते उनें कुड़ी गी सताना बंद नेई कीता। परोहत होर उंदे पर इ'नें गुस्सा होए जे उनें उत्थें उंदे घर गै जाई अपने आप गी कटार मारी ते प्राणें दा त्याग करी दिता। उंदी मौती परैत घरैआहले गी ब्रहम हत्या लगी ते उनें बाबा जी गी मनाया ते उंदा स्थान बनाया। उंदे थड़े पर पलेतर, भरेआलता, मझालता बरोलता आदि ग्रां दे लोक कुसा बी शुभ कम्में मौके मत्था जरूर टेकन औंदे न। इत्थें हवन यज्ञ ते भंडारे दा अयोजन बी कीता जंदा ऐ। इत्थूं दे लोक इनेंगी कुलदेवता दे रूप च पूजदे न।

०००

थान उधमपुर

सनसू देवता

सनसू नाग देवता दा स्थान उधमपुर जिले दे रामनगर थाहरा पर ग्रां बडोई पद्धर च स्थित ऐ। देवता दे थान पर सौंगला न जिनेंगी उंदे रूप च पुजेया जंदा ऐ। इस स्थान पर त्रै पीपलें दे पराने बूहटे न ते इंदे कोल इक बौली ऐ। इत्थूं दे रजाडियें जाति दे ब्रैहमण इत्थूं दे पुजारी न ते देवता दे प्रति मती आस्था रखदे न। तदालिए ठौकर बी देवता गी बड़ी श्रद्धा कनै पुजदे न। लोके दा मनना ऐ जे एह देवता कुसा दी बी सुखन खाली नेई जान दिंदा। इत्थें आले दुआले दे ग्रां थमां लोक औंदे न ते मनोकामना पूर्ण होने दी सुखन करदे न ते फी इच्छेया पूरी होने पर अपनी सुखन चाढ़दे न। लोक मनदे न जे एह देवता, माल बच्छू, निक्के नेयाणे दी रक्षा करदा ऐ, ते जेहडा इनेंगी मनदा ऐ उसगी कदें कोई कमी नेई औंदी।

०००

थान उधमपुर

तनसू देवता

नाग देवता तनसू दा स्थान उधमपुर दे कुनेआ ग्रां च ऐ। लोकें दा मनना ऐ जे इस देवता दा थान पैहले डडूरा ग्रां च हा जित्थें डडवाल जाति दे लोक इनेंगी पूजदे हे। डडवाले गी जराल जाति दे लोक बड़ा तंग करदे ते बार-बार उनेंगी लुट्टी जंदे। डडवाल बड़े तंग रौहन लगे। इक बारी डडवालें दो युवा जेहड़े ताराकोट दे हे उनेंगी जगीर ते इनाम देने गी गलाया जेकर ओह जरालें गी उंदी थाहरा थमां कड्डी लान तां। कृष्णचंद ते कुलदीप दमैं भ्रा मन्नी गै ते इस थमां पैहले जे ओह लड़ाई पर जंदे उनें तनसू देवता दे मत्था टेकेआ ते अर्ज कीती जे ओह लड़ाई च जित्त हासल करडन तां वापस आई ओह मंदर बनागन। लड़ाई जिती परतोए तां उनें देवता दा नमां मंदर कुनियां ग्रां च बनवाया ते उंदे कुल ने तनसू देवता गी अपना कुल देवता मन्नेया। तनसू देवता दा बनाया गेदा मंदर सधारण निक्का जनैहा मंदर हा जिसगी तनसू देवता दा थान गलाया जंदा हा। 1980 च कुनेयाल ज्ञानचंद होरें लोकें दे साथे इक नमां मंदर बनवाया जित्थें देवता दियां मूल मूर्ति मजूद न। त्रै मूरतें च पैहलियां दऊं मूर्तां कुंडली मारे दे फन चुकदे नाग देवता न। दमैं इक अकार दियां न। बश्कार खंडित मती परानी मूर्ति ऐ। इत्थें गै घोड़े पर सवार ते हत्थें च तीर कमान लैते दे योद्धा दी छवि ऐ जिनेंगी लोक योद्धा कुलदीप चंद ते कृष्णचंद मनदे न। इत्थें गै इक कुंड ऐ जित्थें केई शिवलिंग मजूद न। इस देवता दे थान पर हर बरे हाड़ म्हीने दी पुन्नेया गी जातर होंदी ऐ जिस च ग्रां दे आदमी हिस्सा लेंदे न। जातर थमां पैहले कुल परोहत मूर्तियें गी स्नान करांदा ऐ, फल-फुल्ल चाढ़दा ऐ जिसलै गारड़ी मैत्र पढ़दा ऐ तां किश लोकें च देवता दा प्रवेश होंदा ऐ ते जातर शुरु होंदी ऐ। बरे च दऊं बारी इत्थें हवन यज्ञ कीता जंदा ऐ। इक जून म्हीने ते दुआ नबम्बर च। लोक आखदे न जे यज्ञ परैन्त इत्थें बरखा जरूर होंदी ऐ। तनसू देवता गी कुनेआं, पैथल ते डडूरा ग्रां च मान्यता प्राप्त ऐ। कुनेआ ग्रां च लगभग सारे लोक जिंदे च लुहार ब्रैहमण ते हरिजन सब्भै देवता गी मनदे न।

थान उधमपुर

रानी दी देहरी

1844 ई. दे मार्च महीने राजा सुचेत सिंह दे शहीद होने दी खबर जिसलै रामनगर दे मैहले च आई तां उत्थें रौहने आहली दौनें रानियें ते उंदी त्रीहें गोल्लियें उत्थें गै सती होने दा फैसला कीता ते सब्भै अग्नि ते सपुर्द होई गेईयां।

कुंवर रणवीर सिंह, राजा सुचेत सिंह दे दतक पुत्तर हे जिसलै ओह राजगद्दी पर बैठे तां उनें सती रानियें ते उंदी गोल्लियें दी देहरी बनवाई। रानी दी देहरी इक चबूतरे पर ऐ ते इसदी शैली प्हाड़ी ऐ।

०००

थान उधमपुर

लौण्डना देवता



नाग देवता लौण्डना दा थान उधमपुर दे रठियान ग्रां च ऐ। जरनैली शिड़का थमां एह थान अद्धा किलोमीटर दूर ऐ। लौण्डना देवता गी इक कथा मताबक शिवभक्त मनेया जंदा ऐ जेहड़ा धनख विद्या च बड़ा ब्हादर हा। इक दिन लौण्डना सुत्ते दा हा तां उसदे भ्रा ने उसदा ढोल चुक्केया ते भैन चीची पाससै गोआ। लौण्डना ने उठने परैंत दिखेया जे भ्रा उसदा ढोल लेई नस्सा करदा ऐ तां उसनै तीर कन्नै नशाना लाया ते भ्रा गी मारी दित्ता भैन बी सत्तें हिस्से च टोटे करी दित्ती जेहड़ी बाद च सत्त फ्हाड़ियां बनी गई। देवता दे थान आहली थाहरा गी मंडी गलाया जंदा ऐ जेहड़ी इक बयां दे बश्कार ऐ ते देवते दा मोहरा शिला रूप च उच्चे आसन पर रखेया गोदा ऐ।

इत्थें देवता दी मूर्ति च इनेंगी घोड़े पर सवार इक हत्थें च तलवार ते दुयै हत्थे च ढाल ऐ। उप्पर चांदी दा छत्तर ऐ। दौनें पाससै त्रै त्रिशूल न जेहड़े लगभग इक मीटर लम्में न। निक्के अनगिनत त्रिशूल बी इत्थें रखे गेदे न। मूर्ति दे खल्ल छै: नाग न ते खब्बे पाससै देवता दे झुण्डे न जिनेंगी जातर मौके लैता जंदा ऐ। मूर्ति कोल कुंडली मारियै बैठे दे नाग दी मूर्ति ऐ। देवथान पर इक निक्की चौकी ऐ ते अंदर नाग देवता अपने मूल रूप मूर्ति च बराजमान न।

इसैगी देवता दा मूल रूप मन्नेया जंदा ऐ। थान कोल गै इक जल कुण्ड ऐ जेहड़ा भरोचे दा रौहदा ऐ ते जेहड़ा पानी बाहर औंदा ऐ ओह् दऊं बौलिये च जाई पौंदा ऐ। भक्तें दा भरोसा ऐ जे इनें बौलिये च न्हौने कन्नै संतान प्राप्त होंदी ऐ। देवता दे थान पर यज्ञ हवन बरे च इक बारी जेठ हाड़ म्हीने कीता जंदी ऐ। ज्हारें बद्धे भक्त इस मेल च किट्ठे होंदे न। लोक जागतें दे मुन्नन इत्थें करदे न ते फी पंत परोहतें गी ते लोकें गी रुट्टी खलाई जंदी ऐ। इत्थें जातर बी बरे च इक बारी हुंदी ऐ ते फी इसदे दुए दिन इत्थें कुशती दा अयोजन कीता जंदा ऐ मती गिनतरी च लोक इत्थें कुशती दिक्खन औंदे न। इत्थूं दे नाड़ ठौकर, जगेटरे ठौकर ते सलन जात दे ब्रैहमण इनेंगी अपना कुल देवता मनदे न। दुबे जाति दे ब्रैहमण इस देवता दे पजारी न।

०००

थान उधमपुर

सौतल देवता

उधमपुर दे गलेआते ग्रां च सौतल देवता दा स्थान स्थित ऐ। इस देवता पर लोकें दा बड़ा पक्का विश्वास ऐ। जेकर कुसा दे घर चोरी होई जा तां ओह सौतल देवता दे जाई मत्था टेकदा ऐ। ते चोर लेई इस थमां पैहले घोषणा कीती जंदी ऐ जेकर चोर समान वापस नेई करग तां सौतल देवता दी क्रोपी उसगी सैहन करनी पौग। इस्सै कारण इस क्षेत्र च चोरी बड़ी घट्ट होंदी ऐ। लोक विश्वास ऐ जे देवता फरियादी दी फरियाद सुनदा ऐ ते उसगी सजा बी दिंदा ऐ। देवता दे मोहरे दी स्थापना मंदर दे अंदर होई दी ऐ। एह मंदर पंद्रा मीटर लम्मा ऐ ते इसदी कंधे पर सप्प बनाए गेदे न।

०००

थान उधमपुर

टुंडी देवता

टुंडी देवता दा स्थान उधमपुर दे कोल तवी कनारे स्थित ऐ। एह थाहर उधमपुर थमां दो किलोमीटर दे शिंडे पर ऐ। इस स्थान पर देवता दा देहरा मजूद ऐ जिसगी लोक बड़ी आस्था कनै पुजदे न। शिखंडी ब्रैहमण इनैंगी अपना कुलदेवता मनदे न। ते इय्यै ब्रैहमण इंदे पुजारी बी एह न। इयां ते इत्थें सब्भै लोक श्रद्धा रखदे ने पर खासकरी शिखंडी ब्रैहमण इत्थें नमें अनाज दे औने पर, ब्याह पर, मुन्नने पर म्हेशां देवता गी चैता करदे न। नमीं फसल औने पर पैहले देवता दे चाढ़दे न। इत्थूं दे सब्भै लोक इस थाहरा प्रति मती आस्था रखदे न।

०००

थान उधमपुर

कुदद देवता

कुदद देवता दा थान कुदद थमां दऊं किलोमीटर दूर इक प्हाड़ी पर स्थित ऐ। इत्थें देवता दा इक प्राचीन देहरा ऐ ते इत्थें देवता दे झुण्डे ते त्रिशूल बी मजूद न। हर बरे इत्थे लोक बड़ी श्रद्धा कन्नै किट्ठे होंदे न ते देवता दी जातर बी उस रोज इत्थें कीती जंदी ऐ। नमीं फसल औने पर लोक सब्भने थमां पैहले इत्थें चाढ़दे न ते फी आपूं बरतदे न। लोक विश्वास ऐ जे देवता अपने चमत्कार बैल्ले-बैल्ले पर दस्सदा ऐ ते इनें चनैनी दे राजा करतार चन्द दे ब्याह पर बी अपना चमत्कार दस्सेया हा। इत्थें हर बरे भण्डारा हुंदा ऐ ते कुड्ड दा बी सरिस्ता कीता जंदा ऐ।

०००

थान उधमपुर

मनडोरा देवता

मनडोरा देवता दा पवित्र स्थान उधमपुर दे लड्डा ग्रां च मनडोरा फ्हाडी पर ऐ। फ्हाडी पर इक जलस्रोत कोल देव स्थान ऐ। इत्थें देवता पिंडी रूप च न। लोकें दा मनना ऐ जे पिंडी दा अकार हर बरे बधदा रौहदा ऐ। पिंडी कोल देहरा ऐ। इत्थें किश होर मूर्तियां बी एह् न। लाड राजपूत इत्थूं दे पजारी न। पिंडी गी पूजा थमां पैहले शनान इत्थें बगने आहले पानी कन्नै कराए जंदे न ते जंगली धूफ कन्नै पुजा कीती जंदी ऐ। इत्थूं दे लोकें मताबक इस देवता दा पराना स्थान पस्सी हेठ औने करी अदृश्य होई गेआ फी कुसा भक्त ने अपनी भक्ति दी शक्ति कन्नै इनेंगी बाहर आंहदा ते लाड़ जाति दे लोक इनेंगी पालकी च पाई ग्रां औन लगे तां मनडोरा फ्हाडी पर वर्तमान मंदर दे थाहर पर पालकी जुट्टी गई ते देवता दी पिंडी धरती च अन्दर तगर गई उठी। लोकें इत्थें गै देहरा बनाया ते पुजा अर्चना शुरू करी दिती। देवता दा चमत्कार ऐ जे हर बरे एह् पिंडी थोडी उप्पर होई जंदी ऐ। लोकें गी इस थाहरा प्रति मती आस्था ऐ।

०००

थान उधमपुर

गौरी कुंड

गौरी कुंड चनैनी थमां 14 किलोमीटर दूर ऐ। ग्रां बच्छल थमां गौरी कुंड अद्धा किलोमीटर दी दूरी पर ऐ। एह् रस्ता प्राकृतिक नजारें कन्नै बड़ा मनमोहक लगदा ऐ। इस रस्ते च बौलियां ते रस्ते दे सज्जे पाससै जलधारा बगदी ऐ। इत्थें गै बड़ी शैल मूर्तियां बी बनी दियां न। एह् मूर्तियां काले पत्थर कन्नै बनी दियां न। इत्थें पौड़ियें आहलें रस्ते पर लाल ते चिट्ठी भुरपुरी चट्टानां न जिनेंगी सुहान्त राक्षस दा दिल ते अस्थियां मन्नेया जंदा ऐ। पोढियां चढ़ने परैन्त गौरी कुंड आई पुज्जदे न। इत्थें सिद्दी इक चट्टान थमां जलधार



इक कुंड च पौंदी ऐ इसगी गौरी कुंड गलांदे न। लोक विश्वास मताबक पार्वती इस कुंड च श्नान करी कोल गुफा च शिवजी दी भक्ति करदी ही। उनें शिवजी गी पति रूप च पाने लेई इत्थें अराधना कीती। गौरी कुंड थमां गौरी गुफा तगर जाने लेई पोड़ियें आहला रस्ता ऐ। किश पोड़ियें परैन्त इत्थें नंदी दी मूर्ति ऐ ते फी अगें गणेश जी दी मूर्ति ऐ उसदे उप्पर भैरों दी मूर्ति ऐ फी इत्थें इक निक्का जनेहा मंदर ऐ जित्थें शिव पार्वती दी मूर्ति ऐ। इत्थें कोल गै गुफा ऐ। एह् गुफा अट्ठ फुट चौड़ी ते उन्नी फुट चौड़ी ऐ। इस च 15 भक्त किट्ठे बेही सकदे न। गुफा अंदर इक सिंह सोआर गौरजा दी काले पत्थर दी मूर्ति ऐ जिसगी परानी मूर्ति मन्नेया जंदा ऐ। जम्मू कश्मीर ट्रस्ट ने इस थाहरा गी अपने संरक्षण च लैते दा ऐ।

०००

छेमां ध्याऽ :

जिला रियासी दे धार्मिक ते सांस्कृतिक थाहर

रियासी

रियासी जिला जम्मू थमां अस्सी किलोमीटर दी दूरी पर ऐ। एह् प्हाड़ी लाका होने करी बड़ा गै शैल लाका ऐ। इसदा पराना नां भीमगढ़ हा। इत्थूं दे ग्राम देवता भीमसेन दे नां पर गै इस थाहरा दा नां रखेया गेदा हा। अज्ज एह् थाहर रियासी दे नां कन्नै मशहूर ऐ पर इत्थूं दे किले गी हून बी भीमगढ़ करी कुआलेया जंदा ऐ। किले अंदर भीम देवता दा मंदर ऐ। इतिहासकारें मताबक रियासी सन् 1195 ई. च अदूं वजूद च आई जंदू उदयपुर मेवाड़ दे राणा रसपाल ने अपने नां कन्नै इसगी बसाया। फी रसपाल थमां बिगडदे-बिगडदे एह् नां रियासी होई गेआ। राणा रसपाल ने रियासी गी सलाल, गुलाबगढ़ अखनूर तगर फलाया।

महाराजा रणवीर सिंह दे राज मौके रियासी गी जिले दा दर्जा हासल हा पर अजादी परेंत इसगी तसील बनाई दिता गेआ ते रज्हार सत्त च इसगी फी जिले दा दर्जा हासल होई गेआ। इत्थें सब्भनें धरमें दे लोक रलीमिली रौहदे न। इत्थें मते सारे दिक्खने जोग थाहर न जिं'दे च जोरावर सिंह दा किला, भीमगढ़, भारतमाता दा मंदर, शीतला माता मंदर, महादेव मंदर, सेआऽ बावा, बाबा धनसर आदि प्रमुख थाहर न।

०००

रियासी मंदर

महादेव मंदर रियासी

रियासी च आप शम्भु मंदर लोके दी आस्था दा खास थाहर ऐ। एह मंदर रियासी च बार्ड नौ च स्थित ऐ। लोके दा मन्नना ऐ जे इत्थें साक्षात शिव मजुद न। इत्थें कीती गेदी कोई बी सुक्खन खाली नेई जंदी।

पैहले एह लाका घना जंगल हा आम लोक इत्थें घट्ट गै औंदे जंदे हे। इत्थूं दे इक जगीरदार दी गौ दुद्ध नेई दिंदी ही। रोज बड्डलै गौ खोल्ली दिंदे तां ओह जंगल चरने गी जंदी उठी। इक दिन जगीरदार दे घरैआहले गवा दा पिच्छा कीता जे खबरै कोई गवा दा दुद्ध चोरी चोई लैदा ऐ। जंगल च उनें दिक्खेया जे गौ रोज इक शिवलिंग कोल जाई खडोंदी ऐ ते उसदे थने थमां आपमुहारी दुद्धे दी धार शिवलिंग पर जाई पौंदी ऐ। उनें उत्थें जे किश दिक्खेया ग्रं जाई सब्भने गी सनाया, सारे किट्ठे होई जंगल गै तां उनें उत्थें आप शम्भु गी प्रणाम कीता ते उत्थें इक मंदर बनवाई दित्ता। मंदर पूरा होने पर लोके उत्थें वसाखी आहले ध्याड़े इत्थें हवन यज्ञ कीता। अदूं थमां गै इत्थें बसाखी गी मेला लग्गदा ऐ ते लोक हवन यज्ञ करी लंगर खंदे न। इत्थूं दे बसनीक मता चिर इस मंदर दी देखभाल ते धार्मिक अनुष्ठानें दा अयोजन करदे रेह पर हून श्री माता वैष्णो देवी श्राइन बोर्ड इसदी दिक्ख-रिक्ख करदा ऐ।

इस मंदर बारै देसराज होरें सनाया जे जनरल जोरावर होरें इत्थें लगने आहले मेले गी विजयपुर अपने मैहल च लोआई लेआ तां इत्थें मंदर च मजुद शिवलिंग च आपूं दरेड़ आई गेई ते उत्थूं खून निकलन लग्गी पेआ। जिसलै जोरावर सिंह गी घटना दा पता लग्गा तां उनें मंदर आई आप शम्भु थमां माफी मंगी ते मेला परतियै इत्थें लग्गन लग्गी पेआ। शिवलिंग पर जदूं दरेड़ आई तां

लोके जल ढालने, बिल पत्तरी चाढ़ने, फल्ल फुल्ल चाढ़ने कन्नै शिवलिंग पर मक्खन लाना शुरू करी दित्ता ते अदू थमां एह् रीत चली आवा करदी ऐ। सौन म्हीने इत्थें मत्था टेकने ते जल चाढ़ने दा खास म्हत्व ऐ। सौन म्हीने दे हर सोमवारें लोक मती गिनतरी च इत्थें औंदे न ते मत्था टेकी शिवजी थमां आशीर्वाद हासिल करदे न।

०००

थान रियासी

बाबा पुरो

बाबा पुरो दा थान रियासी दे ग्रां संगेतर कोल अंजी नाले दे कंढे पर ऐ। बाबा पुरो ब्राह्मण हे ते ओह रसियाल जात दे राजपुते दे कुल परोहत हे। बाबा पुरो शान्त ते भोले भाले स्थाऽ दे मालक हे। पुजा पाठ करना ते बाँसरी दी मिट्ठी तान लाना उंदा खास गुण हा। अपने कर्मे थमां बैहले होंदे तां बाँसरी जरूर बजांदे। कोई बी उंदी बाँसरी गी सुनने दी मिन्नत करदा तां ओह झट्ट बजान लगी पौंदे। मर्द माहनूये दे कन्नै गै जनानियां बी उंदी बाँसरी दी तान सुनने गितै बलगदियां ते मौका थहोंदे गै बाबा पुरो गी बाँसरी बजाने गितै फरमैश करदियां। इक बारी राजा गी कुसा ने बहकाया जे जिसलै मैहले च मर्द नेई होंदे तां पुरो रानिये दे मैहले च जाई बाँसरी बजांदा ऐ ते रानिये कन्नै रास रचांदा ऐ। राजा गी बडा क्रोध आया ते रसियाल राजे ने सब्भने मर्दे गी कन्नै लेआ ते शकार खेढन जाने दे बाहने कोल गै कुतै छप्पी गै। जिसलै दपैहरी पुरो दी बाँसरी दी बाज सुनी तां उसदी हत्या करी दित्ती। सच पता लग्गने पर रसियाल बडे पछताये। ब्राह्मण हत्या दे दोष थमां बचने लेई उनें पुरो दी मान्यता कीती ते उसदा थान बनाई देहरा बी बनवाया। जित्थे पुरो दा थान ऐ उत्थे पानी दियां बाँलियां बी एह न। कोल गै मते रुक्ख बुहटे बी एह न जिंदे च अम्बा दे ते बड़ दे बुहटे बी एह न। रसियाल राजपूत ते कुखाल जाति दे ब्रैह्मण इंदी बडी मानता करदे न ते कुखाल ब्रैह्मण इनेंगी अपना कुल देवता बी मन्दे न।

०००

थान रियासी

बाबा धनसर मंदर



जम्मू थमां 50 किलोमीटर दूर कटड़ा रियासी जरनैली शिड़का दे खब्बै पाससै तसील रियासी दे कोरुआ ग्रां च इक पवित्र थाहर ऐ जेहड़ा बाबा धनसर दे नांऽ कन्नै मशहूर ऐ। इत्थें बाबा धनसर दा मंदर ते शिव गुफा ऐ। इत्थें लोक दर्शनें गित्तै औंदे न ते इत्थूं दे शलैपे गी मन बसाई लैंदे न।

शिव मंदर तगर पुज्जने लेई पैहलें पानी बिच्चा जाना पौंदा हा पर हून लैंटर पाई रस्ता पक्का करी दिता गेदा ऐ। इस गुफा च भगवान शिव माता पार्वती ते गणेश जी दियां प्राकृतिक मूर्तियां न। फ्हाड़ा थमां बूंद-बूंद जल शिवलिंग पर पौंदा ऐ इत्थूं किश दूर बाबा धनसर दी पिंडी ऐ। बाबा धनसर शेषनाग दे अवतार मन्ने जंदे न। भक्त इत्थें अपनी मनोकामना पूरी होने पर सुन्ने चांदी जां लोहे दे नाग चाढ़दे न। कंधा दे कन्नै-कन्नै स्थानी शिल्पकारें बाबा धनसर दे चित्तर बनाए दे न जेहड़े इस गल्ला दा सबूत न जे जम्मू च बड़े बेहतर शिल्पकार पराने समें च बी है हे।

मंदर दे पुजारी हुंदे मताबक बाबा धनसर दा एह मंदर बड़ा पराना ऐ, उ'नें अपने बर्जुमें थमां सुने दा ऐ जे एह लाका घना जंगल हा। इत्थें राक्षस रौंहदे हे जेहड़े लोके गी बड़ा सतांदे हे।

राक्षसों दे जुल्में थमां तंग आई उत्थूं दे लोक ते तपस्वी साधु बावा धनसर दे पिताजी कोल गे। आखदे न जि'यां ऋषि विश्वामित्र दी प्रार्थना पर राजा दशरथ ने राम ते लक्ष्मण गी उंदे कन्नै भेजी दित्ता हा उ'आं गै बावा धनसर दे पिता ने अपने पुत्र गी लोकें दे दुख मटाने लेई उत्थें भेजी दित्ता। बावा धनसर ने अपनी शक्ति कन्नै उ'नें राक्षसों गी खतम करी उत्थें शांति स्थापित कीती। उत्थूं दे लोक उ'नेंगी अपना कुलदेवता मन्नी उंदी पुजा करन लगी पे। अज्ज बी लोक उ'नेंगी चैता करी उंदी पूजा अर्चना करदे न। नमें ब्याहनू जोड़ें गी इत्थें मत्था टेकन आंहनदे न। आखदे न शरीर छोड़ने परैन्त बावा जी इत्थें पिंडी रूप च प्रगट होए। उंदी पिंडी इत्थें ऐ ते मूर्ति उप्पर ग्रां च ऐ। ओह नागरूप च झील च बी रौंहदे न ते कदें भक्तें गी दर्शन बी दिंदे न। शुरू च सिर्फ ग्रां आहले इत्थें औंदे हे पर बल्लें-बल्लें होर थाहरै दे लोक बी इत्थें औन लगी पे।

इत्थें स्नान करने कन्नै शरीर दे केई कश्ट मिटदे न। बेऔलाद लोकें गी औलाद प्राप्त होंदी ऐ। बावा जी गी याद करने आहले कदें दुखी नेई रौंहदे। इत्थूं दा चरणामृत दे प्रसाद केई दुख दुर करदा ऐ। मंदरै च हवन कुंड ऐ जित्थें त्यहारें गी हवन कीता जंदा ऐ। आखदे न पैहलें फाड़ै थमां दुधिया पानी डि'ग्गदा हा पर हून पानी दा रंग बदली गेदा ऐ। मंदर कन्नै लगदे जंगलें च केई चाल्ली दे बूहटे न जि'यां सिम्बल, कैम्बल, भलुंगड, रमेल, तुनु, वीरम्बल, बेड़ा, पीपल, बिलन (बिल पतरी) आदि। इत्थें पूरा साल हरियाली रौंहदी ऐ। गर्मी च इत्थें ठंडू कारण खास भीड़ रौंहदी ऐ। इत्थूं दा पानी सदी च गर्म ते गर्मी च ठंडा रौंहदा ऐ।

इत्थें आले दुआले केई पराने बूहटे न। इस थाहरा गी बनी (निक्का जंगल) बी आखदे न। इत्थें कोई बी बूहटा जां बूहटे दे पत्तर आदि नेई बड्डी सकदा। आखदे न इक बारी कोई इत्थूं बूहटे थमां डाहलियां घर लेई गेआ तां जमीन पर रखदे गै ओह नाग बनी गेइयां। उसने बावे दे आई मत्था टेकी माफी मंगी। इत्थूं सिर्फ सुक्की लक्कड़ी जेह्डी हवन जां संस्कार लेई लोड़चदी होऐ उ'ऐ लेई जाई सकदी ऐ।

इक बारी इक चरोआल इत्थें बावे दी बनी च अपने भिड्ड बक्करियां चारदा हा सब्भने ठाकेआ पर ओह नेई मन्नेआं। उसदियां बकरियां खाई च

डि'ग्गी मरन लगी पेइयां तां उसने मत्था टेकी क्षमा मंगी उसलै गै उसदियां बक्करियां जीवित होई गेइयां। इत्थें रस्ता बनाने पुली बनाने पर लोहे दे जंगलें बनाने पर लक्खा रपेआ खर्च कीता गेदा ऐ हून अगें बावा जी दियें पिंडियें पर मंदर बनाया जाग तां जे भक्तें गी पिंडियें दी पूजा करने च मुश्कल नेई होऐ। शिड़का थमां मंदर तगर डेढ़ किलोमीटर रस्ता द'ऊं ब'रिं दी चढ़तर कन्नै बनाया गेदा ऐ।

भगवान शिवजी दी गुफा बारे आक्खेआ जंदा ऐ जे इत्थें इक महात्मा ने तपस्या कीती, केई ब'रे ओह् इत्थें रेह्। इक दिन भगवान शिव ने उ'नेंगी दर्शन दित्ते। महात्मा ने ग्रां दे लोकें गी सनाया ते गुफा च भगवान शिव, माता पार्वती ने गणेश जी दियें पिंडियें दे दर्शन करवाए ते आक्खेआ हून तुसेंगी दूर जाने दी लोड़ नेई भगवान शिव इत्थें गै तुंदे दुख दूर करंगन। गुफा लोकें दे हवाले करी महात्मा जी उत्थें कुतै चली गै।

इस थाहरा दे म्हत्तव गी दिखदे होई श्राईन बोर्ड ने इत्थें इक सरांऽ बनाई तां जे यात्री इत्थें सुख कन्नै रेही सकन। पुजारी जी खाने पीने दा लोकें दा सारा प्रबन्ध करदे न। माता वैष्णो दे यात्री बी इत्थें आई रौंहदे न। इत्थें बावा धनसर ते शिवजी दे दर्शन करने गितै आए दे भक्त शांति प्राप्त करदे न। हर सोमवार इत्थें भंडारा करदे न। नमीं फसल होने पर इत्थें भंडारा बी कीता जंदा ऐ। लोक नमीं फसल औने पर पैहलें अनाज इत्थें चाढ़दे न। शिवरात्रि पर इत्थें मेला लगदा ऐ ते अदूं बड़ी रौनक होंदी ऐ सारा सरोवर फल फुल्लें कन्नै भरोची जंदा ऐ। सारा वातावरण भगवान शिव ते बावा धनसर दे जयकारें कन्नै गूंजदा ऐ। भक्त सरोवर च स्नान करी शिवलिंग ते बावा धनसर दे दर्शन करदे न।

इत्थें औने लेई जम्मू कटड़ा थमां बस थ्होई जंदी ऐ। जेकर सैलसफा मैहकमा इस भेठा ध्यान दे तां इत्थें भक्तें दी गिनतरी च बद्धा होई जाहग तां इस पिछड़े दे लाके दा विकास होई सकग।

०००

रियासी मंदर

वैष्णो देवी मंदर



महिषासुर दे डरा कनै देवी देवताए डर कनै अपनी सामूहिक शक्तियां इक करिये जिस कन्या गी शक्तिशाली बनाईयै कष्ट निवारणी माता दे रूप च धरती पर पेजेआ ओह महाशक्ति शतश्रंग फ्हाड़ा बकखी रवाना होई गई।

त्रिकुटा फ्हाड़ें दी गुफा च माता वैष्णो देवी दे दर्शन त्रुं पिंडी रूपें च हुंदे न। एह पिंडियां देवी महाकाली, देवी महालक्ष्मी ते देवी सरस्वती दियां न। माता दे एह त्रवे रूप रज, तम ते सत्व गुणें दे प्रतीक न। माता वैष्णो देवी देवतायें दे तेज थमां उत्पन्न महाशक्ति दा रूप ऐ।

इक कथा मताबक असुर रम्भ दे पुत्तर महिषासुर ने जिसलै साधु संतें, ऋषि मुनियें ते देवी देवतायें गी तंग करना शुरू कीता तां सब्भनें देवी देवतायें ब्रह्मा ते शिव दी अगुआई च भगवान विष्णु कोल गै ते अपना कष्ट सनाया ते महिषासुर तंग करा करदा ऐ, असेंगी उस थमां बचाओ तां भगवान विष्णु बोले जे सब्भनें देवतें दियां शक्तियां प्राप्त करी जेहड़ी महाशक्ति हौग उयै महिषासुर दा खात्मा करग। सब्भने देवतायें भगवान विष्णु दी गल्ल मन्नी लेई।

सबभने थमां पैहले भगवान विष्णु दे मूहां थमां तेज प्रगट हौआ ते फी इयां गै सबभने देवतायें दे शरीर थमां तेज प्रगटें ते अंत च सबभै तेज इक होईयै इक नारी रूप च आए। सबभने देवतायें देवी दी स्तुति कीती। भगवान शिव ने त्रिशूल, भगवान कृष्ण ने चक्र, वरूण ने शंख अग्नि ने शक्ति, मरूत ने धनखबाण, रूद्राक्ष ते कमंडल भेंट कीता, सुरज ने किरणा, काल ने ढाल तलवार, समुद्र ने कपडे ते गैहने, विश्वकर्मा ने फारसा, कुबेर ने सुरापूर्ण पात्र, शेषनाग ने नाग हार ते हिमाचल ने शेर ते केई रत्न भेंट कीते।

शतश्रृंग फ्हाड़ पर माता किश चिर आदकवारी रेही ते फी महिषासुर दे संहार परैत त्रिकुटा दी वर्तमान गुफा गी अपनी तपस्या दा थाहर बनाया। ब्रह्मा दे आक्खने पर माता ने श्वेत, रक्त ते शाम रंग त्रै पिंडियें च रूप धारण कीता, ब्रह्मा दे अंश कन्नै माता सरस्वती, विष्णु थमां महालक्ष्मी ते शिव थमां महाकाली। इस चाल्ली आदिकाल थमां गै देवी पुजा दी शुरूआत होई। कृष्ण, ब्रह्मा, महादेव ते इन्द्र देवता सबभने देवतायें माता दी पूजा कीती। 1672 ई. च सिखें दे दसवें गुरु गोविंद सिंह जी ने भी माता दे दर्शनें गितै इत्थें जातरा कीती।

कटरा थमां माता दे दर्शनें गितै उत्तर दिशा च त्रिकुटा फ्हाड़िये पर 13 किलोमीटर पैदल रस्ता तय करी माता दी पवित्र गुफा ऐ। जित्थें माता त्रुंड पिंडी रूप च विराजमान ऐ जित्थें भक्त दर्शनें गितै बरा भर औंदे न।

कुसा समें भारत च दुर्गम नां दा इक राक्षस लोके गी अत्याचारें कन्नै परेशान करा करदा हा उनें देवतायें गी बी अति तंग कीते दा हा। इस मौके माता दिव्य शक्ति ने दुर्गसेनी दे रूप च अवतार लेआ ते दुर्गम दा नाश करी सबभनें दी रक्षा कीती माता दी उस शक्ति गी भक्तें दुर्गा नां दित्ता ते उंदी पूजा करदे न। जिसलै कैटभ ते मधु नां दे राक्षसे विष्णु कन्नै युद्ध की तां महामाया ने अपने चमत्कार कन्नै दौनें महाबली राक्षसें दा नाश कीता तां माता महाकाली खुआई।

माता दी शक्ति पर सबभै भक्त पूरी आस्था रखदे न ते देश दे कोने कोने थमां दर्शनें गितै कटरा पुज्जदे न। नरातें च भक्तें दी गिनतरी होरनें दिनें थमां मती बद्ध होई जंदी ऐ। माता दी गुफा च जाने थमां पैहले भक्तें गी इक बड्डे

पत्थर परा लंघना पौंदा ऐ जिसगी भैरों दा धड़ मनेआ जंदा ऐ। जित्थें भैरों दा सिर पेआ उत्थें भैरों मंदर ऐ। मरने थमां पैहले भैरों ने माता थमां माफी मंगी तां माता ने वरदान दित्ता उस्सै भक्ता दी यात्रा सफल होग जेहड़ा मेरे दर्शनें परैत भैरो दे दर्शन करग। तां गै भक्त माता दे दर्शन करने परैन्त भैरों घाटी जंदे न। माता दी शक्ति पर उसदे भक्त अपार विश्वास रक्खदे न।

पैहले सुविधा घट्ट होने करी भक्तें गी भामें किश परेशानी हुंदी ही पर हून 1986 थमां इस पवित्र स्थान दा प्रबंधन माता वैष्णो देवी श्राईन बोर्ड कोल ऐ ते मता सारा वकास इत्थें हौआ ऐ।


०००

रियासी मंदर

शिव खोड़ी

जम्मू च केई थाहरें गुफाएं च पवित्र शिवलिंग दे रूप च भगवान शिव दे दर्शन होंदे न। जि'नें गुफाएं च शिव खोड़ी गुफा दा खास म्हत्तव ऐ ते इस कन्नै केई धार्मिक कथां जुड़ी दियां न।

एह गुफा जम्मू थमां 125 किलोमीटर दूर जि'ला रियासी दे ग्रां रन्सू थमां त्रै किलोमीटर दूर हरे-भरे प्हाड़ें पर स्थित ऐ। भगवान शिव दा एह पवित्र थाहर भक्तें दी आस्था दा खास थाहर ऐ। हर ब'रै इत्थें औने आहले भक्तें दी गिनतरी च बाद्धा होआ करदा ऐ। इत्थूं तगर पुज्जने लेई त्रै किलोमीटर दा रस्ता जंगल



ते प्हाड़ी थमां जंदा ऐ। रस्ता तैऽ करदे शिव भक्त उसदे चमत्कारें दा अनुभव करदे न। रस्ते च बौल्लियां, झरने बड़े शैल लगदे न ते किश भक्त इत्थें स्नान करदे जंदे न। रस्ते च केई देवी-देवतें दे मंदर ते महात्माएं दियां समाधियां न। पैदल रस्ता खत्म होंदे गै पौड़ियां शुरू होंदियां न जि'नें दिक्खदे गै भक्तें दा थकेमां दूर होई जंदा ऐ।

शिव भक्त कतारें च खड़ोई हत्थें च फल फुल्ल लेई अपनी बारी गी बलगदे न। पौड़ियें कोल गै हवन कुंड ऐ जित्थें हवन यज्ञ कीते जंदे न। डोगरी भाशा च खोड़ी गुफा गी आक्खदे न ते गुफा च शिवलिंग ऐ इस करी इसगी शिवखोड़ी गलाया जंदा ऐ। एह गुफा सौ मीटर लम्मी ऐ। शुरू च गुफा खु'ल्ली

होने करी उत्थें मते भक्त खड़ोई सकदे न। इत्थें गै मैह्त रमेश गिरि दा तपस्या आह्ला थाहर ऐ ते धूना बी है ऐ। शिवलिंग दे दर्शन करने परैन्त भक्तें गी इत्थूं दी बभूत दिक्ती जंदी ऐ। पैहलें एह् गुफा बड़ी तंग ही ते अंदर न्हेरा हा पर हून इत्थें लोऽ दा इंतजाम ऐ ते गुफा थमां गंदी हवा बाहर जा उठी इस लेई पक्खे बी लाए गेदे न। स्वयं सेवक ते पुलिस भक्तें दी मदद लेई अगें रौंहदे न। अंदर पुजारी जी भक्तें गी इत्थूं बारे पूरी जानकारी दिंदे न।

गुफा दे सामने कोई त्रै-चार सौ भक्त खड़ोई सकदे न। इत्थें प्राकृतिक शिवलिंग दे दर्शन होंदे न। शिवलिंग त्रै फुट्ट उच्चा ऐ। शिवलिंग दे आले-दुआले भक्तें दे खड़ोने दे थाहर संगमरमर लाया गेदा ऐ। शिवलिंग दे सज्जे पाससै माता पार्वती ते गणेश जी दियां आप मुहारी मूर्तियां न। गुफा उप्पर नागें दे अक्स नजरी औंदे न। फ्हाड़ थमां पवित्र जल शिवलिंग पर पौंदा रौंहदा ऐ। शिवलिंग थमां किश उप्पर त्रिशूल, गौरी कुंड, पंज पांडव, काली माता ते माता सरस्वती दियां पिंडियां न। माता काली दा खप्पर म्हेशां जल कन्नै भरोचे दा रौंहदा ऐ, जिसदे अगें म्हेशां जोत जगदी ऐ। सामनै शेषनाग गी गंगा च खड़ोते दे लब्भदे न जिसदे कोल आप शम्भु बिराजमान न। गुफा दा खीरला पास्सा बंद करी दिक्ता गेदा ऐ। इत्थूं गै शिवजी माता पार्वती गी अमर कथा सनांदे अमरनाथ लेई गे हे। बाकी देवतें बी इत्थूं गै सुर्ग लोक गे हे। इस गुफा गी सुर्ग गुफा बी आक्खेआ जंदा ऐ। इस गुफा च ब्रह्मा, विष्णु ते महेश जी दे दर्शन इक मूर्ति च होंदे न। किश साधुएं इस्सै गुफा थमां कश्मीर जाने दा जतन कीता पर उंदा किश पता नेई लग्गा ते नांऽ गै ओह् श्रीनगर पुज्जे।

इस थाहरा कन्नै केई कथां जुड़ी दियां न। इक कथा मताबक भस्मासुर ने भगवान शिवजी दी भक्ति कीती तां शिव जी ने उसगी खुश होई वरदान मंगने गी आक्खेआ। भसमासुर ने ऐसी शक्ति मंगी जे भगवान में जिसदे सिरें पर हत्थ रक्खां ओह् भसम होई जा। शिवजी ने उसगी इक भसम करने आह्ला कड़ा दिक्ता। ओह् नारदजी कोल गेआ ते भसमी कड़े दी सारी गल्ल सनाई ते पुच्छेआ में इस कड़े दी परख कुसदे सिरा पर करां, नारदी जी उसदे इरादें बारै समझी गे ते बोल्ले उस्सै दे सिरें पर कर जि'नें तुगी एह् कड़ा दिक्ता ऐ। भसमासुर अगें गै माता पार्वती पर बुरी भावना रखदा हा। उसने सोचेआ इ'थै

ठीक ऐ। ओह शिवजी कोल जान लगा तां शिवजी उसदे इरादे बारै समझी गे ते उत्थूं द्रौड़ी गै ते भस्मासुर बी पिच्छें लगगी पेआ। नारद जी ने सारी घटना भगवान विष्णु गी सनाई। सारे देवता भगवान विष्णु कोल आई गे। भगवान विष्णु ने मन-मोहना रूप बनाया ते भस्मासुर गी भसम करी दिता ते भगवान शिव जेहड़े गुफा च छप्पी गेदे हे विष्णु जी 33 करोड़ देवी-देवतें कन्नै भगवान शिवजी दे दर्शन करन गुफा च आए। भगवान शिव ने कामधेनु गी की अंदर भेजी रस्ता खोहलेआ। सभ्भनें शिवजी दे दर्शन कीते। एह विश्वास ऐ जे इत्थें 33 करोड़ वास करदे न जेहड़े सभ्भनें भक्तें दियां मनशां पूरियां करदे न।

इक होर कथ दे मताबक इक बक्करवाल गुफा कोल बक्करियां चारदा ते शाम पेदे घर जंदा उठी। इक बारी उसदी इक बक्करी गुआची गई। उसने सारा जंगल तुप्पेआ पर बक्करी नेई लब्धी तां उसने सोचेआ खबरै गुफा अंदर बक्करी गेदी उठी होग। ओह गुफा अंदर चली गेआ तां उसने दिक्खेआ उत्थें इक तेजवान महात्मा तपस्या करा दे न। उ'नें उसगी गलाया जे तूं जे किश तुप्पा करना तुगी बाहर लब्धी जाहग पर दिक्खेआ तूं जे किश दिक्खेआ कुसा गी नेई सनाया। ओह बाहर आया तां बक्करी लब्धी गई।

ओह उस घटना गी छपैली नेई सकेआ ते ग्रां आहलें ही गुफा दा भेद सनाई दिता। ओह महात्मा जेहड़े शिवभगवान हे उ'नें इत्थें शिवलिंग दा रूप धारण करी लेआ। लोकें जिसलै सुनेआ तां उंदा बी मन दर्शन करने गी होंदा पर ओह डरदे उत्थें नेई जंदे। इक बारी ग्रां च त्रै साधु आए तां उ'नें सनाया जे ओह गुफा च शिवजी दे दर्शन करन जा करदे न तां लोकें दा बी डर दूर होआ ते मती गिनतरी च लोक शिवलिंग दे दर्शन कीते। अज्ज मते लोक इत्थें दर्शनें गितै जंदे न ते पूरा ब'रा एह जातरा चलदी ऐ।

गुफा दे शुरू च केई बारी भक्तें गी कबूतरें दे बी दर्शन होंदे न। इत्थें माता पार्वती दी रसोई चकला, बेलना, चु'ल्ला आदि बी हे। ग्रां दे लोकें दा गलाना ऐ जे इत्थें जेहड़े साधुएं तपस्या कीती उंदा नांS लोक बड़े आदर कन्नै लेंदे न। बाबा मंगल गिरि जी दी समाधि रन्सू ग्रां कोल ऐ। बाबा रमेश गिरी जदूं शिव खोड़ी आए तां ओह शिव दर्शन करने परैन्त ग्रां आई जंदे पर बाद च जिसलै कोई महात्मा गुफा च रौहने गी त्यार नेई होआ तां ओह आपूं इत्थें

उठी आए ते भक्तें गी अपने कनै शिवलिंग दे दर्शन करांदे। ग्रांऽ आहलें दी मदद कनै इत्थें भक्तें दे लंगर दा सरिस्ता बी करदे।

इसदे परैन्त शिव मंडली कटड़ा पासेआ शिवरात्रि ते होरनें त्याहारें पर इत्थें भंडारा करदे। माता वैष्णो दे जात्तरी बी इत्थें औन लगी पे। शिवरात्रि पर रियासती सरकारी दे सैलसफा मैहकमें आसेआ इत्थें त्रै रोजा मेला लाया जंदा ऐ। उ'नें दिनें इत्थें खूब रौनक होंदी ऐ। इत्थें बगने आह्ला जल शिवरात्रि पर दूधिया होई जंदा ऐ। इत्थें बगने आहली नदी वरपाप ग्रां कोल त'वी च समाई जंदी ऐ।

शिव खोड़ी मेले च रियासत दे लोकें दे इलावा मती गिनतरी च बाहरा बी भक्त औंदे न। रोज करीब पंज सौ लोक इत्थें दर्शन करदे न। इस तीर्थ स्थान दा सारा प्रबन्ध रियासी दे डिप्टी कमीशनर दे हत्थ ऐ। ग्रां दे लोकें दी मदद ते सब्भनें विभागें दा साथ इस थाहरा दे विकास लेई पूरा जोगदान सब्भै रली-मिली देआ करदे न।

मेले दे दिनें एह सारा इलाका शिवजी दे रंगें च रंगोई जंदा ऐ। हर थाहर भजन कीर्तन करदे लोक नजरी औंदे न।

०००

रियासी देहरी

बुआ लोहारी

बुआ लोहारी दी देहरी रियासी जिले दे ग्रां सलाल च स्थित ऐ। बुआ अपने घरैआहले कनै सती होईयां हियां। उंदे पति दी निर्दोष हत्या भगियाल जात दे इक माहनू ने कीती ही। सती होने परैन्त बुआ ने अपने पति दे हत्यारें गी माफ नेई कीता ते उनेंगी केई चाल्लीं दे दुख जातना देई सताना शुरू कीता। केई बमारियां उनेंगी लग्गी गईयां। लाजकारी परैन्त बी कोई रमान नेई हौआ तां कुसै सेयाने उनेंगी सनाया जे तुसेंगी हत्या दा दोश ऐ। बुआ गी मनाओ तां तुंदे दुख दूर होई जाडन। भगियालें देवी दे मोहरे दी स्थापना करवाई ते देहरी बनाई। इस जाति दे सारे लोकें उनेंगी कुलदेवी दे रूप च मनेया। सारे भगियाल अज्ज बी उत्थें मत्था टेकदे न ते हवन यज्ञ दा सरिस्ता कीता जंदा ऐ।

०००

रियासी थान

चरसू देवता

चरसू देवता दा स्थान रियासी दे भागा ग्रां च ऐ। घने जंगले च एह थान मजूद ऐ। इक चौतड़े पर देवता दी पिंडी रखी दी ऐ। एह पिंडी काले पत्थर दी बनी दी ऐ इंदे कोल गै चार पंज होर पिंडियां बी एह न। इत्तें परानी मूर्तियां दे कन्नै-कन्नै नमीं मूर्ति बी स्थापत ऐ। जिसगी 19 सौ च स्थापत कीता गेआ हा। इत्थें पिंडिये दे कोल गै अट्ठ लोहे दे कील्ल धरती च दब्बे गेदे न। पिंडी कोल गै इस देवता दियां आदमकद मूर्तियां बी एह न। इत्थें इक लकड़ी दी मूर्ति बी बराजमान ऐ। देव स्थान दे पूर्वोतर च इत्थें 35 होर मूर्तियां न जिनेंगी दिक्खी बझौंदा ऐ कुसै थाहरा आहन्नी इनेंगी इत्थें रखेया गेदा ऐ।

इनें मूर्तियें दी शकल भीम देवता कन्नै रलदी ऐ। एह देवता मनोतरे ठाकुरें दा कुल देवता ऐ। कोटली भागा ग्रां दे लोकें च इस थाहरा प्रति बडी मती आस्था ऐ। करसान अपनी खरी फसल ते डंगरे दी रक्षा गितै इस देवता गी पुजदे न। जनेआल ब्रैहमण नमीं ब्याही दी लाड़ी गी इत्थें रकैदे फेरन आहन्दे न। घर जिसलै बी कोई शुभ कम्म करन तां देवते दे नां दी जरूर पैहले रखदे न। जेठ म्हीने दी चौथी गी चरसू देवता दे नां दी जातर होंदी ऐ। इत्थें पैहले पशु बलि बी चाढ़ी जंदी ही।

०००

रियासी थान

चोलसू देवता

नाग देवता चोलसू जिला रियासी दे कटरा कोल ऐ। नंगल ग्रां थमां किश दूर देवता दा थान ऐ। थान आहली थाहर घने जंगलें च घिरी दी ऐ। इत्थें दो मीटर उच्चा देहरा बने दा ऐ ते कोल गै पिंडी ऐ ते कन्नै इक शिला ऐ जिस पर नाग उकरे दा ऐ। इत्थें गै इक पानी दी बौली बी ऐ। इसै देवता दा इक झुण्डा मंडी नंगल च पजारी जेहड़ा रमोत्रा ब्रैहमण ऐ उंदे घर ऐ ते ओह इत्थें देवता दी पूजा आदि करदा ऐ। सारे यजमान उनेंगी भेंट आदि खुशी खुशी देवते दे नां पर दिंदे न।

हर बरे ब्यास पुन्नेया गी देवते दी जातर होंदी ऐ। मती गिनतरी च भक्त इत्थें औंदे न।

उस दिन इत्थें गुड कड़ाह आदि दा प्रसाद चाढ़दे न। एह प्रसाद देहरे दे किश खल्ल चट्टान पर चाढ़ेया जंदा ऐ। लोके दा मनना ऐ जे इत्थें नाग देवता प्रसाद ग्रैहण करन औंदे न। कदें-कदें केई बारी लोके गी दर्शन बी होंदे न। लोके च एह बी मान्यता ऐ जे इस देवता दी पूजा करने कन्नै डंगरे च बमारी नेई फैलदी ते सुख समृद्धि औंदी ऐ। दुद्ध तंदाले दी कदें कमी नेई रौंहदी। फसल बरखा आदि दी कमी कदें नेई हुंदी। लोक इत्थें सुच्चा चकाने परैन्त घर तंदाला घ्यो इस्तेमाल करदे न। नमी परानी फसल पर इत्थें भंडारा आदि कीता जंदा ऐ। जेहडे लोक इनेंगी अपना कुल देवता मनदे न ओह बी इत्थें हवन यज्ञ भंडारा आदि करदे न।

०००

रियासी देहरी

रानी जराली दी देहरी

रानी जराली दी देहरी रियासी च ऐ। ओह जोरावर सिंह कल्हूरिया दी धर्मपत्नी हियां। जिसलै 1841 ई. च जोरावर सिंह शहीद होए तां उनें बी सती होने दा फैसला कीता। महाराजा गुलाब सिंह ने उनेंगी बड़ा अनुरोध कीता जे ओह सती नेई होन पर ओह नेई मन्नी ते सती होई गेइयां। एह देहरी चन्द्रभागा कनारे बनाई गेदी ऐ। एह देहरी फ्हाड़ी शैली च बनी दी ऐ ते इसदा अकार निक्का ऐ। देहरी आहले आंगने च इक बोढी दा बूहटा ते इक खूह ऐ। सांभ संभाल नेई होने कारण इत्थूं दी दशा हून कोई मती खरी नेई ऐ।

रानी जराली दे सती होने दे इक बरा परैन्त उंदे परोआर ने 1842 ई. च इत्थें एह देहरी बनाई ही।

०००

रियासी थान

पांगन देवता

रियासी थमां करीब बीह् किलोमीटर दूर टोट ते साढ़ी ग्रायें दे बन्ने पर स्यार धार ऐ, जित्थें पांगन देवता दा एह् पवित्र थान मजूद ऐ। एह् मंदर लकड़ी दा बने दा ऐ। इसदे उप्परें पैहले लकड़ी गै ही पर हून इसदे उप्पर लोहे दी चादर पाई दिती गेदी ऐ। इस करी हून बर्फ आदि दे मौसम च एह् सुरख्त होई गेदा ऐ। इस मंदर च देवता दी पिंडी ऐ जेह्ड़ी चिट्टे रंगे दी ऐ ते इक मीटर उच्ची ऐ। पिंडी दे सामने गै मूर्तियां बी एह् न जिंदी गिनतरी पंज ऐ। एह् मूर्तियां 5 छै फुट उच्चाई दियां न। नगौती दी नाग जातियां इस देवता गी अपना कुल देवता मनदे न। इंदे समेत आले दुआले दे होर लोक बी इस थाहरा लेई आस्थावान न।

०००

रियासी थान

ढोल देवता

ढोल देवता दा थान रियासी दे शेर-सुंडूवां ग्रां च स्थित ऐ। एह इक लकड़ी दा मंदर ऐ जिसगी इक चबूतरे पर बनाया गेदा ऐ इसदी ऊँचाई अट्ठ मीटर ऐ। देवते दा सिंहासन मन्दर अंदर चबूतरे पर ऐ ते इस पर ढोल देवता विराजमान न। ढोल देवता इक बड्डे ड्रम दे अकार च न। एह बडा अनोखा ढोल ऐ। इस ढोल च देवता दा बास ऐ एह लोके दा मनना ऐ। लोके मूजब पैहले समें च एह ढोल मंदरें अंदर आपूं बजन लगी पौंदा हा पर हून इसगी आपूं बजांदे न। जातर आहले दिन पजारी लोके गी ढोल दे दर्शन करवांदा ऐ। देवते दी जातर कत्ते म्हीने नरातें च हुंदी ऐ। ढोल देवता शेर सुंडुआ ग्रां दा नाग देवता ऐ। जातर आहले रोज इत्थें किट्ठे हुंदे न। एह किट्ठ मेले दा रूप धारण करी लैंदा ऐ। इत्थें लाके दे ओह लोक मती गिनतरी च औंदे न जिनेंगी सप्प डंगी गेदा होए। इत्थे आई ओह लोक ठीक होई जंदे न।

भगलेस ग्रां च बी कदें-कदें देवता दी जातर कीती जंदी ऐ ते इसलेई ढोल देवता गी पालकी च पाईयै उत्थें लैता जंदा ऐ जेकर देवता दा उत्थें जाने दा मन नेई होए तां पालकी भारी होई जंदी ऐ ते उसगी कोई चुकी नेई सकदा। इत्थूं दे लोके दा मनना ऐ जे देवता सभनें दियां आशा पूरी करदा ऐ ते सभनें गी दुद्ध पुत्तर दिंदा ऐ।

०००

रियासी थान

बाबा जित्तो

बाबा जित्तो दा स्थान रियासी दे गां अधार च स्थित ऐ। एह थाहर कटड़ा थमां पंज किलोमीटर दूर ऐ ते रियासी थमां बीह किलोमीटर दूर। बाबा जित्तो लोकनायक दे नां कन्नै सारे डुग्गर च जाने जंदे न जिनें न्याऽ दी खातर अपनी जान तगर देई दिती ते लोके च चेतना जगाई



जे न्याऽ दी खातर लड़ना माहनू दा फर्ज ऐ। अधार च बाबा जित्तो दा स्थान ऐ ते इत्थें इंदा देहरा बनाया गेदा ऐ। देहरे दी लंबाई पंज मीटर ते चौड़ाई चार मीटर दे करीब ऐ। एह थाहर पंज सौ बरें थमां बी मता पराना ऐ। इत्थें हाड़ म्हीने दी पुन्नेया गी मेला लगदा ऐ जित्थें डुग्गर दे केई थाहरें थमां लोक इत्थें शामिल होंदे न।

बाबाजी दे वंशज बाबा जी गी अधार थमां बहार कड्ढी देने दा दुख मनादे न। इत्थूं दे पजारी बाबा जी दे वंशज मखलोत्रा ब्रैहमण न। इसलै एह थाहर माता वैष्णो देवी श्राईन बोर्ड दे अधीन ऐ। इत्थे इक बगीचा बनाया गेदा ऐ जित्थें बाबा जित्तो ते उंदी धीऽ कौड़ी दा उच्चा बुत बनवाया गेदा ऐ।

०००

रियासी थान

शगलिया देवता

शगलिया देवता दा स्थान रियासी ते पौनी दे बश्कार झंडी मुंडी फ्हाड़ी पर बराजमान ऐ। राजा सलवान दे मैहलें कोल जित्थें अज्ज सिर्फ खंडहर गै रेही गेदे न उत्थें गै देवता दा स्थान मजूद ऐ। कोल ग्रान्ते थमां लोक इस देवता पर विश्वास करदे न ते हर मुश्कल बैल्ले देवता गी चैता करदे न। लोकें दा मन्नना ऐ जे देवता उंदा रक्षक ऐ ते हर खरी बुरी गी उंदे कन्नै रौहदा ऐ। लोक दिनें तेहारे गी देवता गी मत्था टेकन औंदे न ते प्रसाद बी भेंट करदे न।

०००

रियासी थान

त्रेसन देवता

रियासी अरनास दे कोल थूब्बी ग्रां च त्रेसन देवता दा स्थान ऐ। इस देवता गी लोक ग्रां दा स्वामी मनदे न। थुब्बी ग्रां दे खुले मैदान च देवता दा थान ऐ। देवता दी मूर्ति लकड़ी दी बनी दी ऐ जेहड़ी कला स्हाबे बी बडी उम्दा ऐ। सटियाल ठौकर इनेंगी अपना कुल देवता मनदे न। घरा च कोई बी शुभ कम्म करने थमां पैहले ओह् अपने कुल देवता गी याद करदे न। उंदा मनना ऐ जेकर देवता खुश हौग तां गै घरा च सुख समृद्धि ओंदी ऐ ते देवता दी नराजगी गरीबी ते बमारी गी साद्दा दिंदी ऐ।

०००

रियासी थान

स्याड़ बाबा

स्याड़ बाबे दा स्थान रियासी थमां 10 किलोमीटर दूर तलवाड़ा ग्रामं च ऐ। इत्थें पंजाह् मीटर दी उच्ची फ्हाड़ी थमां जल दी धार जलकुंड च पौंदी ऐ। लोकें दा विश्वास ऐ जे इस्सै च बावे दा वास ऐ। इत्थें स्नान करने कन्नै चमड़ी दा रोग ठीक हुंदा ऐ इस करी मती गिनतरी च चर्मरोगी इत्थें न्हौन औंदे न ते ठीक हुंदे न। जिनें जनानियें गी बच्चे नेई हुंदे ओह् बी इत्थें स्नान करी मत्था टेकदियां न ते बावा उंदी झोली बच्चे कन्नै भरदा ऐ। लोक इत्थें अपनी सुक्खना पूरी होने पर बावे दे मत्था टेकन औंदे न। इस थाहरा दे कोल गै हून इक नमां शिव मंदर बी बनाया गेदा ऐ।

०००

रियासी मंदर

कालका मंदर

कालका मंदर रियासी बस स्टैंड दे कोल कालका नगर च स्थित ऐ। एह मंदर रियासी दा सब्भने थमां पराना मंदर ऐ। मंदर दे पंत भास्कर हुंदे मताबक इस मंदर गी परतियै डेढ़ सौ बरे पैहले उंदे बुर्जगे बनाया। उंदे मूजब उंदे पूर्वज उत्तराखंड थमां इत्थें आये हे। पंत जगताराम होर अग्रेंज फौजा च सुबेदार हे ते ओह गोलाबारूद समेत क्वेटा जा करदे हे तां उनेंगी क्वालिये लुटी लैता तां ओह अपनी जान बचाने गितै जम्मू महाराजा रणवीर सिंह हुंदी शरण च आई गै। महाराज ने उनेंगी रघुनाथ मंदर रौहने दा स्थान दित्ता। इक दिन माता कालका उनेंगी सुखने च आई ते आज्ञा दित्ती जे रियासी जाई मेरे मंदर दी दिक्खभाल कर। उनें महाराजा कन्नै अपना सुखना सांझा कीता तां महाराजा ने परतियै रियासी मंदर बनवाया। ते पंत होरें इस थाहरा दी सारी उमर सेवा कीती। इत्थें नरातें च मती गिनतरी च लोक दर्शनें गितै जंदे न।

०००

रियासी थान

भीह देवता

भीह देवता रियासी दा लोक देवता ऐ। पराने भीमगढ़ दे बन्ने तगर सब्भनें ग्रायें च भीह देवता गी मनेया जंदा ऐ। संभव ऐ जे इस थाहरा दा संस्थापक बी भीह देवता गै हौग। रियासी ते उसदे पूर्व च तहसील उधमपुर दे केई थाहर भीमगढ़ च औंदे हे। हून सिर्फ रियासी किले गी गै भीमगढ़ गलाया जंदा ऐ। रियासी उधमपुर च केई थाहरें भीम देवता दे स्थान मजूद न। सब्भनें स्थानें च बावे दियां मूर्तियां स्थापत न। ते इंदी मूर्तियें कोल केई थाहरें पर त्रिशूल बी गढ़े दे लब्भदे न। सब्भने थमां लम्मा त्रिशूल सुन्दररानी ग्रां उधमपुर च ऐ। एह चार मीटर उच्चा ऐ।

बाबे दा बड्डा थान सिरला ग्रां च दोआले दे घर ऐ। इक खुल्ले कमरे च अन्दर मिट्टी दे थड़े पर इक चौकी पर बाबे दा ढोल रखेया गेदा ऐ जेहड़ा पराना ऐ ते इसगी सिर्फ जातर आहले रोज गै इस्तेमाल कीता जंदा ऐ। ढोल दे कोल गै योगनी दी पत्थर दी मूर्ति ऐ। इत्थें गै इक लकड़ी दा संदूक ऐ जिस च केई सराख न ते इंदे च वाण रखे गेदे न। लोक विश्वास ऐ जे इंदे च दो वाण अर्जुन दे, दो भीम दे ते दो काई देवता दे न। इत्थें केई झुण्डे बी न जिनेंगी जातर मौके बरतेआ जंदा ऐ। इत्थें तौकड़े च दो दीये न जिनेंगी मता पराना मनेया जंदा ऐ। जेठ महीने दी दशमी गी इत्थें बाबे दी जातर होंदी ऐ। रियासी दे जनुआल ब्रैहमण बाबे दे पुजारी न। सुन्दरानी च सांगडे ब्रैहमण पुजारी न। मनेओतरा ते ठौकर जाति दे राजपूत इनेंगी अपना कुलदेव मनदे न।

०००

रियासी थान

चरैना देवता

रियासी दे सलाल ग्रां च चरैना बाबे दा स्थान इक प्हाड़ी पर ऐ जित्थें इंदा मंदर बने दा ऐ। मंदर दियां कंधा पत्थर दियां न ते छत पर लकड़ी ते टीन लाया गेदा ऐ। मंदर अंदर पिंडी मजूद ऐ। जेहड़ी पत्थर दी ऐ ते इसदे पिच्छें लकड़ी दियां मूर्तियां न। पिंडी काले रंगे दी ऐ। इत्थें सब्भै मूर्तियां इक जनैहियां न। इत्थें होर बी केई मूर्तियां न। इक मूर्ति इक माहनू दी ऐ जिसदे दौनें हत्थें च सप्प न। इत्थे बाहर बेहड़े शिव पार्वती दियां मूर्तियां बी रखी दियां न। मददैयाल ठौकर इत्थूं दे पजारी न ओह् इनेंगी कुल देवता मनदे न। नमां अनाज औने पर ओह् इत्थें पैहले यज्ञ भंडारा करदे न। इत्थें पशुबलि नेई दिंदे बाबे दे चाढ़ने परैन्त उसगी खुल्ला छोड़ी दिता जंदा ऐ। इस स्थान बारै केई लोक विश्वास न। इक कथा मताबक इक बारी इक जनानी प्हाड़ी पर घाऽ कप्पन गेदी ही तां उसगी उत्थें इक मलैम पत्थर दिखेया तां उसनै सलैटा बनाने गितै अपने कन्नै लेई आहन्दा। पर जिसलै ओह् वर्तमान मंदर आहले थाहर पुज्जी तां पत्थर जमीन पर डिग्गेया ते जमीना च खुब्बी गेआ। जनानी ने दन्दल कन्नै खोदेया तां उत्थूं खून निकलन लगी पेआ। उसनै ग्रां आई सब्भने गी सनाया तां कुसा सेयाने ने पंछानी लैता जे एह् कोई देवता रूप पत्थर ऐ। तां लोके देवता रूप च इत्थें पूजा शुरू कीती। चदैर जाति दे लोके पूजा शुरू कीती इस करी बाबे दा नां चरैना पेई गेआ। इक होर कथा मताबक महाराजा गुलाब सिंह इक बारी सलाल आए तां उनें सपाहियें गी ग्रां थमां दुद्ध आहनने दा हुक्म दिता पर लोके दुद्ध नेई दिता तां राजा दे हुक्म पर जर्बदस्ती दुद्ध आहन्दा गेआ। रातीं राजा गी बावे दी क्रोपी होई तां बड्डलै उनें बाबे दे मत्था टेकेया ते बकरे दी बलि चाढ़ी। अदूं थमा इस थाहरा दा महत्व मता बद्धी गेआ।

०००

रियासी थान

मास्सुल देवता

मास्सुल बावे दा थाहर महोर दे खन्नीकोट ग्रां च ऐ। इत्थें बावे दा मंदर प्हाड़ी शैली च बने दा ऐ जेहड़ा पंज मीटर दे करीब उच्चा ऐ। मंदर दी छत टीन दी ऐ मंदर अंदर सिंहासन पर मूर्ति स्थापित ऐ जेहड़ी ढाई मीटर उच्ची ऐ। मूर्ति लकड़ी दी ऐ ते डुग्गर दे सब्भने लोक देवतें थमां बड्डी ऐ। मंदर दे पूर्व पच्छम च चार मूर्तियां न जिनेंगी बावे दे मंत्री मनेया जंदा ऐ। मंदर कोल इक चट्टान ऐ जिस थमां पानी दी धार निकलदी ऐ। ग्रां दे सब्भै लोक बावे प्रति भक्ति भावना रखदे न पर खनियाल ठौकर इनेंगी कुलदेवता मनदे न। ग्रां दे लोहार इत्थूं दे पुजारी न ते नादियाल गारड़ी न। लोकें दा मनना ऐ जे बाबा जी सब्भने दा न्यांऽ करदे न ते कसुरवार लोकें गी सजा बी दिंदे न। इत्थें पशु बलि बी दित्ती जंदी ऐ ते किश लोक कड़ाह आदि दा प्रसाद बी चाढ़दे न।

०००

रियासी थान

बाबा बिड्डा

बावा बिड्डा जी दा पवित्र थाहर रियासी थमां दस्स किलोमीटर दूर बिड्डा ग्रां च ऐ। सारा ग्रां इस बावे गी बड़ा श्रद्धा कन्नै पुजदा ऐ। एह थाहर बडा गै शैल ऐ। बिड्डा बाबाजी बारै लोक विश्वास ऐ जे ओह बालक रूप च विराजमान न। इत्थें पूरा बरा भक्त दर्शनें गितै औंदे न। पर कास्ती दे दुए रोज बैड जाति दे ब्रैहमण इत्थें हवन यज्ञ ते भंडारा करदे न। इत्थें जिनें लोकें गी सप्प लड़े दा होए तां ओह इत्थें आई जेकर हवन कुंड दी वभूति खाने कन्नै उसगी जैहर नेई चढ़दा। ऐतवार ते मंगलवार लोक इत्थें रुट्ट चाढ़दे न उंदा विश्वास ऐ जे रुट्ट चाढ़ने परैन्त कर्दे भक्तें दे घर सप्प नेई निकलदा। सारा ग्रां इस बाबे पर आस्था रखदा ऐ।

०००

रियासी देहरी

बुआ बराला

बुआ बराला दा स्थान पौनी भारख थाहरा पर ऐ। बराल जाति दे लोके च बुआ दी बड़ी मानता ऐ। ओह घरे दा हर शुभ कम्म करने थमां पैहले बुआ गी चेचे तौरा पर चैता करदे न। लोक विश्वास मताबक केई चिर पैहले कुसा लटवाल जाति दे राजपूत गी खबरै कुस कारण बुआ कन्नै बडी खिंझ ही ते इक दिन मौका लगदे ऐ उसनै बुआ दा मूह ट्रैक पाई बंद करी दित्ता ते बुआ दे प्राण पक्खेरु होई गै। इस गल्ला दा पता जिसलै बराल ब्रैहमणे गी लगा तां उने बुआ दी मानता कीती ते इस घटना परैत बराल अज्ज बी ट्रैक दे बूहटे जां उसदे पतरें गी हत्थ तगर बी नेई लांदे। बुआ दे चैते च इत्थें उंदा दिन मनाया जंदा ऐ ते बराल बड़ी शरधा भक्ति कन्नै बुआ दा नां लेंदे न।

०००

सतमां ध्याऽ

जिला रामबन दे धार्मिक ते सांस्कृतिक थाहर

थान रामबन

बाबा नेलना

जिला रामबन च अज्जे थमां करीब 12 सौ बरे पैहले बाबा नेलना जी दी मूर्ति प्रगट होई ही। एह गलाना ऐ इत्थूं दे बसनीकें दा। उसलै इस ग्रामं च सिर्फ सत्त घर हे। थान दे कोल अदूं गै इक आपमुहारा चश्मा बी निकलेया हा। इस च इन्ना पानी हा जे कोल लगदे खेतरे चा धान दी फसल गी इयै पानी लगदा हा। पानी आहले घराट बी इस पानी कन्नै गै चलाए जंदे हे। चश्में थमां रोज इक नाग बाहर निकलदा तां इक आदमी थाल च दुद्ध भत्त पांदा ते उत्थें रखी



औंदा आपूं उत्थूं दूर पिट्ठ करी बेही जंदा जिसलै नाग खाई लैंदा तां टन-टन दी अवाज औंदी थाली च सुन्ने दी मोहर होंदी आदमी थाली लेई परतोई जंदा। इक बारी उसगी कुतें जाना हा तां उसनै अपने भ्रा गी नाग देवता गी दुद्ध भत्त खलाने दी जिम्मेदारी सौंपी। पैहले रोज उसनै इयां गै कीता जियां भ्रा ने आक्खे दा हा। दुए रोज उसदे मना च लालच आई गेआ ते उसनै सोचेया में नाग

हत्या करी उसदियां मोहरा इक्कै बारी हासल करी लेंग। ओह रोज आंहगर
दुद्ध भत्त लेई थाल उस्सै थाहर रक्खी आया ते दूर जाई बैठा। नागर देवता
आए तां उसनै उंदी पिट्ठी पर ज्हरां मोहर दिक्खी उंदे पर तीर चलाया तां
नाग देवता म्हेशां लेई छुप्पी गै। ओह परती कदें कुसा गी नजर भामें नेई आए
पर केई चमत्कार अज्ज बी लोकें गी उंदे पर विश्वास रखने ते अपनी
मनोकामना पूरी करने गितै परतक्ख होंदे न।

०००

रामवन थान

कुर्क देवता

रामवन दे ग्रां सेनापति दा, कुर्क देवता ग्राम देवता ऐ। इत्थूं दे लोक इस बाबे दे प्रति बड़ी श्रद्धा रखदे न। बावा जी दा मुख थान उखराल दे कोल इक फ्हाड़ी पर ऐ। इस थाहर पुज्जने लेई सेनापति ग्रां थमां चढ़ाई शुरू हुंदी ऐ। सत्त मील चलने परैंत भक्त स्थान पर पुज्जी जंदे न। बावे दा मंदर लकड़ी कन्नै बनाया गेदा ऐ जेहड़ा पंज मीटर उच्चा ऐ। मंदर दी छत्त लकड़ी दी बनी दी ऐ जेहड़ी ढालमां ऐ तां जे सेयाले बर्फ इस थमां आपूं खल्लें पेई सके। मंदर च पत्थर दी मूर्ति ऐ। बल्ली जाट दे ठौकर कुर्क देवता गी अपना कुल देवता मनदे न। रुकवाल राजपूत बी इस बावे प्रति आस्थावान न। बावे दा इक होर स्थान भंडारथी ग्रां च बी बराजमान ऐ। जिसलै मौके पर बरखा नेई होए तां लोक घड़े च सप्प पाईयै इत्थें स्थान पर रखी जंदे न। जेकर सप्प बावे दे मंदर आहली बक्खी जा तां लोक समझदे न जे हून बरखा पक्की होग।

०००

रामवन थान

बनसुल देवता

बनसुल देवता दा स्थान रामवन दे ग्रां नमोट च ऐ। इत्थें देहरा बनाया गेदा ऐ जेहड़ा कमरे आंहगर ऐ ते इसदी छत्त पर त्रिशूल ऐ। कमरे च देवमूर्ति ऐ। इत्थें देहरे दे कोल गै इक चीहड़ दा पराना बूहटा ऐ। जिसगी भक्त बड़ा पवित्र मनदे न। इस सारे लाके च देवता दी बड़ी मान्यता ऐ। सारे लाके थमां लोक रोज इत्थें दर्शनें गितै औंदे न पर मंगल ते शनिवार इत्थें खास भीड़ होंदी ऐ। इस थाहर दी इन्नी मान्यता ऐ जे बावा चोरी दी कोई बी वारदात होए तां अपराधी गी जरूर दंड दिंदे न। जिसदे घर चोरी होई जा ओह पैहले घोषणा करदा ऐ जे जिसने बी चोरी कीती दी ऐ ओह समान परतोई दे नेई तां ओह देवता गी चोर गी दंड देने दी शिकायत मजबूरी च करग। लोकें दा मनना ऐ जेकर देवता फरियाद सुनी ले तां चोर गी सख्त सजा मिलदी ऐ। कटोच जाति दे राजपूत इस थान दे पुजारी न।

बनसुल बावे दा इक होर थान गनोत रामवन च ऐ। उत्थें मंदर पत्थर दा बने दा ऐ ते पिंडी बी पत्थर दी गै ऐ। इत्थें मंगल शनिवार जातर होंदी ऐ ते भेड़ू दी बलि लगदी ऐ।

०००

रामवन थान

लीट देवता

लीट देवता नाग देवता दे रूप च रामवन दे झटगली हिलर च बाका ऐ। इस देवता दा मंदर लकड़ी दा बने दा ऐ ते छत्त ढालवां ऐ। मंदर दी उच्चाई छः मीटर ऐ ते परदक्खन लैने गितै चौने पाससै रस्ता बने दा ऐ। मंदर च मूर्ति लकड़ी दी बनी दी ऐ जिसदा मूंह गोल ऐ। चन्द्रकोट थमां एह थाहर इक किलोमीटर दूर ऐ। देवस्थान पर पुज्जने पर इत्थूं दा वातावरण बड़ा शैल ऐ ते इत्थें पानी दी इक बौली बी ऐ। बावे दी जातर अस्सु कत्ते च हुंदी ऐ। इंदे पुजारी मन्हास राजपूत न। ओर बोदी रखदे न ते मनचित कन्नै बावे दी सेवा करदे न। जिसलै उस च जातर बैल्ले बावे दी छाया औंदी ऐ तां ओह लोकें दे सुआले दे परते बी दिंदे न। जातर परैन्त राती कुड्ड बी कीता जंदा ऐ। लोकें दा विश्वास ऐ जेकर बावा खुश होन तां मौके पर बरखा हुंदी ऐ, पशुधन च बादधा हुंदा ऐ ते लोकें दियां मनै दियां इच्छेयां बी बावा पूरी करदे न। जातर मौके आले दुआले दे केई लोक इत्थें शामिल हुंदे न।

०००

रामवन थान

राम मन्दिर

रामवन दा राम मन्दर इत्थूं दे सब्भने थमां शैल मंदरें दी गिनतरी च औंदा ऐ। इस मंदर गी डोगरा राजबंश दी रानी ने बनवाया हा। मंदर च राम, लक्ष्मण ते सीता माता दियां मूर्तियां न। इत्थें होर बी देवतायें दे निक्के-निक्के मंदर है न। इस मंदर दा निर्माण नागर शैली च कीता गेदा ऐ। एह् मंदर रामवन दा सब्भने थमां शैल मंदर मनेया जंदा ऐ। इसलै इक मंदर दा रख रखाव धर्मार्थ ट्रस्ट दे हत्थें च ऐ।

०००

अठमां ध्याऽ

जिला डोडा दे धार्मिक ते सांस्कृतिक थाहर

भद्रवाह ते डोडा

सुर्गभूमि खुआनें आहले भद्रवाह गी भद्रकाशी, भद्राश्रम, भद्रदेश ते भद्रद्वीप आदि नांऽ कन्नै बी जानेया जंदा ऐ। शिवालिक प्हाडियें दे उत्तर-पूर्व पास्सै ते पीर पंचाल शृंखला दी गोदी च एह प्रदेश समुद्र तल थमां 520 फुट उच्चा ऐ। इस थाहरा दा शलैपा इन्ना मशहुर ऐ जे इसगी निक्का कश्मीर करी बी कुआलेया जंदा ऐ। हरे भरे द्यारें, चीडें ते पड़तल आदि दे बूहटें कन्नै भरोचे दे जंगल, बर्फ कन्नै लदोई दियां उच्चियां धारां इत्थूं दे शलैपे गी चार चन्न लाई दिंदियां न। एह प्रदेश देवी-देवतें, सिद्धें, यक्षें, रिशि मुनियें, साधु संतें ते अज्ञात शक्तियें दी बास भूमि रेही ऐ। इयै कारण ऐ जे इत्थूं दे लोक धार्मिक, गुणी ते शांत स्भाऽ आहले न। इत्थें हिन्दू, मुसलमान, सिक्ख ते क्रिश्चन रौंहदे न। सिक्खें ते क्रिश्चनें दी गिनतरी इत्ते मती घट्ट ऐ। इत्थें बाहर थमां दी मते लोक आई बस्से दे न। इत्थुआं दी फसलें च धान, रौंगी, मोठ, माह, राजमांह, मुंगी मक्क कनक आदि प्रमुख न। फलें च स्यऊ, बग्गूगोशा, खोड़, बेही ते मलूक खास फल न। इत्थें स्युल, बजरभंग ते द्रेऊ बी होंदा ऐ। मती गिनतरी च इत्थें सब्जी जियां कड़म, पालक सरेयां, गुच्छियां कसरोड़ा आदि प्रमुख न।

इत्थूं दा शलैपा ते भलोकडे लोक म्हेशां प्रभावत करदे न।

डोडा- डोडा दी गल्ल करचै तां एह लाका किश गर्म ते सुक्का ऐ। रली मिली लोके दी गिनतरी इत्थें लब्धदी ऐ।

०००

थान डोडा

भोच नाग देवता

जिला डोडा दे तसील काश्तीगढ़ दे दूर दरेड़े ग्रां धनदल च भोच नाग देवता दा प्राचीन मंदर केई सौ बरे पराना ऐ। इत्थूं दे लोकें दा मनना ऐ जे एह इक चमत्कारी मंदर ऐ। लोके दी इस पर खास आस्था ऐ। आतंकवाद दे मौके 1990 थमां केई बारी शरारती तत्वेन इसगी फूंकने दी कोशश कीती पर इसगी अगग गै नेई लगगी। काश्तीगढ़ दे बसनीक रिशी सिंह होरें दस्सेया जे इस इलाके च जदूं बी बरखा नेई होन ते फसल लेई करसानें गी खास मुश्कल हुंदी ऐ तां इत्थें किट्ठे होई लोक यज्ञ पूजा अर्चना करदे न ते बलि चाढ़ी जा तां उसलै गै बरखा होई जंदी ऐ। धनदल ग्रां दे लोक इस थाहरा पर मती आस्था रखदे न ते अपनी समृद्धि दा कारण इस थाहरा गी मनदे न।

०००

डोडा मंदर

चौंड माता मंदर

चौंड माता चण्डी माता दा गै रूप ऐ। इसदे मंदर सारे फ्हाड़ी लाकें च थाहर-थाहर बने दे न। काशतीगढ़ च माता दा बड़ा पराना मंदर ऐ। आखदे न इत्थें पांडवें अपने वनवास मौके कश्यप ऋषि थमां ज्ञान हासिल कीता हा। इत्थूं दे भाऊ राजपूतें दी एह कलुदेवी ऐ। आखदे न जदूं बी इत्थें बरखा नेई ही हुंदी तां भाऊ खानदान दा कोई माहनू माता दे स्थान पर जाई व्रत रक्खी माता दी पूजा करे तां झट्ट बरखा होई जंदी ऐ। माता दा पराना मंदर जेहड़ा गां थमां त्रै मील दूर फ्हाड़ी पर हा उसगी आतंकवादी गतिविधियें दे चलदे केई बारी नुक्सान पजाया गेआ। केई चिर लोक डरदे उस थाहर नेई गै। ते फी 2007 च उधमपुर दे डा. साठे हुंदी नौकरी काशतीगढ़ घंघल लग्गी। एह थाहर माता दे नश्ट हौये दे मंदरे सामने हा।

ओह बड़े पूजा पाठी माहनु हे। उनेंगी माता ने कन्या रूप च सुखने च दर्शन दित्ते। उनें उत्थें लोकें गी रोज औने आह्ला सुखना सनाया तां उनें लोकें सनाया जे तुसेंगी माता रानी सुखने च दर्शन दिंदी ऐ। डॉ. साठे ने उस थाहर माता दा मंदर परतियै बनाने दी सोची। घंघल दे लोकें बी उनेंगी इस शुभ कम्मा च पूरा साथ दित्ता। गां च गै भाऊ खानदान दा चेला सुरेश सिंह माता गी अपने घर लेई आया ते इक मंदर स्थापना करी दित्ती। हालात सुधरने पर उनें माता दे मंदर जाने लेई छड़ी जातरा शुरू कीती। नासाज माहौल होने करी लोक डरदे रेह ते उत्थें जाने दी हिम्मत नेई करी पाये। यात्रा दी शुरूआत 21 जुलाई 2007 गी होई ते उसलै सिर्फ त्रै जनें यात्रा कनै गै फी बल्लें-बल्लें लोक बी कनै आई रले। पुजारी सुरेश सिंह हुंदे मताबक 16 दिसम्बर 2010 गी माता दा पराना मंदर जेहड़ा गलाधार च हा इक बारी परतियै शरारती तत्त्वं अग्गा दे हवाले करी पूरी चाल्ली नास करी दित्ता। पुजारी होरें सनाया जे सब्भै किश फकोई जाने परैन्त बी माता दी शिला बिल्कुल उयै जनेही साफ-सुथरी ही।

5 अप्रैल 2011 गी परतियै मंदर बनाना शुरू कीता गेआ। 21 अप्रैल 2011 गी पराने मंदर कोल गै खुदाई करदे होई माता दी इक होर शिला लब्धी जिसदी पुजा अर्चना बी करना शुरू कीती गई। उसदी स्थापना बी मंदरे च गै कीती गई। अज्ज इत्थें छड़ी जातरा पुजारी सुरेश सिंह हुंदी दिक्ख रिक्ख च हर ब'रे हुंदी ऐ ते लोक बड़ी खुशी कन्नै इत्थें हिस्सा लेंदे न। मां दे जयकारे कन्नै सारे फ्हाड़ गूंजी उठदे न।

०००

डोडा थान

कुरमत देवता

जिला डोडा दे अस्सर ग्रां च नाग देवता कुरमत दा थान ऐ। एह थान अस्सर शिड़का दे कंठे ऐ। इस मंदर दे अंदर जनानी जात गी जाने दी मनाही ऐ। इस मंदरे दी उचाई 6 मीटर थमां बी मती ऐ। इसदी छत्त लकड़ी दी ऐ जिसदा अकार छतरी आंहगर ऐ। मंदरे दे उप्पर नाग देवता बनाये गेदे न। इसदी कंधे पर बी नाग देवता दियां मूर्तां न। मंदरें दे अंदर नाग देवता दी मूर्ति स्थापित ऐ। कुरमत नाग देवता दे दर्शनें गितै इंदे थान पर ज्हारें बदधे लोक औंदे न। इस मंदर बारे प्रचलत ऐ जे इत्थें कोई बी सुक्खन पूरी होए बिजन नेई रौंहदी। इत्थें प्रसाद आदि चाढ़ेया जंदा ऐ। इत्थें पशु बलि बी चाढ़ी जंदी ऐ।

०००

भद्रवाह डोडा मंदर

सोवाराम मंदर


इस मंदर गी महाराजा रणवीर सिंह दे समें च वजीर सोवाराम ने बनवाया। सोवाराम इक धार्मिक प्रवृति दे माहनू हे ते ईश्वर च विश्वास रखदे हे। एह लक्ष्मी नारायण जी दा मंदर ऐ। मंदर च लक्ष्मी नारायण गी सिंहासन पर बठाय़ा गेदा ऐ। मंदर च मूर्तियां शैल वस्त्रें ते गैहनें बन्धे कन्नै सजाई गेदियां न। मंदर दिक्खने गी बड़ा गै शैल ऐ। एह मंदर भद्रवाह बस अड्डे दे भलेयां कोल ऐ इसकरी इत्थें असानी कन्नै पुजेया जाई सकदा ऐ। मंदर बड़ी खुल्ली थाहर बनाया गेदा ऐ जिस बड्डी ड्योढ़ी, खुल्ला बेहड़ा ते गर्भगृह ऐ। उयां ते आमतौर पर इत्थें भक्तें दा औना रोज गै होंदा ऐ पर पर्व त्याहरें गी मती गिनतरी च भक्त इत्थें ओंदे न। यज्ञ हवन ते भंडारें दा अयोजन बी मौके-मौके पर इत्थें कीता जंदा ऐ।

०००

भद्रवाह डोडा मंदर

वासुकि नाग मंदर

एह मंदर भद्रवाह दा इतिहासक मंदर ऐ। इस मंदर दे कोल गै गुप्त गंगा बी ऐ। डुग्गर दे नाग मंदरे च एह इक उतम कला दा नमूना ऐ। इस नाग मंदर गी भद्रवाह दे राजा धीपाल ने 1634 ई. च बनाया ऐसा किश लोकें दा मनना ऐ। किश लोकें दा मनना ऐ जे वर्तमान नाग मंदर दा निर्माण भद्रवाह दे राजा नागपाल ने जेहड़ा 1557 थमां 1605 तगर राजा रेहा उनें इस मंदर गी बनवाया। एह राजा सम्राट अकबर दा समकालीन हा ते वासुकि नाग दा भक्त हा। एह मंदर लकड़ी दा बने दा ऐ। नाग मूरत बी लकड़ी दी बनी दी गै मन्नी जंदी ऐ की जे अदूं लकड़ी दे कम्मा दा गै मता चलन हा। सन 1835 ई. च चम्बे दे राजा चढ़त सिंह ने इस मंदर गी परतियै बनवाया ते इत्थें काले पत्थर दी नाग मूर्ति बी स्थापत करवाई। इस मूर्ति दे पिच्छें टाकरी च लखोए दा ऐ जे 18 सौ 35 गी भाद्रों म्हीने दी अष्टमी आह्लें रोज राजा चढ़त सिंह होरें एह नाग मूर्ति इत्थें स्थापित करवाई।



इस मंदर बारै केई विश्वास लोकें च जुड़े दे न। लोकें दा मनना ऐ जे वासुकि नाग गरूढ़ थमां डरे दे इस फ्हाड़ी लाके च आए तां भद्रकाली ने उनेंगी इत्थें अपनी शरण च लैआ ते इत्थूं दा राजा बनाया। भद्रवाह च केई चिर नागराज रेहा ते फी डुग्गर च नाग संस्कृति पनपी। जन्माष्टमी परैन्त औने आहली मस्सेआ गी इत्थूं दा गै छड़ी मुबारक कपलपन कुण्ड दे कोल अयोजत कीते जाने आह्ले धार्मक मेले आस्तै जंदी ऐ।

०००

डोडा मंदर भद्रवाह

नाग मंदर भद्रवाह

एह इक प्राचीन मंदर ऐ। इसगी चम्बे दे राजा चढ़त सिंह ने नौमी दसमीं सदी च बनवाया हा। प्रो. पी.के. कौल हुंदे मताबक मंदर दे बनने परैन्त इत्थें शिवशक्ति, विष्णु आदि दियां मूर्तियां स्थापित हियां बाद च इनेंगी इत्थूं होर थाहर लैता गेआ ते इत्थें अष्टकमल आहली जलैहरी च शिवलिंग, दुर्गा, लक्ष्मी ते गरुड़ासीन विष्णु स्थापित कीतियां गईयां। बाद च बड्डे मंदर च आदमक वासुकी नाग, जीमूत वाहन ते इक कोने च लौहके अकार दी शंखचूड़ नाग दी मूरती स्थापत करी दिती ही।

इस नाग मंदर दियें मूर्तियें दी शिल्पकला बड़ी उम्दा ऐ। पी.के. कौल हुंदे मताबक इनें मूर्तियें गी इत्थूं दे स्थानी कलाकार बस्तीराम होरें बनाया पर इंदे उप्पर कश्मीर घाटी दी शिल्पकला दा साफ प्रभाव लभदा ऐ।

०००

भद्रवाह डोडा मंदर

गुप्त गंगा मंढर

भद्रवाह च बगने आहली मीरू नदी दे कोल उत्तर दिशा पाससै शिवजी दा गुफा मन्दर ऐ। इत्थूं अदधा किलोमीटर दूर शिवजी दा पराना मंदर ऐ। शिवजी मंदर च इस मंदर दा खास थाहर ऐ। एह लोके च आस्था दा केन्द्र ऐ। जम्मू तगर लोक इस मंदर पर आस्था



रखदे न। इत्थें गंगा शिवलिंग पर जलधारा सुट्टदी ऐ ते फी गुप्त होई जंदी ऐ। मंदर दा गुंबद पत्थर कन्नै बनाया गेदा ऐ। इस मंदर दे कोल इक गुफा ऐ जिसदे बारै च आक्खेया जंदा ऐ जे अपने अज्ञातवास मौके पांडव इस गुफा रस्तै गै कुतैं चली गै हे। एह गुफा हून बंद करी दित्ती गेदी ऐ। इस मंदर च जलैहरी दा अकार बड़ा बड्डा ऐ। इसगी काले संगमरमर कन्नै बनाया गेदा ऐ। इत्थें इक बौली बी ऐ जिस दा शिवलिंग पर पानी पौंदा ऐ। इत्थें साधु ते भक्त जेहड़े दर्शनें गित्तै औंदे न पैहले स्नान करदे न। मंदर दे अंदर चट्टान पर भीमसेन दे पैरें दा नशान ऐ। डुगगर दे लोक इस मंदर पर बडी आस्था रखदे न ते जेहड़ा इक बारी इत्थें जा ओह परती-परती जाना चांहदा ऐ।

०००

डोडा मंदर

देवीरी कोठी ग्रां दी विष्णु मूर्ति

गरुडासीन इस मूर्ति गी चम्बा दे राजा नागपाल दी रानी माली जेहड़ी भलेसा दी रौहने आहली ही उनें बनवाई ही। उनें इत्थें पैहले इक बौली बनवाई ने फी इत्थें कोल गै गरुड़ पर सवार विष्णु भगवान दी मूर्ति बनवाई। एह मूर्ति कला दा इक अनोखा नमूना ऐ। एह मूर्ति बासक देहरे कनै रलदी मिलदी ऐ। ते इस बौली कोल 11 सौ 60 च राजा नागपाल ने इक शिला लेख बी लिखवाया हा जिस च चम्बे दे राजा ललित वर्मन ने बी अपनी प्रशंसा लखोआई ही।

०००

डोडा मंदर

कपलास कुंड

भद्रवाह थमां 20 किलोमीटर दूर दक्खनी पेठा कपलास कुंड बराजमान ऐ। एह् भद्रवाह दा इक मशहूर तीर्थ ऐ। इसगी वासकुंड बी गलाया जंदा ऐ की जे इस च वासुकी नाग दा बास मन्नेया जंदा ऐ। इसकरी इत्थें वासुकी नागै दियां मूर्तियां बी एह् न। इत्थें जेहड़ा मदान ऐ ओह् बड़ा गै शैल ऐ। स्योज थमां डेढ़ मील दूर चढ़ाई चढ़ियै शखपद नां दी शैलधार औंदी ऐ ते फी किश दूर कपलास कुंड। इस झील दा व्यास 3 वर्ग किलोमीटर दे लगभग ऐ। बर्फ पौने करी इसदे शलैपे च चार चन्न लगी जंदे न। इत्थें जन्माष्टमी गी मेला लगदा ऐ। इत्थें गर्म मौसम च बी खूब ठंड होंदी ऐ। छड़ी मबारक बाद लोक किट्ठे होई गाठा मंदर जंदे न ते ग्याना बालियै सारी रात कुड्ड नाच करी देवते गी खुश करदे न।

०००

थान डोडा

गुरसल देवता

गुरसल देवता दा थान डोडा दे कोरखन ग्रां च ऐ। इत्थूं दे आले दुआले दे मते ग्रायें दे लोक देवता गी मनदे न ते मौके-मौके पर आई देवता दे सीस झुकांदे न। इत्थूं दे रकवाल, भूतियाल, गौड़ी आदि राजपूत जाति दे लोक देवता गी पूजदे न। बरे च इक बारी देवता दे सारे किट्ठे होंदे न ते जातर करने परैन्त हवन यज्ञ कीता जंदा ऐ ते फी रातीं गी कुड्ड नाथ दा सरिस्ता बी कीता जंदा ऐ। ते इत्थें इसलै मते ग्रायें थमां लोक जियां गुरामिल, ललूट मंझमे, थाना, भाटा आदि थमां लोक औंदे न।

०००

थान डोडा

भद्रकाली मंदर

भद्रकाली दा मंदर वासुकि नाग मंदर कोल ऐ। लोक विश्वास मताबक इस मंदर गी भद्रवाह दे राजा भद्रपाल ने बनवाया हा। भद्रपाल गी काहनसिंह बलौरिया ने भद्रवाह राज दा संस्थापक मन्ने दा ऐ। इस करी एह् मंदर बी इन्ना गै पराना ऐ जिन्ना भद्रवाह। भद्रकाली दी शिला दा जिक्र वासुकि पुराण च मिलदा ऐ। इस पुराण मताबक एह् नागदेवी वासुकि नाग दी भैन ऐ। पुराणे च जिस भद्रापीठ दा उल्लेख मिलदा ऐ एह् उयै मंदर ऐ। एह् मंदर लकड़ी दा बने दा ऐ ते इसगी इत्थूं दी शैली च गै इत्थूं दे कलाकारें बनाए दा ऐ। इसगी विदवाने खस जां नाग शैली आक्खे दा ऐ।

इयै जनैह मंदर हिमाचल दे चम्बा ते सिरमौर च बी एह् न। एह् मंदर वासुकि नाग शैली च गै हा पर इसगी बार-बार बनाने कारण इसदा रूप-सरूप बदलोंदा रेहा। इसलै मंदर दी छत सिद्दी ऐ। इस मंदर च काले पत्थर दी बनी दी मूर्ति बराजमान ही जिसी खूब सजाया जंदा हा पर इसलै एह् मूर्ति मंदर थमां गायब ऐ ते मंदर सुन्ना पेदा ऐ।

०००

मंदर डोडा

गव्होह गुफा मंदर

डोडा दे भलेसा थाहरा थमां जुगसर थाहरा पर इक प्हाड़ी दे उप्पर एह स्थान स्थित ऐ। इस गुफा मंदर गी इक चरोआले ने सब्भने थमां पैहले दिखेया इत्थें इक अद्दा किलो दा सुन्ने दा त्रिशूल ते इक किलो दा चांदी दा त्रिशूल हा। इस मंदर गी देवी मंदर मन्नेया जंदा ऐ। इत्थूं दे लोकें मताबक एह लाका चम्बा कन्नै रलदा हा ते कोल गै किले दे अवशेष बी मजूद न। मन्नेया जंदा ऐ एह मंदर उस्सै किले च रौहने आहले दी इष्ट देवी होनी ऐ। इस थाहर सुविधा नेई होने करी सिर्फ स्थानी लोक गै जंदे न। बाहरा भक्त अजे इत्थें नेई आँदे।

०००

मंदर डोडा

रहुशर माता



भद्रवाह च शीतला माता गी रहुशर माता करी जानेया जंदा ऐ। एह पराना मंदर प्हाड़ी दी ढलान पर बने दा ऐ। इस थाहरा पर मती गिनतरी च रहुशर दे बूहटे होने करी रहुशर माता दा नां प्रचलन च ऐ। इत्थें लोक बच्चे दे मुनन कराने गितै औंदे न। इस मंदर दे दर्शनें गितै चम्बा, बनी, बलौर, कटुआ, डोडा, किशतवाड़ थमां लोक पूरा बरा औंदे न। इत्थें अठमें नरातें गी मेला लगदा ऐ। इत्थें रौहनें लेई भक्तें गितै धर्मशाला बनी दियां न। चिंता जगह थमां इत्थूं तगर औने दा शिंडा चार किलोमीटर ऐ।

०००

भद्रवाह मंदर

चण्डी माता चनौत



एह माता चण्डी दा मंदर ऐ। एह मंदर चनौत थाहरा पर स्थित ऐ। इत्थें 3 जुलाई गी डोडा थमां त्रिशूल यात्रा औंदी ऐ। उस रोज इत्थें सारा दिन लोक भजन कीर्तन करदे न ते रातीं यात्रा वापस डोडा परतोई जंदी ऐ। फी 18 अगस्त इस थमां बी बड्डी यात्रा इत्थूं चनौत थमां शुरू होई मचैल तगर जंदी ऐ। इक दिन जातरा पाड़र रूकदी ऐ ते फी भद्रवाह वापस आई पुज्जदी ऐ। इस यात्रा दी अवधि इक म्हीना होंदी ऐ।



थउ

०००

नौमां ध्याऽ

जिला किशतवाड़ दे धार्मिक ते सांस्कृतिक थाहर

किशतवाड़

हिमालय दे बशकारें बस्से दा किशतवाड़ चोंने पास्सै दा प्हाड़ें कन्नै घिरे दा ऐ। इसदे उत्तर च जंस्कार, पूर्व च हिमाचल प्रदेश दक्खन च डोडा ते पच्छिम च अनंतनाग ऐ। इत्थूं दा मौसम गर्मी च गर्म ते सेयाले ठंडा होंदा ऐ। अप्रैल थमां नवम्बर इत्थें बड़ा शैल मौसम होंदा ऐ। इत्थें बरखा बड़ी घट्ट बरेदी ऐ। किशतवाड़ गी केसर दी धरती दे नां कन्नै बी जानेया जंदा ऐ। इत्थूं दा केसर सारे विश्व च मशहुर ऐ। इत्थूं दा मता हिस्सा जंगलें कन्नै भरोचे दा ऐ। इत्थें 124.23 वर्ग मील धरती पर सिर्फ जंगल फैले दे न। इ'नें जंगलें च देवदार, चीड़ कैहल आदि दे बुहटें मती गिनतरी च लब्भदे न। खोड़, तूत, आड़ू, खमानी दे बुहटे बी मती गिनतरी च इत्थें होंदे न। इत्थूं दे जंगले च कीमती जड़ी बूटियां न। किश लोक इनेंगी किट्टा करी बजार जाई बेचदे न ते अपनी जीवन चलांदे न। इंदे च गुच्छियां, बनकशां, कुट्ट, धुप्प, जीरा, अनारदाना आदि प्रमुख न। इत्थें सब्भने धर्म दे लोक रली-मिली रौहदे न जिंदे च मुसलमान, हिन्दू, बुद्ध ते सिक्ख आदि न। प्हाड़ें च बस्से दा एह थाहर अपने प्राकृतिक शलैपे कन्नै दिक्खने आहलें गी मंत्रमुग्ध करी दिंदा ऐ।

०००

किशतवाड़ मंदर

राधा कृष्ण मंदर

किशतवाड़ जलना ग्रां च कोई मंदर नेई हा। इस करी करीब बीह बरे पैह्ले इत्थूं दे लोके किट्ठे होई एह राधा-कृष्ण मंदर बनवाने दा फैसला कीता ते मंदर गी बनाना शुरू कीता गेआ तां जे लोके गी दिन तेआर मौके प्रभु दर्शन ते हवन यज्ञ दा सरिस्ता होई सके। मंदर लेई निहाल चंद सैन होरें मूर्तियां दितियां ते मंदर लेई किशतवाड़ रघुनाथ मंदर ने दो कनाल जमीन दित्ती। इत्थें इक बड्डा हाल प्रवेश करदे गै जित्थें त्रै कमरें बनाये गेदे न। बश्कारले कमरे च मंदर स्थापित कीता गेदा ऐ। गर्भगृह च राधा-कृष्ण दियां मूर्तियां न। बाकी दऊं कमरे च बी मूर्ति स्थापना कीती जानी बाकी ऐ। इत्थें औने आहने साधु महात्मा इत्थें बने दे कमरे च रौंहदे न। मंदर दी परदक्खन गितै डेढ़ फुट चौड़ा रस्ता ऐ। बाहरले हाल च हवन यज्ञ आहले दिन भक्त किट्ठे होई बाँहदे न। मंदर गी बनवाने गितै इत्थूं दे आले-दुआले दे लोके बी चंदा देई मती मदाद कीती। मंदर च मौके-मौके पर धार्मिक प्रवचन आदि होंदे रौंहदे न।

०००

किशतवाड़ मंदर

गणेश मंदर पोछाल

इस मंदर च स्थापित गणेश जी दी मूर्ति पैहले कुसा होर थाहर स्थापित ही। दंद कथा मताबक जित्थें अज्ज मूर्ति स्थापित ऐ उत्थूं दे इक बर्जुग गी गणेश जी ने सुखने च दर्शन दिते ते आखेया जे मिगी इत्थूं अपने ग्रां लेई चल। ओह परिहार बर्जुग मूर्ति गी अपनी पिट्ठा पर लेई चली पेआ। भार मता हा इसकरी बसाऽ करने गितै थाहर थाहर बौहना पेआ। जेह्दे बुहटे हेठ उनें बसाऽ कीता ओह सारे गणेश जी दे नां करी दिते गै, कोई बी उनें बूहटे गी बड्डी नेई सकदा। मंदर आहली थाहर जिसलै मूर्ति पुज्जी तां इत्थें गै स्थापित करी दित्ती गई। एह पोछाल, बेड़ा-भाटा, मता ते पलभाड़ ग्रां दा कुल देवता ऐ। इत्थें हून इक होर मंदर बी बनवाया जा करदा ऐ।

०००

किशतवाड़ मंदर

कार्तिक स्वामी मंदर नागनी

किशतवाड़ दे नागनी ग्रां च कार्तिक भगवान दा इक पराना मंदर ऐ। एह मंदर किशतवाड़ दे दक्षिण पूर्व पाससै ऐ। इक दंद कथा मताबक परिहार जात दा इक बर्जुग अपने घरा लेई बालन लेई आवा करदा हा। रस्ते च किश हुट्टन होई गेआ तां उनें लकड़ियां सिरा थमां थल्ले रक्खी दितियां। एह उयै थाहर हा जित्थें अज्ज मंदर ऐ। किश चिर बसांऽ करने परैन्त जिसलै ओह लकड़ियां सिरै पर रक्खन लगा तां ओह खूब भारी होई गईयां। कुसा गी कन्नै बी लाया पर कोई फायदा नेई होआ। तां उनें लकड़ी गी निक्के-निक्के टोटें च करने गितै कुहाड़ी दा फट्ट कराया तां लकड़ी थमां खून बगी पेआ। डरे मारे उसने लकड़ी उत्थें गै छोड़ी ते आपूं घर आई गेआ। रातीं सुखने च इक दिव्य माहनु ने उसगी दर्शन दित्ते ते गलाया में कार्तिक स्वामी आं मिगी एह थाहर बड़ा मनभाना लग्गा, तूं मेरा मंदर बनवाई मेरी स्थापना कर।



सारा ग्रां कार्तिक स्वामी दे हुक्म मताबक किट्टा होई सारा ग्रां मंदर बनान लग्गी पेआ ते उस लकड़ी दे अगले हिस्से दी मूर्ति बनाई। मंदर कन्नै मती जमीन बी छोड़ी गई।

राजा काहनपाल ने फी इत्थें कैह दी मूर्ति स्थापित कराई ते मंदर गी परतियै बनवाया। मंदर बड़े घने जगलें च हा इसकरी उत्थें आम आदमी बड़ा घट्ट पुज्जी सकदा हा। इस कारण ओह मूर्ति उत्थूं किशतवाड़ दे बजार च स्थापित नीलकंठ दे प्राचीन मंदर च रखी दित्ती गई। इत्थें अगग लगी तां मूर्ति

गी मंदरे दे पंत हुंदे घर रखी दित्ता गोआ व फी चोर मूर्ति गी चराई लेई गै ते फी लाला अमरनाथ होरें संगमरमर दी चिट्ठी मूर्ति इत्थें स्थापित कराई। नागनी दे पराने मंदर च इसलै शिवलिंग स्थापित ऐ। जनानियें गी इत्थें जाने दी मनाही ऐ। कार्तिक स्वामी पंजसांसी, सैन बरादरी दा कुल देवता ऐ।

हुदरी ग्रां च कार्तिक स्वामी दा दुआ निक्का मंदर ऐ। इत्थें कार्तिक स्वामी दी त्रिमुखी चिट्ठे संगमरमर दी मूर्ति स्थापित ऐ।

नागनी दा कार्तिक स्वामी मंदर बड़ा शैल ऐ। शादी ब्याह मौके जां कुसा बी शुभ कम्मा गी करने थमां पैहले लोक इत्थें जरूर मत्था टेकदे न। नमां अनाज औने पर पैहले इत्थें चाढ़ेया जंदा ऐ। दूरा थमां लोक इस मंदर गी दिक्खन औंदे न।

०००

मंदर किशतवाड़

हुन्दमाता मंदर

हुन्दमाता दा स्थान किशतवाड़ थमां 85 किलोमीटर दूर रच्छन लाके दे केखौल ग्रां च ऐ। इत्थूं दे लोके गी माता पर बड़ी आस्था ऐ।

हाड़ म्हीने सरकूट मंदर किशतवाड़ थमां हुन्दमाता दे दर्शनें लेई जातरा निकलदी ऐ। बड़े गै भक्तिमय महौल च बाजे-गाजे कन्नै नच्चदे गांदे जातरा शुरू हुंदी ऐ। रातीं बैल्ले जातरा इखाला ग्रां पुज्जदी ऐ इत्थें भक्तें दे खाने-पीने ते ठैहरने दा पूरा इंतजाम हुंदा ऐ।

दुयै दिन जातरा पंजधारा आई सकदी ऐ। रात रौहने मगरा बड्डलै सबैल्ले जातरा फी शुरू हुंदी ऐ। दपैहरी दी रुट्टी अनंत नाले पर ते रातीं गुगट नाले दी धर्मशाला च जातरा दे रौहने दा प्रबन्ध कीता गेदा हुंदा ऐ। चौथे रोज जातरा, दपैहरी हुन्द जाई पुजदी ऐ। हुन्दमाता इक फ्हाड़ दे खल्ले बनी दी गुफा च वास करदी ऐ। उत्थें पिंडी रूप च माता दे भक्तें गी दर्शन हुंदे न। गुफा दे उप्परें इक निक्का जनैहा मंदर ऐ जेहड़ा लोक शैली च बनाया गेदा ऐ। आखदे न जे इत्थें पैहले लकड़ी दा मंदर हा।

मंदर जाने दा रस्ता बड़ा तंग ऐ ते इक्क मौके इक गै माहनु अंदर जाई सकदा ऐ। मंदर दे अगमें खुल्ला बेहड़ा ऐ जिस च शिवजी दा अंदर ऐ जिसगी देआर दी लकड़ी कन्नै बनाया गेदा ऐ।


जिस हुन्द फ्हाड़ी पर माता दा मंदर ऐ उत्थें इक जलकुंड ऐ। आखदे न जे पैहलें माता दा मंदर इस्सै थाहर हा पर फी लोके दी सुहलियत लेई पुजारी ने मंदर ख'ल्लें बनवाया हा। हुन्दमाता केई जातें दे लोके दी कुल देवी ऐ। इत्थूं दे लोके दा विश्वास ऐ जे हुन्द माता माँ दुर्गा दा रूप ऐ।

०००

मंदर किशतवाड़

गौरी शंकर मंदर सरकूट

एह इक पराना मंदर ऐ। किशतवाड़ दे चगाने दे दच्छन पच्छम च सरकूट सरोवर दे उतरी तट पर स्थित ऐ। एह मंदर केई बारी बनाया गेआ जिस कारण इसदी बनावट च समें-समें पर बदला होंदा रेहा। इशरत कश्मीरी हुंदे मताबक एह मंदर रिशी पाल दे समें दा ऐ। उंदा समां 13वीं सदी दा मन्नेआ जंदा ऐ। इस करी एह मंदर करीब सत्त सौ बरे पराना ऐ।



एह मंदर करीब 52 कनाल जमीन च फैले दा हा। इसदे चार चफेरे छै सौ फुट तगर कुसा गी बी शकार करने दी आज्ञा नेई ही। इत्थें इक बड़ा बड्डा तलाऽ बी हा जेहड़ा हून अकार च बड़ा घट्टी गेदा ऐ।

आक्खदे न जे इत्थें तलाऽ कोल बाबा तुलसी गिरी कुटिया बनाई रौंहदे हे। उनें ब्याह नेई हा कीते दा ते ओह नारी जाति गी कुटिया कोल औने दी आज्ञा बी नेई हे दिंदे। ओह मंदर दी देख-रेख करदे ते 3200 कनाल जमीन जेहड़ी राजा ने मंदर गी दित्ती दी ही जिसदी सांभ-संभाल उंदे चले सरकूट दे जोगिन्द्र, डूल दे नागेन्द्र ते पलभाड़ दे भागेन्द्र करदे हे। किश लोके दा मत ऐ जे महात्मा तुलसी गिरी महाराजा गन्धर्व सैन दे खानदान थमां हे। उनें जिंदे जी इत्थें समाधि लेई ही। लोक अज्ज बी इंदे प्रति अपार श्रद्धा भाव रखदे न।

इसलै एह इक भव्य मंदर ऐ। मंदर च गौरी शंकर, राम सीता लक्ष्मण

ते हनुमान जी, दुर्गा माता, गणेश जी ते धर्मराज दियां मूर्तियां स्थापित न। कोल गै हवन कुंड ऐ ते उस कन्नै महात्मा तुलसी गिरि जी दी समाधि ऐ।

एह फ्हाड़ी शैली च बनाया गेदा काठ मंदर ऐ। इसदा उप्परला हिस्सा गुंबर अकार दा ऐ। एह मंदर किशतवाड़ दी संस्कृति गी सम्हालदा ऐ। जन्माष्टमी गी इत्थूं शोभा जातरा निकलदी ऐ ते सरथल देवी दी जातरा दी शुरूआत बी इत्थूं गै होंदी ऐ।

०००

मंदर किशतवाड़

नीलकंठ महादेव मंदर

नीलकंठ महादेव दा एह मंदर किशतवाड़ दे खास मंदरें च इक ऐ। इस मंदर गी दसमीं सदी च राजा काहनपाल ने बनवाया हा। आखदे न इस मंदर च नीलम पत्थर दा शिवलिंग रखेया गेदा हा इस करी इस मंदर दा नां नीलकंठ मंदर पेई गेआ।

किशतवाड़ दे इतिहास च लखोए दा ऐ जे 1629-1635 ई. च बसोहली दे राजा भूपतपाल ने किशतवाड़ पर हमला कीता ते इस मंदर गी भलेयां बिरान करी दिता ते शिवलिंग गी बसोहली अपने कन्नै लेई गेआ ते उत्थें मंदर च स्थापित करी दिता। किशतवाड़ दा मंदर केई चिर उजड़े दा रेहा। 2002 च इत्थूं दे लोके इसगी परतिये बनाना शुरू कीता। मंदर बनाने परेंत इस मंदर च शिव पार्वती दी मूर्ति स्थापना कीती गई। इसलै इस मंदर दी गिनतरी बड्डे मंदरे च कीती जंदी ऐ। लोक बड़ी भक्ति भावना कन्नै इत्थें औंदे न ते उनेंगी इस मंदरे पर अटूट आस्था ऐ। पूरा बरा इत्थें केई सांस्कृतिक कार्यक्रम चलदे न।

०००

मंदर किशतवाड़

श्री रघुनाथ मंदर-किशतवाड़

किशतवाड़ दा रघुनाथ मंदर बड़ा पराना ऐ। मंदरा दियां किश पोढ़ियां चढ़ियै उप्परली मंजल पर राम जी दा दरबार सज्जे दा ऐ। मंदर च रक्खी दी मूर्ति बंडी गै शैल ऐ। एह मंदर लकड़ी कन्नै बनाया गेदा ऐ। मंदर दे कोल हनुमान जी दा मंदर ऐ। सज्जे पाससै शिवजी ते धर्मराजे दा मंदर ऐ। इत्थें गै इक हवन कुण्ड बी ऐ।

आक्खदे न जे बरागी अखाड़े दे बाबा टैहलदास इत्थें आये। उनेगी सुखने च इत्थें राम मंदर बनाने दा हुक्म होआ। उनें बड़ी धर्मनिष्ठा कन्नै मंदर बनाया। मंदर बनाने लेई इत्थूं दे लोकें यथाशक्ति दान ते जमीन मंदर लेई दित्ती। इक भक्त शादीलाल ने लोआद नेई होने कारण अपनी सारी जमीन मंदर लेई दान करी दित्ती। महाराजा गुलाब सिंह होरें बी मंदर दे नां किश जमीन दित्ती। बाबा टैहलदास जी दे परैन्त सैहजदास मंदरां दी सेवा च रेह। महानंद जेहड़े जिवर ग्रां दे रौहने आहले हे उनें मंदर दी पूजा पाठ ते सांभ-संभाल सैहजनाथ हुंदे परैन्त अपने हत्थें च लेई।

इत्थूं दे लोकें दी मर्जी मताबक 1980 थमां मंदर दी पूजा पाठ दा कम्म महात्मायें संभाले दा ऐ। मंदर दी सारी व्यवस्था “श्री रघुनाथ मंदर” प्रबंधक समिति करदी ऐ।

०००

मंदर किशतवाड़

किशतवाड़ राम मंदर

एह राममंदर किशतवाड़ दे बागवान महल्ले च ऐ। इत्थें कोई लिखित प्रमाण नेई थ्होआ जिस कन्नै पता लगी सके जे एह मंदर कदूं बनाया गेआ। पर लोके दा आक्खना ऐ जे एह मंदर जोरावर सिंह दे बाद बनेया। इसदा निर्माण महाराजा रणवीर सिंह दे राज बैल्ले होआ। एह अंदाजा लाया जंदा ऐ जे एह मंदर सन 1860 दे कोल कश होआ।

एह मंदर फ्हाड़ी शैली च बनाया गेदा ऐ। ते इसदा शलैपा अज्ज बी मनमोहना ऐ। इत्थें राम-सीता ते लक्ष्मण दियां मूर्तियां स्थापत न। इसदा उप्परला हिस्सा गुम्बद अकार दा ऐ ते गर्भघर वर्गाकार ऐ। कंधे दे बाहरले पाससै कोई चित्रकारी नेई कंधा बिल्कुल कोरिया न। मंदर अज्ज बी पुख्ता ऐ। लोके दी आस्था इस मंदर पर अज्ज बी ऐ।

०००

मंदर किशतवाड़

अगराल ढा मंदर

बड़डे-बड़डे पत्थरें कन्नै बने दा एह मंदर तसील किशतवाड़ दे सरथल लाके दे ग्रां अगराल च स्थित ऐ। एह मंदर राजा अग्रदेव थमां बी पैहले दा बने दा ऐ। विदवाने दा मत ऐ जे एह मंदर दसमीं ग्यारमीं सदी दा बने दा ऐ। मंदर दे नां पर हूब इत्थें किश गै नशान गोचरी हुंदे न। पत्थर दी शिलायें कन्नै बने दा तोरण, कलश ते त्रै त्रुट्टी दियां मूर्तियां गै रेही गेदियां न। मंदर दा मुख हिस्सा 345 मीटर लम्मा ऐ। इसदे उप्पर त्रै-त्रै बड़डे-बड़डे पत्थर न ते फी इंदे उप्पर 2029 मीटर लम्बा पत्थर दा धरण ऐ। इसदा तोरण 2044 मीटर उच्चा ऐ। इसदे मत्थें पर इक गोल चक्र उप्पर दऊं परियें दियां मूर्तियां न। इस तोरण कोल गै इक दिवोरु (देवस्थल) हा जिसदे हिस्से पूरे ग्रां च खिल्लरे दे न ते किश मंदर च सम्हाले गेदे न। इंदे च शिवजी दी त्रै मुखी मूर्ति, पार्वती जी, कार्तिकेय दी मोर कन्नै मूर्ति ते इक गोल थम्म त्रुट्टे दी स्थिति च इत्थें पेदा ऐ। कार्तिकेय दी मूर्ति कला दी नजर कन्नै दिक्खी जा तां कारीगरी दा इक उम्दा नमूना ऐ। ग्रां दे लोके दा गलाना ऐ जे इत्थें इक शिला लेख बी पेदा हा जेहड़ा हून मजुद नेई ऐ।

इतिहासकार डी. सी. शर्मा दे मताबक बाहरमीं सदी 'च किशतवाड़ दे राजा अग्रदेव ने इस मंदरें दा तोरण बनवाया हा।

पंडित हरिलाल शर्मा मताबक 1170 च राजा अग्रदेव किशतवाड़ दे इनें जंगलें च शकार खेढ़न आया तां उसनें त्रुट्टी दी हालत च एह मंदर दिखेया जित्थें किश बी तौर तरीके कन्नै नेई हा। देवी दी मूर्ति बिजन टल्ले कपड़े गैहने बन्धें दे पेई दी ही।

०००

किशतवाड़ मंदर

लक्ष्मी नारायण मंदर

एह मंदर किशतवाड़ दे ब्राह्मण महल्ले दे बशकार स्थित ऐ। इस मंदर गी पंडित हरि लाल जी ने बनवाया। मंदर बनवाने गितै जमीन इत्थूं दे लोके दान च दित्ती ते फी किश जमीन खरीदी बी गई। एह मंदर करीब चालीं (40) बरे पराना ऐ।

शुरू च मंदरे गी बनाने मौके इसदी देखभाल पंडित हरिलाल होरें कीती ते उंदे सुर्ग सधारने परैंत ब्राह्मण सभा किशतवाड़ ने इसदे निर्माण कम्में गी अगगें बधाया। सभा दे प्रधान जगदेव शर्मा केई चिर इत्थें कम्में च रुज्जे दे रेह। मंदर पूरा होने परैंत ब्राह्मण सभा किशतवाड़ मंदर गी चला करदी ऐ। इस मंदर च दो मुख डयोढ़ियां न इक पच्छम ते दूई दक्खन पाससै। अंदर खुला बेहड़ा ऐ ते पूर्व पेठा शिव मंदर ऐ। जेहड़ा बड़ा मता बड्डा नेई पर दिक्खने गी बड़ा शैल ऐ। उत्थें नंदीगण, शिवलिंग ते ताम्मे (त्राबें) दे नाग देवता बिराजमान न। मूर्तियां काले पत्थर कन्नै बनी दियां न।

दक्खन पाससै उप्परें जित्थें किश पोढ़ियां चढ़ी जाना पौंदा ऐ लक्ष्मी नारायण दा मंदर ऐ। एह सारा मंदर शीशे कन्नै सजाया बनाया गेदा ऐ। मंदर च संगमरमर दियां लक्ष्मी नारायण जी दियां बड्डियां-बड्डियां मूर्तियां ने जेहड़ियां राजस्थानी शैली दा नमूना न। इनें मूर्तियें गी शैल कपड़ें ते गैहनें कन्नै सजाया गेदा ऐ।

मंदर च मते श्रद्धालु दिने तेहारें गी भगवान दे दर्शनें गितै औंदे न। इत्थें दूरा औने आहले भक्तें दे रौहने दी व्यवस्था बी ऐ। पुन्नेया, जन्माष्टमी ते होरने तेहारें गी भक्त इत्थें पुजा अर्चना करदे न। जदूं मचैल माता पाडर दी जात्तरा

होंदी ऐ तां लोक इत्थें रातीं ठैहरदे न। मंदर दी देखभाल सी. आर. पी. एफ. दे जवान करदे न। एह मंदर शैहरा दी सांस्कृतिक धार्मिक ते समाजिक गतिविधियें दा केंद्र ऐ। इत्थें आमतौर पर साधु महात्मा प्रवचन ते कथा वाचन करदे न। इत्थें केई मौके पर हवन यज्ञ ते भंडारें बी कीते जंदे न। लोके गी इस थाहर पर बड़ी आस्था ऐ।

०००

किश्तवाड़ मंदर

अष्टभुजा दुर्गा मंदर, हट्टा

किश्तवाड़ दे हट्टा ग्रां च अष्टभुजा दुर्गा दा पराना मंदर ऐ। लोकें दी धारणा ऐ जे इस मंदर गी सब्भने थमां पैहले पांडवें बनाया हा। इस मंदर दे अवशेष दिक्खने पर पता लगदा ऐ जे एह इक विशाल मंदर हा। इत्थें अज्ज बी छै:-छै: फुट लम्मी ते इक्क फुट चौड़ी शिलां नजरी औंदियां न। पराना मंदर त्रुट्टी जाने पर किश्तवाड़ दे राजा तेग सिंह ने इस मंदर गी परतियै बनाया ते फी जम्मू दे राजा बी मंदर दी मरम्मत करवांदे रेह। मंदरें कन्नै पंज सौ कनाल जगह खेती बाडी लेई दान दिती गई जिस पर मालिया नेई हा लगदा तां जे साधु महात्मार्यें दी रुट्टी पानी असानी कन्नै चली सके। इत्थें सब्भने थमां पैहलें जेहड़े पुजारी हे ओह बंगाल थमां आए दे हे। हट्टा शब्द डोगरी दे शब्द हट्टी दा बिगड़े दा रूप ऐ। एह थाहर पैहलें बनज बपार दा मुख थाहर हा ते धनी अबादी आह्ला हा। अज्ज एह इक निक्के जनैह ग्रां दे रूप च सिमटी गेदा ऐ।

राजें दे मौके जदूं मेहता बस्ती राम लड़ाई जिती आया तां मंदर दे छत्त दी मरम्मत करोआई गई। इत्थूं दे लोक इस माता गी कुलदेवी दे रूपा च मनदे न। मुनन, ब्याह बच्चे दे जन्मदिन ते होरनें शुभ मौके पर इत्थें मत्था टेकन औंदे न।

माता दी मूर्ति बड़ी शैल ऐ ते काले पत्थर कन्नै बनाई गेदी ऐ।

माता दे शक्ति चमत्कारें बारे इत्थूं दे लोक अकसर गल्ल करदे न। इत्थूं दे वृद्ध पुजारी मताबक उंदे पिता बद्दीनाथ हुंदे मौके मंदर च मंगलवारें शेर औंदा ते माता दे मत्था टेकी जंदा उठी। इयां गै इक बारी मुगल फौज इत्थें

औन लगी तां लोक डरी गै। उसलै गै मंदरे थमां इक सिंगें आहली गौ आई
ते उसनै सारी फौज उत्थूं कड्डी लाई।

इत्थें शिवरात्र गी यज्ञ ते भंडारा कीता जंदा ऐ। मता चिर पैह्ले इत्थें मेला
लगदा हा जिस च केई दिनें तगर कश्मीर दा हास्य नाटक वांडपाथर होंदा हा।
कदें एह् थाहर धार्मक, समाजक ते सांस्कृतिक गतिविधियें दा मुख थाहर हा।

०००

मंदर किशतवाड़

वजीरें दा शिव मंदर

एह इक सौ सतारह बरें पराना भव्य शिव मंदर ऐ। इसगी वजीर हीरानंद होरें 1898 ई. च बनवाया हा। इस करी इसगी वजीरें दा मंदर करी कुआलेया जंदा ऐ। हीरानंद दे घर कोई संतान नेई ही। सब्भै सुख होंदे होई बी इनेंगी म्हेशा लोआदा दी कमी मसूस हुंदी। उनेंगी भगवान पर बड़ा भरोसा हा। ओह शिव भक्त हे। जिसलै उनेंगी हर पाससै दा नराशा गै हत्थ लगगी तां उनें शिव भगवान दे अगें हत्थ जोड़ी सुक्खन कीती जे मेरे घर जागत होग तां में तुंदा मंदर बनवागा। ईश्वर दी कृपा कन्नै उंदे घर जागत होआ, जिस दा नांऽ वद्रीनाथ हा। वजीर हीरानंद होरें फी अपनी सुक्खन मताबक एह मंदर बनवाया। बनवाने दे परैन्त एह मंदर उनें साधु महात्मायें गी अर्पण कीता। एह मंदर नागर शैली च बनाया गेदा ऐ। इस मंदर च इक गर्भघर, प्रदक्खना लेई रस्ता ते उच्चा शिखर ऐ। गर्भघर च रक्खेआ गेदा शिवलिंग बड़ा मनचित मोहना ऐ।

समें दे अंतराल कारण मंदर च किश मरम्मत दी लोड होने करी, हून मंदर दा निर्माण कार्य कीता जा करदा ऐ। इत्थूं दे लोक तन मन धन कन्नै मंदरे दी सेवा च हाजिर रौहदे न।

०००

थान किशतवाड़

कासर नाग स्थान

कासर नाग देवता दा स्थान पाड़र दे हमीद ग्रां च ऐ। एह ग्रां गुलाब गढ़ थमां सत्त किलोमीटर दूर मचेल रस्ते पर ऐ। एह मंदर इक चबूतरे पर बने दा ऐ। एह चबूतरा सिर्फ 3.44 मीटर लम्मा ऐ। मंदर दे अंदर इक शिला पर कासर नाग दी मूर्ति बनी दी ऐ, एह लकड़ी दी बनी दी ऐ। मूर्ति च नाग देवता दे हत्थें च नाग दर्शाये गेदे न। मंदर दे ललाट पर वासुकि नाग दी इक निक्की मूर्ति जड़ी दी ऐ। इसदी छत्त ढालमें तखतें कन्नै बनी दी ऐ। इसदी पैहली बनी दी छत्त खराब होई चुकी दी ही सन 19 सौ 88 ई. च इसदी नमीं छत्त बनाई गई। इस मंदर पर इसलै टीन दी छत्त पाई गेदी ऐ।

०००

थान किशतवाड़

शेषनाग स्थान

एह प्रसिद्ध मंदर किशतवाड़ दे कोला 61 किलोमीटर दूर हठौली दे पच्छम च कुन्दल गां दे तत्ता पानी दे उप्पर इक निक्के जनेह टीले पर बने दा ऐ। मंदर जाने लेई छै: पोढ़ियां न। इत्थें शेषनाग जी दी मूर्ति ऐ ते कोल गै महात्मा बुद्ध दियां दऊं मूर्तियां न इक मूर्ति त्रामें दी ते दूई पीतलू दी ऐ। कर्धें पर नाग मूर्तियां बनी दियां न। इस मंदर थमां पता लगदा ऐ जे पाडर क्षेत्र च नाग पूजा दी रवायत रेही दी ऐ। इस मंदर गी कुन्दल हठौली दे राणा ने सोहलमीं सदी च राजा नागपाल दी प्रेरणा कन्ने बनवाया हा। इस मंदर दे सिरै पर नाग मूर्ति बनी दी ऐ जिसदा अकार लौहका ऐ। इत्थें गै कृष्ण ते भैरो दियां मूर्तियां न। इत्थें गै दऊं अक्खां बनी दियां न जेहड़ियां लोक नाग देवी दी अक्खीं करी मनदे न। इत्थूं दी मूर्ति बड़ी शैल ऐ जेहड़ि काले पत्थर दी बनी दी ऐ। इस मूर्ति दे किश खल्लें काले पत्थर दी कालीवीर जी दी मूर्ति ऐ। इत्थें लाके दे लोक बड़ी आस्था रखदे न।

०००

थान किशतवाड़

बैकुंठनाथ मंदिर

एह मंदर किशतवाड़-पाडर शिड़का उप्पर पदेरना थमां 7 किलोमीटर दूर इक सुनसान थाहरा पर स्थित ऐ। एह थाहर इसलै भलेयां खंडहर अवस्था च ऐ। इनें खंडहरे थमां इक त्रिमुखी बैकुंठनाथ दी मूर्ति लब्धी जेह्डी पत्थर कन्नै बनाई गेदी ऐ। इसदे सज्जे पाससै शेरा दा मूंह बने दा ऐ ते इसदे खल्लें निक्की-निक्की मूर्तियां न। इत्थूं गै गणेश ते नन्दी जी दियां मूर्तियां बी लब्धी दियां न। एह मंदर इयां बझोंदा ऐ जे विष्णु भगवान दा मंदर ऐ। इसगी दसमीं सदी च बनाया गेदा हौग इयां मन्नेया जंदा ऐ। इसगी कुसनै बनाया इस बारै कोई लिखित प्रमाण नेई मिले दा ऐ।

०००

मंदर किशतवाड़

शीतला माता

शीतला माता दा एह् मंदर पाडर दे गुलाबगढ़ थाहरा पर चन्द्रभागा दे पूर्वी कंडे इक बड्डी चट्टान पर बनाया गेदा ऐ। एह् मंदर लकड़ी दा ऐं ते एह् भरमौर दे देवी मंदर आहला लेखा ऐ। मंदर अंदर माता दी मूर्ति ऐ जेह्ड़ी पत्थर कन्नै बनाई गेदी ऐ। इस मंदर दी छत्त ढालमी ऐ। मंदर दी कंधे दी लकड़ी पर जेह्ड़ा कम्म होए दा ऐ जेह्ड़ा सराहने जोग ऐ। माता दी सवारी गधा ऐ इसकरी मूर्तियें गी गधे पर सोआर दस्सेया गेदा ऐ। माता शीतला गी नाग, किरात गद्दी आदि पुजारी मन्नेया जंदा ऐ।

०००

थान किशतवाड़

जरिहू देवता

एह गुफा मंदर किशतवाड़ पाडर दे गुलाबगढ़ थमां 65 किलोमीटर दूर चन्द्रभागा ते भोटना दे संगम पर इक मदान च बराजमान ऐ। डुड्डी ग्रां थमां इक रस्ता इस गुफा गी जंदा ऐ। इत्थें इक जलकुंड ऐ जिसदा पानी साफ ते नरोआ ऐ। इस जलकुंड दे कोल इक शिवलिंग ऐ जेहड़ा कोहरा जमने कन्नै बने दा ऐ कदें-कदें एह इक मीटर उच्चा बी होई जंदा ऐ। हर बरे बैसाख म्हीने इत्थे 28 तरीक गी जातरा औंदी ऐ जिसदा नेतृत्व पुजारी करदा ऐ। इस देवता दी पूजा शंगली ते मनाल फुल्लें कन्नै कीती जंदी ऐ। जरिहू देवता गी लोक देवता दे नां कन्नै पूजेया जंदा ऐ केई लोक इनेंगी जरिहू नाग दे नां कन्नै बी पुजदे न।

०००

सरथल देवी

सरथल देवी

सरथल माता दा मंदर किशतवाड़ च ऐ। इत्थूं दे लोके च इस माता दी बड़ी मानता ऐ। इसगी श्रीस्थल दे नां कन्नै बी जानेया जंदा ऐ। डुग्गर प्रदेश दे कोने-कोने च रौहने आहले लोक माता दे भक्त न। एह पवित्र थाहर किशतवाड़ दे पूर्व उत्तर च 27 किलोमीटर दूर अगराल ग्रां च इक फ्हाड़ी ढलान च इक नाले दे कंढै ऐ। माता दा मूल मंदर गुफा च हा पर हून इसगी मंदरें दा रूप दिता गेदा ऐ। मंदर दे गर्भगृह च देवी दी मूर्ति ऐ जेहड़ी काले पत्थर दी ऐ देवी दियां ठारां बाहमां न। खबरें तां गै देवी दा नां अष्टादश भुजा ऐ।



देवी दे हत्थें च अस्त्र शस्त्र न। देवी दी एह मूर्ति बड़ी परानी ऐ। लोके मताबक 1170 वि० संवत् च किशतवाड़ दे राजा अग्रदेव गी एह मूर्ति कालीगढ़ दे जंगलें च इक त्रुटे दे मंदर च पत्थर दी चौकी पर रखी दी लम्बी ही। राजे ने उत्थूं थमां मूर्ति अगराल ग्रां आहन्नी ते मंदर बनवाईयै इत्थें मूर्ति स्थापना कीती। इस मंदर गी समें-समें पर केई राजे फेर बदल करी बनवाया। वर्तमान मंदर महाराज हरिसिंह होरें (1926-48) च बनवाया। इसगी फ्हाड़ी शैली च बनाया गेदा ऐ। मंदर च इक सराऽ ऐ जिस च यात्रुएं दे रौहने दी व्यवस्था ऐ। सरथल माता केई लोके दी कुल देवी ऐ। बरा भर लोक इत्थें श्रद्धा भाव कन्नै औंदे न।

०००

मचेल माता



किशतवाड़ दे पाडर दे मचेल ग्रां च माता दा मंदर ऐ। समस्त डुग्गर दे लोक माता दे भक्त न। माता दा मंदर लकड़ी दा बने दा ऐ। जिसदी ढालमी छत ऐ। इस च इक गर्भघर प्रदक्खन लेने दा रस्ता ऐ। इसदा सामने दा हिस्सा बड़ा कलात्मक ऐ। इस च समुद्र मंथन दा द्रिश्श दर्शाया गेदा ऐ। मंदर दे बाहरले हिस्से च पौराणिक ते नाग देवी देवताएं दियां मूर्तियां न। मंदर दा गर्भगृह वर्गाकार ऐ। इसदे अंदर चन्डी इक पिण्डी दे रूप च ऐ। पिण्डी कोल दो धातु दियां मूर्तियां न जिंदे च इक चांदी दी ऐ। आखेया जंदा ऐ जे चांदी दी एह मूर्ति जंस्कार थमां आहन्नी गंदी ऐ।

लोकें दा गलाना ऐ जे सेनापति जोरावर सिंह, वजीर लखपत ते मेहता बस्तीराम लड़ाई पर जाने थमां पैहले इत्थें आये हे। सन 1947 च जंस्कार गी पाकिस्तान ने जिसलै अपने अधिकार च लैता तां कर्नल हुक्म सिंह यादव ने माता अगगे जित्त लेई प्रार्थना कीती ते लड़ाई पर गेआ उठी। उसदी जित होई तां उसनै परतोंदे होई माता दे यज्ञ कीता ते इक मूर्ति स्थापना बी कराई। मचेल यात्रा 1981 च ठाकुर कुलवीर सिंह होरें शुरू कीती। अज्ज ज्हारें बद्धे लोक इस यात्रा च शामिल हुंदे न। यात्रा चिनोत थमां रम्भ हुंदी ऐ ते फी अठोली, पाडर ते फी मस्सु ग्रां पुज्जदी ऐ। रातीं मस्सु अराम करी बड्डलै माता दे जाई दर्शन होंदे न। माता दे यज्ञ भंडारे दा सरिस्ता बी हुंदा ऐ।

०००

दसमां ध्याऽ

जिला रजौरी दे धार्मक ते सांस्कृतिक थाहर

रजौरी

रजौरी 1968 च जिला बनी। इस थमां पैहले एह पुंछ जिले च इक तसील हैड-क्वार्टर ही। जिले दा दर्जा थ्होने परैंत इस च कोटरंका, काला कोट, सुंदरबनी, नशैहरा थन्नामंडी, दरहाल ते मंझाकोट आदि तसीलें गी शामिल कीता गेआ। इत्थूं दे लोक बक्ख-बक्ख धर्मे दे होने पर बी रलीमिली रौंहदे न। इत्थूं दी भाशा बरै गल्ल करचै तां इत्थें कश्मीरी, गोजरी बक्करवाली, फ्हाड़ी ते पोठोहारी भाशा बोली जंदी ऐ। बक्ख-बक्ख मौसमें स्हाबें जिले च बक्ख-बक्ख फसलां होंदिया न। उत्तर च मक्क, धान ते दक्खन च कनक मक्क आदि फसलां होंदिया न। उत्तरी भाग च खोड़, आलू राजमांह, खुमानी नाखां, साढ़ियां आदि मती मात्रा च होंदे न। जिले दे बश्कारले हिस्से च कनक मक्क धान ते दक्खन च सरेआं दी फसल मती होंदी ऐ। इत्थें फल ते मेवे बी मते होंदे न।

०००

रजौरी मंदर

वीरभद्रेश्वर मंदर

वीरभद्रेश्वर मंदर रजौरी दा प्राचीन मंदर ऐ। मंदर फ्हाड़ें दी चोटी पर ऐ। इसदे आले दुआले चीड़ दे बूहटे इसदा शलैपा बधांदे न। रजौरी थमां एह् मंदर 66 किलोमीटर दूर ऐ। एह् मंदर पाकिस्तान बन्ने थमां किश गै दूर ऐ। जेकर इत्थें खडोइयै दिक्खो तां मीरपुर कोटली आदि साफ नजरी औंदा न। इत्थें सारी दिक्खरिख फौज करदी ऐ की जे हिन्दू इत्थें मती दूर रौंहदे न। इस मंदर गी घैंटियें आह्ला मंदर बी गलाया जंदा की जे लोकें दी आस्था ऐ जेकर इत्थें घैंटी चाढी जा तां भगवान शिव बड़े खुश होंदे न इसकरी इत्थें ज्हारें दी गिनतरी च मंदरें दे अंदर बाहर घैंटियां न। मंदर दे अंदर शिवलिंग ऐ ते परानी मूर्तियां मंदरें कोल कमरे च रखी दियां न।

इस मंदर बारै लोके दे बक्ख-बक्ख मत न। केईयें दा गलाना ऐ जे सती दे पिता राजा रक्ष ने कनखल हरिद्वार च इक यज्ञ कराया जित्थें सती गी पिता थमां साद्दा नेई थ्होआ ते ओह् बिजन सद्दे दे पिता दे रचाये दे यज्ञ च जाई पुज्जी पर उसगी उत्थें मान नेई थ्होआ ते उसनै यज्ञ कुंड च अपने आप गी खत्म करी लैआ जिसलै शिवजी गी पता लग्गा तां उनें गुस्से च अपनी जटां खोल्ली दितियां ते जेह्ड़ी पैहली जाट धरती पर पेई उस थमां वीरभद्रेश्वर दा जन्म होआ ते उसनै माता सती दी मौत दा बदला राजा दक्ष गी मारी मकाया, जिसलै ओह् कैलाश पर्वत वापस जारदा हा तां उसनै इस फ्हाड़ा पर किश चिर बसांऽ कीता हा जिसकरी इत्थें उसदा मंदर बनाया गेआ।

किश होर लोकें दा गलाना ऐ जे मंदरें दी कंधा पर लिखत रूप च मिलेया जे एह् मंदर राजा कनिष्क ने बनाया हा जिसलै ओह् बुद्धमत दे चौथे सम्मेलन

च शारदा युनिवर्सिटी जा करदा हा। शारदा युनिवर्सिटी मुज्जफराबाद नीलमघाटी च ही। इस मंदर पर लोके दी आस्था बड़ी पक्की ऐ ते मौके-मौके पर लोक इत्थें मत्था टेकन औंदे न। बन्ने पर होने करी फौज भामें इसदी सांभ-संभाल करदी ऐ पर लोके दा विश्वास बी इस मंदर लेई अननुट्टा ऐ।

०००



वीरभद्रेश्वर मंदर

रजौरी मंदर

मंगला माता मंदर

मंगला माता दा मंदर रजौरी दे नौशहरा थाहरा पर स्थित ऐ। असल च एह थाहर हमीरपुर पाकिस्तान च हा पर जिसलै पाकिस्तान च उनें मंगला बान्न बनाना शुरू कीता तां एह थाहर उस च आई गोआ। तां उसलै गै इक ब्राह्मण जिसदा नां पंत नेहाल चंद हा माता उसगी सुखने च आई ते



सनाया जे में अपना स्थान हमीरपुर थमां भवानी दे जंगलें च बनाई लैआ ऐ ते माता ने उसगी सुखने च गै से 'ई थाहर बी दस्सी। बडडलै पंत होरें जगले च जाई उस थाहरा दी तपाश कीती तां उनेंगी उत्थें माता दे पिंडी रूप च दर्शन होए उसनै उत्थें हवन यज्ञ करी माता दी मानता कीती। इस दरान उत्थें गै रौहने आहले इक चरवाहे ने माता दी सत्या गी नकारी दित्ता ते पिंडियें गी त्रुड़ने दी कोशिश कीती पर ओह पूरी चाल्ली नकाम रेहा। आखदे न किश चिरै परैन्त ओह चरवाहा बूहटे थमां डिग्गी पेआ ते उसदा लक्क बुरी चाल्ली त्रुट्टी गोआ ते उसदी मौत होई गई।

एह गुफा मंदर बडी गै शैल थाहरा पर ऐ जित्थें लोक दर्शनें गितै औंदे न पर पुनेया आहले रोज इत्थें मते भक्त औंदे न।

इस थाहरा दी मती प्रसिद्धी अदूं होई जदूं 1975 च माता मंगला डा.

कर्णसिंह होरें गी सुखने च आईयां ते कर्ण सिंह होरें अपना सुखना घरै च सांझा कीता ते उत्थें दर्शनें गितै गै।

इस थाहरा पर नराते च बरें च दऊं बारी बड़ा मेला लगदा ऐ। आखदे न एह गुफा मंदर घना जंगल होने करी पैहले बंद करी दिती गई ही पर लोक दर्शनें गितै औंदे गै रेह तां मंदर आपूं भक्तें गितै खुल्ली गेआ। इत्थें कोल गै दो होर गुफा मंदर न। नैना माता दी पिंडी बी मंदर च मजूद ऐ।

भक्त इत्थें भजन कीर्तन करदे न ते उंदी सुख-सुविधायें दा तेआन मंदर लेई बनाई गेदी कमेटी पूरी चाल्ली करदी ऐ।

०००

रजौरी मंदर

मनवा माता मंदर

मनवा माता दा मंदर रजौरी दे कालाकोट थाहरा पर पाकिस्तान बन्ने दे कोल स्थित ऐ। इस मंदर बारै इत्थूं दे बसनीकें दे बक्ख-बक्ख मत न। इक मतानुसार शिवजी भगवान इस गुफा च किश चिर रेह हे ते फी माता मनवा ने इस थाहरा पर केई बरे भगवान दा तेआन कीता ते उंदा बास इत्थें रेहा।

इस थाहरा दी होंद बारै महाभारत च बी वर्णन ऐ। पांडवें अपने बनवास दे मौके इत्थूं थमां अट्ट किलोमीटर दूर पंजनारा ग्रां च अपनी रिहायश रखी ते ओह रोज इत्थें आई भगवान शिव ते मनवा माता दी भक्ति च लीन रौंहदे हे।

इत्थूं दे लोकें दा एह बी मनना ऐ जे भगवान शिव जिसलै कश्मीर जंदे हे तां ओह इस गुफा राहें अपनी जातरा पूरी करदे हे।

इत्थें पूजा भक्ति दा सिलसिला लोकें च उसलै शुरू होआ जदूं उच्ची थाहरा परा कुसा दा बैल खल्ल इस गुफा च पेआ तां उसगी किश बी नेई होआ। लोकें इस चमत्कार गी माता मनवा दी शक्ति दा प्रतीक मन्नेया ते उंदी आस्था इस थाहरा लेई बद्ध होई गई।

इत्थें मजूद पंत हुंदे मताबक इत्थें होर मती सारी पिंडियां न जिनेंगी शक्ति रूप च पुजेआ जंदा ऐ। नरातें च इत्थें भक्तें दी मती भीड़ होंदी ऐ। हवन यज्ञ आदि दा सरिस्ता कीता जंदा ऐ। लोकें दा विश्वास ऐ जे नरातें च माता सुर्गे थमां आई इत्थें वास करदी ऐ। इसकरी इनें दिनें लोक इत्थें खासतौर पर हवन यज्ञ पूजा आदि करदे न। इस थाहरा दा शलैपा बी भक्तें गी अपने आस्सै खिच्चदा। इत्थूं थमां पंज किलोमीटर दूर इक तत्ते पानी दा चश्मा ऐ। इसदी लोकें च बड़ी ख्याति इस करी ऐ जे इत्थें हड्डी दे रोगी स्नान करी भलेयां ठीक होई जंदे न। जम्मू थमां गै नेई एह रोगी पंजाब हिमाचल थमां बी मती गिनतरी च इत्थें औंदे न।

०००

रजौरी मंदर

चन्नी परात मंदर


एह मंदर रजौरी कोल सुन्दर बनी दे ग्रां परात च बराजमान ऐ। चन्नी परात ग्रां सुन्दरबनी थमां 14 किलोमीटर दूर इक फ्हाड़ी पर ऐ। एह मंदर वास्तु कला दी नजर कन्नै दिखेया जा तां डोगरा राजें दे काल च बने दे मंदरें थमां किश बक्खरापन झलकदा ऐ। एह मंदर बड़ा शैल ऐ। इस मंदरें दी कंधें पर बने दे रामायण महाभारत दे कथा चित्र बड़े शैल न। इसदे इलावा इत्थें कंधें पर महाराजा रणजीत सिंह, गुरूनानक देव, गुरू गोरखनाथ ते योगसाधना आदि दे चित्र बी बने दे न।

इस मंदर गी महाराजा प्रताप सिंह दे राज मौके इक साधु ने बनवाया हा जेहड़ा इस थाहर औंदे जंदे रौहदा हा। एह दो मंजला भगवान रघुनाथ जी गी समर्पित ऐ। इस मंदर गी बनवाने गितै महात्मा होर वणारस थमां उत्थूं दे मंदरा दा नक्शा कन्नै लेई आए दे हे ते उस्सै दी तर्ज पर उनें इस मंदर दा निर्माण करवाया हा। हर बरे जून म्हीने इत्थें मती गिनतरी च भक्त दर्शनें गितै औंदे न की जे इत्थें जून च खासतौर पर जातरा दा मौका हुंदा ऐ।

०००

रजौरी मंदर

हनुमान मंदर



हनुमान जी दा एह मंदर रजौरी नशैहरा दे ग्रां चरैआला च स्थित ऐ। इसगी इक साधु जेहड़े सोलन हिमाचल प्रदेश दे राज परोआर कन्नै सरबंध रखदे हे जिसलै उनें साधु चोला लाया तां ओह् अपनी इक साध्वी कन्नै इत्थें आए हे ते उनें इत्थूं दे लोकें दे सैहजोग कन्नै इस मंदर दा निर्माण 1967-68 च करवाया हा। ओह् हनुमान जी दी निक्की जनेई मूर्ति अपने कन्नै लेई आए दे हे जिसदी स्थापना उनें इस मंदर च कीती। पंज-छै बरे इत्थें रौहने परैन्त ओह् इत्थुआं गै उठी ते मंदर वरान होई गेआ की जे एह् मंदर चरैआला थमां मता बाहर हा ते लोकें दा इत्थें औना-जाना बड़ा घट्ट हा।

1981 च अयोध्या नाथ नां दे माहनू जेहड़े चरैआला ग्रां दे हे ते उंदी अपनी जागरण मंडली ही उनें इसगी परतियै लोकें दे सहयोग कन्नै बनवाया।

संतराम जेहड़े मंदर कोल रौहदे हे लाड़ी दे काल परैत मंदर दी सांभ-संभाल च अपना समां गजारदे। संतराम होरें गी मांस शराब आदि दा सेवन करने दी बड़ी बुरी आदत ही पर ओह् मंदर जाना बी नेई छोड़दे हे। इक रातीं

उनेंगी सुखने च हनुमान जी दे दर्शन होए उनें उसगी गलाया जेकर मेरी सेवा करनी ऐ तां अपनी मांस शराब दी आदत छोड़ी दे ते जिन्ना अंडा मांस शराब सेवन करना ऐ अज्ज गै करी ले ते उसगी बड़ा मता मांस शराब अपने अग्गे रखे दा लब्धा। जाग खुल्ली तां ओह भगवान दी आज्ञा गी सिर मत्थें धरदे होई सब्भै किश दा त्याग करी प्रभु सेवा च हाजर होई गै। मरने आहले दिनें तगर ओह इस मंदर दी सेवा च रेह। लोकें दा विश्वास ऐ जे उनेंगी अपने काल दा पैहले गै पता लगगी गेदा हा तां गै उनें मंदर अपनी पगग छोड़ी ते फी कदें इत्थें वापस नेई आए उंदा काल होई गेआ।

उंदे मरने परैत मंदर इक बारी परतियै वरान होई गेआ। इक दिन इत्थूं दे बसनीक कुलदीप कुमार होरें इक बक्करवाल गी मंदर च पशाब करदे दिक्खेया तां उसगी इयां करने थमां रोकेया। परते च बक्करवाल ने गलाया जे एह मंदर नेई जेकर मंदर होंदा तां अबाद होंदा इयां वरान नेई। कुलदीप होरें गी उसदे परते ने मना च खौदल पाई ते उनें मंदर परती बनाने दा निश्चा कीता। अगले इक हफते च गै कुलदीप कुमार होरें उत्थूं दे नौजवानें समेत इत्थें मंदरे गी परती बनाया। लोकें बी उंदी माली मदाद कीती। इत्थें गै हवन यज्ञ ते भंडारे दा बी सरिस्ता कीता।

इत्थूं दे लोक इस मंदर गी “नौकरी आहला मंदर” करी बी कुआलदे न की जे लोकें दा मनना ऐ जे इत्थें कीती गेदी हर सुखन पूरी होंदी ऐ पर युवा पीढ़ी खास करी नौकरी दी सुखन करदी ऐ ते इत्थूं दे करीब पंजाह युवा दा मनना ऐ जे उनेंगी नौकरी हनुमान जी दी सुखन करने पर गै थहोई एह उंदी कृपा ऐ।

इत्थें हर बरें 17 फरवरी गी भंडारा ते हवन यज्ञ कीता जंदा हा पर हून 7 फरवरी गी बी कीता जंदा ऐ कीजे हनुमान जी दी नमीं मूर्ति स्थापना इस्सै रोज होई दी ऐ। हनुमान जयंती गी बी इत्थें हवन ते भंडारा होंदा ऐ ते मती गिनतरी च लोक इत्थें औंदे न।

०००

रजौरी मंदर

कलसिया मंदर

एह मंदर नौशैहर दे कोला तेरह किलोमीटर दूर नौशैहरा झंगड शिड़का उप्पर कलसिया ग्रां च स्थित ऐ। लोकें दी इस प्राचीन मंदर पर बड़ी आस्था ऐ पर हून इसलै एह मंदर फौजा दे अन्दर होई जाने कारण लोकें गी अंदर जाने च किश मुश्कल हुंदी ऐ पर फौजी आज्ञा परैन्त इत्थें आई जाई सकदे न। किश लोकें दा मंदर बारै मत ऐ जे पैहले एह बौद्ध मंदर हा पर फी इसगी ब्रैहमण मंदर बनाया गेआ। इस मंदर गी छेमीं सदी दी कृति मन्नेया जंदा ऐ। इसगी केई बारी बनाया गेआ। इयां बी गलाया जंदा ऐ जे इत्थें पैहले दऊं मंदर हे ते फी उंदा इक मंदर करी दित्ता गेआ।

मंदर गी उच्चि थाहरा बनाया गेदा ऐ ते उप्पर जाने लेई पौड़ियां न। इस मंदर च दो चाल्ली दे खम्बे बने दे न किश झरीदार ते किश गोल अकार दे। झरीदार खम्भें पराने लगदे न। मंदर दी डयोढी शिलाएं कन्नै बनी दी ऐ। एह 1047 मीटर उच्चि ते 84 मीटर चौड़ी ऐ। मंदर दा गर्भघर चऊं कोने आह्ला ऐ। मंदर अंदर कंधां पर राम, सीता लक्ष्मण दियां आदमकद मूर्तियां न। मंदर दी पूर्वी कंधा पर धर्म चक्र बने दा ऐ। पर उसदी शिरां इक्की न। लोकें इस प्राचीन मंदर पर खास भक्ति भाव रखदे न। फौज इसदा रखरखाऽ करदी ऐ।

०००

रजौरी मंदर

पंचनाड़ा मंदर

जिला रजौरी दी कालाकोट तसील दे तैहत् सुंदरबनी कालाकोट शिडका पर सोलकी ग्रां थमां 18 किलोमीटर दूर पंचनाड़ा ग्रां दे नाले दे कंठे बने दा एह् मंदर डुग्गर दा गौरवशाली मंदर ऐ। इस मंदर गी 9वीं सदी च बनाया गेआ हा इयां बझोंदा ऐ। किश विदवान इसगी बौद्ध मंदर बी मनदे न। आई.सी. काक हुंदे मताबक एह् विष्णु मंदर ऐ उनें इस मंदर दी तुलना पुनियार मंदर कन्नै कीती दी ऐ। इस मंदर गी कुन बनाया इस बारै कोई सबूत नेई थहोंदा। गलांदे न जे इस मंदर दा नाश मुहम्मद तुगलक दी फौजा ने कीता हा। वास्तुकला दी नजर च एह् डुग्गर दा अद्भुत मंदर ऐ। एह् मंदर इक परकोट दे छोरे च ऐ। इत्थें गै चबूतरे पर मंदर बने दा ऐ। चबूतरा चढ़ने लेई 14 पोड़ियां न। गर्भघर दे मझाटै मूर्ति लेई सिंहासन ऐ पर इत्थें मूर्ति मजूद नेई ऐ। इसलै इत्थें सिर्फ हनुमान जी, शिवजी ते भेरौं दियां मूर्तियां एह् न। इस मंदर दी खास गल्ल ऐ जे परकोट दी कंथै पर चैत्य अकार दे निक्के बड्डे 60 कक्ष न जिंदे च जाने लेई निक्क दरोआजे न। इसदा अकार त्रिकोण ऐ। इक गै माहनू मुश्कलें अंदर जाई सकदा ऐ। गलाया जंदा ऐ जे एह् निक्की कोठियां दासें लेई बनाई गेदियां हियां। इस मंदर कोल ब्रैह्मणें दा म्हल्ला ऐ।

०००

रजौरी मंदर

तरेहाठ मंदर

जिला रजौरी दी कालाकोट थाहरा पर दऊं उपनिदयें दे संगम पर एह इतिहासक मंदर बने दा हा। पर अज्ज इत्थूं दी हालत बड़ी खराब ऐ। इत्थें मंदर दी नीहें दे लावा किश बी मजूद नेई ऐ। लोके दे मताबक इस मंदर गी सेयालकोट (पाकिस्तान) दे राजा शालवाहन ने बनवाया हा। गलाया जंदा ऐ जे भगवान विष्णु ने मोहनी दा रूप धारण करियै असुरें गी छलेआ हा। विष्णु भगवान आस्सेया त्रीआ हठ बरतने करी इस थाहरा दा नां त्रीया हठ पेआ जेहड़ा बाद च तरेहाठ नांऽ कन्नै मशहूर होआ।

1965 तगर मंदर दे अवशेष इत्थें नजरी औंदे हे पर शिव निर्मोही हुंदे मताबक प्रत्यक्षदर्शियें दा गलाना ऐ जे इस मंदर च विष्णु भगवान दी मूर्ति स्थापित ही। इस दियां बाहरलियां कंधां पत्थरें कन्नै बनी दियां हियां। 1947 दे बाद इत्थें हाड़ औने करी एह मंदर मता प्रभावत होआ ते डिग्गी पेआ। बाद च इसगी कुसै नेई बनवाया ते मलबा आले दुआले पेदा रेहा पर 1965 च जिसलै रियासी गी रजौरी कन्नै शिड़का राहें रलाने लेई शिड़क बनाने दा कम्म शुरू होआ तां शिड़क बनाने आहले लोकें इस मलबे गी चुकी लैता। ते इक इतिहासक मंदर दा नांऽ मिलने दी कगार पर आई पुज्जा।

०००

थान रजौरी

बड्डाहल देवता

राजौरी दे बड्डाहल ग्रां च देवता दा स्थान ऐ। जित्थें देवता दा देहरा बने दा ऐ ते उसदे अन्दर पत्थर दी मूर्ति ऐ। इत्थूं दे लोक इनेंगी अपना देवता मनदे न ते सारे जाति दे लोक इत्थें पूजा करदे न। शुक्लपक्ष दे बुधवार भक्त इत्थें दर्शनें गितै औंदे न। हर शनि ते ऐतवार बी लोक इत्थें किट्ठे होंदे न ते देवता अगें सीस झकांदे न। इत्थें बरे च इक बारी जातर ते हवन यज्ञ बी कीता जंदा ऐ। लोक विश्वास ऐ जे देवता अपने भक्तें दा हर कष्ट दूर करदे न ते सुख समृद्धि दिंदे न।

०००

शान रजौरी

मणिमल्ल देवता

इस देवता दा स्थान रजौरी दे चन्नी परात ग्रां च स्थित ऐ। मणिमल्ल देवता गी इत्थूं दा सब्भनें थमां बड्डा देवता मन्नेया जंदा ऐ। लोकें दा मन्नना ऐ जे इस देवता दा राज इत्थूं दे बाकी देवतायें पर बी ऐ ते कोई बी देवता इंदा हुकम नेई नकारी सकदा। ते मणिमल्ल देवता दा गै हुक्म ऐ जे कोई बी देवता कालीधार थमां खल्ल नेई गेआ। इत्थें लोक अपनी सुक्खन करन औंदे न ते फी मनें दी मुराद मिलने पर इत्थें जरूर मत्था टेकन औंदे न। लोकें दा इस थाहरा पर अनत्तुट्ट भरोसा ऐ।

०००

थान रजौरी

सुमाड़ देवता

सुमाड़ देवता दा थान रजौरी दे बड्डहाल ग्रां च स्थित ऐ। इस देवता गी इयां ते सारे लोक इत्थें मनदे न पर खास करी करसान इस देवता दी मान्यता करदे न। कीजे उंदा गलाना ऐ इयै देवता इत्थूं दी फसलें दा रखवाला ऐ जेकर देवता खुश होए तां मौके सिर बरखा होंदी ऐ। फसल गी नश्ट करने आह्ला तूफान नेई चलदा, ऐन आदि थमां बी इयै देवता फसल गी बचांदा ऐ ते फसल नरोई ते मती हुंदी ऐ। इत्थें बकरे दी बलि बी दित्ती जंदी ऐ। एह् बलि ऐतवारें पंचमी आहले रोज दित्ती जंदी ऐ।

०००

देवी मंदर रजौरी

देवीमंदर

एह गुफा मंदर कालाकोट ततापानी दे पराणु ग्रां च इक नाले कंदे बराजमान ऐ। इत्थें देवी दी पिंडी स्थापित ऐ। इत्थें लोक बडे श्रद्धाभाव कन्नै औंदे न। इस थाहरा दी लोकप्रियता सिर्फ इत्थूं दे लोकें च ऐ। अजें इत्थें बाहरा थमां भक्त नेई औंदे। एह मंदर इक सधारण जनेही गुफा अंदर ऐ। इसलै इत्थें भामें आले दुआले दे लोक गै औंदे न पर हून ततापानी पंचायत इस देवी स्थान दा विकास करने च हिले करा करदी ऐ।

०००

पुंछ परनोत्स

एह् एतिहासिक नगर पुंछ उपनदी ते नाला बेतार दे संगम आहले थाहर पर बस्से दा ऐ। एह् जम्मू थमां 248 किलोमीटर दूर ऐ। अस जेकर भगौलिक नजर कन्नै दिक्खचै तां एह् थाहर उतर च जिला बारामूला, पूर्व च रजौरी कोल ऐ।

इस थाहरा दे नां बारै विदवानें दे केई मत न। खुशदेव मैनी हुंदे मताबक इस नगर दी संस्थापना कश्यप ऋषि दे भ्रा पुलस्त्य ऋषि ने कीती। उसदे नां पर गै पुलस्तय, पुलसत, प्रोनस्त जां प्रोनस विकसित हौआ। इक दंद कथा मताबक कश्मीर दे राजा पुरुषसेन ने इस थाहरा दी स्थापना कीती। डॉ० सुखदेव सिंह चाड़क हुंदे मताबक इस थाहरा दा आदि नांऽ प्रस्त हा। प्रस्त थमां प्रोनस ते प्रोनस थमां पुंछ बनी गेआ। इक होर दंद कथा मताबक लोहर कोट दे कुसै राजा ने 'पुंछा' नांऽ दी कुड़ी कन्नै ब्याह कीता जेह्डी उत्थूं दी रौहने आहली ही उससै रानी दे नांऽ पर पुंछ नगर बसाया गेआ।

इनें सभनें मतें दा अध्ययन करने पर निष्कर्ष एह् निकलदा ऐ जे इस थाहरा दा आदि नांऽ परनोत्स जां प्रोनस हा। अज्ज बी कश्मीरी च पुंछ गी प्रोनस आक्खदे न।

०००

थान रजौरी

लोहरा नाग

लोहरा नाग दा थान पुंछ दे मेंढर थाहरा पर ऐ। इस देवता गी पुंछ दा रक्षक देवता मन्नेया जंदा हा। पुंछ दी समृद्धि ते सुख दा देवता लोहरा नाग सब्भने दी आस्था दा केन्द्र हा। लोक बडे आदर कन्नै उंदे थान पर मत्था टेकदे न। अज्ज स्थिती इत्थें किश होर जनेही ऐ पैहले आंहगर लोके दी भीड़ भामें इत्थें नेई होंदी पर फी बी मते लोक इत्थें नतमस्तक बी होंदे न। केई इतिहासकार लोहरा नाग गी राजा बी मनदे न। उंदा मनना ऐ जे लोहर कोट दी स्थापना इस्सै राजा ने वर्तमान पुंछ च कीती। के० डी० मैनी होंदे मताबक नाग राज वंशावली च लोहरा दा नां बी मजूद ऐ।

०००

ग्यारहवां ध्याऽ

जिला पुंछ दे धार्मिक ते सांस्कृतिक थाहर

पुंछ मंदर

मां काली मंदर

इस मंदर गी राजा मोती सिंह दे राज मौके बनाया गेआ की जे मोती सिंह आपूं मां काली दे परम भगत हे। इस मंदर गी सिद्ध मंदर मन्नेआ जंदा हे। इत्थें केई साधु महात्मायें सिद्धी प्राप्त कीती। महात्मा बिंदा ते बाबा नाथ ने बी इत्थूं गै सिद्धी प्राप्त कीती ही। एह मंदर केई बारी नश्ट हौआ ते इसगी केई बारी बनाया गेआ। वर्तमान मजूद मंदर गी बनाने दा श्रेय डोगरा राजें गी हासल ऐ। एह मंदर, बीह् मीटर उच्चा ऐ ते आर्य शिखर शैली दा मंदर ऐ। मां काली जि'नेंगी जित्त दा प्रतीक मन्नेया जंदा ऐ उंदी पवित्र मूर्ति मंदर अंदर स्थापित ऐ।

इस मंदर दी बनावट बड़ी मनमोहनी ऐ। मंदरे दी डयोढी पर दो शेरे दियां मूर्ता बनी दियां न। बेहड़े च इक खूह ऐ जित्थूं लोक पानी भरदे न। उयां ते इत्थें भगत म्हेशां दर्शनें गितै औंदे न पर मंगलवारें इत्थें भगतें दी खास भीड़ होंदी ऐ।

मंदर दे शुरुआती समें च इत्थूं दे पजारी काहन चंद जी हे पर इत्थें किश समां गजारने परेंत ओह गै उठी ते फी पंत प्रभदयाल जी ने मंदरे दी जिम्मेदारी सम्भाली।

मंदर दी अज्ज बी लोकें च बड़ी म्हता ऐ।

०००

पुंछ मंदर

शिवखोड़ी मंदर

भारत पाकिस्तान बश्कार जदू 19 सौ 71 दी लड़ाई होंदी तां फौजा गी शिवखोड़ी दी फ्हाडियें पर पेजने दा कम्म शुरू कीता गोआ।

फ्हाड़ी पर जाने दा अदू कोई रस्ता नेई हा बने दा। फौज गी उत्थें जाने ते लोड़चदा समान पजाने लेई शिड़क बनानी ही इसकरी कम्म शुरू कीता गोआ। किश दिन ते कम्म ठीक चलेया पर जिसलै फौज अगें पुज्जी तां उत्थें बेशुमार नाग निकलने शुरू होई गै नेह् हलातें च कम्म करना फौजा लेई मुश्कल होई गोआ। इक रातीं उत्थें तैनात फौजा दे इन्फैंट्री ब्रिगेड कमांडर नाटो गी सुखना आया जे इस थाहर शिव दा स्थान ऐ मंदर बनाओ तां में तुसेंगी अगें बधन देड। एह् ओह् थाहर ही जित्थें अज्ज मंदर ऐ। जिसलै बड्डलै कमांडर उस थाहर गै तां उनेंगी सुखने च लब्भी दी थाहर ते नशान पंछाना च आई गै। उनें फौजा गी उत्थूं चट्टान त्रोटने दा हुक्म दिता तां उत्थें उनेंगी नाग देवता दे दर्शन होए ते उत्थूं जलधार बी निकली। पंत ने उत्थें मैत्र पढ़े ते पूजा आदि कीती ते मंदर बनाने दा कम्म शुरू हौआ। कम्म करदे होई इत्थें गै केई शिवलिंग नजरी आए। इक निक्का जनैहा मंदर बनी गोआ तां इत्थें अखंड जोत जलाई गेई जेहडी अज्ज बी जगा करदी ऐ। इसदे परैन्त 19 सौ 93 गी इत्थें नमां मंदर बनाया गोआ जिस च ब्रिगेडियर पी० एन० राव ते इत्थूं दे लोके दे सैहजोग कन्नै कम्म कीता ते फी जोधपुर थमां शिवलिंग ते नंदी दी मूर्ति आहन्नी स्थापित कीती गेई।

शिवरात्रि गी इत्थें बडी रौनक हुंदी ऐ लोक शिवपार्वती दी पूजा अर्चना करदे न ते फौज बी इत्थें अपना पूरा जोगदान दिंदी ऐ।

०००

पुंछ मंदर

बाबा बुड्ढा अमरनाथ




बाबा बुड्ढा अमरनाथ दा पवित्र मंदर पुंछ थमां 28 किलोमीटर दूर राजपुर मंडी च स्थित ऐ। इत्थें उयां ते बरा भर लोग दर्शनें गितै औंदे न पर रक्खड़ी दे तेहार पर पुन्छ दे दशनामी अखाड़ा थमां छड़ी यात्रा निकलदी ऐ जिस च मुख् भरा थमां भक्त इस यात्रा च शामिल होंदे न। अमरनाथ यात्रा परैन्त भक्त इत्थें औना लाजमी मनदे न। लोक विश्वास ऐ जे अमरनाथ दी यात्रा इत्थें दर्शन करने परैन्त गै पूरी होंदी ऐ। इस थाहरा गी इसकरी बी पवित्र मनदे न की जे इत्थें नाला गागरी ते पुलस्त नदी दा संगम ऐ।

पैहले ते एह मंदर निक्का गै हा पर हून इसदा परतियै निर्माण होने परैन्त इसदा अकार बड्ढा होई गोदा ऐ। इस थाहरा पर पराने मंदर दे अवशेष बी नजरी औंदे न। पुंछ दे डोगरा राजे दे राज मौके इस थाहरा दा खास म्हत्व हा।

इस मंदर बारे केई मत न। इक कथा मताबक रावण दे दादा पुलस्त ऋषि जेहड़े हर बरें अमरनाथ जंदे हे पर जिसलै ओह बजुर्ग होई गै तां ओह दर्शन करन नेई जाई सके तां भगवान आपूं इस थाहर प्रगट होई गै ते उनेंगी दर्शन दित्ते। एह थाहर उंदी तपोभूमि मन्नी जंदी ऐ।

लोरन दी महारानी दी कथा मताबक इक बारी उंदे ठीक नेई होने कारण ओह अमरनाथ नेई जाई सकी जिस करी उंदा मन बड़ा दोआस होई गेआ ते ओह व्रत रखी तपस्या च लीन होई गेईयां। केई चिरै उनेंगी इक बुड्ढे साधु ने महारानी चंद्रिका गी दर्शन दिते ते उनेंगी सनाया जे लोरन कोल मंडी थाहरा पर पुलस्त नदी दे कंडै श्री अमरनाथ महादेव जी दे दर्शन तुस करी सकदियां ओ। रानी बड़ी खुश होई ते अपने दास ते लोकें दे कन्नै-कन्नै उस साधु दे पिच्छें-पिच्छें उर्थें पुज्जी तां साधु उर्थूं गुम होई गेआ। सब्भने गी जकीन होई गेआ जे आपूं साक्षात शिवजी हे। उस थाहरा पर साफ सफाई करांदे होई उर्थूं चट्टान थमां संगमरमर दा शिवलिंग प्रगट हौआ। उस मौके थमां गै इस पवित्र स्थान गी बुड्ढा अमरनाथ बाबा चट्टानी दे नां कन्नै कुआलेया गेआ।



इस थाहरा दी आस्था सिर्फ हिंदू लोकें च गै नेई बल्कि इर्थूं दे मुसलमान ते सिख समुदाय च बी ऐ। ओह लोक इर्थें पानी दी छबीलां ते लंगर लाई भक्तें दी सेवा करदे न। बी० एस० एफ. इस थाहरा दा रख-रखा बड़ी मुस्तैदी कन्नै करदी ऐ।

०००

पुंछ मंदर

दशनामी अखाड़ा



एह थाहर पुंछ दे दक्खन च फुहारा बागै दे पार मजुद ऐ। इस थाहरा पर सिर्फ घना जंगल हा ते इत्थें इक बारी इक साधु रौंहदा हा जेहडा म्हेशा अपनी पाठ पूजा च मग्न रौंहदा। इक बारी साधु अपने ध्यान च मग्न हा तां उत्थूं दा राजा रुस्तम खान लंघेआ ते ओह साधु हुंदे कोल अर्शीवाद लेन आई गेआ। रुस्तम अजें राजा नेई हा पर गद्दी दा दावेदार जरूर हा। साधु ने उनेंगी अर्शीवाद दित्ता जे ओह तौले गै पुंछ दे राज-तख्त पर बराजमान होग। किश चिरै परैन्त ऐसे हलात बने जे रुस्तम खान पुंछ दा राजा बनी गेआ। राजा बनने परैन्त रुस्तम खान साधु दी सेवा च हाजर हौआ ते उत्थें इक मंदर बनवाया ते इक जगीर उनेंगी भेंट च दित्ती। उसदै परैन्त इस मंदर गी दशनामी अखाड़ा आक्खेया जान लगी पेआ। डोगरा राजकाल च 1850 ई० थमां 1940 ई० तगर इस अखाड़े दे स्वामी गी पुंछ दे राजगुरु दी उपाधि हासल ही ते राजा गी इत्थें गै राजतिलक दित्ता जंदा हा। इत्थें इक बडा बड्डा हाल ऐ जित्थें हनुमान

जी दी प्राचीन मूर्ति स्थापत ऐ। कोल गै इक शिवमंदर ऐ जित्थूं रक्खड़ी पर
छड़ी मुबारक दा जलुस कड्ढेआ जंदा ऐ जेहड़ा बुड्ढे अमरनाथ तगर जंदा
ऐ। इत्थें बसाखी गी बी मेला लगदा ऐ। पुंछ दे लोकेँ गी इस थाहरा लेई बडी
आस्था ऐ ओह इत्थें पूजा पाठ लेई औंदे न। पुंछ च एह पैह्ला मंदर ऐ जेहड़ा
मुसलमाने दे राज च बनाया गेआ हा ते इसदी सांभ संभाल दी जिम्मेदारी बी
ओह आपूं संभालदे हे।

०००

पुंछ थान

सन्दुला नाग

जिला पुंछ च मजुद ग्रां निक्कियां च सन्दुला नाग देवता दा पवित्र थान ऐ। इस देवता गी ग्रां दे लोक बडी आस्था कन्नै पुजदे न। आले दुआले दे ग्रां दे लोक बी इत्थें मत्था टेकन औंदे न ते इस धार्मिक थाहरा पर विश्वास रक्खदे न। इस देवता गी लोक डंगरे दा रक्षक, करसान खेती बाड़ी च बाद्धा करने आह्ला, ते लोक बाल बच्चे दी सेहत, सदबुद्धि, ते बोध वकास बख्खाने आह्ला देवता मनदे न। हर शुभ कम्म ते ब्याह आदि पर बी लोक इत्थें मत्था टेकन जंदे न। लोके दा एह बी मनना ऐ जे ग्रां च कोई बी मसीबत नेई औंदी जेकर देवता खुश होऐ।

०००

पुंछ मंदर

राम कुंड मंदर



रामकुंड मंदर पुंछ जिले दा प्राचीन मंदर ऐ। इस मंदर गी राजा ललित दित्य ने बनवाया हा। एह मंदर पुंछ थमां 62 किलोमीटर दूर मेंढर तसील दे ग्रां नरोल च स्थित ऐ। लोके दा मनना जे इक बारी राजा ललित दित्य अपने घोड़े पर मंदर आहले थाहरा पर शकार खेढ़न गेदा हा तां उसनै दऊ कुडियें गी दिक्खेया, इक नच्चा करदी ही ते दूई गा करदी ही ते गीत खत्म होंदे गै कुडियां उत्थूआं मत्था टेकी लोप होई गेईयां। राजा बडा हरान होई गेआ ते ओह रोजे उत्थें जान लगी पेआ ते उयै नजारा रोज दिक्खी उसदे मना च जिज्ञासा जागी।

उनें कुडियें कोल जाई इक दिन इत्थें नच्चने गाने दा कारण पुच्छेया तां उनें सनाया जे ओह देवदासियां न ते अपनी मां ते दादी दे गलाने पर इत्थें रोज औंदियां न पर इसदा कारण उनेंगी बी नेई पता। राजे गी बडी हैरानी होई ते अगले दिन इस थाहरा बारै जानने लेई उसनै सारी जगह खुदाई करवाई ते इत्थूं थमां दऊं मंदरें दे अवशेष मिले जिंदे दरोआजे बंद हे। राजा ने दरोआजे खुलवाये तां उत्थूं दो मूर्तियां निकली पेईयां। आखदे न जे एह मूर्तियां भगवान

राम लक्ष्मण ने अपने बनवास मौके बनाईयां हियां। ललित दित्य ने एह मूर्तियां अपने कन्नै लेईयां जिंदे चा इक अपने जन्म स्थान परिहासपुरा कश्मीर च विष्णु परिहास मंदर च स्थापित कीती ते दूई उसदी रानी ने चकरेश्वरी मंदर च स्थापत करवाई। राजा ने फी इस मंदर दा पुर्ननिर्माण करवाया। इस थाहरा गी राजा ने पूरी धार्मिक म्हता प्रदान करवाई। इसलै इत्थें त्रै कुंड मजुद न जिंदा नां रामकुंड, लक्ष्मण कुंड ते सीता कुंड ऐ। इनें कुंडे दी वनावट ऐसी ऐ जे इत्थें चश्में दा पानी पैहले रामकुंड च पौंदा ऐ फी लक्ष्मण ते सीता कुंड च जिसलै एह त्रैवे भरोची जंदे तां पानी नाले च जाई पौंदा ऐ। हर बरे चैत्र म्हीने दी चौद्हा तरीक इत्थें चैत्र चौदेआ दा मेला लगदा ऐ जित्थें रजौरी पुंछ थमां मती गिनतरी च लोक औंदे न ते इत्थें स्नान करी भजन कीर्तन करदे न।

०००

पुंछ मंदर

लोहड़ देवता

लोहड़ देवता दा थान पुंछ थमां 25 किलोमीटर दक्खन पूर्व मेंढर पाससै कृष्णा घाटी कोल पौंदा ऐ। एह पुंछ दे रौहने आहले किश लोकें दा देवता ऐ। फौजा दे कृष्णा घाटी ब्रिगेड थमां होईयै लोक इत्थें जाई सकदे न। फौज होने करी लोकें दा रोज इत्थें औना जाना मनासब नेई पर हर बरे बुध पुन्नेया गी लोक इत्थें जंदे न ते सेना इंदा साथ दिंदी ऐ। उस रोज मती गिनतरी च लोक इत्थें औंदे न। फ्हाड़ी दे उप्पर इत्थें पानी दा इक स्रोता ऐ जित्थूं आले-दुआले दे लाके गी पानी सप्लाई बी कीता जंदा ऐ। लोक इस थाहर बड़ी आस्था कन्नै औंदे न सिर्फ हिन्दू गै नेई सिख ते मुसलमान बी शिरक्त करदे न। फौज बी इस दिन लोड़चदे इंतजाम करदी ऐ।

०००

पुंछ मंदर

सखी मदान मंदर

एह प्राचीन ते इतिहासक मंदर जिला पुंछ दे मेंढर च स्थित ऐ। इत्थें इक मदान ऐ ते इक चबूतरा बने दा ऐ इयां बझोंदा ऐ जे इस चबूतरे पर गै मंदर बने दा हा। इसदे कोल होर निक्के मंदरें दियां त्रुट्टी दियां कथां इस बारै कहानी कहानी ब्यान करदियां न। इत्थें खिल्लरे दा मलवा नशानदेही करदा ऐ जे इत्थें इक भव्य मंदर हा। इसलै इत्थें कुसा बी देवते दी मूर्ति नेई ऐ। पता लगने दा कोई नशान नेई नजरी औंदा जे एह मंदर कुस देवता दा हा पर इत्थूं दे लोक इसगी शिव मंदर मनदे न। विदवान पी० के० कौल हुंदे मताबक एह इक बौद्ध भवन हा। डॉ० कौल दे मतानुसार मेनानडर ने अपने नांऽ पर इत्थें इक बौद्ध विहार बनवाया हा। उस्सै दे नांऽ पर इस थाहरा दा नां मेनानडर रखेया जिसदा विकृत रूप मेंढर होई गेआ। जम्मू कश्मीर रियासत दे पुरातत्व मैहकमें दी सर्वे रिपोर्ट मताबक एह मंदर दसमीं सदी च बनाया गेदा ऐ।

०००